


Xtidxcoob Dios ni  
biädinä dad Jesucrist



New Testament in Zapotec, Mitla (MX:zaw:Zapotec, Mitla)

# **Xtidxcoob Dios ni biädñä dad Jesucrist**

## **New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

### **Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
5cff1274-8dc3-5398-a94d-f6033bb363c9

## Contents

San Mateo . . . . .	1
San Marcos . . . . .	43
San Lucas . . . . .	70
San Juan . . . . .	115
Hechos . . . . .	148
Romanos . . . . .	190
1 Corintios . . . . .	207
2 Corintios . . . . .	223
Gálatas . . . . .	233
Efesios . . . . .	239
Filipenses . . . . .	245
Colosenses . . . . .	249
1 Tesalonicenses . . . . .	253
2 Tesalonicenses . . . . .	257
1 Timoteo . . . . .	259
2 Timoteo . . . . .	264
Tito . . . . .	267
Filemón . . . . .	269
Hebreos . . . . .	270
Santiago . . . . .	282
1 Pedro . . . . .	287
2 Pedro . . . . .	292
1 Juan . . . . .	295
2 Juan . . . . .	300
3 Juan . . . . .	301
Judas . . . . .	302
Apocalipsis . . . . .	304

## Guijtz Ni Bacuaa Mateo

### *Retoxpengoldoo Jesucrist*

(Lc. 3:23-38)

- <sup>1</sup> Guijtz ni rusule' laj retoxpengoldoo xten Jesucrist xi'n toDavid, xi'n toAbraham.
- <sup>2</sup> Abraham gujc xtdad Isaac, Isaac gujc xtdad Jacob, Jacob gujc xtdad Judá con rebejtzni.
- <sup>3</sup> Judá con Tamar gujc xczuzajn Fares con Zara. Fares gujc xtdad Esrom, Esrom gujc xtdad Aram.
- <sup>4</sup> Aram gujc xtdad Aminadab. Aminadab gujc xtdad Naasón. Naasón gujc xtdad Salmón.
- <sup>5</sup> Salmón con Rahab gujc xczuzajn Booz. Booz con Rut gujc xczuzajn Obed. Obed gujc xtdad Isai.
- <sup>6</sup> Isai gujc xtdad reii David. David con nani gujc cháäl Urías gujc xczuzajn Salomón.
- <sup>7</sup> Salomón gujc xtdad Roboam. Roboam gujc xtdad Abías. Abías gujc xtdad Asa.
- <sup>8</sup> Asa gujc xtdad Josafat. Josafat gujc xtdad Joram. Joram gujc xtdad Uzias.
- <sup>9</sup> Uzias gujc xtdad Jotam. Jotam gujc xtdad Acáz. Acáz gujc xtdad Ezequías.
- <sup>10</sup> Ezequías gujc xtdad Manasés. Manasés gujc xtdad Amón. Amón gujc xtdad Josías.
- <sup>11</sup> Josías gujc xtdad Jeconías con rebetzni cheni huij reben Israel pres lo guedx Babilonia.
- <sup>12</sup> Che gudejd huij rebejnnga pres Babilonia, dxejc guyu' xi'n Jeconías, Salatiel. Salatiel gujc xtdad Zorobabel.
- <sup>13</sup> Zorobabel gujc xtdad Abiud. Abiud gujc xtdad Eliaquim. Eliaquim gujc xtdad Azor.
- <sup>14</sup> Azor gujc xtdad Sadoc. Sadoc gujc xtdad Aquim. Aquim gujc xtdad Eliud.
- <sup>15</sup> Eliud gujc xtdad Eleazar. Eleazar gujc xtdad Matán. Matán gujc xtdad Jacob.
- <sup>16</sup> Jacob gujc xtdad José cháäl Marii nani gujc xnán Jesús ni birilaj Crist.
- <sup>17</sup> Ni'cni gujc tzudaj xfamil' reni agudejd gubi' reni lo guedxliujre che gubajñli toAbram cheni gubajñliza toreii David. Tzudajza rexagdoo najc reni gudejd cheni gubajñli toDavid cheni huijli reben Israel pres Babilonia. Stzudaj rexagdoo najc reni gudejd cheni birilireni pres Babilonia che gojlli Crist.

### *Cheni gojl Jesucrist*

(Lc. 2:1-7)

- <sup>18</sup> Scree gujc cheni gojl Jesucrist. Abia'n xnanni, Marii, diidx guchnaani José ni gac cháäl ni. Per ansde xca' sa'reni, Marii agac nuxi'nni sa'csi biääd Sprit Dxan xten Dios lojni.
- <sup>19</sup> José com najcni te beñsa'c, di rlanjni nuro'nni Marii nez loj rebejn te niacbeereni, ni'c bejn ni xhigab Guronxhiga'tzni Marii.
- <sup>20</sup> Xhigabga cayujñni cheni baluiloj te xangl Dios lojni, lo bacal räjpni lojni:  
— José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxan xten Dios.
- <sup>21</sup> Che gaal xi'nni cuälajluni Jesús sa'csi laani guslaani rexpejn ni lo rextoljreni.
- <sup>22</sup> Guiraa redee gujc si'c te guzobj diidx ni gunii tej ni bacuaa xtdix Dios. Räjpni:
- <sup>23</sup> Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajñ con nuure).
- <sup>24</sup> Che gubajñ José lo bacal, bejn ni si'cni räjp xangl Dad lojni. Cua'ni Marii gujc cháäl ni.
- <sup>25</sup> Luxh dini niembeen si'c cháäl ni dxejli cheni gudejd gojl xingangalojni ni gulälajni Jesús.

## 2

### *Che biädhuii reben nanduxh ni laa remagos lojni*

- <sup>1</sup> Cheni gojl Jesús neñ guedx Belén xten guedx Judea, najc Herodes reii xten guedx Judea. Dxejc bidzujñ reben najn ni najc remagos, siäädreni nejz cadro rliejn gubijdx, bidzujñreni guedx Jerusalén.
- <sup>2</sup> Rniabdiidxreni:  
— ¿Con reii xten reben Israel nani golgaj, ä? Nurnu abihuiinu xpajl ni laadxlinu, ni'cni siopdonnuni.
- <sup>3</sup> Che bejn diajg reii Herodes diidxga, guyuduxhni yärsia' nájza guiraa reben Jerusalén.
- <sup>4</sup> Dxejcti batie'ni guiraa rebixhojzro ni rnibee loj rebixhojz, nájza guiraa renani ruluii xleii Moisés lo rebejn te gunabdiidxni lojreni:  
— ¿Caro gaal Crist?
- <sup>5</sup> Laareni räjpreni:  
— Neñ guedx Belén xten guedx Judea sa'csi si'c gunii niguii ni bacuaa xtdix Dios che räjpni:

<sup>6</sup> Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neŋ guejdxre guirii tej nani guinibee, te ni ga'p rexpenä Israel.

<sup>7</sup> Dxejcti guredx-xhiga'tz Herodes remagos te gunabdiidxni gucti biricaj bajl nani bahui-ireni.

<sup>8</sup> Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jädniitu loä te näjza narä chaganäni.

<sup>9</sup> Che biejn diajgreni xtidx reii, sä'tireni. Bajl nani bahuiireni lagajc lajdxreni lahtis nijdñi lojreni. Che bidzujñireni cadro yu' bázga, dxejcro guzobdx bajlga.

<sup>10</sup> Che bahuii remagos loj bajlga, rbalazduxhrenei.

<sup>11</sup> Si'c bidzujñireni. Che biu'reni neŋ yu', bahuiireni lo bázga con xnanni Marii. Dxejcti bazuxhijbreni, gojñreni bázga, baxhalreni rexcäl'nasa'creni bazalajzreni oor, näjza yaal näjza yalnejxh.

<sup>12</sup> Che agojl guibi'reni, gunixcäl'reni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

### *Che siini Egipto*

<sup>13</sup> Che sii remagos lajdxreni, biääd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinärenei Egipto. Ro'c guläjz che guiniäli lojlu. Siguilil Herodes biuxe're sa'csi rlajzni ju'tnini.

<sup>14</sup> Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto.

<sup>15</sup> Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

### *Che guinibee Herodes gujt rebixbáz*

<sup>16</sup> Che gucbee Herodes abasguee remagosni, bidxechduxhni. Gunibeeni guet guiraa rebixniguii ni yu' tio'p ijz näjza rebixue' ni yu' guxiiru dxej, guideb neŋ guedx Belén näjza reguejdx ni re' gabiga, si'cti redxej ni räjp remagos lojni.

<sup>17</sup> Dxejc guzobj diidx ni bacuaa Jeremias ni gunii xtidx Dios che räjpni:

<sup>18</sup> Biejn xse' bejn neŋ guedx Ramä, te yälhuinduxh, te yälrbedxij, yälrbedxneŋ: laa Raquel ni roon yejc rexi'nni.

Naaddini jääl lajzni sa'csi agujt rexi'nni.

<sup>19</sup> Cheni gujt Herodes, dxejc lo te bacal huiluiloj xangl Dios loj José neŋ Egipto.

<sup>20</sup> Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlajz ju't biuxe're.

<sup>21</sup> Dxejcti huistie José, cua'ni biuxe' näjza xnanni. Gubi'reni Israel.

<sup>22</sup> Luxh che biejn diajgri rñibee Arquelao guejdx Judea lacuaa Herodes, xtdani, bidxejbn nuini ro'c. Dxejc gunisac Dios lojni loj te bacal, ni'c huijni lo reguejdx xten Galilee.

<sup>23</sup> Dxejc biädäljzni neŋ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

## 3

### *Juan Bautist basule' xtidx Dios loj rebejn*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Neŋ redxejga biääd Juan Bautist lo reyubijdz xten guedx Judea, ro'c cagulijdxni,

<sup>2</sup> cayäjpni:

—Colgusiechlaztu rextojltu sa'csi xcäl'rñibee Dios abidzungajxhni.

<sup>3</sup> Juan najc nani basä't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

<sup>4</sup> Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh.

<sup>5</sup> Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadijgri xtiidxni.

<sup>6</sup> Che ruxhobdojl'reni xtoj'reni, rutiobnis Juanreni ro' gueu Jordán.

<sup>7</sup> Che bahuii siääd xhidajl reben guidoo ni najc refarisee näjza ni najc resaducee, rlajzreni gutiobnisnireni, räjpni lojreni:

—La'tu benguidduxh, najctu si'c bäl. ¿Chu balijdxtu guxuntu loj xcäl'rñix'e'ch Dios ni siääd?

<sup>8</sup> Colguibaŋsa'c si'cni nungäjil te fiipac rebejn guliipac abasiechlaztu.

<sup>9</sup> Na'c litis guntu xhigab naatu: “iNi nurnu najcnu rexagdoe toAbram!” Rniliä lojtu, sajc xca' Dios reguijre gunni gacreni rexi'n toAbram.

<sup>10</sup> Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni.

<sup>11</sup> Narä guliicani rustiobnisä con nis si'c te seen cheni abasiechljaztu, abaxhobdojltu. Niluxh nani siääd detzä sutiobnisni la'tu con Sprit Dxiän xten Dios näjza con guiboo. Rnibeeruni loä. Benšacduxhni. Nicla xcura'chni digacdi chanää.

<sup>12</sup> Aca'ni xhi cojn gusiani triuu xtenni te chuchee triuuga nen ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

*Che guobnis Jesús*

(Mr: 1:9-11; Lc. 3:21-22)

<sup>13</sup> Dxejc birii Jesús nez Galilee, bidzujñni ro' gueu Jordán cadro yu' Juan te gutiobnis Juanni.

<sup>14</sup> Niluxh naaddi Juan gutiobnis Jesús. Räj p Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

<sup>15</sup> Dxejc räj Jesús lojni:

—Basaan gacni si'c naj, sa'csi nanab gusoobnu guiraa ni rlazj Dios gac.

Dxejctiru batiobnis Juan Jesús.

<sup>16</sup> Cheni gulujx guobnis Jesús, birigajcni lo nis. Dxejc bixal xhaguibaa, bahuiini siädjajt Sprit Dxiän xten Dios si'c te palom, biäjtni lojni.

<sup>17</sup> Dxejc xhaguibaali biejn diajgreni te xse' ni räj p:

—Dee najc xi'nä ni sanälazä. Laani rbanälazä.

## 4

*Che huij Jesús lo reyubijdz*

(Mr: 1:12-13; Lc. 4:1-13)

<sup>1</sup> Dxejc bejn Sprit Dxiän xten Dios huij Jesús nez lo reyubijdz te nejzga nuhuał bendxab Jesús.

<sup>2</sup> Che gulujx bacua'n Jesús tiuu gubijdx, tiuu guxhijñ, gulaanni.

<sup>3</sup> Sas biääd bendxab lojni, räj pni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidxre lojni, räj pni:

—Loj reguijtz xten Dios caj scree: “Xhet ganaxdi yäłtxtiil guibajñ rebejn; sibajñzani con guiraa diidx nani rniü Dios.”

<sup>5</sup> Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejctu räj bendxab lojni:

<sup>6</sup> —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj; siliäsreni luj con naareni didi gacnaj ni'lu lo reguijga.

<sup>7</sup> Badzu' Jesús diidxre lojni, räj pni:

—Caj loj rexquijtz Dios: “Na'c fallu Dad ni najc Xtioslu.”

<sup>8</sup> Stee huält huinä bendxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcäl'nasa'creni.

<sup>9</sup> Dxejcti räj pni loj Jesús:

—Guiraa redee sunidxä lojlu palga guzuxhijblu nez loä te ganlu narä.

<sup>10</sup> Dxejcti räj Jesús lojni:

—iHuij nez rec bendxab! Scree caj loj rexquijtz Dios: “Dad Xtioslislu ganlu; lojtsni chulu.”

<sup>11</sup> Dxejcti gubicaj bendxab loj Jesús. Dxejc biääd rexangl Dios biähuiireni Jesús.

*Gusloj Jesús cayujñ txzuunni*

(Mr: 1:14-15; Lc. 4:14-15)

<sup>12</sup> Che biejn diajg Jesús yu' Juan nen ladzguuib, huijni nez Galilee.

<sup>13</sup> Dxejcti gudejñdi guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabalón con Neftalí.

<sup>14</sup> Si'c gujc te guzojb diidx ni bacuaa Isaiás ni gunii xtidx Dios:

<sup>15</sup> Lajdx Zabalón, lajdx Neftalí, nez yuj ni rij nez ro' nisdoe, stelaad gueu Jordán, Galilee cadro rbäjz rebejn nani di gac rexpen Israel.

<sup>16</sup> Rebejn nani rbäjz nen te yäl'cäjy abahuiireni te bajlga, luxh bajlga basaniñ xcäriejn renani nabajñ lo xcäl'rdxejb, lo xpalaa yäl'gujt.

<sup>17</sup> Dxejcli gusloj cagulijdx Jesús, räj pni:

—Colgusiejchljaztu, colguxhobdoj te guibañsa'ctu sa'csi abidzungenajxh xcäl'rnibee Dios.

*Che gurejdx Jesús tajp xpejn̄ni*  
(Mr. 1:16-20; Lc. 5:1-11)

<sup>18</sup> Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bāj, ni'c cacuaareni guijxh lo nisdoo.

<sup>19</sup> Dxejcti rāj̄p Jesús lojreni:

—Coltanajl narä. Naj riniiaaztu bāj, niluxh narä gunä cueedxtu rebejn.

<sup>20</sup> Lagajc dxejc basa'nreni xquijxhreni te sanajlreni laani.

<sup>21</sup> Che gudejdreni ro'c, bahuiini loj stio'p niguii, Jacoob con bejtzni Juan. Yu'reni neñ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

<sup>22</sup> Lagajc dxejc basa'nreni barcw nājza xtadreni te sanajlreni Jesús.

*Caguluii Jesús xhidajl bejn*  
(Lc. 6:17-19)

<sup>23</sup> Sasajti Jesús guideb nez región xten Galilee, caguluiini neñ tejga rexquidooreni. Cagusule'ni redidxcoob xten xcāl̄rnibee Dios. Cagusiajczani guiraa yāl̄racxhuu ni rajc rebejn guejdxga, guiraa yāl̄guijdx.

<sup>24</sup> Biejn diajg reben Siria diidx xcuent ni cayujn Jesús. Sas biādnāreni guiraa rebenracxhuu ni cayajc guiraloj yāl̄guijdx, yāl̄nayan; guiraa reni rajc yejcreni, guiraa reni rajc malyāl̄guijdx, reni rajc yāl̄guidxbej, guiraa reni abixu'n tiejxhreni. Dxejcti basiajc Jesús rebejnaga.

<sup>25</sup> Xhidalduxh beñ Galilee huinajl̄ni, nāj rebeñ reguedx Decápolis, nājza rebeñ guedx Jerusalén, nājza rebeñ Judea nājza rebejn ni tre' stelaad gueu Jordán.

## 5

*Yejc te daj̄n balijdx Jesucrist rebejn*

<sup>1</sup> Che bahuii Jesús loj rebeñ xhidajl, huä'pni yejc te daj̄n. Dxejcti gubig rexpejn̄ni ni gurejdxni lojni.

<sup>2</sup> Dxejc gusloj caguluii Jesús reni'c, scree rāj̄pni:

*Rebejn ni sibaalajz*  
(Lc. 6:20-23)

<sup>3</sup> —Sibaalajz rebejn nani nanchee rquinduxhreni xcāl̄racnāj Dios, sa'csi laareni nungāj̄lreni xcāl̄rnibee Dios.

<sup>4</sup> Sibaalajz rebejn nani rac-huin lajzreni xcuent rextoj̄lreni, sa'csi sudzucaj Dios xtoj̄lreni, susiāj̄l̄ni lajzreni.

<sup>5</sup> Sibaalajz rebejn nani nadolajz nani r̄lajz guntis si'cni rnibee Dios, sa'csi sacnāj Diosreni lo xcāl̄nabaj̄nreni lo guedxliujre.

<sup>6</sup> Sibaalajz rebejn ni nastoocanu rliaanreni, rioj̄lreni, sa'csi r̄lajzreni guibaṅsa'ctisreni nez loj Dios, sa'csi sudeed Dios lojreni guiraa ni rniabreni.

<sup>7</sup> Sibaalajz rebejn nani rulaslajz sa'reni, sa'csi sulaslajza Diosreni.

<sup>8</sup> Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

<sup>9</sup> Sibaalajz rebejn nani ruscuecdxilajz sabejn̄reni, sa'csi laareni sirilajreni rexi'n Dios.

<sup>10</sup> Sibaalajz rebejn nani rusutijp lajzreni che rusacsí bejn̄reni sa'csi nabaṅsa'creni nez loj Dios, sa'csi xtenreni najc xcāl̄rnibee Dios xhaguibaa.

<sup>11</sup> Col̄spaalajz̄tu che gusacsí bejn̄tu t̄l̄nāj̄reni la'tu, guiniireni guiraloj didx-xhii xcuent xtidxä.

<sup>12</sup> Col̄guibaalajz, col̄balajz sa'csi xhaguibaali sunidxduxh Dios xcuent xtzuuuntu. Sigajcza basacsíreni reniguii ni gubaj̄n galoo ni gunii xtidx Dios.

*La'tu najctu si'c sejd lo guedxliujre*  
(Mr. 9:50; Lc. 14:34-35)

<sup>13</sup> Rāj̄pzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejn̄ni dxejc? Susāj̄reni sejdga detz yu', sulāj̄ bejn̄ yejcn̄i.

<sup>14</sup> La'tu najctu si'c te bianij lo guedxliujre. Te guejdx nani tre' jiaa yejc te daj̄n, digacdi guiga'tzni.

<sup>15</sup> Digacdi xcaguij te bajl dxejcti jiäuuni neñ te caj. Maazru huen soobni jiaa neñ te gandilieer te gusānijni loj guiraa rebejn ni tre' neñ yu'.

<sup>16</sup> Xcāl̄nabaṅsa'ctu najc si'c te bajl loj rebeñ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

*Ruluii Jesús xcuent leii*

<sup>17</sup> Rāj̄pzani:

—Na'c guntu xhigab siädgudzucaä leii xten toMoisés, niclaza rediidx ni baluui redad ni gunii xtidx Dios. Xhet siäddzucaädini, narä siälä te guluiäpacni si'cni najcni.

<sup>18</sup> Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajjpac guiralii ni caj lo reguijtzga.

<sup>19</sup> Ni'cni chutis ni rlanj gusaan te diidx nani caj loj leii, mase te didxbäzni, luxh ruluuini gun bejn si'c, laani guxiduxh sajci lajdx Dios guibaa. Niluxh renani rucuadaiajg xtidx leii, luxh rujnpacreni si'cni caj lo leii, ruluizani leii, bensacduxh gacni lajdx Dios guibaa.

<sup>20</sup> Ni'cni rniä lojtu, palga ditu gusa'cru xtzun Dios, ditu guibansa'cru loj reni najn xcuent xleii toMoisés, näjza loj reben guidoo ni laa farisee, dipactu jiu' lajdx Dios xhaguibaa.

*Ruluui Jesús xcuent yärdxe'ch*

*(Lc. 12:57-59)*

<sup>21</sup> Räjzani:

—Abiejza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jäuuni nen latzguiib.”

<sup>22</sup> Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “benayälajz” sidejdni loj yälguxhtis xten Dios, sijni gabijl cadro cayejc guiboduxh.

<sup>23</sup> 'Che sanälu gojn guidoo te gusa'nlu ni lo bacuug, palga guinaj lajzlu yu' chu lo cadxe'chlu,

<sup>24</sup> basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

<sup>25</sup> 'Palga yu' chu rdxe'ch lojlu, basquejn basiäjl diidx con laani lagajc cheni sasanäjlni lonezyuj te di gutedni luj lo juejz. Luxh juejz suteedni luj loj reguixhajg te gusa'reni luj nen latzguiib.

<sup>26</sup> Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

*Ruluui Jesús xcuent yälrusquee sa'ni*

<sup>27</sup> Räjzani:

—Abiejn diajgtu guniireni galoo: “Na'c guesnäjtu gunaa nani di gac chäältu.”

<sup>28</sup> Narä rniä, chutis te nani fii loj te gunaa dxejcti guisia' lajzni gunaaga, abejnni dojl nen lastooni.

<sup>29</sup> Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl.

<sup>30</sup> Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

*Ruluui Jesús xcuent yälrur'o'n chää bejn*

*(Mt. 19:9; Mr. 10:11-12; Lc. 16:18)*

<sup>31</sup> Räjzani:

—Abiejn diajgtu guniireni galoo: “Chutis niguii ni rlanj guro'n chäälni, nanabtis gudeedni te guijtz nani rniä abaro'nni chäälni.”

<sup>32</sup> Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

*Ruluui Jesús xcuent che ria'n diidx*

<sup>33</sup> Räjzani:

—Abiejza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.”

<sup>34</sup> Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios,

<sup>35</sup> nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiro,

<sup>36</sup> niclaza por lagajc bituuejclu, sa'csi digacdi guncheelu te guichyas niclaza te guichnol, nicla tej guijch.

<sup>37</sup> Nanab guiniitisl: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

*Chanälajzni rebejn ni rdxe'ch lojni*

*(Lc. 6:29-30)*

<sup>38</sup> Räjzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.”

<sup>39</sup> Narä rniä, na'c tijnäjlu te bejn ni bejn te cos guidx lojlu. Palga chääzni ladbee lojlu badeed stelaad lojlu chääzni.



- <sup>40</sup> Palga yu' chu rlaɟz tɪl'näjlu te xca'ni xcamangwlu, badeedza näj xsa'cwlu lojni.
- <sup>41</sup> Palga yu' chu guinibee guulu xcargwɪni te kilómetro, huināni tio'p kilómetro.
- <sup>42</sup> Nani guiniab xhi guiniabxli'a'ni lojlu, badeedni. Nani guiniablaa xhi guinablaani lojlu na'c gudxoɲnluni lojni, na'c gāblu: "Xhetini."
- <sup>43</sup> Abiejn diajgtu gunii rebengool: "Cołchanälajz sa'tu. Colguidxe'ch loj renani rdxe'ch lojtu."
- <sup>44</sup> Narä rniä lojtu, cołchanälajz rebejn ni rdxe'ch lojtu. Benle' yejc reni rgue lojlu. Cołyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsıreni la'tu,
- <sup>45</sup> te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riajb nisguij lo rebensa'c sigajcza lo rebenguijdx.
- <sup>46</sup> Palga la'tu chanälajztu lagajctis rebejn nani rinälajz la'tu, çxhi gaan guntu dxejc? Najctu lagajc si'c najc rebejn ni rutie' meel ni rajx lo gubier.
- <sup>47</sup> Palga guiniitu: "Xchan", lagajctis loj resa'tu, çxhini'c rujntu ni najc hueenru lo chutis bejn? ÇLa et sigajcdiza rujn rebejn nani di gumbee Dios?
- <sup>48</sup> Colyajc beɲsa'c si'c ni najc xtadtu ni yu' xhaguibaa.

## 6

### *Rului Jesús xho gudeedni gojn*

- <sup>1</sup> Räjpszani:  
—Na'c gusäbdiidx guntu dzunsa'c nez loj rebejn te fitisireni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu.
- <sup>2</sup> Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neɲ reguidoo, näjza lad nezuyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni.
- <sup>3</sup> Luj che gudeedlu gojn xtenlu, na'c gacbee nicla tej xamiigwlu xhi badeedlu,
- <sup>4</sup> te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

### *Rului Jesucrist xho cueedx, guiniabni lo Dios (Lc. 11:2-4)*

- <sup>5</sup> Räjpszani:  
—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglaɟzreni rniabreni lo Dios rsiuliireni neɲ reyu' cadre riel xtidx Dios, näjza guiraa resquini, näjza nez ronejz te ruhuii rebejn xho rujnreni. Rniliäpac, acua'reni gaan xtenreni.
- <sup>6</sup> Naj luj cheni cueedx, guiniablu lo Dios, biu' neɲ xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.
- <sup>7</sup> Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios.
- <sup>8</sup> Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni.
- <sup>9</sup> Ni'cni scree colguini lo Dios:  
Xtadnu ni yu' xhaguibaa dxan najc lajlu.
- <sup>10</sup> Sujjääd xcäl'rniibeelu;  
bejn si'cni rlaɟzlu lo guedxliujre sigajc rujnlu xhaguibaa.
- <sup>11</sup> Nadxej baniidx xcu'nnu sa' ni rdaunu guira dxej.
- <sup>12</sup> Basiäj'lajzlu redoɲl xtenu si'c riäj'lajznu redoɲl xten rebejn ni rujn doɲl loonu.
- <sup>13</sup> Na'c gusaanlu jiaabnu xhigabguijdx,  
baslaa nuure lo doɲl,  
sa'csi xten guejblu najc yäl'rniabee, yäl'nadip näjza yälrdimbicha' par teɟpas.  
Sugacni si'c.
- <sup>14</sup> Palga la'tu gusiäj'lajzlu redoɲl ni rujn rebejn lojtu, xtadtu ni yu' xhaguibaa susiäj'lza laɟzni rextojltu.
- <sup>15</sup> Palga ditu gusiäj'lajzlu redoɲl ni rujn rebejn lojtu, sigajcza xtadnu ni yu' xhaguibaa di laɟzni jäj'lza rextojltu.

### *Rului Jesús xho gucua'n bejn*

- <sup>16</sup> Räjpszani:  
—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni.
- <sup>17</sup> Niluxh la'tu, che rucua'ntu, colcuɲ yejcti, colquiib lojtu

<sup>18</sup> te na'c gacbee rebejn cagucua'ntu, xtadtistu suhuui cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

*Yäl'nasa'c ni yu' xhaguibaa*  
(Lc. 12:33-34)

<sup>19</sup> Räjzpani:

—Na'c gapdajntu yäl'nasa'c lo guedxliujre cadro rajw reman o rribtiejn xhixtentu, niluxh richu' gubaan rolijz bejn te rbajnreni.

<sup>20</sup> Hueenru ga'ptu xcäl'nasa'ctu xhaguibaa cadro di reman gauu, diza rehxixtentu cuibtiejn, diza regubaan jiu' te cuanreni.

<sup>21</sup> Sa'csi cadro yu' xcäl'nasa'ctu, ro'cza naga' lastootu.

*Bianij xten tiejxhtu*  
(Lc. 11:34-36)

<sup>22</sup> Räjzpani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij.

<sup>23</sup> Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, ilinacäiboo najc guidebtu!

<sup>24</sup> 'Ni'cla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuum Dios palga caguuiltistu xcäl'nasa'ctu lo guedxliujre.

<sup>25</sup> 'Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, ni'claza naatu xhicha lajd gajcwtu. Yäl'nabajn sajcro lo yäl'rajw, luxh sajcro tiejxhtu lo xhajbtu.

<sup>26</sup> Col'huii remane' ni rtajt xhaguibaa. Direni cue'c binij, dizareni guilia' gäj, dizareni cuchee xhi gaureni neñ yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä?

<sup>27</sup> ¿Chu tej la'tu sa'csi ru'tu yärsia' sajz tiobrutu ste bo'c jiaaru?

<sup>28</sup> ¿Xhicuent runduxhtu xhigab xcuent xhajbtu? ¿Col'huii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni.

<sup>29</sup> Narä rniä lojtu, ni'clareñ Salomón guideb najcwni rexhabsa'c xtenti di nisiuchee si'c rsiuchee tej reguiiga.

<sup>30</sup> Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz?

<sup>31</sup> Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?”

<sup>32</sup> Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajjni xhini'c rquiintu.

<sup>33</sup> Col'quixgaa yäl'rnibee xten Dios näjza yäl'nabansa'c si'cni rlajz Dios dxejc sica'tu guiraa ni rquiintu.

<sup>34</sup> Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

## 7

*Na'c cubeetu sa'tu*  
(Lc. 6:37-38, 41-42)

<sup>1</sup> Räjzpani:

—Na'c cubeetu sa'tu te na'cza cubee Dios la'tu.

<sup>2</sup> Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutiehx Dios lojtu.

<sup>3</sup> ¿Xhicuent ruhuüilu loj guijxh ni yu' baloj sa'lu, luxh dilu fii yagro nani yu' lagajc balojlu?

<sup>4</sup> ¿Xhicuent gäblu lo sa'lu, nädoñnu cuää guijxh ni yu' neñ balojlu, luxh dilu fii loj yagro ni yu' neñ balojlu?

<sup>5</sup> Benguijdx ni rusguee, guläxgaa yagro ni yu' balojlu te gac fisa'clu te cuäalu guijxh nani yu' baloj sa'lu.

<sup>6</sup> Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najceni si'c cuch ni ruläj yejc xhitis xhi cos.

*Col'nab, col'quiiil, col'gusejz rolä'*  
(Lc. 11:9-13; 6:31)

<sup>7</sup> Räjzpani:

—Col'nab lo Dios te guniidxni nani rniabtu. Col'quiiilni te guidxäjltuni. Col'nii rolä', te guidxalni jiu'tu.

<sup>8</sup> Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenij lojni.

<sup>9</sup> '¿La yu' chu teju che guiniab xi'nni te yätxtiil, alga gudeedni te guij, ä?

<sup>10</sup> O palga guiniabni te la' bäjl, ¿la sudeedni te bäl?

<sup>11</sup> Palga la'tu ni najc beñ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

<sup>12</sup> 'Ni'cni guira'ti cos ni rlanjtu gunnäj beñ la'tu, sigajcza coljennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

*Rolä' xten yälñabajñ najc däa*

(Lc. 13:24)

<sup>13</sup> 'Coljiu' nez rolä' nani najc däa, sa'csi gulajg najc rolä', gulajg najcza nezyuj nani rinä beñ lo yälrunij, luxh xhidajlreni riu' nejzga.

<sup>14</sup> Sa'csi däa najc rolä', däaza najc nezyuj nani rinä beñ nez loj yälñabajñ, niluxh guxii najc renani rdxäl nezyujga.

*Ninexhsa'c ni rcaj loj te yajg rujñ gumbeeni yajgga*

(Lc. 6:43-44)

<sup>15</sup> Räjpzani:

—Colñatiro rebeñ nani rlanj gusguee la'tu. Rniisireni rusule'reni xtidx Dios. Rluuisi nadolajzreni si'c te xiil, niluxh direni gac. Alga si'c loob najczeni, rutie'chreni beñ si'c re'ch xiil che riädchu' loob lojreni.

<sup>16</sup> Dzuun nani rujñreni sujñ gumbeetureni. Anajntu di uub xcaj lo reyaguejch, diza iigw xcaj lo guechbiojb.

<sup>17</sup> 'Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c, ganax ninejxh ni di ganaxsa'c rcaj lojni.

<sup>18</sup> Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c.

<sup>19</sup> Guiraa reyajg nani di ninexhsa'c xcaj lojni, nanab guidinni te checni.

<sup>20</sup> Sigajcza sajç gumbeetu beñsa'c sa'csi rujñreni dzunsa'c.

*Xhet guiraadi beñ jiu' lo xcälñmibee Dios*

(Lc. 13:25-27)

<sup>21</sup> Räjpzani:

—Xhet guiraadi renani rnii, “Dad, Dad”, jiu' lo xcälñmibee Dios xhaguibaa. Ganaxtis renani rujñ si'cni rlanj Xtadä ni yu' xhaguibaa.

<sup>22</sup> Sidzujñ dxej sinii xhidajl beñ loä: “Dad, Dad, con lajlu basule'nu xtiidxlu, con lajzalu biläanu rebeñdxab, con lajzalu biennu remilagw.”

<sup>23</sup> Dxejç säpä lojreni: “Dina gumbeä la'tu. Colbicaj loä beñlatsiaj.”

*Tio'p cimient*

(Lc. 6:47-49; Mr. 1:22)

<sup>24</sup> Räjpzani:

—Chutis nani rucudajg diidx nani canä, luxh ruzoob xtidxä, laani najc si'c te beñsin nani basoob rolizni yejç te guilaj.

<sup>25</sup> Che biajb nisguij, biäjt nis gueuu, gubi' bej, bidinreni yejç yu'ga sas di yu'ga niajb sa'csi sojbni yejç guilajga.

<sup>26</sup> Nani rieñ diajgñi xtidxä, luxh dini guzoob xtidxä najc si'c te beñ gualajz nani basoob rolizni lo yujxh.

<sup>27</sup> Che biajb nisguij, biäjt nis gueuu, gubi' beduxh bidinreni yec yu'ga. Dxejç ligurebän yu'ga. Lacti xhiroob banijt beñjga.

<sup>28</sup> Che gulujx gunii Jesús rediidxga, lacti bidxeloj rebeñ rediidx ni baluini,

<sup>29</sup> sa'csi baluini rebeñ si'cpac te nani rnibee, xhet si'c ruluiidi rebeñ ni najñ leii.

## 8

*Rustajç Jesús te beñ ni rañ tiejxhni*

(Mr. 1:40-45; Lc. 5:12-16)

<sup>1</sup> Che biäjt Jesús yec dajñ, xhidajl beñ huinajlñi.

<sup>2</sup> Dxejcti biääd te beñracxhuu ni rañ tiejxhni nez loj Jesús. Bazuxhijbni, räjpnii:

—Dad, palga rlanjzlu, sajç gusajclu narä.

<sup>3</sup> Dxejcti basgaa Jesús ñaani, gudajñni dade'ga con ñaani, räjpnii:

—Rlazä jiajclu. Siajç tiejxhlu.

Lagajç dxejç gubicaç guejdx ni rañ tiejxhni.

<sup>4</sup> Dxejcti räjñ Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

*Rusiajc Jesús te xmos capitán roman*

(Lc. 7:1-10)

<sup>5</sup> Che biu' Jesús guedx Capernaum, bidzujñ te capitán roman nani rnibee te gayuu soldaad. Gunabduxhni lo Jesús,

<sup>6</sup> räjpni:

—Dad, xmosä naga' rolizä. Di gacdi guiniibni luxh cayanduxhni.

<sup>7</sup> Räjp Jesús:

—Do'o te gusiacäni.

<sup>8</sup> Dxejcti räjp capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajc xmosä.

<sup>9</sup> Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

<sup>10</sup> Che biejn diajg Jesús si'c, bidxeloduxhni, räjpni loj renani siädnajlni:

—Rniliäpac lojtu, nicla neñ guideb reguedx Israel dina nidxälä te bejn ni rililajz si'c rililajz dade're.

<sup>11</sup> Niluxh rniä, sirii xhidajl benzijt nez ladjiaa, nez ladjiaät, te jiädcuenäjreni Abram, Isaac, Jacob lajdx Dios xhaguibaa.

<sup>12</sup> Luxh rebeñ Israel nani niajc xi'n Dios sijreni te laad lo yälçäy cadro soonreni, sauya'reni läjyreni, sidejdtisreni trabajw par tejpas.

<sup>13</sup> Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga biajc xmosni.

*Rusiajc Jesús xnansuegr Pedr*

(Mr. 1:29-31; Lc. 4:38-39)

<sup>14</sup> Che bidzujñ Jesús rolijz Pedr, bahuini naga' xnansuegr Pedr, cayacxhuuni, yu'ni xliaa.

<sup>15</sup> Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

*Rusiajc Jesús xhidajl beñ racxhuu*

(Mr. 1:32-34; Lc. 4:40-41)

<sup>16</sup> Che biu' guxhijn, biädnäreni loj Jesús xhidajl bejn ni yu' rebeñdxab lostooreni; con xtiidxni gunibeeni birii guiraa rebeñdxabga. Basiajczani guiraa rebeñ racxhuu.

<sup>17</sup> Si'c bejnne te guzobj diidx ni bacuaa todad Isaiäs, ni gunii xtidx Dios, che räjpni: Lagajc laani cua'ni rexcälracxhuunu, sanäzani rexcälnayannu.

*Reni rlaiz ninajl Jesús*

(Lc. 9:57-62)

<sup>18</sup> Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexpajnpacni stelaad ro' nis.

<sup>19</sup> Dxejcti biääd te bennajn loj Jesús, räjpni:

—Mastr, sisiaäza cadrotis chäälü.

<sup>20</sup> Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xptiääzreni, niluxh narä Xi'n Dios ni gujc Niguii dina gapä cadro gaa yecä.

<sup>21</sup> Stee rexpajnpacni räjp lojni:

—Dad, basaan chaxgää ladxä te chacuatzá xtaädä.

<sup>22</sup> Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najceni beñdojl.

*Basiacdxl Jesús te beduxh*

(Mr. 4:35-41; Lc. 8:22-25)

<sup>23</sup> Che biu' Jesús neñ barcw, biu'za rexpajnpacni lagajc nenga.

<sup>24</sup> Dxejc huäjs te bedonduxh lo nisdoo. Lirusiääzni barcw neñ nisdoo. Luxh Jesús nagayejsni.

<sup>25</sup> Dxejcti huij rexpajnpacni huicuäänni, räjpreni:

—Dad, gucnäj nuure te di guetnu.

<sup>26</sup> Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej nájza lo nisdoo, te biacdxireni.

<sup>27</sup> Dxejcti bidxeloduxh rexpeljpacni, rájpreni:

—¿Chuni'c najc niguiire? ¡Ahuilaa xho rucuardiajg bej nájza nisdoo xtiidxni!

*Rebendxab ni yu' lajdx regadarenos*

(Mr. 5:1-20; Lc. 8:26-39)

<sup>28</sup> Che bidzujñ Jesús stelaad nisdoo cadro najc lajdx regadarenos, tio'p bejñ ni yu' bendxab lastooreni biächaglojreni Jesús. Rebejnga riireni neñ rebaa, nialazduxhrene, ni'cni rut rajcdi rdejd nezuyjga.

<sup>29</sup> Guredxa'reni rájpreni:

—¿Xhicuent siächu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad gal'di xor'nu, ä?

<sup>30</sup> Nez te laad, zijte' cadro suga'reni, cayajp bejñ xhidarlo cuch.

<sup>31</sup> Dxejcti gunab rebendxabga loj Jesús, rájpreni:

—Palga cuäälu nuure, basaan jiu'nu neñ recuchre.

<sup>32</sup> Dxejcti rájp Jesús:

—Cołcháj.

Dxejcti biriireni nen lastoo redade'ga, huichu'reni neñ recuchga. Dxejcti guiragajc recuchga caguxun'reni, huitejbreni ro' te guilaj, biääzreni neñ nisdoo, gujtjireni neñ nis.

<sup>33</sup> Rebejñ ni cayajp recuchga, baxun'reni, huijreni lajdxreni, huiyeireni diidx guiraa ni guzajczeni nájza ni guzajc redade' ni guyu' rebendxab lastooreni.

<sup>34</sup> Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

## 9

*Basiajc Jesús te bejñ nani abixu'n tiejxhni*

(Mr. 2:1-12; Lc. 5:17-26)

<sup>1</sup> Dxejcti biu' Jesús nen barcw. Gudejdni stelaad ro' nis te bidzujñni lajdxni.

<sup>2</sup> Ro'c biädnärene lojni te bejñ nani abixu'n naani, ni'ni. Naga'ni lo te da'. Che bahuii Jesús lacti rililajzreni, rájpmi loj benracxhuuga:

—¡Baspaa lajzlu xi'nä! Agubicaj rextojllu.

<sup>3</sup> Dxejcti gaii benñajni ni ruluui xleii Moisés cayujñreni xhigab ensilareneni, caniyaj dee Dios con rextiidxni.

<sup>4</sup> Dxejcti gucbegajc Jesús xhi xhigab cayujñreni, dxejcti rájpmi lojreni:

—¿Xhicuent cayujntu xhigabguijdx neñ lastootu?

<sup>5</sup> ¿Con ni najc guyasiru? Guiniä lo te bejñ: “Agubicaj rextojllu”, o guiniä lo te bejñ: “Huistie, guzaj.”

<sup>6</sup> Dec gunä te gacheetu Xi'n Dios ni gujc Niguii rajp yäl'mibee lo guedxliujre te gudzucajni dojl.

Dxejcti rájpmi loj benracxhuuga:

—Huistie, cua' xta'lu, huij rolizlu.

<sup>7</sup> Dxejcti huistie benracxhuuga, siini rolizni.

<sup>8</sup> Che bahuii rebejñ lojni, bidxeloduxhrene, gulä'preni xpala'n Dios, ni badeed yäl'mibeega loj rebejñ.

*Che gurejdx Jesús Mateo*

(Mr. 2:13-17; Lc. 5:27-32)

<sup>9</sup> Dxejcti birii Jesús cadro basiajcmi benracxhuu, sä'tini. Dxejcti bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejcti rájp Jesús lojni:

—Gudanajl narä.

Dxejcti huisuni, sanajlni Jesús.

<sup>10</sup> Cheni sobga' Jesús lo mex cayajwreni roliz Mateo, biääzda xhidajl rebejñ nani ruquijx xcuent guiraloj, ni najc rebejñ ni di gac xpen Israel, gurejzareneni lo mex näj Jesús nájza reni najc rexpeljpacni.

<sup>11</sup> Che bahuii reben guidoo, ni laa refarisee, xhi cayujñ Jesús, rájpreni loj rexpeljpac Jesús: —¿Xhicuent raunäj xmastrtu rebejñ nani ruquijx xcuent reyuj nájza rebejñ ni di gac xpen Israel?

<sup>12</sup> Che biejn diajg Jesús xhi guniireni, rájpmi lojreni:

—Rebejñ nani nadaan dini guiquiin chu gusiajcmi, niluxh rebejñ racxhuu ni'c rquiniireni chu gusiajcreni.

<sup>13</sup> Colchäj te colchaseed xhi säloj diidxre ni caj loj reguijtz: “Yälrlulaslajz rlazä, dina rlazä guniidxtu guiädxaa löä.” Sa'csi narä dina niädtedxä rebensa'c, narä siädtedxä rebendojl te gusiechlajzreni.

*Gunabdiidxreni xcuent yälrucua'n*  
(Mr. 2:18-22; Lc. 5:33-39)

<sup>14</sup> Dxejcti biääd rexejnpac Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexejnpacu gucua'n, ä?

<sup>15</sup> Räjp Jesús lojreni:

—Che ruchnaa te bi'n, ¿xhixh rac-huin lajz regelnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

<sup>16</sup> Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadre biräjsga.

<sup>17</sup> Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtza reguijda. Ni'cni nanab guida' bincoob neñ reguidcoobza, te si'c nicla tejreni di nit.

*Xindxa'p Jairo näjza gunaa nani gudajn xhajn Jesús*  
(Mr. 5:21-43; Lc. 8:40-56)

<sup>18</sup> Lal ni caniini rediidxga, biääd te dade' ni rnibee neñ guidoo xten rexejnpac Israel. Bazuxhijbni nez loj Jesús räjpni:

—Entis gujt xindxa'pä. Gudaa, badzuub naalu yejcti te guibañsacni.

<sup>19</sup> Dxejcti huisu Jesús, sanäni Jairo. Näj rexejnpacni sanajlreni.

<sup>20</sup> Luxh guyu' te gunaracxhuu nani agujc tzubitio'p ijz cayajcti yälguidxbäi. Bidzujñni nez dejtj Jesús, gudajñni ro' xhajnbi,

<sup>21</sup> sa'csi bejnii xhigab neñ lastooni: “Palga sajc canätis ro' xhajnbi, siacä.”

<sup>22</sup> Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yälrlilajz xtenlu abasiajclu.

Luxh lagajc dxejc bñajc gunaaga.

<sup>23</sup> Cheni biu' Jesús rolijz dade' nani rnibee neñ xquidoo rexejnpac Israel, bahuiini rebejn ni rol bizej näjza xhidajl rebejn ni cabedxa' cayoon, li te biey cayajc, dxejc

<sup>24</sup> räjpni loj rebejnga:

—Colguibicaj. Nagayejctis dxa'pga, gajdni guet.

Dxejc rebejnga alga ruxhiznäjreni Jesús.

<sup>25</sup> Cheni abirii rebejn neñ yu', biu' Jesús, gunaazni naa dxape', dxejc huistie dxape'ga.

<sup>26</sup> Dxejcti bire'ch diidxga guiraa neñ reguejdx ni tre' nejzga.

*Basiajc Jesús tio'p lotiä'p*

<sup>27</sup> Che birii Jesús ro'c, huinajl tio'p bejnii nani di fii. Rbedxa'reni roonreni räjpreni:

—Balaslajz nuure, Xi'n toDavid.

<sup>28</sup> Che bidzujñ Jesús cadre caya'nni, gubigreni lojni. Dxejcti gunabdiidx Jesús lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

<sup>29</sup> Dxejcti gudajñni balojreni, räjpni:

—Sugacni si'cpacni rililajztu.

<sup>30</sup> Lagajc dxejc bixal balojreni. Sas räjppac Jesús lojreni:

—Arniä, na'c chayeitu diidxre, te rut gacheedi xhi guzajctu.

<sup>31</sup> Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

*Basnii Jesús te gop*

<sup>32</sup> Che biriireni cadre bñajc baloj rebejnga, biääd sgaii bejn biändnäreni te gop loj Jesús. Yu' xpriit beñdxab neñ lastoo bejnga.

<sup>33</sup> Che barilaagw Jesús xpriit beñdxab neñ lastoo beñgopga, guslogajcti caniini. Rdxeloduxh rebejn räjpreni:

—Gajdpacnu guihuii sa' redzuunre lajdx rexejnpac Israel.

<sup>34</sup> Dxejc rebeñ guidoo ni najc refarisee, räjpreni:

—Rbääni rexpriti beñdxab con yälrnibee xten beñdxabro.

*Rulaslajz Jesús rebejn*

<sup>35</sup> Gudejd Jesús guiraa reguedxro näjza reguedxbäz, basule'ni xtidx Dios neñ reguidoo xten rexejnpac Israel. Basääbni diidx xten xcälrnibee Dios. Basiajczani guiraloj yälracxhuu, guiraloj yälguijdx ni rajc bejn neñ reguejdxga.

<sup>36</sup> Che bahuiini loj rebejn xhidajl biaduxhni rebejn ga sa'csi rdebya' lajzreni, rac-huin lajzreni, najczeni si'c najc rexiil nani di ga'p baxtoor.

<sup>37</sup> Dxejcti räjpni loj rexpejn pacni:

—Gulii pac xhidalduxh bejn guedxliuj di gan xtidä, luxh guxii najc reni guluiireni; najcni si'c gäjil ni agojl guilia', niluxh ruti mos ni guilia'ni.

<sup>38</sup> Colnab lo Dad nani najc xteni guedxliujre te guxhalni rebejn ni sajc guluii rebejn guedxliujre, gacreni si'c mos ni rlia' gäjil.

## 10

*Gule Jesús guitzubitio'p rexpejn pacni*  
(Mr. 3:13-19; Lc. 6:12-16)

<sup>1</sup> Dxejcti gurejdxni guitzubitio'p rexpejn pacni, badeedni yälrmibee lojreni te gurilaag-wreni rexprit bendxab lastoo bejn näjza te gusiajcreni guiraloj yälgujdx näjza yälracxhuu.

<sup>2</sup> Laj reguitzubitio'p rexpejn ni ni guleni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob;

<sup>3</sup> Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo;

<sup>4</sup> Simón, te bejn ni yu' loj recananita; Judas Iscariote, nani bateed Jesús ladznaa rebejn nani rdxe'ch lojni.

*Baxhal Jesús rexpejn pacni gutie'chreni diidx*  
(Mr. 6:7-13; Lc. 9:1-6)

<sup>5</sup> Guitzubitio'p rebejn re baxhal Jesús. Baliidxnireni räjpni:

—Na'c chäätu nez cad yu' rebejn ni di gumbree Dios. Na'c jiu'tu lajdx rebejn samaritan.

<sup>6</sup> Colchäxga lo rexpejn Israel nani agunijt nejn dojl.

<sup>7</sup> Colchäj, colzäbdiidx lo rebejn, colye'tz lojreni xcälrmibee Dios abidzungajxh.

<sup>8</sup> Colgusijc bejn racxhoo, colgusijc tiejxh rebejn ni ral guejch tiejxhreni, colguspajn bengut. Colgurilaagw xprit bendxab lastoo rebejn. Ligaj cua'tu yälrmibee, ligajza colyejn dzuun.

<sup>9</sup> Räjpzani:

—Na'c chanätu oor, niclaza pla't, niclaza coobr nejn xdobdäjltu,

<sup>10</sup> niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäjil xca'ni xhi gauni.

<sup>11</sup> Räjpzani:

—Che guidzujntu xhitis te guedxro, xhitis te guedxbäz, colquuil te bens'a'c. Rolijztisni coljia'n dxejli ni jiunejztu guejdxga.

<sup>12</sup> Cheni jiu'tu nejn yu', colnii xtidx Dios lo rebejn ga.

<sup>13</sup> Palga najczeni bejn ni numbee Dios, sujia'n yälrbexilajz loj rebejn ga. Niluxh palga direni gac bens'a'c, naaddireni xca'reni xtidx Dios, suguib'i yälrbexilajzga lojtu, coljiunejz ro'c.

<sup>14</sup> Palga direni gusaan jiu'tu rolizjreni, palga di rlajzreni gucuadijgreni xtiidxtu, dxej coljiunejz rolizj bejn ga, o coljiunejz guejdxga, dxej colcuibj guxhuj ni'tu si'c te seen gulälazreni xtidx Dios.

<sup>15</sup> Rniliäpac lojtu, dxej ni gun Dios xcälguxhtisni, te yälguxhtisoru gun Dios rebejn ga, quela yälguxhtis ni gujc rebejn guedx Sodoma näj Gomorra.

*Yälrusacs'i ni siääd*

<sup>16</sup> Räjpzani:

—jColhuiire! Narä suxhalä la'tu si'c xile' nez loj reloob, ni'cni colgacnasinduxh si'c najc te bäl, colyajza nadolajz si'c te palom.

<sup>17</sup> Colnatiro rebejn sa'csi suteedreni la'tu ladznaa rexcuxhtisreni, siguijnzaren i la'tu nejn xquidooreni.

<sup>18</sup> Sinäzaren i la'tu nez loj regubier, nez loj regei xcuent rextidä, te gusule'tu xtidä nez lojreni näjza nez loj rebejn nani di gumbree Dios.

<sup>19</sup> Cheni chanären i la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga.

<sup>20</sup> Sa'csi et la'ditu ni guinii dxej, Sprit xten Xtadt Dios ni yu' nejn lastootu, laani guinii nejn lastootu.

<sup>21</sup> Luxh rebejn suteedreni lagajc bejtzreni ladznaa reni ju'treni. Redad suteedreni lagajc xi'nreni, rexi'n bejn sidxe'chzaren i lo xczujznreni te ju't bejn xczujznreni.

<sup>22</sup> Guiraa rebejn guedxliuj sidxe'chreni lojtu xcuent xtidä. Nani chanuu lo xtidä dxej lultli, ni'c sujn gaan yäl'nabajn par tejpas.

<sup>23</sup> Che guirinajlreni la'tu te gusacsíreni la'tu neñ te guejdx, colguxuñ ro'c, colcháj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiääd Xi'n Dios ni gujc Niguui.

<sup>24</sup> 'Di te bejn ni casieedgaj beñroru lo xmastrni, diza te mos gac beñroru lo xlamñi.

<sup>25</sup> Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamñi te gacni si'c najc xlamñi. Palga rbälajreni Beelzebú nani rnibebe beñdxab, ¿xho direni cuälajza Beelzebú rexi'nni, ä?

*Chuni'c nanab guidxeybni*

(Lc. 12:2-9)

<sup>26</sup> Räjpzani:

—Ni'cni na'c guidxeybtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni.

<sup>27</sup> Diidx nani rniä lojtu guxhijn, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni.

<sup>28</sup> Na'c guidxeybtu renani rugu't bejn, sa'csi direni gun gaan ju'treni xaim bejn. Colguidxeybru nani rugu't tiexh bejn näjza xaim bejn neñ gabijl.

<sup>29</sup> ¿La di bejn guto' tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj.

<sup>30</sup> Näjza rexquidxeyclu nagab tebgajreni.

<sup>31</sup> Ni'cni rniä na'c guidxeybtu; sajcrutu lo te chinaa manbáz ni rutajt.

*Renani rusule' xtidx Jesucrist nez loj rebejn*

(Lc. 12:8-9)

<sup>32</sup> Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa.

<sup>33</sup> Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

*Rlia' Jesús sa' bejn*

(Lc. 12:51-53; 14:26-27)

<sup>34</sup> Räjpzani:

—Na'c guntu xhigab siädnää yälrbexdilajz lo rebeñ guedxliujre, xhet yälcue dxidi ni siädnää, yälrdxagdijl siädnää.

<sup>35</sup> Narä siädnää yälrdxagdijl te bi'n con xtadni; te dxa'p con xnanni; te gulijzni con xnansueegrni.

<sup>36</sup> Ni'cni lagajc resa'tu ni yu' rolijztu sidxe'chreni lojtu.

<sup>37</sup> 'Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä.

<sup>38</sup> Nani di guu xcrujzni, nalajznu tedni trabajw, jiädnajlñi narä, di gacdi gacni xpenä.

<sup>39</sup> Nani guidxäl xcälñabajñi lo guedxliujre, sunitni yälñabajñ xhaguibaa. Luxh nani gunijt xcälñabajñi lo guedxliujre xcuent rextidxä, sidxälñi yälñabansa'c xhaguibaa.

*Gaan nani xca'ni*

(Mr. 9:41)

<sup>40</sup> Räjpzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhal narä.

<sup>41</sup> Nani guscuääz te niguii ni rniä xtidx Dios rolijzni sa'csi baxhal Dios niguiiga, sica'za bejnga lagajc gaan ni xca' niguii ni rniä xtidx Dios. Nani guscuääz te beñsa'c rolijzni sa'csi beñsa'cni, sica'zani lagajc gaan ni xca' beñsa'cga.

<sup>42</sup> Chutis nani gudeed mase te xhijgtis nis niälñiuj xcuentä lo rebixue're, rniliäpac lojtu, direni gunijt, sica'pacreni nani nungäjñ xca'reni.

## 11

*Renani baxhal Juan Bautist loj Jesús*

(Lc. 7:18-35)

<sup>1</sup> Che gulujx baluui Jesús rexpejn pacni xho gunreni dzuun, dxejcti biriini ro'c te saluini, chasule'ni diidx lajdx rexpejn pacni.

<sup>2</sup> Juan yu' neñ latzguuib. Che biejn diajgni xhi cayujñ Jesús, baxhalñi tio'p xpejn pacni

<sup>3</sup> te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejn?



<sup>4</sup> Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhuiitu.

<sup>5</sup> Reni di fii, ruhuiireni; reni di sa, arsiajreni, reni ral tiejxhni, abiajc tiejxhreni; reni di jien diajg, ariejn diajgreni; rebengut, ahüäjreni, gubansacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni ruslaa bejn neñ dojl.

<sup>6</sup> Chicbaa renani di jeed narä.

<sup>7</sup> Cheni sii rebejnğa gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä?

<sup>8</sup> ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolizj rerei.

<sup>9</sup> La'tu ¿xhicuent huijtu ro'c? ¿Te fitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; benrrooni.

<sup>10</sup> Laa Juan nani rusä't ni bacuaa lo reguijtz cadro caj scree:

Narä suxhalä te niguii nani guinii xtidxä nez lojlu;

laani susuceeni nezyuj nezlojlu.

<sup>11</sup> Guliipac rniä, loj guiraa rexingaan xten gunaa, nicla tejni gajd guiricaj ni najc te bensacduxh loj Dios si'c ni najc Juan Bautist. Niluxh bejn nani najc ben huinru lo xcälrnibee Dios xhaguibaa, bejnğa maazru sajcn loj Juan.

<sup>12</sup> 'Cheni gucli dxej ni gusloj rusule' Juan Bautist diidx najli, yu'duxh reni rlanjpac jiu'reni lo xcälrnibee Dios ni yu' xhaguibaa con yälrdxe'ch, sas reni nadxecha' rlanjzreni cuäxuuni xcälrnibee Dios.

<sup>13</sup> Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist.

<sup>14</sup> Palga rlanjztu chalilajztu, lagajc Juan najc Elías, niguii xten Dios nani bia'n diidx jiääd.

<sup>15</sup> Nani sobdiajg diidx, gucuadiajgni.

<sup>16</sup> '¿Xhicojn guntebloä rebejn nani tre' naj, ä? Najcreni si'c najc rebieuux nani rguijt nez lo guii cadro rdo', rbejdxreni lo sa'reni,

<sup>17</sup> rniireni: "Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon."

<sup>18</sup> Sa'csi che biääd Juan dini niajw dizani niä', luxh räjp rebejn najcni te xpejn bendxab.

<sup>19</sup> Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: "Niguiire rauxha't, rätejzani bin, najcni xamigw rebendojl näjza reniguii ni ruquijx xcuent reyuj ni rajx lo gubier." Luxh loj rebejn ni najc xpejn Dios yuduxh xcälnajn Dios, ni'cni baxhalni guiro'p rebejnre.

### *Reguejdx gualajz*

*(Lc. 10:13-15)*

<sup>20</sup> Dxejcti gusloj Jesús gudilnäjni rebenguejdx cadro benduxhni remilaagwr, sa'csi naad-direni gusiechljazreni xtojlneni, sanuutis nabajjnreni neñ dojl. Dxejcti räjpni:

<sup>21</sup> —¡Gunatiru guedx Corazín! ¡Gunatiro guedx Betsaida! Paru neñ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejchljazreni xtojlneni, cadxejli niajcwreni neñ godx, nidääb cobdäj yejcreni.

<sup>22</sup> Luxh rniä lojtu: che guidzujn dxej ni gun Dios xcälguhtisni, sidejdrutu castiigw loj rebejn ni guläjz guedx Tiro näjza guedx Sidón.

<sup>23</sup> Luj guedx Capernaum di gunlu xhigab chäslu xhaguibaa; jäjt neñ baa jiajblu, sa'csi paru neñ guedx Sodoma niajc sa' remilaagwr nani gujc guedx lajdxlu, pet najli tresijc guejdxga.

<sup>24</sup> Luxh rniä lojtu, dxej ni gun Dios xcälguhtisni, trabajwduxhru tedtu loj rebejn Sodoma.

### *Coltaa loä, te gusilajztu*

*(Lc. 10:21-22)*

<sup>25</sup> Laa dxejcn räjp Jesús:

—Rliä'pä xpala'nu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni rachee, te baluuluni loj rebennadolajz ni najc si'c biuxbäz.

<sup>26</sup> O'n. Guliini, Xtadä, sa'csi rujnlu xhigab si'c najc hueen gacni.

<sup>27</sup> 'Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni.

<sup>28</sup> Coltaa loä guiraatu nani abadxajg, nani rsina', narä sunidxä yälrusilajz lojtu.

<sup>29</sup> Colguisieed guntu dzuun si'cni ruluiätu. Colhuii xho runä, xho nacä nadolajz, dizana gacä bennayedxlajz neñ lastoä, ni'cni sidxäl xaimtu yälrusilajz.

<sup>30</sup> Sa'csi guyasi najc xtzunä ni ruluiätu, dizani gac naganduxh.

## 12

### *Rutie' rexpejn Jesús triuu dxej ni rusilajzreni*

(Mr: 2:23-28; Lc. 6:1-5)

<sup>1</sup> Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejnpacni, guslojreni calädxä'reni doj lo triuu te cayajwrenini.

<sup>2</sup> Che bahuüi reben guidoo ni laa farisee, räjpreni loj Jesús:

—Ahuii xho rujn rexpejnpacku dzuun nani di nungäjl gunreni dxej nani rusilajz bejn.

<sup>3</sup> Luxh laani räjpni lojreni:

—¿La gajdtu goj xhi caj loj reguijtz xcuent ni bejn toDavid che gulannäjni rexpejñni, ä?

<sup>4</sup> Biu'reni xquidoo Dios, gudajwreni yätxtiil nani di nungäjl gauni, nicla laani, niclaza rebejn nani sanäni, sa'csi yätxtiilga rebixhojztis rajwni.

<sup>5</sup> O ¿la gajdtu goj lo reguijtz xten leii cadro caj xcuent rebixhojz, ä? Laareni riu'reni nen reguidoo dxej ni rusilajz bejn, rujnreni xtzuunreni niluxh xhet dojldi rujnreni.

<sup>6</sup> Narä rniä lojtu, xhe suga' tej nani sajcro loj guideoga.

<sup>7</sup> Paru niacheetu xhi säloj dee: “Yälruulaslajz riazä, xhet yälrejtdi guidxaa”, ditu nucuaquij redee ni xhet bejnäni.

<sup>8</sup> Sa'csi narä Xi'n Dios ni gujc Niguüi rnibeä dxej ni rusilajz rebejn.

### *Niguüi ni rxu'n naani*

(Mr: 3:1-6; Lc. 6:6-11)

<sup>9</sup> Che birii Jesús ro'c, biu'ni te xquidobäzreni.

<sup>10</sup> Ro'c suga' te bejn ni gubijdz te naani. Luxh sa'csi caguüilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajçni bejñracxhuu dxej ni rusilajz bejn, ä?

<sup>11</sup> Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni nen bisie che gaļ dxej ni rusilajz bejn,

¿xhixh dini cuää xiilga nen bisie, ä?

<sup>12</sup> Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

<sup>13</sup> Dxejcti räjpni loj dade'ga:

—Baslii naalu.

Che basliinini, dxejc biajc naani, gujçni tebloj si'c najc stelaad naani.

<sup>14</sup> Dxejcti birii reben guidoo ni laa farisee, bachagsa'zarenäni te bia'nreni diidx ju'treni Jesús.

### *Diidx ni guniireni xcuent Jesús*

<sup>15</sup> Che guchee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu.

<sup>16</sup> Dxejc räjpni lojreni:

—Na'cpac gäbreni chu najçni.

<sup>17</sup> Si'c gujc te gusojb diidx ni gunii Isaías ni gunii xtidx Dios che räjpni:

<sup>18</sup> Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

<sup>19</sup> Dini tilnä j bejn, dizani cuedxa';  
rudza jieindi diajçni xse'ni lad nezuyuj.

<sup>20</sup> Dini qui'ch nicla te niyt ni cabiejç,  
dizani gusuüi te duxiil ni cayujn guxh,  
dxejli che gunni gaan guinibeeni yälguxhtis.

<sup>21</sup> Lajtisni sustioob lastoo reben ni digac xpejn Israel.

### *Rucuaquijreni Jesús rajpni yälrnibee xten bejñdxab*

(Mr: 3:19-30; Lc. 11:14-23; 12:10)

<sup>22</sup> Dxejcti biädnäreni loj Jesús te bejn ni di fii, dizani guiniüi, yu' te bejñdxab lastooni. Dxejcti basiajc Jesúsni, te gujc guniüni, te gujçza bahuüini.

<sup>23</sup> Guiraa rebejn bidxeloreni, räjpreni:

—¿Xhaa laa Xi'n toDavidni, ä?

<sup>24</sup> Che biejn diajç reben guidoo ni laa farisee rediidxga, räjpreni:

—Bejnre rbää rebejñdxab con yälrnibee xten Beelzebü ni rnibee loj rebejñdxab.

<sup>25</sup> Che guchee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajç te famil nani rlia' sa'reni, nani ridilnä j sa'reni, sinitlojreni.

<sup>26</sup> Sigajçza palga bejñdxab rbää sabejñdxabni, silia' sa'reni, dxejc ¿xho gac chanuu xcälrnibeereni?

<sup>27</sup> Palga narä rbää rebeḅdxab con yälṛnibee xten Beelzebú, ¿chu xcälṛnibee rajc rbää rexpejntu beḅdxab, ä? Ni'cni lagajc laareni suluiireni xhet laadi rujntu xhigab.

<sup>28</sup> Palga narä rbää rebeḅdxab con Xpřit xten Dios, guliipacni abidzujṅ xcälṛnibee Dios lojtu.

<sup>29</sup> 'Bahuilaare. ¿Xho gac jiu' te bejṅ cuan roliz te beḅdaan, xho gac cuanni xhixten bejṅga, palga dini gulibxgaani beḅdaanga? Che abiliib bejṅga, sajc cuanni rexhixten bejṅga.

<sup>30</sup> 'Nani xhet yu' di xladä, rdxe'chni loä. Nani di jiädnaṅ narä, rutie'chni reni siädnaṅ narä.

<sup>31</sup> 'Ni'cni rniä guira'ti doṅ, guira'ti yälṛusguee xte bejṅ sajc gusiäjṅ lajzni xtebtis yälṛniyaj Sprıt Dxaṅ xten Dios di Dios gusiäjṅ lajzni.

<sup>32</sup> Chutis ni guinii xhi te diidx yälṛniyaj Xi'n Dios ni gujç Niguii sajc gusiäjṅ lajzni, luxh chutis ni guiniyaj Sprıt Dxaṅ xten Dios, di Dios gusiäjṅ lajzni, nicla lo guedxliujre, niclaza xhaguibaa.

*Sajc gumbeetu bejṅ xcuent diidx ni rniireni*  
(Lc. 6:43-45)

<sup>33</sup> 'Palga nasa'c te yajç sicaj ninexhsa'c lojni, per che di yajç gac yagsa'c, xho xcaj ninexhsa'c lojni. Ni'cni huenniisi siembeetu te yajç che fiitu xho najc ninejxh ni rcaj lojni.

<sup>34</sup> Sa' la'tu beṅguijdx ni najc si'c te bäl niälasduxh, ¿xho gac guiniitu te didxsa'c?, ni ro' bejṅ rniitis rexhigab ni yu' neṅ lastoo bejṅ.

<sup>35</sup> Te beṅsa'c rniini didxsa'c, sa'csi ganax xhigabsa'c yu' neṅ lastooni, te beṅguijdx rniitisni cosguijdx sa'csi ganax xhigabguijdx yu' neṅ lastooni.

<sup>36</sup> Narä rniäza, guiraa redidxguijdx nani rni bejṅ sudeedreni cuent lo Dios cheni gunni yälṅuxhtis,

<sup>37</sup> sa'csi lagajç rextiidxlu sujṅ guinii Dios najclu beṅsa'c, lagajç rextiidxlu sujṅ gunijtlu lo Dios.

*Rebeṅguijdx rniab te milagwr si'c te seen*  
(Mr. 8:12; Lc. 11:29-32)

<sup>38</sup> Dxejcti rebejṅ ni ruluii xleii to Moisés näjza rebeṅ guidoo ni laa farisee, räjpreni loj Jesús:  
—Mastr, nuurnu rlaiznu guihuiinu te seen; bejṅ te milagwr te fiinuni.

<sup>39</sup> Badzu' Jesús diidxre, räjpni:

—Rebeṅguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios.

<sup>40</sup> Sa'csi lagajç si'cni guyu' Jonás xque' te bälro choṅ dxej, choṅ yääl, si'cza chu Xi'n Dios ni gujç Niguii neṅ lastoo guedxliuj choṅ dxej, choṅza yääl.

<sup>41</sup> Cheni gac yälṅuxhtis xten Dios pet sistie rebejṅ ni siäd Nínive te fiireni gac yälṅuxhtis rebejṅ ni tre' lo guedxliuj naj, niluxh säjb rebejṅ Nínive abanijt rebejṅre sa'csi rebeṅ Nínive basiejch lajzreni, bia xtojṅreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás.

<sup>42</sup> Näjza reiṅ xten rebeṅ sur sistieni te fiini gac yälṅuxhtis rebejṅ ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajṅni reyälṅajṅ xten Salomón, luxh nani yu' lojtu naj nanduxhruni loj Salomón.

*Te sprıtxuudx ni rbisac*  
(Lc. 11:24-26)

<sup>43</sup> Räjczani:

—Cheni riı te sprıtxab neṅ lastoo te bejṅ, ricanzajni nez lo reyubijdz, ritiilni cadre gusilajzni, per cad rdxäldini.

<sup>44</sup> Dxejcti rujṅni xhigab, naani, guibisacä cadre biriä. Cheni rbisacni ro'c, rdzujṅni si'c rdzujṅ te bejṅ neṅ te yu' ni naya neṅni, naliobsa'cni, sucheeni, luxh rut rbäjzdi ro'c.

<sup>45</sup> Dxejcti rijni, rixiini sgajdz sprıt nani najc nadxuudxru lojni te jiädläznäjrenini neṅ lastoo bejṅga. Dxejcti rxhınduxhru bejṅga lojni gujçni galoo. Sigajcza gac rebejṅ ni tre' lo guedxliujre naj.

*Xnan Jesús con rebejtzni*  
(Mr. 3:31-35; Lc. 8:19-21)

<sup>46</sup> Laṅ ni caninäjṅni rebejṅ, bidzujṅ xnanı con rebejtzni, suga'reni rolä' rlaizreni guiniireni lojni.

<sup>47</sup> Dxejcti biäd tej ni räjp loj Jesús:

—Xnanlu näjza rebejtzlu suga' rolä' rlaizreni guininäjreni luj.

<sup>48</sup> Laani badzu'ni diidx lo bejṅga räjpni:

—¿Chuni'c najc xnanä? ¿Chuni'c najc rebetzä?

<sup>49</sup> Dxejcti basgaani naani nez loj rexpejṅpacni, räjpni:

—ıRedee najc xnanä redeeza najc rebetzä!

<sup>50</sup> Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

## 13

*Xcuent bejn nani rbe'c binij*

(Mr: 4:1-9; Lc: 8:4-8)

<sup>1</sup> Lagajc dxejga birii Jesús royu'ga, huicueni nez ro' nisdoo.

<sup>2</sup> Xhidalduxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii.

<sup>3</sup> Dxejc gusloj caguluui Jesús con recuent, räjpni:

— Colcuadiajg. Birii te dade' ni rbe'c binij te cue'cni binij.

<sup>4</sup> Lañ ni cabe'cni binij yu' binij ni bitejb gajxh nez ro' nesiuq, biääd remane' ni rutajt, sas gudajwreni binijga.

<sup>5</sup> Yu' binij ni bitejb nez neñ reguij cadro guxii yu' yuj. Gulengajc binijga sa'csi direni nibej jiät neñ yuj.

<sup>6</sup> Che birii gubijdx, bigolreni sa'csi xhetiza xlobaani, dxejc gubijdzni.

<sup>7</sup> Yu'za binij ni bitejb neñ reguejch. Che guroob reguejchga, dini nusaan niroob regäjle', gubijdzitreni.

<sup>8</sup> Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej.

<sup>9</sup> Nani rsobdiajg diidx gucuadiajgni diidxre.

*Xhi pajr najc recuent xten Jesús*

(Mr: 4:10-12; Lc: 8:9-10)

<sup>10</sup> Dxejcti gubig rexpejñpacni, gunabdiidx lojni, räjpreni:

— Xhicuent rusule'lu diidx loj rebejn con recuent?

<sup>11</sup> Dxejcti badzu' Jesús diidx räjpni lojreni:

— Sacnä Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeereni.

<sup>12</sup> Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni räjpni sibicaj.

<sup>13</sup> Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni.

<sup>14</sup> Laareni najczeni si'c te soob diidx ni gunii Isaías, dade' ni gunii xtidx Dios, che räjpni: Siejn diajgpactu, niluxh xhetliidi gacbeetu, sidxelojactu, niluxh ditu fii.

<sup>15</sup> Sa'csi guyalajz rebejnre, lastooreni najc si'c te guij, di diajgreni jiejn,

luxh niäuzä balojreni, didi fisa'creni con balojreni,

didi jiejnza diajgreni, didi gacbeezä lastooreni,

didi gusiejch lajzreni guibi'reni loä te gusiaca' lastooreni.

<sup>16</sup> La'tu colguibalaznä balojtu sa'csi rhuisa'ctu, riensa'cza diajgtu.

<sup>17</sup> Rniliäpac, xhidajl redade' ni gunii xtidx Dios, näjza xhidajl beñsa'c rladuxh nuhuii sa' recos ni cahuiitu, luxh direni nuhuiini, rladjzreni niejn diajgreni sa' rediidx nani cayejn diajgtu, luxh di diajgreni niejnni.

*Rusule' Jesús xcuent bejn ni rbe'c binij*

(Mr: 4:13-20; Lc: 8:11-15)

<sup>18</sup> Colcuadiajg xhi säloj xcuent bejn nani rbe'c binij.

<sup>19</sup> Rebejn nani rucuadiajg diidx xten xcälrnibee Dios, niluxh direni gacbeeni, najczeni si'c najc binij nani bitejb nez ro' nesuy; riääd beñdxab rudzucajni rediidx nani biu' neñ lastooni.

<sup>20</sup> Rebinij nani bitejb nez neñ reguij, najc si'c rebejn nani rucuadiajg diidx, gustli rca'reni diidxga,

<sup>21</sup> luxh guxii yu' xlobaani, direni sutijp. Che rdejdreni trabajw, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga.

<sup>22</sup> Rebinij nani gurej neñ reyaguejch säloj rebejn nani rucuadiajg rextidx Dios rujnrueni te gunreni dzuun te ga'preni yälñasa'c ni yu' lo guedxliujre. Dxejcti rexcälñasa'c xten guedxliujre rusgueereni. Guiraa recosre rutau lo xtidx Dios neñ lastoo rebejnre, dini gusaan gac te cosechsa'c neñ lastoo rebejnre.

<sup>23</sup> Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojñ; yu'za bejn ni najc si'c binij ni gujc galbitzuu.

*Xcuent triuu cadro guyu' cuanguejch*

<sup>24</sup> Dxejc bij Jesús stee cuent, räjpni:

—Xcäl̄rnibee Dios xhaguibaa najc si'c te bejn nani gule'c ganax triusa'c lo xyujni.

<sup>25</sup> La<sub>l</sub> nagaguejs bejn̄ga, biäd̄ad te bejn̄ nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejn̄ga, dxejcti sääni.

<sup>26</sup> Cheni gulejn triuuga, birii doj lojni, dxejc biricaj näjza cuanguejch ro'c.

<sup>27</sup> Dxejcti räjp remos lo xlam̄reni; “Dad, ¿la et ganax triusa'c di gule'clu, ä? ¿Caxh bazaj cuanguejchre?”

<sup>28</sup> Räjp xlam̄reni: “Te bejn̄ ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlaiz guejblu cholädx̄a'nu recuanguejchga, ä?”

<sup>29</sup> Dxejc räjp xlam̄reni: “Na'c, sa'csi che guiliäd̄dx̄tu cuanguejchga, nägajcza triuu guil- iäd̄dx̄tu.

<sup>30</sup> Col̄saan tioobreni tebloj. Che guire' cose'ch, dxejc guinibea remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen̄ yu'.”

*Xcuent bedz muxhtas*

(Mr. 4:30-32; Lc. 13:18-19)

<sup>31</sup> Bijza Jesús stee cuent räjpni:

—Xcäl̄rnibee Dios xhaguibaa najcni si'c te bedz muxhtas nani cue'c te bejn̄ lo xyujni.

<sup>32</sup> Gulii bejdzga najc baze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riäd̄ad remane' ni rutajt riädyujn xpitiädzreni lo xajcw yajgga.

*Xcuent levaduur*

(Lc. 13:20-21)

<sup>33</sup> Bijzani stee cuentre, räjpni:

—Xcäl̄rnibee Dios xhaguibaa najc si'c levaduur nani rugu'ch te gunaa lo choñ̄mediid arin̄, dxejc ni'c rusaguijni guideb cojbga.

*Xhicuent baluii Jesús ganaxtis con cuent*

(Mr. 4:33-34)

<sup>34</sup> Baluii Jesús guiraa rebejn̄ ganaxtis con recuent, xhetiru stee mood nuluuini, ganaxtis con cuent guniini lojreni.

<sup>35</sup> Si'c bejn̄ni te guzoj̄b xtid̄x dade' ni gunii xtid̄x Dios che bacuaani lo reguijtz, räjpni: Suiyã diidx con recuent,

suiyã diidx xcuent recos ni naga'tz che bencheeli Dios guedxliuj.

*Rusule' Jesús xcuent cuanguejch nen̄ triuu*

<sup>36</sup> Dxejcti basadiidx Jesús rebejn̄, biu'tini nen̄ yu' cadro bire' rexpelj̄pacni lojni, räjpreni lojni:

—Basule' loonu xcuent cuanguejch ni guyu' loniaa.

<sup>37</sup> Räjp Jesús lojreni:

—Bejn̄ nani rbe'c retriusa'c, najc Xi'n Dios ni gujc Niguii;

<sup>38</sup> Ioniaaga najc guedxliuj; retriusa'c najc rebejn̄ nani najc xpejn̄ Dios, nani rucudiagj xtiidxni; recuanguejchga najc rebejn̄ ni najc xpejn̄ bendx̄ab.

<sup>39</sup> Bejn̄ nani rdxe'ch lajz najc lagajc bendx̄ab. Cose'ch säloj che nitloj guedxliuj; reni gutie' cose'ch najc rexangl Dios.

<sup>40</sup> Sigacni guire' recuanguejch te chääni lo guiboo te checni, sigajcza gac che gac fis guedxliuj.

<sup>41</sup> Xi'n Dios ni gujc Niguii suxha<sub>l</sub> rexangl̄ni te jäd̄dgutie'reni, te jäd̄dlääreni lo xcäl̄rnibeeni guiraa renani rujn̄ riajb̄ bejn̄ nen̄ doj̄l, näjza reni rujn̄ cosguijdx.

<sup>42</sup> Susäl̄reni rebejn̄ga nen̄ te or̄ cadro cayecduxh. Ro'c sonduxhreni, sauya'reni läijyreni.

<sup>43</sup> Dxejcti rebensa'c sidimbicha'reni si'c gubijdx lo xcäl̄rnibee Xtadreni. Palga sobdiajgtu, col̄gucudiagsa'c.

*Te cossacduxh ni naga'tz*

<sup>44</sup> Räjpzani:

—Si'cza xcäl̄rnibee Dios xhaguibaa najc si'c te cossacduxh ni naga'tz lo te yuj loniaa. Bidxäl̄ te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

*Perl nani sacduxh*

<sup>45</sup> Räjpzani:

—Xcäl̄rnibee Dios xhaguibaa najcza si'c najc te dad rapduxh nani caguuil perlsa'c te siini.

<sup>46</sup> Che bidxälni te perlsa'c, tejni sacduxh, bato'ni guiraa xhixtenni te gusiini perлга.

*Guijxh ni rniaaz bäjl*

<sup>47</sup> Räj pzani:

—Xcälrnibee Dios xhaguibaa najca si'c te guijxh ni rusäl bejn lo nis te rniaazreni guiraloj cuaa bäjl.

<sup>48</sup> Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni najc hueen rucheeni neñ te dxijm; nani di gac hueen rusälrenini te laad.

<sup>49</sup> Si'ca gac che gac fis guedxliuj; sirii rexangl Dios te sudzucajreni rebenguijdx lo rebensa'c.

<sup>50</sup> Dxejcti susälreni rebenguijdx neñ te or cadro cayecduxh; ro'c sonduxhreni, sauya'reni läjyreni.

*Te beñ rajp*

<sup>51</sup> Dxejcti gunabdiidx Jesús lojreni, räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

<sup>52</sup> Dxejcti räjpni lojreni:

—Cheni rsieed te bejn nani najn leii xcuent yälrnibee xten Dios xhaguibaa, najcni si'c te lam nani rajc rbää lo rexcäl'nasa'cni recos ni nacoob, näjza recos biejw.

*Jesús lo guedx Nazare't*

(Mr 6:1-6; Lc 4:16-30)

<sup>53</sup> Che gulujx basule'ni recuentre, biriini ro'c, sääni.

<sup>54</sup> Huijni lagajc lajdxni. Ro'c gosloj caguluuini neñ xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl'najnre? ¿Xho rajc rujnni remilagwr?

<sup>55</sup> ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacoob, José, Simón con Judas.

<sup>56</sup> Luxh rebisiajnni rbäjzreni lo guejdxre. ¿Cacharo bisieedni guiraa nani caguluuini?

<sup>57</sup> Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdxpacni direni jiu xtiidxni.

<sup>58</sup> Ni'c dini niujn xhidal milagwr ro'c sa'csi direni chalilajz xtiidxni.

## 14

*Che gujt Juan Bautist*

(Mr 6:14-29; Lc 9:7-9)

<sup>1</sup> Lagajc neñ redxejga Herodes, ni laaza tetarca, biejn diajgni diidx xcuent ni cayujn Jesús.

<sup>2</sup> Dxejc räjpni lo rexmosni:

—Dee najc Juan Bautist. Pet agubañsacni lo rebengut, ni'cni rajpni yälrnibee te rujnni remilagwr.

<sup>3</sup> Si'c gunii Herodes sa'csi laani basäuuni Juan neñ latzguuib. Niluxh gunibeeni biliibni con caden neñ latzguuib xcuent Herodías, ni gujc chää bejtzni Felipe.

<sup>4</sup> Bidxe'chni sa'csi räjp Juan lo Herodes:

—Et laadi rujnlu rbäznäjlu chää bejtzlu.

<sup>5</sup> Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rnii xtidx Dios.

<sup>6</sup> Dxejc che gojlaj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni,

<sup>7</sup> räjpni loj gunaaga:

—Gunab xhitis ni rlazlu, sa'csi gudix lazä gunidxä ni guiniabtislu.

<sup>8</sup> Dxejcti gunaaga, abalijdx xnannini, räjpni lo Herodes:

—Loj te platón baniidx bitiyuejc Juan Bautist.

<sup>9</sup> Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga.

<sup>10</sup> Dxejcti gunibeeni biru' yejc Juan Bautist neñ latzguuib.

<sup>11</sup> Sas biädnäreni yejcnii lo te platón, badeedrenini loj gunaaga. Dxejcti gunaaga badeed-nini lo xnanni.

<sup>12</sup> Dxejcti bidzujñ rexpejn Juan sanäreni togoalga te huicua'tzrenini. Dxejcru huisa'nreni diidx loj Jesús.

*Bayaan Jesús gaii miĵ bejn**(Mr. 6:30-44; Lc. 9:10-17; Jn. 6:1-14)*

<sup>13</sup> Che biejn diajg Jesús xhi guzajc Juan, xtebni huä'pni neŋ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neŋ reguejdxga biriireni.

<sup>14</sup> Che birii Jesús neŋ barcw, bahuiini loj xhidalduxh bejn, dxejc balazlajznireni, basiajcnj rebejn nani racxhuu.

<sup>15</sup> Cheni acayu' guxhijn, gubig rexpejnpacni lojni räjpreni:

—Rut rbäjzdi nez lo reyubijdzre, niluxh agudxey naj. Basadiidx rebejn te jiireni nez rerench te chasiireni xhi gaureni.

<sup>16</sup> Räjp Jesús:

—Xhicuent jiireni. La'tu colgudeed xhi gaureni.

<sup>17</sup> Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjl rajpnu.

<sup>18</sup> Laani räjpni:

—Coltanäni ree.

<sup>19</sup> Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejnpacni. Dxejcti rexpejnpacni gudisreneni loj rebeŋ xhidajl.

<sup>20</sup> Guiraa reni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni.

<sup>21</sup> Renani gudajw najceni si'cti gaii miĵ niguii, xhet näjdi regunaa niclaza rebiuux bigab.

*Gusaj Jesús lo nisdoo**(Mr. 6:45-52; Jn. 6:16-21)*

<sup>22</sup> Sas gunibee Jesús biu' rexpejnpacni neŋ barcw te ganidreni tedreni stee lad nis laĵni casadiidxni rebejn.

<sup>23</sup> Che gulujx basadiidxni rebejn, huä'p Jesús yecdajw te xtebni guninäjni Dios Xtadni. Che gojl guxhijn, ro'c sugaxteb Jesús.

<sup>24</sup> Luxh barcw galäi lo nis sasaj. Cagusnibduxh reoĵ barcw, liriääzni lo nis sa'csi cabi' beduxh cadro sääreni.

<sup>25</sup> Rsildooru gubig Jesús, bidzujjni lojreni, siädsajni lo nisdoo.

<sup>26</sup> Che bahuii rexpejnpacni siädsajni lo nisdoo, bidxeljbrei, räjpreni:

—Colhuii te fantasmni —guredxa'reni sa'csi bidxebduxhrenei.

<sup>27</sup> Dxejc gunii Jesús lojreni, räjpni:

—Na'c guidxeljbtu, laa naräni; colsutijp lastootu.

<sup>28</sup> Dxejcti gunii Pedr lojni, räjpni:

—Dad, palga lujni, gunibee jialä lojlu nez lo nisre.

<sup>29</sup> Räjp Jesús:

—Gudaa pues.

Dxejcti birii Pedr neŋ barcw gusajni lo nis te sääni nez loj Jesús.

<sup>30</sup> Che bahuii Pedr beduxh ni cabi', bidxeljbrei, dxejc gusloj cayääzni neŋ nisdoo. Guredxa'ni, räjpni:

—Dad, jgulää narä!

<sup>31</sup> Lagajc dxejc gunaaz Jesús naani, räjpni loj Pedr:

—Guxii rajplu yälirililajz. ¿Xhicuent guctio'p lajzlu?

<sup>32</sup> Che huä'preni neŋ barcw, guläzgjajc bej.

<sup>33</sup> Dxejcti renani sää neŋ barcw bazuxhijbreni nez loj Jesús räjpreni:

—Guliipacni najclu Xi'n Dios.

*Basiajc Jesús rebeŋ racxhuu guedx Genesare't**(Mr. 6:53-56)*

<sup>34</sup> Che gudejdreni lo nis, bidzujnreni nez lo reyuj xten Genesare't.

<sup>35</sup> Che biembee rebeŋ ro'cni, batie'chreni diidx guideb gabi lajdxreni. Dxejcti biädnäreni guiraa rebeŋ racxhuu lojni.

<sup>36</sup> Gunabduxhrenei gusaanni canreni ro' xhajbtisni. Dxejcti guiraa renani gudajw xhajbni, bialjcreni.

**15***Nani ruxhin bejn**(Mr. 7:1-23)*

<sup>1</sup> Dxejcti gubig gaii rebejn nani ruluii lei näjza rebejn guidoo ni laa farisee. Siäädreni guedx Jerusalén, räjpreni loj Jesús:

2 —¿Xhicuent di rexpeljnpaclu jiu xcostrumbr rebeṅgool? ¿Xhicuent direni gusoob yälrdiib ṅaareni che rajwreni?

3 Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu.

4 Dios gunibeeni xho guntu che räjpni: “Gojpp xpala'n xtdadu, xnanlu”, näjza “Nani guiniyaj lo xtadni o loj xnanni, suguetni.”

5 Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.”

6 Luxh chutis ni guinii si'c, xhetru nanabdi gacnäjni xtadni o xnan. Si'c ni cabälaztu rextidx Dios te gac chanuutu rexcostumbrtu.

7 ¡Bejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

8 Rebeṅguedxre con ro'reni rliä'preni xpala'nä niluxh lastooreni zijt suga' nez loä.

9 Xliä'si rajjnreni narä, sa'csi ruluiireni si'c xtidxä reyälrmibee xten rebeṅ guedxliuj.

10 Dxejcti gurejdxni rebejn, räjpni lojreni:

—Colcuadijg, colyabee.

11 Nani riu' ro' bejn di guxhiṅ bejnga, sanga nani rii ro' bejnga ni'cni ruxhiṅ bejnga.

12 Dxejcti rexpeljnpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

13 Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani.

14 Colgusaanreni; lotiä'preni, ruluiireni nezyuj lo salotiä'preni. Luxh palga te beṅ lotiä'p guluui canejz chää stee lotiä'p, guiro'preni sitejbreni neṅ te gueed.

15 Räjp Pedr loj Jesús:

—Basule' cuentre loonu.

16 Räjp Jesús:

—¿La näjza la'tu ditu gacbee, ä?

17 ¿La ditu gacbee guiraa ni rajw bejn ru' xque'ni, dxejcti che rdejdni xque'ni, abigo'ṅni?

18 Niluxh diidx nani rii ro' bejn, neṅ lastoo bejn riini; dee ni ruxhiṅ bejn.

19 Sa'csi neṅ lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chää sa'ni; xten rebejn ni rbajn; xten rebejn ni rniididxxhii lo sa'ni; xtenza rebejn ni rutijl sa'ni.

20 Laa sa' recosre ni ruxhiṅ bejn. Che dini gusoob recostumbr xte yälrdiib ṅaani, di ni'c guxhiṅ bejn.

*Te gunazit nani huililajz xtidx Jesús*

*(Mr 7:24-30)*

21 Biriiti Jesús ro'c, sääni nez región xten Tiro näjza Sidón.

22 Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beṅdxab lastooni, niluxh casacsäduxhnini.

23 Xhet räjpdi Jesús lojni. Dxejcti biädnaḅdux rexpeljnpacni lojni, räjpreni:

—Barilaagw gunaare, didi rbedxa'ni siädnaḅni luj.

24 Dxejcti räjp Jesús lojni:

—Dios baxhaḅ narä lojtis xpen Israel nani agunijt neṅ dojl.

25 Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

26 Dxejc räjp Jesús lojni:

—Di gac hueen xca' bejn xcuxtiil rexi'nni gusaḅni lo rebä'cw.

27 Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

28 Dxejcti räjp Jesús lojni:

—Nane', lacti guroob najc xcälirililajzlu. Sugac si'cni rlanjlu.

Lagajc dxejc biajc xindxa'pni.

*Basiajc Jesús xhidäl beṅ racxhuu*

29 Birii Jesús ro'c gudejdn nez ro' nisdoo ni laa Galilee. Huäpgajcni yejc te dajn, ro'c gurejni.

30 Xhidajl bejn bidzujn cad sobga'ni. Siädnäreni rebeṅ ni rajc ni'ni, rebeṅ ni najc lotiä'p, rebeṅ gop, rebeṅ ni xheti ṅaani, näjza xhidälro beṅ racxhuu, bidzunäjrenini nez loj Jesús. Dxejcti basiajcnireni.

31 Ni'cni lacti bidxeloduxh rebeṅ xhidajlga che bahuiireni rniid regop, riajc reni xheti ṅaani, rsiaj reni rajc ni'ni, ruhuüi relotiä'p, dxejc rliä'preni xpala'n Xtios rexpeljnpacni Israel.



*Badeed Jesús xhi gudajw tajp miġ bejn**(Mr. 8:1-10)*

<sup>32</sup> Gurejdx Jesús rexpejn<sub>pacni</sub> räjpni lojreni:  
—Riaä rebejnre sa'csi agujc choñ dxej yunäjreni narä luxh xhet ca'direni gaureni. Di rlazä guxhaläreni jiireni rolizreni palga gajdreni gau didi guidxajgreni lo nezuyj.

<sup>33</sup> Dxejcti räjp rexpejn<sub>pacni</sub> lojni:

—¿Xho guidxälnu xhi gau rebeñ xhidajlre nez lo reyubijzre cadro rut rbäjzdi, ä?

<sup>34</sup> Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

<sup>35</sup> Sas gunibee Jesús cue rebejn lo yuj.

<sup>36</sup> Dxejc cua' Jesús guigajdz yätxtiilga näjza rebäjlg, badeedni xquixtios lo Dios dxejc gula'ni reyätxtiilga näjza rebäjlg badeednireni loj rexpejn<sub>pacni</sub>. Dxejcti laareni gudisreni yätxtiilga con rebäjlg lo rebejn xhidajlga.

<sup>37</sup> Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni.

<sup>38</sup> Renani gudajwga najc si'cti tajp miġ bejn, niluxh xhet näjdi regunaa niclaza rebiuux bigab.

<sup>39</sup> Dxejcti basadiidx Jesús rebejn, biu'tini neñ barcw te gudejdni lo nisdoo nez región xten Magdala.

**16***Rebeñ guidoo ni laa farisee näjza saducee rniabreni te milagwr si'c te seen**(Mr. 8:11-13; Lc. 12:54-56)*

<sup>1</sup> Refarisee näjza resaducee bidzujnreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagusguesireni, sa'csi rlazjreni guiga' Jesús.

<sup>2</sup> Dxejc badzu' Jesús diidxre räjpni lojreni:

—Che rajl gudxaj, rniitu: “Saru gac te dxej guixee sa'csi naxniaa xhaguibaa.”

<sup>3</sup> Che rajl rsil rniitu: “Etladi gac te dxej nadxaj sa'csi naxniaa xhaguibaa niluxh tre' za.” Xhoxh numbeetu xhi säloj reseñ ni rien xhaguibaa, luxh ditu gumbee xhi säloj reseñ xcuent redxajre, nalajznu recos ni cayajc.

<sup>4</sup> Rebeñ guijdxre, rebeñ gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

*Levaduur xten refarisee**(Mr. 8:14-21)*

<sup>5</sup> Che gudejd rexpejn<sub>pacni</sub> stelaad nisdoo biäl-lajzreni ninäreni yätxtiil.

<sup>6</sup> Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

<sup>7</sup> Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.”

<sup>8</sup> Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¿Huinduxh najc xcälrlilajztu!

<sup>9</sup> ¿La gajdtu gacbee? ¿La diza lajztu guinaj che gudisä gaii yätxtiil gudajw gaii miġ bejn, ä? ¿Bal dxijmni batie'tu, ä?

<sup>10</sup> ¿La diza lajztu guizaj che gudisä gajdz yätxtiil gudajw tap miġ bejn, ä? ¿Bal dxijmni batie'tu?

<sup>11</sup> ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

<sup>12</sup> Dxejcru gucbeereni dini niäjp: “Colnati levaduur xten yätxtiil.” Laani caniini: “Colnaäti yälrlulii xten refarisee näjza resaducee.”

*Bicäjp Pedr Jesús najc Cristpac**(Mr. 8:27-30; Lc. 9:18-21)*

<sup>13</sup> Che bidzujn Jesús región xten Cesarea xten guedx Filipo, gunabdiidx Jesús loj rexpejn<sub>pacni</sub>, räjpni:

—¿Chu naj rebejn nacä narä Xi'n Dios ni gujc Niguui?

<sup>14</sup> Laareni räjpreni:

—Yu'reni naj luj najclu Juan Bautist; yu'zarenii rniil luj najclu Elías, peta sgaireni rniil luj najclu Jeremias o stee niguui ni rniil xüdx Dios.

<sup>15</sup> Dxejcti räjpni lojreni:

—La'tu, ¿chuni'c rniitu nacä?

<sup>16</sup> Dxejc räjp Simón Pedr:

—Luj najclu Crist, Xi'n Dios nani nabajn.

<sup>17</sup> Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejn̄di baluui dee lojlu, Xtaďätis ni yu' xhaguibaa baluuiinini lojlu.

<sup>18</sup> Narä rniä lojlu, luj najclu Pedr, nani säloj: “Te guij.” Sa'csi sibäxtiejl̄u guidxagsa'za renani rililajz xtidxä, niluxh che guetreni, direni nitloj.

<sup>19</sup> Narä gunidxä yälr̄nibee lojlu te gulijdxlu rebejn̄ nani ahuiliilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

<sup>20</sup> Dxejcti gunibee Jesús rutlojdi gäb rexpelj̄npacni laani najc Guejb Crist.

*Gunii Jesús xho guetni*

(Mr: 8:31-9:1; Lc: 9:22-27)

<sup>21</sup> Lagajc dxejc gusloj cagusule' Jesús diidx lo rexpelj̄npacni, guniini lojreni xho nanabpac chääni guedx Jerusalén te ro'c tedni trabajwduxh ladzn̄aa rebengool xten guidoo, ladzn̄aa rebixhojz, näjza rebejn̄ ni najn xleii Moisés. Guniizani sugu'trenini, niluxh ni riojn̄ dxej sibansacni lo rebengut.

<sup>22</sup> Dxejcti huinä Pedr Jesús te laad, gusloj cadiñn̄ajni, räjpni:

—¡Gacñäj Dioslu, Dad! ¡Gurniälojlu gaclu si'c!

<sup>23</sup> Dxejc gubiré Jesús, räjpni lo Pedr:

—¡Gubicaj loä beñdxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

<sup>24</sup> Dxejcti räjp Jesús loj rexpelj̄npacni:

—Palga yu' chu tejt̄u rlaiz guirinajl narä, sucuälazni lagajc laani, suguuni xcrujzni, nalajznu tedni trabajw, sujiädnajl̄ni narä.

<sup>25</sup> Sa'csi nani rlaiz gunni gaan xcäl̄nabajn̄ni, sunijtnini. Luxh nani runijt̄ xcäl̄nabajn̄ni por narä, siđxäl̄ni xcäl̄nabajn̄ni par tejjpas.

<sup>26</sup> Sa'csi çhi gaan gun te bejn̄ palga ga'pni guideb guedxliuj, luxh nit xaimni lo Dios, ä? o çla yu' xhi gudeed bejn̄ te siini xaimni?

<sup>27</sup> Sa'csi narä Xi'n Dios ni gujc Niguii siälä lo yälr̄dimbicha' xten Xtaďä con rexangl̄ni, dxejcti siguixä tebgaj bejn̄ si'ctis ni gujc xtzuunni.

<sup>28</sup> Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcäl̄rnibea.

## 17

*Chuni'c najc guroob*

(Mr: 9:2-13; Lc: 9:28-36)

<sup>1</sup> Che gudeed xho'p dxej, huinä Jesús Pedr, Jacoob, con Juan betz Jacoob, xtebreni huijreni jiaa yejc te dajn.

<sup>2</sup> Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl.

<sup>3</sup> Dxejc bahuigajczeni loj Moisés näjza loj Elías, cayujyreni diidx con Jesús.

<sup>4</sup> Dxejcti räjp Pedr loj Jesús:

—Dad, ¡huenduxh suga'nu ree! Palga rlaizlu, sajç jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

<sup>5</sup> Lañi canii Pedr, biäjt te za ni rdimbicha' guideb gabireni; neñ zaga biejn̄ te xse' ni räjp:

—Dee najc xi'nä ni sanälazä, ruspaduxhni lazä, col̄cuadiajz xtiidxni.

<sup>6</sup> Che biejn̄ diajz rexpelj̄npac Jesús diidxga, bazuxhijbreni, basajbreni lojreni lo yuj, bidxebduxhreni.

<sup>7</sup> Dxejcti gubig Jesús lojreni, batzuubni ñaani yejcreni, räjpni:

—Col̄chasulii, na'c rdxejbtu.

<sup>8</sup> Che guläs lojreni, lojtis Jesús bahuiireni, rutru suganäj̄dini.

<sup>9</sup> Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibañsacä narä Xi'n Dios ni gujc Niguii lo rebengut.

<sup>10</sup> Dxejcti gunabdiidx rexpelj̄npacni lojni:

—çXhicuent rnīi rebejn̄ ni najn xleii Moisés ganid Elías nanab jiääd, ä?

<sup>11</sup> Badzu' Jesús diidxre, räjpni:

—Guliini siädxgaa Elías, laani gunsa'cni guira'ti,

<sup>12</sup> niluxh narä rniä lojtu, abiääd Elías, di rebejn̄ nienbeeni, luxh bennäj̄renini si'ctis ni rla-zreni, basacsiduxhrenini. Sigajcza gunnäj̄reni narä Xi'n Dios ni gujc Niguii, susacsiduxhreni narä.

<sup>13</sup> Dxejcti gucbee rexpejn<sup>pacni</sup> caniini xcuent Juan Bautist.

*Jesús basiajc te biuux ni guyu' xpej bendxab*

(Mr. 9:14-29; Lc. 9:37-43)

<sup>14</sup> Cheni bidzujn<sup>reni</sup> cadro tre' xhidajl bejn, gubig te bejn lojni bazuxhijbni, dxejc räjpni:  
<sup>15</sup> —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguijdxgani, yu' huält rtejbni lo guiboo yu' huält rtejbni lo nis.

<sup>16</sup> Biädnäáni loj rexpejn<sup>pacu</sup>, luxh di niajcdi nusiajcrenini.

<sup>17</sup> Jesús badzu' diid<sup>xre</sup> lojreni räjpni:  
 —Benguijdx, bejn ni di chalilajz, ¿guc<sup>li</sup> yu'ä lojtu? ¿Cati gac gunä huant la'tu? ¿Coltanä biuuxga ree!

<sup>18</sup> Dxejcti gudilnäj Jesús bendxab ni yu' lastoo biuuxga, gunibeeni biriini, lagajc dxejc b<sup>iaj</sup>c biuuxga.

<sup>19</sup> Dxejc guninäj rexpejn<sup>pacni</sup> Jesús te laad, gunabdiid<sup>xreni</sup> räjpreni:

—¿Xhicuent di niajcdi nibäänu bendxab nen lastoo biuuxga?

<sup>20</sup> Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yäl<sup>rililajz</sup> xtentu si'cti te bejdz muxhtas, saj<sup>c</sup> gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajz<sup>pactu</sup>, xhetliidi yu' ni di gacdi guntu.

<sup>21</sup> Niluxh sa' bendxabre, dini guirri palga ditu guiniabduxh lo Dios, gucua'nzatu.

*Jesús rusule' stehuält xho guetni*

(Mr. 9:30-32; Lc. 9:43-45)

<sup>22</sup> La<sup>l</sup>ni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguüi ladz<sup>naa</sup> rebendojl te gusacsíreni narä.

<sup>23</sup> Niluxh sugu'treni narä, dxejc ni riojn dxej siba<sup>nsacä</sup> lo rebengut.

Che biejn diajg<sup>reni</sup> diid<sup>xga</sup>, guc-huinduxh lajzreni.

*Gudijxni impuest xten guidoo*

<sup>24</sup> Che bidzujn Jesús näjza rexpejn<sup>pacni</sup> guedx Capernaum, biäd rebejn ni rusquijx xcuent guidoo lo Pedr, gunabdiid<sup>xreni</sup> lojni, räjpreni:

—¿La di xmastrtu quiix impuest xten guidoo?

<sup>25</sup> Räjp Pedr:

—Rguijxnini.

Che biu' Pedr nen yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuet, recuyo't? ¿Reben lajdxreni o rebenzijt?

<sup>26</sup> Badzu' Pedr diid<sup>xre</sup> räjpni:

—Rebenzijt.

Räjp Jesús:

—Ni'cni di rexi'nreni quiixni.

<sup>27</sup> Luxh te di guidx'e<sup>chreni</sup>, huij ro' nisdoo, bacuaa ansuel, gulää bäj<sup>l</sup> ni guiniazzgaalu. Ro' bäj<sup>lga</sup> sidxällu te melpla't ni saj<sup>l</sup> te chatijxlu impuest xcuentä näjza xcuentlu.

## 18

*¿Chuni'c sajcru lajdx Dios xhaguibaa?*

(Mr. 9:33-37; Lc. 9:46-48)

<sup>1</sup> Laa dxej<sup>cni</sup> gubig rexpejn<sup>pac</sup> Jesús lojni te gunabdiid<sup>xreni</sup>:

—¿Chuni'c sajcru lajdx Dios xhaguibaa?

<sup>2</sup> Dxejcti gurejdx Jesús te biuxbäz, bazujnini nez galäiireni,

<sup>3</sup> dxejc räjpni:

—Rniliä<sup>pac</sup> lojtu, palga ditu gusiechlajztu, palga ditu gac nadolajz si'c te biuxbäz, ditu jiu' lajdx Dios xhaguibaa.

<sup>4</sup> Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa.

<sup>5</sup> Chutis ni riu te sa' biuxe're, sa'csi rinälajzni narä, lagajc narä riuni.

*Riezgw jiajbni nen dojl*

(Mr. 9:42-48; Lc. 17:1-2)

<sup>6</sup> Räjpzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yej<sup>nni</sup>, chatejbni loj nisdoo, palga gunni jiajb tej reni'c lo dojl.

<sup>7</sup> Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riabza lo dojl reni rililajz xtidxä, ni najc si'c biuxe're.

<sup>8</sup> 'Palga ni'lu o naalu gun jiajblu lo dojl, batiu'ni. Hueenru jiu'lu lo xcäl'nabajn Dios nitiujnglu o natiujnglu lacuaa jiilu con guiro'p ni'lu o guiro'p naalu lo balduxh ni rejc par tejpas.

<sup>9</sup> Palga te balojlu rujn riablu lo dojl, gulääni. Hueenru jiu'lu lo xcäl'rnibee Dios najclu lotiä'p lacuaa chu guiro'p baloj chazäl'reni luj lo balduxh ni rejc par tejpas.

*Xcuent xiil ni gunijt*  
(Lc. 15:3-7)

<sup>10</sup> Räjpa Jesús lojreni:

—Colnatiro, andi cuälaztu rebejn ni najc si'c biuxbäzre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios.

<sup>11</sup> Sa'csi Xi'n Dios ni gujc Niguii biääd te guslaani rebejn nani agunijt nen dojl.

<sup>12</sup> Räjpani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' nen gurajl te chatiilni xile' ni gunijt, ä?

<sup>13</sup> Luxh palga guidxälni xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiil nani di ninijt.

<sup>14</sup> Sigajcza Xtradnu ni yu' xhaguibaa di rlajz nit lo Dios nicla tej reni ahuililajz xtiidxni, ni najc si'c biuxbäzre.

*Xho gunnäjl bejtzlu*  
(Lc. 17:3)

<sup>15</sup> Räjpani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejnni lojlu. Palga saru gucuadiajgni xtiidxlu, abiäj'l lajzlu.

<sup>16</sup> Palga naaddini gucuadiajgni, dini jiu xtiidxlu, dxejc huinä stee o stio'p bejn chan-inäjlni, te guiraa ni guiniitu jiejn diajg rebejn'ga, te arajplu tio'p o choñ testigw.

<sup>17</sup> Palga di bejtzlu gucuadiajg xtidx rebejn'ga, luxh dizani jiu xtiidxreni, nen guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te benguijdx ni di gumbee xtidx Dios o si'c rebejn nani rusquijx loj rebejn nani ruto'.

<sup>18</sup> 'Ni'cni rniliäpac lojtu, guiraa yälguxhtis xten bejn ni di gusiechlaiz xtoj'reni ni guntu lo guedxliuj, si'c jia'nni xhaguibaa; guiraa redojl nani gusiäj'l lajzlu lo guedxliuj sa'csi basiechlaiz bendojlga, si'cza jia'nni xhaguibaa.

<sup>19</sup> 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtääd ni yu' xhaguibaa suniidxni ni rniabtu lojni.

<sup>20</sup> Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejn'ga.

<sup>21</sup> Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäj'l lazä? ¿La sajl gajdzli huält, ä?

<sup>22</sup> Badzu' Jesús diidxre lojni räjpani:

—Dina guiniä gajdztis huält, rniä gayonbidzuu huält, nalajznu si'ctiza huält basiäj'l lajzlu.

*Xcuent tio'p bejn ni nazäb meel*

<sup>23</sup> 'Xcäl'rnibee Dios xhaguibaa najc si'c te reii ni rlajz gunni cuent lac nazäb rexmosni lojni.

<sup>24</sup> Agusloj cayujnni xcuentni chela bidzunäj'reni te mos ni nazäb balti mil lojni.

<sup>25</sup> Luxh mosre xhet rajpdini te quiixni rexti'nni, ni'c gunibee reii guido'ni si'c sclav, näjza chäälni, näjza rexi'nni, nägajcza guiralii xhixtenni, te gaxh xti'nni.

<sup>26</sup> Dxejcti mosga bazuxhijbni loj xlamni, gunabduxhni lojni, räjpani: “Guläzsjc tiop-choñ dxej, Dad, te gac quixä xti'nä.”

<sup>27</sup> Dxejcti lamga balazlajzni xmosni, badzucajni guiraa ni nazäb mosga lojni, baslaanini.

<sup>28</sup> Cheni birii mosga roliz xlamni, bidxaagni stee samosni ni nazäb bale'si beex lojni. Gunaaznini, baxhiya'ni yejnni, dxejc räjpani: “Gudijxga ni nazäbblu loä.”

<sup>29</sup> Dxejcti ste mosga bazuxhijbni lojni, räjpani: “Guläzsjc. Siguixäca guiraa ni nazäb lojlu.”

<sup>30</sup> Luxh steega naaddini, alga huisäugacni samosni nen latzguuib te bejnni gaan gudijxni guiraa ni nazäbblu.

<sup>31</sup> Cheni bahuii sgaii mos xhini'c bejnni, gucnaduxhlajzreni, huiye'tzreni lo xlamreni xhi huiyejnini.

<sup>32</sup> Dxejcti gurejdx xlamreni mosga, räjpani lojni: “¡Mos guiidx! Narä badzucä di'n ni nazäbblu loä, sa'csi gunabduxhlu loä.”

<sup>33</sup> Si'cza niunnäjlu sa'lu, nulazlajzluni sigajc ni balazlazälu.”

<sup>34</sup> Sas lacti bidxechduxh lamga, gunibeeni biäuumi te gudijxni guiragajc ni nazääbni lo xlamni.

<sup>35</sup> Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiälajzpac guiraa redojl ni rujn resa'ni lojni.

## 19

*Jesús rulüi xcuent yälruo'n sa'ni*

*(Mr. 10:1-12; Lc. 16:18)*

<sup>1</sup> Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán.

<sup>2</sup> Xhidajl bejn birinajlni, ro'c basiajzni rebenracxhuu,

<sup>3</sup> dxejc gubig refarisee lojni, rrajzreni gusguesireni Jesús ni'c räjpreni lojni:

—¿La sajc guro'n te niguii chäälni che rrajztsini, ä?

<sup>4</sup> Badzu' Jesús diidxre lojreni, räjpni:

—¿La gajdtu goj lo reguijtz nani bacuaa to Moisés cadro caj xho benchee Dios bejn galooi: "Niguii näjza gunaa bencheenireni"?

<sup>5</sup> Guniiza Moisés: "Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni."

<sup>6</sup> Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

<sup>7</sup> Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nni gunaaga, ä?

<sup>8</sup> Räjp Jesús lojreni:

—Sa'csi najc lastootu si'c te guij, ni'c basaan to Moisés baro'n niguii chäälni, niluxh galodoo et si'cti gujzni.

<sup>9</sup> Luxh rniä lojtu, niguii nani gusaan chäälni, luxh xhet dojldi bennäj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

<sup>10</sup> Dxejc räjp rexpejn pacni lojni:

—Palga si'c najc xcuent niguii con chäälni, hueenru na'c guchnaani.

<sup>11</sup> Jesús räjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee.

<sup>12</sup> Yu' xhicuent digacdi guchnaa niguii: yu'reni digacdi guchnaa sa'csi si'c gojlni; yu'reni digacdi guchnaa sa'csi baxhin sabejnreni; yu'zaren digacdi guchnaareni sa'csi rrajzreni gunreni xtzuuntis Dios. Nani rajc racbeeni rediidxre, sugacbeenireni.

*Biädnäreni rebiuux loj Jesús*

*(Mr. 10:13-16; Lc. 18:15-17)*

<sup>13</sup> Dxejcti biädnäreni rebiuuxe' loj Jesús te gudzuubni naani yejcreni, guiniabni lo Dios xcuentre. Luxh rexpejn pacni gudilnäj rebejn ni siädnä rebiuuxe'ga.

<sup>14</sup> Dxejc räjp Jesús lojreni:

—Colgusaan guibig rebiuuxe' loä, na'c gudxojturen, sa'csi xcälrnibee Dios xhaguibaa najc xten reni nadolajz si'c najc rebiuuxe're.

<sup>15</sup> Che gulujx badzuubni naani yejc rebiuuxe', biunejzni ro'c.

*Te ben ni rajp guninäj Jesús*

*(Mr. 10:17-31; Lc. 18:18-30)*

<sup>16</sup> Dxejc biädä te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yäl nabajn lo Dios par tejpas?

<sup>17</sup> Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rrajzlu xca'lu yäl nabajn lo Dios, bazoob rextidx Dios ni caj lo xleii Moisés.

<sup>18</sup> Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl bejn nani di gac chäällu, na'c cuanlu, na'c guiliäslu didxxhii xcuent bejn.

<sup>19</sup> Bazoob xtidx xtadlu con xnanlu, huinäljaz sa'lu si'cni sanälajzlu lagajc luj.

<sup>20</sup> Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

<sup>21</sup> Dxejc räjp Jesús lojni:

—Palga rlaizlu gaclu bensa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaa te jiädnajlju narä.

<sup>22</sup> Cheni biejn diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

<sup>23</sup> Sas Jesús räjp loj rexpejnpacni:

—Rniliäpac lojtu, naganduxh jiu' te bejn rajp loj xcäl'rnibee Dios.

<sup>24</sup> Rnisacä lojtu, guyasiru ted te cameii nen baloj te guux; naganduxhru jiu' te bejn ni rajp lo xcäl'rnibee Dios.

<sup>25</sup> Che biejn diajg rexpejnpacni rediidxre, bidxeloduxhrene, dxejc canabdiidx loj sa'reni:

—¿Chuni'c sajc jiu' lo xcäl'rnibee Dios?

<sup>26</sup> Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

<sup>27</sup> Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

<sup>28</sup> Jesús räjp lojreni:

—Rniliäpac lojtu, la'tu ni biädnajlju narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadro guinibeä lo guiraa reben guedxliuj, la'tu ni siädnajlju narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn Israel.

<sup>29</sup> Luxh guiraa rebejn ni basa'n rolizni o rebejtzni, o rebisiajnmi, o xtadni, o xnanni, o chäälni, o xi'nni, o rexhujni, te siädnajlju narä, rebejnga sajp te gayuu huält locni gojpmi, nägajc ga'preni xcäl'nabajn Dios par tejpas.

<sup>30</sup> Rebejn nani rchalo najcreni benroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

## 20

### *Xcuent reni rujn dzuun*

<sup>1</sup> Räjpzani:

—Xcäl'rnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub.

<sup>2</sup> Che bidxäl'ni gaii mos, bachaagni diidx. Bia'nreni diidx quixixnireni te denaar tebdxej cade tej remosga. Dxejc baxhañnireni lo xyujni sayujnreni dzuun.

<sup>3</sup> Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guii.

<sup>4</sup> Räjpni lojreni: “Näja la'tu colchayujn dzuun lo xyuä. Narä siguixä si'cni riäj' xca'tu.” Sä'ti rebejnga lo dzuun.

<sup>5</sup> Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejnga.

<sup>6</sup> Dxejc si'cti rcagaii birisacni, huijni lo guii. Ro'c bidxäl'ni sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?”

<sup>7</sup> Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näja la'tu colchayejn dzuun lo xyuä. Narä siguixsa'cätu.”

<sup>8</sup> Che biu' guxhijn, räjp lam lo mos ni rnibee remos: “Gurejdx remos te quixixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.”

<sup>9</sup> Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej.

<sup>10</sup> Cheni biu' reni biu' lo dzuun rsiloo, bejnreni xhigab sica'rureni meel, per sigajcza laareni cua'reni te denaar cade tejreni.

<sup>11</sup> Che cua'reni xcuentreni gusloj cadxe'chreni lo baxhuaan xten dzuunga.

<sup>12</sup> Räjpreni: “Redee ni biu' lult lo dzuun pet teb ortis bejnreni dzuun, luxh gudixlureni sigajcni gudixlru nuurnu, luxh biennu dzuun guideb dxej, luxh biennu dzuun lo yäl'nanaa.”

<sup>13</sup> Dxejc räjp lamga lo tejreni: “Xamigwä, xhet cosgujdxdi cayunä lojlu. ¿La xhet bia'ndinu diidx te denaar quixälu tebdxej?”

<sup>14</sup> Huij, cua' xmeellu. Narä rlazä quixä bejnre ni biu' lult sigajc ni gudixä lojlu.

<sup>15</sup> ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?”

<sup>16</sup> Ni'cni reni biäd lult sajcreni tebloj con reni biäd ganid, luxh reni biäd ganid sajcreni tebloj con reni biäd lult.

*Gunisac Jesús xho guetni*  
(Mr. 10:32-34; Lc. 18:31-34)

<sup>17</sup> Che sasaj Jesús lo nezyuj sääni Jerusalén, huináni rexpeljpacni te laad te räjpni lojreni:  
<sup>18</sup> —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladznaa reni rnibee lo rebixhojz, näjza lo rebejn ni najn lei. Laareni sinibeereni guetä.  
<sup>19</sup> Suteedreni narä ladznaa rebenzjzt te cubeereni narä quini reni narä, dxejc gucuareni narä lo cruju. Luxh ni riojn dxej, sibañsacä loj rebengut.

*Ni gunab xnan Jacoob näjza Juan*  
(Mr. 10:35-45)

<sup>20</sup> Dxejcti gubig xnan Jacoob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.

<sup>21</sup> Gunabdiidx Jesús lojni:  
—¿Xhini'c rlajzlu?  
Räjp gunaaga lojni:  
—Che jiu'lu lo xcälrnibeelu, gunibelaa cue tej rexi'nä xladbeelu, steeni cue xladbägwlu.  
<sup>22</sup> Dxejc räjp Jesús:  
—¡Ditu gan xhini'c rniabtu! ¿La sajc tedtu yälrsacsí sa'ni tedä? ¿La sajc tedtu trabajwduxh sa'ni nanab tedä?

Dxejc räjpreni:  
—Sajc tednuni.  
<sup>23</sup> Dxejcti räjp Jesús lojreni:  
—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtädi ni yu' xhaguibaa alaguleni rebejnga.

<sup>24</sup> Che biejn diajg stzuu rexpeljpac Jesús, bidxe'chreni loj guiro'p rexi'n nane'ga.  
<sup>25</sup> Dxejc gurejdx Jesús reni, räjpni:  
—La'tu najntu xho rujn regubier ni rnibee lo rebenzjzt, rnibeereni rebejnga si'c xlamreni. Luxh reni najc rebenro lojreni runnäjreni rebejnga si'ctis ni rlajzreni.

<sup>26</sup> Et si'cni gunditu la'tu loj rebejn. Chutis rlajz gac benro lojtu, nanab gunni dzuun gacnäjni guiraliitu si'c te mos.

<sup>27</sup> Luxh chutis tejtü ni rlajz guiliä'p xpala'nni, nanab gacni si'c xmos lo guiraliitu.  
<sup>28</sup> Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yälñabajn xtenni te gudijxni baslaani xhidal bejn ni yu' lo dojl.

*Jesús rusiajc tio'p lotiä'p*  
(Mr. 10:46-52; Lc. 18:35-43)

<sup>29</sup> Che gojl guiriireni guedx Jericó, xhidalduxh bejn sanajlni.  
<sup>30</sup> Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.  
<sup>31</sup> Gudilñäj rebejnreni, te gusäureni ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!  
<sup>32</sup> Dxejc guzudxi Jesús, gurejdxni reni di fii, räjpni lojreni:

—¿Xhini'c rlajztu gunä?  
<sup>33</sup> Räjpreni lojni:  
—Dad, rlaaznu guixal balojnu te gac finu.

<sup>34</sup> Dxejc balazlajz Jesúsreni, gudajjni balojreni. Sas biacgajc balojreni, gujc bahuiireni, sanajltireni Jesús.

## 21

*Biu' Jesús guedx Jerusalén*  
(Mr. 11:1-11; Lc. 19:28-40; Jn. 12:12-19)

<sup>1</sup> Cheni Siäddzungajxhrene guedx Jerusalén, bidzujñreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejpacni,

<sup>2</sup> räjpni lojreni:  
—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxhečni, coltanäni löä.

<sup>3</sup> Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Sux-halgajcni.”

<sup>4</sup> Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

<sup>5</sup> Colye'tz loj reni rbäjz guedx Sión, bahuii xreilu siääd lojlu,

nadolajzni bijbni te burbáz, te burbáz, xi'n man ni rujn dzuun, ni ruu cargw.

<sup>6</sup> Dxejcti huij rexpejn'pacni, bejnreni si'c gunibee Jesús gunreni.

<sup>7</sup> Biádnäreni burga nájza burbáz xi'nni. Gudixhreni xhajbreni detz burbázga, dxejcti gubijb Jesús burbázga.

<sup>8</sup> Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadro ted Jesús.

<sup>9</sup> Rebejn ni nijd, nájza reni siáad dejtzni gusloj cabedxa'reni, rájpreni:

— ¡Xchej guibajn Xi'n toDavid! ¡Chicbaa ni siáad xcuent Gueb Dios! Rliá'pnu xpala'n Guejblu Dios.

<sup>10</sup> Cheni biu' Jesús neñ guedx Jerusalén, guiraa rebeñ guejdxga gusloj camojm, yu'reni canabdiidxreni loj sa'reni:

— ¿Chucha najc bejn're?

<sup>11</sup> Yu'zarení rájpre:

— Dee najc Jesús, niguii ni rusule' xtidx Dios. Guedx Nazare't xten Galilee siáadni.

*Basia Jesús guidoro*

(Mr. 11:15-19; Lc. 19:45-48; Jn. 2:13-22)

<sup>12</sup> Dxejcti biu' Jesús neñ guidoro xten Dios, guláani guiraa rebejn ni caguto' nájza rebejn ni casii. Barexhät'ni remex xten reni ruchaa meel xten rebejn, nájza reyagxhil xten reni ruto' repalom.

<sup>13</sup> Dxejcti rájpreni lojreni:

— Loj reguijtz ni bacuaa rebengaloo caj: “Sirilaj xquideö yu' xten yäl'rejdx, yäl'riabi loj Dios.” Niluxh la'tu abejntuni xpiliáa gubaan.

<sup>14</sup> Lagajc neñ guidooga, gubig loj Jesús gaii bejn ni di fia nájza gaii bejn ni rsiacoj, luxh basiajcnireni.

<sup>15</sup> Cheni bahuii reni rnibee loj rebixhojz, nájza reni najn leii remilagwr ni bejn Jesús, luxh biejnza diajg'reni xho cabedxa' rebixue' caniireni: “Rliá'pnu xpala'nlu Xi'n torei David”, bidxe'ch rebixhojzga.

<sup>16</sup> Dxejcti rájpreni loj Jesús:

— ¿La riejn diajglu xhi caniireni, ä?

Badzu' Jesús diidx're lojreni rájpreni:

— O'n, riejn diajáni. ¿La gadtu goj lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidx're:

Abejnlu goj rebixhojz nájza rebáznite' dij ni rliápsa'cpac xpala'n Dios.

<sup>17</sup> Dxejcti basaan Jesúsreni, biunejz'ni ro'c sáani guedxe' ni laa Betania, ro'c gudej'ni yáal.

*Te yag iigw ni gubijdz*

(Mr. 11:12-14, 20-26)

<sup>18</sup> Cheni bara yáal, rsilru gubisac Jesús guedx Jerusalén. Lañ ni sáani, gusloj calaanni.

<sup>19</sup> Bahuii loj te yag iigw cuá' nezyuj. Gubigni gajxh ni' yajgga, per xhet ninejxhdi bidxálni, ganaxhtis balajg caj lo yajgga. Dxejcti rájpre Jesús lo yajg iigwga:

— ¡Nuncru xcaj nicla tej ninejxh lojlu!

Dxejcti gubidz'gajc yajgga.

<sup>20</sup> Cheni bahuii rexpejn'pacni, bidxeloduxh'reni, gunabdiidx'reni loj Jesús:

— ¿Xhi cuent gubidz'gajc yajgga?

<sup>21</sup> Rájpre Jesús lojreni:

— Rniliápac lojtu, palga chalilajz'pactu, luxh ditu gun tío'p lajz'tu, xhet ganaxdi sa' cosre guntu, palga gábtu lo te dajn: “Gubicaj ro'c, gusuj galáii nisdoo”, si'c gacni.

<sup>22</sup> Guiraa ni guiniabtu loj Dios, palga chalilajz'pactu, suniidx'nni.

*Xcäl'rnibee Jesús*

(Mr. 11:27-33; Lc. 20:1-8)

<sup>23</sup> Dxejcti biu' Jesús neñ guidoro, dxejcti lañ ni caguluuini rebejn gubig reni rnibee loj rebixhojz nájza rebengool, gunabdiidx'reni lojni:

— ¿Xhi yäl'rnibee rajplu ni'cni rajc rujnlu recosre? ¿Chuni'c baniidx yäl'rnibeere lojlu?

<sup>24</sup> Badzu' Jesús diidx're lojreni rájpreni:

— Sigajcza narä gunä te yäl'gunabdiidx lojtu; palga sajc gudzu'tu diidxga loä, dxejcti guiniä lojtu chuni'c baniidx yäl'rnibee te runä recosre.

<sup>25</sup> ¿Chuni'c gunibee gutiobnis Juan ni rutiobnis? ¿La Dios o la beñ guedxliuj?

Dxejcti gusloj cayájp lo sa'reni, palga jie'tznu Dios gunibeeni, dxejcti sinajni loonu, ¿xhicuent ditu nililajz'xtiidx'ni?

<sup>26</sup> Palga jie'tznu bejn guedxliuj gunibeeni, dxejcti sixa't rebejn yej'cnu sa'csi guiraareni rililajz'reni Juan najc te Dade' ni gunii xtidx Dios.



<sup>27</sup> Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

*Te dade' ni guyu' tio'p xi'nni*

<sup>28</sup> Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.”

<sup>29</sup> Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni.

<sup>30</sup> Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij.

<sup>31</sup> Loj guiro'preni, ¿chuni'c bejn si'cni rlazj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios,

<sup>32</sup> sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunabdxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

*Xcuent remosguijdx*

*(Mr. 12:1-12; Lc. 20:9-19)*

<sup>33</sup> ¿Colcuadijg stee cüentre! Guyu' te dade' ni najc baxhukaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujnci te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro.

<sup>34</sup> Che agojl guire' cose'ch baxhal baxhuaanga gaii xmosni loj xyujni te chaxiireni cose'ch ni riälj xca' baxhuaanga.

<sup>35</sup> Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni.

<sup>36</sup> Dxejc baxhal sac baxhuaanga sgaii mos. Niluxh reni biannäj yujga sigajcza bennäjreni remosga.

<sup>37</sup> Dxejcti bejn baxhuaanga xhigab: “Maazru huen guxhalä xi'nä; sucuadijgrureni xtiidxni.”

<sup>38</sup> Cheni bahuiireni lo xi'n baxhukaan xten yujga, bejnreni xhigab: “Deeni jiannäj yujre; do'o guigu'tnuni te jiannäanu yujre.”

<sup>39</sup> Dxejcti gunaazrenini, guläärenini te laad, dxejc bagu'trenini.

<sup>40</sup> Dxejc gunabdiidx Jesús räjpni:

—Che jiääd baxhukaan xten yujga, ¿xhi gunnäjni rebejn nani biannäj xyujni?

<sup>41</sup> Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riälj xca'ni che gal guire' cose'chga.

<sup>42</sup> Dxejcti räjp Jesús lojreni:

—¿La gajdtu gol lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',  
cua' Dios lagajc guijga gudixhnini squiin yu',  
sajcrumi loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

<sup>43</sup> Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riälj xca' xcälrnibee Dios, nalajznu renani chalilajzpac xtiidxni.

<sup>44</sup> Luxh xcuent guijga: nani jiajb lo guijga, silia'ni, per nani guitejb guijga yejnci, li siujyni, gacni däj.

<sup>45</sup> Che biejn diajg reni rnibee lo rebixhojz näjza refarisee recuent ni canii Jesús, gucbeereni cagasä'tni lagajc laareni.

<sup>46</sup> Rlazjreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

<sup>1</sup> Guslosac canii Jesús lojreni con recuent, räjpni:

<sup>2</sup> —Xcälrnibee Dios najc si'c te reii ni bejn te sa' te guchnaa xi'nni.

<sup>3</sup> Baxhałni rexmosni te saxiireni regolnejdx chääreni sa', niluxh rebejnre di rıajzdireni.

<sup>4</sup> Dxejc baxhalsacni rexmosni, räjpni: "Colye'tz loj reni abidon, agujc comiid. ¡Abagutä balti gonsa'c, gonguro! Anacchee guira'ti yälrajw. Coltaa."

<sup>5</sup> Niluxh reni abidonga di niu xtiidxreni. Tejni sahuui rexyujni, steeni säa lo rexnegosni,

<sup>6</sup> dxejcti sgaii reni nıajc biooz gunaazreni rexmos reii, basacsıreni remosga, sas bagu'trenini.

<sup>7</sup> Che biejn diajg reiga, bidxe'chduxhni, baxhałni rexsoldaadni te sagu'treni guiraa rebejngıjdxga, te saze'czareni guejdx cadro rbäjzreni.

<sup>8</sup> Dxejcti räjpni loj rexmosni: "Guiraa dee anacchee, di nungäjł jıäädru reni abidon.

<sup>9</sup> Colchäj, pues, lo resquiin lo nezyuj, colcuejdx chutis bejn ni guidxaagtistu."

<sup>10</sup> Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc bejngıjdx sigajc reni najc benhueen te gudxaj rolıjz reiga.

<sup>11</sup> 'Dxejc biu' reii biädhuini loj rebiooz. Bahuiini loj te bejn ni sobga' ro'c, luxh xhet xhablanıjđini najcwni.

<sup>12</sup> Dxejc räjp reii lojni: "Xamıgwä, ¿xho bejnlu biu'lu ree luxh xhet xhablanıjđilu nacjwlu?" Dxitis sobga' bejnga, xhet rniidini.

<sup>13</sup> Dxejc räjp reii loj rexmosni: "Colguliib ni'ni näjza naani, colsäłni detzyu' cadro nacäjy te ro'c gonduxhni chubejli reläjyni."

<sup>14</sup> Sa'csi xhidajł najc reni bidon luxh guxii najc reni bıbee.

*La sajc quixni impuest*

(Mr. 12:13-17; Lc. 20:20-26)

<sup>15</sup> Dxejcti sii refarisee, bia'nreni diidx siguiilreni xho gunıjt Jesús te diidx te guiga'ni.

<sup>16</sup> Ni'c baxhałreni gaii xpejnreni näjza gaii bejn ni nadxaag Herodes te räjpreni loj Jesús:

—Mastr, anajnnu niılu ganax didxlii, ruluıızalu xtiidxpac Dios, luxh dilu jıu xhi rniı rebejn, sa'csi dilu cue bejn ni sajru lo stee bejn.

<sup>17</sup> Gunii loonu, pues: ¿La laaca najc quixnu impuest lo César ni rnıbee loonu o et laadi?

<sup>18</sup> Dxejc gucbee Jesús xhet laadi xhıgab cayujnreni neñ lastooreni, dxejc räjpni lojreni:

—¡Bejngıjdx! ¿Xhicuent rıajztu guquıiltu narä?

<sup>19</sup> Colguluii te meel loä.

Dxejc badeedreni te meel ni laa denario.

<sup>20</sup> Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

<sup>21</sup> Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

<sup>22</sup> Che biejn diajgreni rediidxre, bidxeloduxhreni. Dxejc basaanrenini, sä'tireni.

*Canabdiidxreni xho gac che guıbaııac rebejn*

(Mr. 12:18-27; Lc. 20:27-40)

<sup>23</sup> Lagajc dxejga bidzujn gaii reni laa saducee, reni di chalılajz sibıııac bejn loj rebengut. Gubıgıreni loj Jesús, gunabdiidxreni,

<sup>24</sup> räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjł guchnaa bejtzni biuudga te chu xi'nreni xcuent bejtzni.

<sup>25</sup> Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chääłni lo bejtzni.

<sup>26</sup> Sigajza gusajc ni ro'p bejtzni; sigajza gusajc ni riojn bejtzni. Si'c huınuu gujc che basa'li guıgajdz bejtzga.

<sup>27</sup> Sas che gujt guiraareni, näjza gunaaga gujt.

<sup>28</sup> Che guıbaııac rebejnga lo rebengut, ¿chu tej lo rebejtzga gac chääłpac gunaaga, ni guiraareni bachnaareni gunaaga?

<sup>29</sup> Dxejcti badzu' Jesús diidxre lojreni, räjpni:

—Et laadi rujntu xhıgab sa'csi ditu gacbee xtidx Dios nıclaza xcuent xcälrnıbee Dios.

<sup>30</sup> Ni che guıbajı rebengut, diru yälruchnaa chu, diruza bejn gudeed rexindxa'preni guchnaa. Dxejc sajcreni si'c rexangł Dios ni yu' xhıguıbaa.

<sup>31</sup> Dxejc xcuent yälrbıııac loj rebengut, ¿la gajdtu goł reguijtz ni bacuaa toMoisés che räjp Dios xcuent retoxtadgoldoonu:

<sup>32</sup> "Narä nacä Xtios Abram, Xtios Isaac, näjza Xtios Jacob", ä? Dios di gac Xtios bengut, Xtıostis rebejn ni nabajı najcni.

<sup>33</sup> Che beijn diajg rebejn xtidx Jesús, bidxeloduxhrene diidx ni ruluini.

*Diidx ni maazru sajc*

*(Mr. 12:28-34)*

<sup>34</sup> Che gucbee refarisee basäu Jesús ro' resaducee, bidojpreni, bachaagreni diidx.

<sup>35</sup> Dxejc tejreni nani najn lei, rlanjzni guquuilni Jesús ni'c gunabdiidxni lojni räjpni:

<sup>36</sup> —Mastr, ¿xhi diidx ni gunibee Dios sajrcu lojreni caj lo lei?

<sup>37</sup> Räjp Jesús lojreni:

—Nani rni scree: “Huinälajz Dad Xtioslu guideb lastoolu, guideb xaimlu, näjza guideb-gajc xcäriejnlu.”

<sup>38</sup> Diidxre ni gunibee Dios najc ni sajrcu, luxh ganidni siädni loj rextidx Dios.

<sup>39</sup> Ni ro'pga sigajcza najcni: “Huinälajz resa'lu sigajc ni sanälajzlu lagajc luj.”

<sup>40</sup> Guiro'p remandamientre nanab te guzoob bejn guiraa rediidx ni bacuaa toMoisés näjza ni bacuaa redade' nani gunii xtidx Dios.

*¿Chu xi'n najc Crist?*

*(Mr. 12:35-37; Lc. 20:41-44)*

<sup>41</sup> Lałni tre' refarisee, gunabdiidx Jesús lojreni, räjpni:

<sup>42</sup> —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

<sup>43</sup> Räjp Jesús lojreni:

—¿Xhicuent räjp David “Xtadä” lojni che basanij Sprit Dxan xten Dios lastooni? Ni'c bacuaa toDavid rediidxre:

<sup>44</sup> Dad Dios räjp lo Xtadä,

gurej xladbeä lał ni gudzugä guiraa reni rdxe'ch lojlu ladzni'lu.

<sup>45</sup> Palga lagajc David rni: “Dad” lojni, ¿xho mood najcni xi'nni?

<sup>46</sup> Dxejc rut gujcdi badzu' nicla te diidx lojni, luxh dxejluga rutru gojpd i xhi diidx niniabdiidxruren lojni.

## 23

*Rucuaquij Jesús refarisee näjza rebejn nani najn lei*

*(Mr. 12:38-40; Lc. 11:37-54; 20:45-47)*

<sup>1</sup> Dxejc räjp Jesús loj reben xhidaalga näjza loj rexpejn pacni:

<sup>2</sup> —Rebejn ni najn lei näjza refarisee räjp yälajn te gusule'reni xleii Moisés.

<sup>3</sup> Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rniibereni guntu.

<sup>4</sup> Rniibereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni.

<sup>5</sup> Guiraa recos ni rujnreni, rujnrenini te fiitis rebejn. Rchagljazreni rcaj lo cuajsureni näjza roxhagjwreni recaje' cadro yu' tla' guijtzi ni caj xtidx Dios lojni. Rustioolzaren xi' xhajbreni.

<sup>6</sup> Rlanjzreni ganidreni tedreni lo mex che gal te lanij; rlanjzreni cuereni lo rebancw ni suga' delant neñ reguidobäz.

<sup>7</sup> Sigajcza rlanjzreni guchagro' bejn naareni nez lo guii, guiniiza rebejn “Mastr” lojreni.

<sup>8</sup> Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu.

<sup>9</sup> Na'c guiniitu “Xtadä” loj te beñ guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa.

<sup>10</sup> Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist.

<sup>11</sup> Ni yu' si'c mos lojtu ni'c najc beñroru loj resa'ni.

<sup>12</sup> Sa'csi chutis ni rchaloni najcni beñro lo sa'ni, ni'c sustuiyä lojni, chutis ni najc nadolajz loj Dios, ni'c sunäni beñro lo sa'ni.

<sup>13</sup> ¡Proobzatu remastr xten lei näjzatu refarisee, najctu benguijdx! Sa'csi rudxoijntu jiu' rebejn loj xcälrnibee Dios. Lagajc la'tu ditu jiu' luxh dizatu gusaan jiu' rebejn ni rlanj jiu'.

<sup>14</sup> ¡Proobzatu remastr xten lei näjzatu refarisee, najctu benguijdx! Sa'csi rudzucajtu roliz renanbiuud lałsi cabedx canabduxhtu lo Dios, naatu gusgueueu bejn si'c. Sa'csi rujntu scree, siabduxh fis xten Dios yejctu.

<sup>15</sup> ¡Proobzatu remastr xten lei näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te gan'ni Dios si'c rajntuni. Luxh che ahuiilajz bejnga xtiidxtu, rujntuni tio'p huält maazru te xi'n gabijl loj ni najctu.

<sup>16</sup> ĴProobzatu, najctu si'c lotiä'p, rlaĵztu guluiitu nezyuj! La'tu ni rnii palga te bejn ġuiniliipac xtiidxnġ guzä'tni ġuidoro, xhet sajcdi xtiidxnġ. Palga ġuiniliipacni guzä'tni oor ni yu' neġ ġuidoo, dxeġc sii rniliini dxeġc nungäĵl ġuzoobni xtiidxnġ.

<sup>17</sup> ĴBen nayääl, benlotiä'p! ĴXhini'c sajcru? ĴLa oor la ġuidoro ni rundxan oorga?

<sup>18</sup> Rniizatu: "Palga te bejn ġuiniliipacni guzä'tni lo bacuug ni yu' neġ ġuidoro, di xcuentdi xtiidxnġ. Luxh palga yu' chu ġuiniliipac guzä'tni ġojn ni dzuub lo bacuug, dxeġc sii rniliipacni dxeġc nungäĵl ġusoobni xtiidxnġ."

<sup>19</sup> ĴBen nayääl, ben lotiä'p! ĴXhini'c sajcru? ĴLa ġojn o la bacuug nani rundxan ġojnga, ä?

<sup>20</sup> Nani ruzä't lo bacuug che rniliipacni, et ġanaxdi lo bacuug ruzä'tni, näĵza ġuiraa ni tre' lo bacuug ruzä'tni.

<sup>21</sup> Ni ruzä't ġuidoro che rniliipacni, et ġanaxdi ġuidoro ruzä'tni, näĵza Dios ni rbäĵza neġ ġuidoro ruzä'tni.

<sup>22</sup> Sigajcza ni ruzä't ġuibaa che rniliipacni caguzä'tzani yagxhilo xten Dios näĵza lagajc Dios ni sobga' ro'c.

<sup>23</sup> ĴProobzatu remastr xten leii näĵzatu refarisee, najctu benguijdx! Bedzxtiil, anis näĵza comġn ni rajptu, rudeedtu lo Dios tej tantga yeġc cade te tzuu, niluxh ditu ĵiu ni sajcru lo xtidx Dios, cadro caj xcuent yäl'nabanya, yäl'rulazlajz, näĵza yäl'rililajz. Deeza ni riäĵpac ġuntu laĵ ni cayujnzatu steega.

<sup>24</sup> ĴLa'tu, lotiä'p ni rlaĵz guluii nezyuj! Riutu rediidx ni ġuxii sajġ, niluxh rediidx ni sacduxh ditu ĵiuni, najctu si'c bejn ni rbää te rex lo xpla'tni dxeġcru räĵmni te cameii.

<sup>25</sup> ĴProobzatu remastr xten leii näĵzatu refarisee, najctu benguijdx! Rusiatu detz bas näĵza pla't luxh nenni najc-dxuudx. Sigajcza la'tu riuduxhtu recostumbr, luxh lastootu ġuidxa yäl'gubaan näĵza yäl'rdxe'chlaĵz.

<sup>26</sup> Farisee ni najc lotiä'p: ġudibxгаа neġ bas näĵza neġ pla't, dxeġc näĵ deĵtznġ sajġ naya.

<sup>27</sup> ĴProobzatu remastr xten leii näĵzatu refarisee, najctu benguijdx!, sa'csi najctu si'c rebaa ni nacches'a'c; nolbäĵreni, saru rluiini, luxh neġreni ġuidxa dĵujt xte bengut näĵza bälyudx.

<sup>28</sup> Sigajcza najctu la'tu. Saru ruĵn loĵtu, rchalo rebeĵn najctu beġsa'a'c, niluxh lastootu ġuidxa yäl'rusguee näĵza yäl'guyalajz.

<sup>29</sup> ĴProobzatu remastr xten leii näĵza refarisee, najctu benguijdx! Runcheetu xpaä redade' ni ġunii xtidx Dios ġaloo, rusucheedzatu ro' xpaä rebeĵn ni ġujc beġsa'a'c,

<sup>30</sup> dxeġc rniitu: "Paru nibajnnu neġ redxeġ ni ġubajġ retoxtadġoldoonu dinu niacnäĵ reni bagu't redade' ni ġunii xtidx Dios."

<sup>31</sup> Lagajc con rediidxre rcäĵptu najctu rexajġ renani bagu't redade' nani ġunii xtidx Dios.

<sup>32</sup> ĴColġuscuaäz ġuntu sa' recos ni ġuläxteġ retoxtadġoldootu!

<sup>33</sup> ĴLa'tu ni najc si'c bäl, la'tu ni najc si'c te bitiäz ġuidxa bäl'nialajz! ĴXho ġuntu te na'c chäätu ġabijl par teĵpas?

<sup>34</sup> Ni'cni, ġuxhalä rexpənä ni ġuinii xtidxä, näĵza beġnajġ, näĵza mastr. Luxh yu'reni sugu'ttu sucuaatunġni lo crujz; yu'zarenġ siguijntu neġ reguidobäz, sirinajlturenġ ġueĵdx por ġueĵdx.

<sup>35</sup> Si'cza yeġctu ĵiaĵ xteġjn ġuiraa rebennadolajz ni bagu't beġn xcheĵli toAbel ni ġujc nadolajz, xcheĵliza Zacarias, xi'n Berequias, ni bagu'ttu neġ ġuidoro ġajxh lo bacuug.

<sup>36</sup> Rniliäpac loĵtu, doĵl xten ġuiraa recosga siaĵb yeġc rebeĵn ni tre' lo ġuedxliuj näĵ.

*Jesús biin xcuent ġuedx Jerusalén*

*(Lc. 13:34-35)*

<sup>37</sup> Räĵpza Jesús:

—ĴJerusalén, Jerusalén! Xpeĵnlu rugu't redade' ni rnii xtidx Dios, rucuaazarenġ ġuij yeġc rebeĵn ni ruxhal Dios te ġusule'reni xtiidxnġ loĵtu. ĴBalti huält rlažä nutie'ä la'tu si'cni rutie' ġuidco'c rexquidbäzni neġ xhigani, per ditu nicäĵb!

<sup>38</sup> Colġhuii xho ĵianxteb xquidootu cuälazreneni.

<sup>39</sup> Rnixgaä loĵtu, näĵ dirutu fii loä, dxeĵli che ġuiniitu: "Benle' Dios nani siääd xcuentni."

## 24

*Jesús räĵp sibijl ġuidoro*

*(Mr. 13:1-2; Lc. 21:5-6)*

<sup>1</sup> Birii Jesús neġ ġuidoro te asiini, dxeġc ġubig rexpeĵnġpacni loĵni, ġusloĵ caguluiireni reyuduxhga loĵni.

<sup>2</sup> Dxeġc räĵp Jesús loĵreni:

—ĴLa ruhuiitu ġuiraa reyure? Rniliäpac nicla tej ġuij di ĵia'n yeġc sa'ni ree; ġuiragajc reyure sibijl.

*Cos ni ġuluiġoĵ ġac fis*

*(Mr. 13:3-23; Lc. 21:7-24; 17:22-24)*

<sup>3</sup> Dxejcti huijreni yejc te dajn ni laa Oliib. Che gurej Jesús ro'c, biääd rexpejn pacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen gululoj ameer jäädlu näjza che ameer nitloj guedxliuj?

<sup>4</sup> Dxejc räjp Jesús lojreni:

—¡Colnatiro te rut gusgueedi la'tu!

<sup>5</sup> Sa'csi su' xhidajl reni jääd, naareni: “Narä nacä Crist”, luxh susgueereni xhidajl bejn.

<sup>6</sup> Siejn diajgtu xcuent cadro cayajc guer, näjza xcuent cadro rlaiz chu guer, na'c guidxe-jbtu sa'csi si'c nungäjl gac, niluxh gajd galdi nitloj guedxliuj.

<sup>7</sup> Sa'csi siäjs te naciön sidilnäjni stee naciön; te yälrnibee sujn guer con stee yälrnibee, luxh su' gubijn, su' yälgujdx, su'za xuduxh xhidajl lajt.

<sup>8</sup> Luxh guiraa redee cuäxtiejtis retrabajwduxh ni churu chu.

<sup>9</sup> Dxejc guteedreni la'tu ladznaa rebendojl te gusacsireni la'tu, te gugu'tzarenani la'tu, luxh guiraa rebejn sidxe'ch lojtu sa'csi sanälajztu narä.

<sup>10</sup> Neñ redxejga, xhidajlreni sibälaz xcälirilajzreni, sidxe'ch lo sa'reni, suto' sa'reni lo sa'reni.

<sup>11</sup> Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn.

<sup>12</sup> Sa'csi lacti suduxh yällatsiaj lo guedxliuj, diru bejn chanälajz sa'ni.

<sup>13</sup> Dxejcti bejn ni chasanäj xnezyujtis Dios, ni'c sun gaan xca'ni yäl nabajñ par tejpas.

<sup>14</sup> Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejrcu jääd fis xten Dios.

<sup>15</sup> Cheni fiitu asobga' te benguidxduxh neñ yu' ni najc dxan neñ guidoro, si'cni gunixgaa toDaniel ni gunii xtidx Dios gacni, bejn ni goj dee sugacbeeni nani rojni,

<sup>16</sup> dxejc renani rbäjz lo guedx Judea, suguxunreni gucuatzlojreni neñ dajn.

<sup>17</sup> Bejn ni niä'p yejc xyu'ni dxejga di galdi jäajtne te chaläni xhixtenni neñ xyu'ni;

<sup>18</sup> bejn nani cayujñ dzuun lo niaa, na'c guibi'ni niclaza chaxhiini xhajbni.

<sup>19</sup> ¡Proobza regunaa ni nuxi'n, näjza reni cagusiä' báz neñ redxejga!

<sup>20</sup> Colnabduxh loj Dios xhet neñdi redxej ni cayacnalduxhdi nanab guxunditu, niclaza dxej che rusilajz bejn.

<sup>21</sup> Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni.

<sup>22</sup> Luxh palga di Dios gutiu' yejc redxejga, nicla tej bejn di laa. Luxh sutiu' Dios yejc redxejga sa'csi rinälajzni reni aguleni.

<sup>23</sup> Neñ redxejga palga yu' chu naa lojtu: “Colhuii, aree Crist”, o “Colhuii ani arec”, na'c chalilajztuni.

<sup>24</sup> Siääd xhidajl niguii ni rusguee, gäbreni najcreni crist; sidzujñza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzarenani senro, parsi gusgueereni, susgueduxhrene rebejn, niluxh rlaizreni gusguezarenani rebejn ni agule Dios, ni rililajz xtiidxni.

<sup>25</sup> Agunixgaa lojtu xhini'c gac.

<sup>26</sup> Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neñ yu're”, na'c chalilajztuni.

<sup>27</sup> Sa'csi si'cni guideb xhaguibaa rien che rdinya' ladjiaa näjza ladjiatli, si'cza suhuiitu loä, Xi'n Dios ni gujc Niguii, cheni jäälsacä lo guedxliuj.

<sup>28</sup> Ni najntu cadro naga' te mangut, ro'c re' regolbetz.

*Cheni jäädsac Xi'n Dios ni gujc Niguii*

*(Mr. 13:24-37; Lc. 21:25-33; 17:26-30, 34-36)*

<sup>29</sup> Räjpzani:

—Cuantsi ted guiraa retrabajwduxh, sicäy lo gubijdx, diruza bäii gusanij, sitejzba rebajl ni yu' xhaguibaa, sinibduxhza guideb xhaguibaa.

<sup>30</sup> Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, sonduxhrene suhuiireni siääd Xi'n Niguii lo reza xhaguibaali. Siäädni con yälrnibee näjza yälrdimbichaduxh.

<sup>31</sup> Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squin guedxliuj, guideb lo guedxliuj näjza xhaguibaa.

<sup>32</sup> ¡Colguiseed ni ruluui yajg iigw! Che naren reñaani che cabäani be'n, asiääd bäi cures,

<sup>33</sup> sigajcza cheni fiitu cayajc guiraa recosre, sacbeetu asiädgajxh fis, rolä'li abidzujñni.

<sup>34</sup> Rniliäpac lojtu, guiraa redee sajc lañ ni nabajñ gaii rebejn ni suga' ree naj.

<sup>35</sup> Guibaa näjza guedxliuj sinitloj, niluxh xtidxä di nitloj.

<sup>36</sup> Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

<sup>37</sup> Sigajcni gujc neñ redxej che gubajñ toNoé, si'cza gac che jiälä Xi'n Dios ni gujc Niguii.  
<sup>38</sup> Neñ redxe galoo, cheni gajd nisguiduxhga jiajb, rebejn ni nabajñ dxejc cayajwreni, cayä'reni, caguchñaareni, cagudeedza bejn xindxa'preni guchñaä, dxejli cheni biu' Noé nen barcwro.

<sup>39</sup> Direni niacbee xtiidxni; cheni biäädli nisguiduxh ni sanä guiraareni dxejcru gucbeereni. Sigajcza gacni che jiälsacä narä Xi'n Dios ni gujc Niguii.

<sup>40</sup> Neñ redxejga palga cayujñ tio'p bejn dzuun lo niaa tejni guibee, steeni sia'n.

<sup>41</sup> Palga cayo't tio'p gunaa xobniil, tejni guibee, steeni sia'n.

<sup>42</sup> Ni'cni col̄susin, sa'csi ditu gan xhi dxej jiääd Dad xtentu.

<sup>43</sup> Col̄ganchee, paru niacbee baxhwaan xten yu' cor̄ yälä niääd gubaan ni siädlan rolizjni, nisiusin̄ni dxejc, dini nusaan niu'ni rolizjni te cuanni.

<sup>44</sup> Ni'cni col̄susin̄za la'tu, sa'csi siääd Xi'n Dios ni gujc Niguii lagajc or̄ ni ditu gun xhigab jiäädni.

*Xcuent te mossa'c näjza te mosguijdx*

*(Lc. 12:41-48)*

<sup>45</sup> '¿Chuni'c najc mossa'c ni ruzoob diidx, ni basannäj xlam̄ni rebejn ni yu' rolizjni te guedeđni xhi gaureni ä?

<sup>46</sup> Chichaa mos ni saru cayujñ xtzuunni che guidzujñ xlam̄ni.

<sup>47</sup> Rniliäpac lojtu, lam̄ga susa'nni sa' mosga te fini guiraa xhixtenni.

<sup>48</sup> Dxejc palga mosga di gusoob xtidx xlam̄ni, gunni xhigab: "Sacladuxh guibi' xlam̄ä",

<sup>49</sup> dxejc guisloj cagusacsini resamosni, guislojni gaunäjni, yänäjni rebengu.

<sup>50</sup> Dxejc sidzujñ xlam̄ni dxej che dini gun xhigab jiäädni, luxh or̄ ni dini gan guidzujñni.

<sup>51</sup> Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sONDUXHNI, chubejli reläjyni.

## 25

*Xcuent tzuu gunaa*

<sup>1</sup> Räjpa Jesús:

—Pues xcäl̄rnibee Dios najc si'c tzuu gunadxa'p nani cua' xcandilse'treni te huijreni te sa'.

<sup>2</sup> Gaii regunaaga nasin, sgaiireni nayääl.

<sup>3</sup> Reni nayäälga sanäreni xcandilreni, niluxh direni nica' sijn se't.

<sup>4</sup> Niluxh reni nasin̄ga sanäreni sijn se't te guze'creni neñ xcandilreni.

<sup>5</sup> Sa'csi bi'nga di nidzujñgaj, gunaa bacal̄ regunadxa'pga, gudiejstireni.

<sup>6</sup> Dxejc si'cti garol yääl, biejn te xse' ni räjpa: "Bi'n asiääd, colchäj, colchachaglojni."

<sup>7</sup> Guiraa regunaare huistieguxun̄reni, dxejc bensa'creni xcandilreni, te cuaguijreni.

<sup>8</sup> Dxejc guigaii regunayääl räjpreni loj reni nasin̄: "Col̄gumidklaa te bo'c se't gusanijnu xcandilnu, sa'csi arlajzni jiuini."

<sup>9</sup> Dxejcti regunanasin̄ räjpa lojreni: "Digacdini, dxejc dini gal̄ nicla par nuurnu nicla par la'tu. Colchäj cadro ruto'reni se't colchazii xse'ttu."

<sup>10</sup> Lal̄ni sasiu guigaii regunaa-nayäälga se't, bidzujñ bi'n. Regunaa-sin̄ ni cabäjz bi'n biunäjrenini lo sa', biäauti ro lä'.

<sup>11</sup> Cheni bidzujñ regunamayäälga, räjpreni: "Dad, Dad, baxhal ro lä'."

<sup>12</sup> Dxejc räjpa lojreni: "Rniliäpac lojtu, dina gumbeätu."

<sup>13</sup> Dxejc Jesús räjpa lojreni:

—Col̄susin̄za, sa'csi ditu gan nicla xhi dxej nicla xhi or̄ siääd Xi'n Dios ni gujc Niguii.

*Xcuent lam̄ ni badeed meel*

<sup>14</sup> Xcäl̄rnibee Dios xhaguibaa najc si'c te bejn ni agojñ guirii chääni zijt te biaj. Gurejdxni rexmosni, badeedni meel lojreni.

<sup>15</sup> Lo tejni badeedni si'cti gaii miñ meel, lo steeni badeedni si'cti tio'p miñ, dxejc steeni cua' te miñ. Loj tejjani badeedni si'cti ni rujñni xhigab sajñ gunnäjreni dzuun, dxejcti biriini xpiajni.

<sup>16</sup> Ni cua' gaii miñ meel bejn te dzunro, bejnñi gaan sgaii miñ meel.

<sup>17</sup> Sigajcza ni cua' tio'p miñ meel, bejnñi gaan stio'p miñ.

<sup>18</sup> Dxejcti ni cua' te miñ meel, huicua'tzni xmeel xlam̄ni neñ te gueed ni gudäänni lo yuj.

<sup>19</sup> Gudejdti balti bäii, dxejc gubi' xlam̄ni remosga, bejnñi cuent loj guiraareni.

<sup>20</sup> Che bidzujñ ni cua' gaii miñ meel, bidzun̄näjni sgaii miñ meel ni bejnñi gaan, räjpa loj xlam̄ni: "Dad, baniidx guejblu gaii miñ loä. Aree sgaii miñ meel ni benä gaan."

<sup>21</sup> Räjpa xlam̄ni lojni dxejc: "Hueenca, mos hueen najclu, rusoobzalu xtidxä. Sa'csi gujclu bensa'c con te cos báz, naj sunidxä guinibeelu xhiroobru. Biu' loä, bibalaznäj narä."

<sup>22</sup> Che bidzujñni ni cua' tio'p miñ meelga, räjpa loj xlam̄ni: "Baniidx guejblu tio'p miñ meel loä, aree stio'p miñ meel ni benä gaan."

<sup>23</sup> Rájǰ xlamni lojni: “Mbaj. Mos hueen najclu rusoobzalu diidx. Sa'csi gujclu be<sub>nsa</sub>'c con te coshá, naj sunidxá guinibeelu xhiroobru. Biu' loá, bibalaznáj nará.”

<sup>24</sup> Che bidzujǰ mos ni cua' te miǰ meel, rájǰni lo xlamni: “Dad, ananá najclu te bejǰ ni di gulazlajǰ; rca'lu cose'ch cadro dilu nibe'c binij, rutojǰzalu cadro dilu nutie'ch binij.

<sup>25</sup> Ni'cni bidxebá, huicua'tzá xmeellu neǰ yuj. Niluxh axh aree xmeellu.”

<sup>26</sup> Dxejǰ rájǰ xlamni lojni: “ǰMos guijǰx, mos plojǰ! Najnlu rca'á cose'ch cadro dina nibe'cá binij, rutopá cadro dina nutie'chá binij.

<sup>27</sup> Riájǰ nisa'nlu xmelá neǰ te bancw te che nibi'á nicasacá xmelá con xi'nni ni niujǰni gaan.”

<sup>28</sup> Dxejǰ rájǰni loj reni suga' ro'c: “Colgudzucaj te miǰ meel ni ca'ni colgudeedni loj ni rajǰ tzuu miǰ meel.

<sup>29</sup> Sa'csi loj ni rajǰ sudedáru, niluxh ni xhet rajǰdi sudzucáá tudxe'n nani rajǰni.”

<sup>30</sup> Dxejǰ rájǰni: “Colca' mosre ni xhet sajǰdi, colguzáǰni lo yáǰnacáǰy, cadro chu yáǰronduxh, náǰza yáǰrajw reláǰy bejǰn.”

### *Yáǰluxhtis xten reguejǰx*

<sup>31</sup> 'Che jiádsac Xi'n Dios ni gujǰ Niguui con yáǰrdimbicha' xtenni, siádnáni rexangl Dios. Dxejǰ sibejǰni lo tron ni rdimbicha' xtenni te guinibeeni.

<sup>32</sup> Dxejǰ sidojǰ nez lojni guiraa rebeǰ guedxliuj. Dxejǰ sibeni lojreni, silia'ni sa'reni si'c rujǰ te baxtoor cheni rbeni rexiil loj redxib, te rlia'reni loj sa'reni.

<sup>33</sup> Suzujǰni rexiil xladbeeni dxejǰ redxib xladbáǰgwini.

<sup>34</sup> Dxejǰ sáǰb reii loj reni suga' xladbeeni: “Coltaa, la'tu ni beǰle' Xtaá. Coljiu' lo yáǰrnibee ni guc-chee cheni guzoblojǰli guedxliuj.

<sup>35</sup> Sa'csi che calaná la'tu baniidx xhi gudauá, che cayolá, la'tu baniidx xhi gu'á. Che cuanzaá si'c te benzjǰt, la'tu baniidxlaatu cadro bia'ná.

<sup>36</sup> Che xheti xhabá, la'tu baniidxni, che gucxhuá, la'tu biádhuiitu nará, che guyu'á neǰ latzguiib, biádhuiitu nará.”

<sup>37</sup> Dxejǰ sinii reni suga' xladbeeni, sáǰbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojǰllu, baniidxnu xhi gu'lu?

<sup>38</sup> ¿Guc bahuiinu najclu si'c te benzjǰt, baniidxnu cadro bianlaalu, o biáádx xhajǰlu, baniidxnu xhi gojǰtlu?

<sup>39</sup> O ¿guc bahuiinu cayacxhuulu, o yu'lu neǰ latzguiib, biophuiinu lojlu?”

<sup>40</sup> Dxejǰ reiiǰa sáǰb lojreni: “Rniliápac lojtu, xhitis xhi bejǰntu loj te rexpená ni rnii xtidxá mase proobreni, lagajǰ loá bejǰntu recosga.”

<sup>41</sup> 'Dxejǰ sáǰǰzani loj reni suga' ladbáǰgwini: “Colguibicaj loá, beǰguijǰx, colcháǰ lo balduxh ni cayejǰ par teǰpas ni cayejǰ par beǰdxab ni rnibee náǰza rexpenǰxabni.

<sup>42</sup> Sa'csi gulaná, luxh ditu nuniidx xhi niauá; biolá, per ditu nuniidx xhi niá'á;

<sup>43</sup> cuanzaá si'c te benzjǰt, luxh ditu nunidxlaa cadro nia'ná, biádxza xhabá, niluxh ditu nuniidx xhi niacwá; gucxhuá, guyu'áza neǰ latzguiib, niluxh ditu niádhuii loá.”

<sup>44</sup> Dxejǰ laareni sáǰbreni: “Dad, ¿guc bihuiinu calaanlu, o cayojǰllu, o canzajǰlu si'c te benzjǰt, o cayáádx xhajǰlu, o cayacxhuulu, o yu'lu neǰ latzguiib, luxh dinu niacnáǰlu?”

<sup>45</sup> Dxejǰ sáǰb reiiǰa lojreni: “Rniliápac lojtu, loj xhitis ni ditu niacnáǰ rebejǰni ni rililajǰ xtidxá, mase proobreni naráni ditu niacnáǰ.”

<sup>46</sup> Dxejǰti sij rebejǰne lo yáǰrusacsáǰ par teǰpas, per rebejǰni nadolajǰ, ni agule Dios, sijreni lo xcáǰnabajǰ Dios par teǰpas.

## 26

### *Bejǰreni xhigab xho guiniaazreni Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Che gulujǰ gunii Jesús rediidxre, rájǰni loj rexpejǰpacni:

<sup>2</sup> —Anajǰntu stio'p dxejǰtis cayáádx gac lanij ni laa pascw. Luxh sutedreni nará, Xi'n Niguui ladznáa reni gucuaa nará lo cruz.

<sup>3</sup> Dxejǰ bidojǰ rebejǰni ni rnibee rebixhojǰ, náǰza remastr xten leii, náǰza rebeǰgool lo rexpejǰni Israel. Lo xle' Caifás, ni rnibee loj rebixhojǰ, bidojǰpreni.

<sup>4</sup> Ro'c bachaagreni diidx xho guiniaazreni Jesús con yáǰrusguee, te ju'trenini.

<sup>5</sup> Luxh rájǰpreni lo sa'reni:

—Na'c jiennuni neǰ redxe lanij, te di gun rebejǰni bieiduxh.

### *Te gunaa ni biádná perfum*

(Mr. 14:3-9; Jn. 12:1-8)

<sup>6</sup> Che yu' Jesús guedx Betania, rolijǰ Simón te bejǰni ni basiaǰcni che raǰ tiejǰxhni,

<sup>7</sup> ro'c gubig te gunaa lojni, ca'ni te vasguijǰ ni laa onix, guidxani te perfum ni sajǰ melro. Che sobga' Jesús lo mex, bachajǰni perfum yejǰ Jesús.

8 Che bahuii rexpejn̄pacni xhi cayuj̄nni, bidxe'chreni, gusloj cayäj̄preni:

—¿Xhicuent casäl̄xlia'ni perfumga?

9 Perfumre ni ajc nido'ni, nirii xhidajl meel lojni te niacnäj̄ni reben̄proob.

10 Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäj̄tu gunaare? Ni te coshueen najc dee nani bejn̄ni loä.

11 Ni guirasi dxej su' rebejn̄ ni xhet rajpdi lojtu, peta narä guxii dxej su'ä lojtu.

12 Nani bejn̄ gunaare che bachajni perfumre guideb lagaa tiexhä, najcni par guzucheeni narä te guiga'tzä.

13 Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj̄ gunaare narä, te guinaj lajzreni gunaare.

*Judas bato' Jesús*

*(Mr. 14:10-11; Lc. 22:3-6)*

14 Dxejc lo retzubitio'p rexpen̄pac Jesús birii tej ni laa Judas Iscariote, huininäj̄ni rebejn̄ ni rnibee loj rebixhojz,

15 räjpni:

—¿Lac guniidxtu loä te gutedä Jesús ladzn̄aatu?

Dxejc badeedreni galbitzuu melpla't lojni.

16 Dxjecl̄i caguuil Judas xho gutedni Jesús lojreni.

*Lult xchej xten Jesús*

*(Mr. 14:12-25; Lc. 22:7-23; Jn. 13:21-30; 1Co. 11:23-26)*

17 Primer dxej lanij, dxej ni rajwreni yätxtiil ni di saguij, gubig rexpejn̄pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

18 Dxejc räjpni lojreni:

—Colchäj̄ lo guejdx rolizj te dade', colye'tz lojni: "Si'c naj Dad mastr: Asiäddz̄ungajxh xorni, ni'cni rolizjlu gaunäj̄ni rexpejn̄ni xchej lanipascw."

19 Bejnti rexpejn̄pacni si'cni gunibee Jesús gac, bazucheereni xchej xten pascw.

20 Che biu' guxhij̄n, sobga' Jesús lo mex con retzubitio'p xpejn̄pacni.

21 Laḷ ni cayajwreni räjpni lojreni:

—Rniliä lojtu, yu' tejt̄u ni guto' narä.

22 Dxejc guc-huinuxh lajzreni, räjpreni lojni:

—Dad, ¿andi naräni?

23 Dxejcti räjp Jesús lojreni:

—Ni gaunäj̄ narä neñ tejtis pla't, laa ni'cni guto' narä.

24 Xi'n Dios ni gujc Niguui sajc si'ctis ni caj loj guijtz xten Dios, per gunatiro bejn̄ ni guto'ni. Huenru na'c ni ajl bejn̄ga.

25 Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

26 Laḷ ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn̄pacni, räjpni:

—Coltajw; dee najc si'c tiexhä.

27 Dxejc guläsni te vas, badeedni xquixtios lo Dios, dxejcti badeednini loj rexpejn̄pacni, räjpni:

—Guiraatu colyä',

28 sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn̄ te guslaanireni neñ dojl.

29 Luxh rniä lojtu, diruna yä'ä nis nani r̄ii yejc uub, dxejlini yänäsacätu lo xcäl̄rnibee Dios, Xtaä.

*Räjp Jesús sibälaz Pedroni*

*(Mr. 14:26-31; Lc. 22:31-34; Jn. 13:36-38)*

30 Che gulujx bil̄reni te dij, biriireni, sääreni lo dajn ni laa Oliib.

31 Dxejc räjp Jesús lojreni:

—Guiragajct̄u sactio'p lajzt̄u xcuentä, susa'ntu narä naguxhij̄n sa'csi lo reguijtz xten Dios caj scree: "Sugu'treni baxtoor dxejc sire'ch rexiiil."

32 Dxejc chen̄i guibañsacä lo rebengut, ganidä cha'ä región Galilee, dxejcti jiäd̄najltu narä.

33 Dxejc räjp Pedr loj Jesús:

—Masque guiraareni cuälazlu, narä dina cuälazälu.

34 Dxejc räjp Jesús lojni:



—Rniliäpac lojlu, lagajc guxhijñre, nicla gajd guidgäi cuedxa', luxh luj alagulälazlu narä choñ huält.

<sup>35</sup> Räjñ Pedr loj Jesús:

—Masque riäjñ guetnäälü, dina cuälazälü.

Dxejc sigajcza gunii guiraa rexpejnñpacni.

*Gurejdx-gunab Jesús loj Dios neñ Getsemani*

(Mr. 14:32-42; Lc. 22:39-46)

<sup>36</sup> Dxejcti bidzujñ Jesús näjza rexpejnñpacni te lajt ni laa Getsemani, räjpni lojreni:

—Colcuésijc ree lañ ni cuedx-guiniabä lo Dios.

<sup>37</sup> Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh.

<sup>38</sup> Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

<sup>39</sup> Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajñni, basanlaa tedcaj trabajwduxhre ni tedä, te na'c tedäni. Xhet si'cñi ni rlazä gacni; si'cpacni rlazlu gac, si'c gacni.

<sup>40</sup> Dxejcti gubi'ni cadro suga' guichon rexpejnñpacni, che bidzujñni ro'c, nagayejsreni. Räjñni lo Pedr:

—¿La di niajcdi nutie'chtu bacal lojtu nicla tebor, ä?

<sup>41</sup> Colguibajñ, colñab lo Dios te na'c jiajbtu neñ dojl. Guliipacni, lastootu nadip, niluxh tiejxhtu rdxajg.

<sup>42</sup> Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlazlu gacni.

<sup>43</sup> Dxejc gubisacni, bidxälñi rexpejnñpacni, nagayejsreni sa'csi yuduxh bacal lojreni.

<sup>44</sup> Basaannireni, dxejc säasacni, gurejdx-gunabni lo Dios ni riojn huält, gunisacni lagajc rediidx ni guniini galoo.

<sup>45</sup> Dxejc huijni cadro suga' rexpejnñpacni, räjpni lojreni:

—¡Naj sii, colguejs, colgusilajz! Abidzujñ or ni gutedreni Xi'n Dios ni gujc Niguii ladzñaa rebendojl.

<sup>46</sup> ¡Colchastie, colcho', colhuii! Asiääd nani guted narä ladzñaa rebendojl.

*Gunaazreni Jesús sanärenini pres*

(Mr. 14:43-50; Lc. 22:47-53; Jñ. 18:2-11)

<sup>47</sup> Lañni canii Jesús bidzujñ Judas, nani najc tej retzubitio'p xpejnñpacni. Bidzunñajni xhidalduxh bejn ni ca' espaad, ni ca' garo't, najcreni xpejnñ reni rnibee rebixhojz, näjza xpejnñ rebengool xten rexpejnñ Israel.

<sup>48</sup> Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgjacni.

<sup>49</sup> Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni.

<sup>50</sup> Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

<sup>51</sup> Per tej reni suganäj Jesús gulääni te spaad, batiu'ni diajg te mos xten rebixhojz ni rnibee.

<sup>52</sup> Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni.

<sup>53</sup> ¿La ditu gan sajca guiniabä lo Xtadä, luxh laani suxhalgajcni gayonbitzubitio'p miñ xanglni gacñaj narä?

<sup>54</sup> Dxejc xho gac soob diidx ni caj lo reguijtz xten Dios ni rnixgaa riäjñ gac guiraa recosre lagajc si'cni cayajcni.

<sup>55</sup> Dxejc räjp Jesús loj rebejnñ xhidajlga:

—¿La siädñatu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu neñ guidoro, luxh ditu niniaaz narä.

<sup>56</sup> Niluxh guiraa recosre cayajc te soob rediidx ni caj lo reguijtz ni bacuaa redade'ni gunii xtidx Dios.

Dxejcti guiraa rexpejnñpacni basanxtebreni Jesús, baxunñreni lojni.

*Jesús nez loj rebixhojz**(Mr. 14:53-65; Lc. 22:54-55, 63-71; Jn. 18:12-14, 19-24)*

<sup>57</sup> Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojz guiraa rebejn nani ruluii leii näjza rebengool xten xpejn Israel.

<sup>58</sup> Dxejcti zit-zijt biädnajl Pedr rebejnga, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

<sup>59</sup> Reni rnibee rebixhojz, näjza rebengool con guiraa reni rajp yälrnibee gosloj caguilireni xhitis te diidx, masque xhet guliidini, te gucuaquijreni Jesús te guinibeereni guetni.

<sup>60</sup> Niluxh xhet bidxäldireni, luxh gubig xhidajl bejn, guniireni xhidajl didx-xhii xcent Jesús. Dxejcti bidzujn tio'p dade' ni gunii didx-xhii,

<sup>61</sup> räjpreni:

—Niguiire gunii scree: “Narä sajc gutzulä guidoro xten Dios, sajcza gunchesacäni nen choñ dxej.”

<sup>62</sup> Dxejc gosulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

<sup>63</sup> Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajñ. Gunii don, ¿la luj najc Crist, Xi'n Dios?

<sup>64</sup> Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jialä lo reza ni tre' xhaguibaa.

<sup>65</sup> Dxejc batiäjs dade' ni rnibee loj rebixhojz xhajbni, räjpni:

—¿Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

<sup>66</sup> ¿Xhi rchalotu?

Dxejc basejcreni diidx:

—¿Abiga'ni! Riäjñ guetni.

<sup>67</sup> Dxejc batiobxhejnreni lojni, gudijnrenini. Yu'reni gudajp lojni,

<sup>68</sup> räjpreni lojni:

—Palga najclu Crist, gunii chuni'c gudijnlu.

*Di Pedr nicäjp numbeeni Jesús**(Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Lañ ni cayaic reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

<sup>70</sup> Per di Pedr nicäjp nez loj guiraarenini, räjpni:

—Dina ganä xhini'c caniilu loä.

<sup>71</sup> Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

<sup>72</sup> Dxejc basguee Pedr stehuält, räjpni:

—Rniliäpac dina gumbeä dade'ga.

<sup>73</sup> Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejnñ; huenliisi riejn diidx ni rniilu.

<sup>74</sup> Dxejcti goslojni cagueni, caguzä'tni Dios, räjpni:

—Dipačna gumbeä niguiiga.

Guniitismi si'c, chela guredxa' te guidgaii.

<sup>75</sup> Dxejrcru banalajz Pedr rediidx ni gunii Jesús lojni che räjpni: “Che gajdli guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gosloj cayon-duxhni.

**27***Batedreni Jesús loj Pila't**(Mr. 15:1; Lc. 23:1-2; Jn. 18:28-32)*

<sup>1</sup> Che bianij lo guedxliuj, guiraa reni najc rebixhojz ni rnibee näjza rebengool xten rexpelj Israel bia'nreni diidx xho gunreni ju'treni Jesús.

<sup>2</sup> Baliibrenini, guläärenini ro'c, huisa'nrenini loj Poncio Pila't, ni najc gubernadoor.

*Xho gujt Judas*

<sup>3</sup> Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool.

<sup>4</sup> Räjpni:

—Banitduxhä lo Dios sa'csi bato'ä te bejn ni xhet bejnä.

Dxejc räjpreni lojni:

—Xhixh gunnu. Ni'c najc xcuentlu; luhti najn.

<sup>5</sup> Dxejc bacuaa Judas meelga lo yuj nen guidoro, biritini ro'c. Sas huijni, baliibni te duu guejnä, gojni lo te yajg, ro'cti gujtni.

<sup>6</sup> Rebixhojz ni rnibee batojpreni meelga, räjpreni:

—Di gac di guizälnu meelre nen caj gojn sa'csi najcni xcuent xtiejn te bejn.

<sup>7</sup> Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt.

<sup>8</sup> Ni'cni najli rniireni yujga: “Yurejn”.

<sup>9</sup> Si'c gusojb diidx ni gunii Jeremias, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejnä.

<sup>10</sup> Con meelga guziireni yuj lo bejn ni runchee guejs, sigacni gunibee xtdadnu Dios.”

*Gusuj Jesús nez loj Pila't*

(Mr. 15:2-5; Lc. 23:3-5; Jn. 18:33-38)

<sup>11</sup> Bidzunnäreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

<sup>12</sup> Lalni cabe'c rebixhojz ni rnibee näjza rebengool rexquej Jesús xhetliidi guniidi Jesús.

<sup>13</sup> Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

<sup>14</sup> Per xhetliidi diidxdi basej Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

*Gunibeereni guet Jesús*

(Mr. 15:6-20; Lc. 23:13-25; Jn. 18:38-19:16)

<sup>15</sup> Nen redxe lanij rajpreni costumbr rusläa Pila't tej bejn ni cue rebejn loj reni yu' nen latzguuib.

<sup>16</sup> Nen redxejga guyu' te bejn ni säab xtiidxni ni laa Barrabás.

<sup>17</sup> Cheni tre' guiraareni ro'c, gunabdiidx Pila't lojreni:

—¿Chuni'c rlanjtu gusläa, la susläa Barrabás o Jesús ni laa Crist?

<sup>18</sup> Sa'csi najn Pila't rdxe'chlajzreni lo Jesús, ni'c bateedrenini lojni.

<sup>19</sup> Lañ ni sobga Pila't lo yajgxiil cadro rujni yälguxhtis, baxhañ chäälni diidx lojni, räjpni:

—Xhet gundilu dade'ga ni xhet bejnä, sa'csi nuchej nadxuudx gunixcalä xcuentni.

<sup>20</sup> Niluxh rebixhojz ni rnibee näjza rebengool baquuilreni rebejn te gunabreni läa Barrabás, näjza te guet Jesús.

<sup>21</sup> Dxejcti gunii gubernadoor stehuält, räjpni lojreni:

—¿Chu tej loj guiro'preni rlanjtu gusläa?

Dxejc guredxa'reni, räjpreni:

—jBarrabás!

<sup>22</sup> Gunabdiidx Pila't, räjpni:

—¿Xhi gunnä Jesús ni laaza Crist?

Guiraareni guredxa':

—Bacuaani lo cruzj.

<sup>23</sup> Dxejc räjp Pila't lojreni:

—¿Xhi latsiaj bejnä?

Niluxh laareni guredxa'rureni, räjpreni:

—jBacuaani lo cruzj!

<sup>24</sup> Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejnä. La'tu colhuii xho guntu. Xcuenttitu najcni.

<sup>25</sup> Dxejc guiraa rebejnä badzu' diidxre, räjpreni:

—Suxcaquijnu xtiejnä, nuurnu näjza rexi'nnu.

<sup>26</sup> Dxejc basläa Pila't Barrabás, dxejc gunibeeni gudijnreni Jesús dxejc bateednini ladznäa rebejn te gucuaarenini lo cruzj.

<sup>27</sup> Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni.

<sup>28</sup> Dxejc gulääreni xhajbni, bashuajcwrenini te lad xniaa.

<sup>29</sup> Dxejc bencheereni te coron guejch, basälrenini yejcnä, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—jCollä'p xpala'n reii xten rexpejn Israel!

<sup>30</sup> Sas batiobxhejnreni lojni, cua'reni yabixijlga te ni'c batiäjlneni yejnci.

<sup>31</sup> Che gulujx baxhiznäjnrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

*Bacuaareni Jesús lo cruzj*

(Mr. 15:21-32; Lc. 23:26-43; Jn. 19:17-27)

<sup>32</sup> Cheni sariireni, bidxaagreni te bejn ni siäd guedx Cirene, laani Simón, basguureni dade'ga xcruzj Jesús.

<sup>33</sup> Che bidzujnreni te lajt ni laa Gólgota, nani säloj: dan Calabeer,

<sup>34</sup> ro'c badeedreni bin nu'ch cuanlaa te gu' Jesús. Te bochäztisni gu'ni, dxejc naaddiruni niä'nini.

<sup>35</sup> Cheni abacuaareni Jesús lo cruzj, gudzujt resoldaad yejc xhajbni, te si'c gudisreni xhajb Jesús cua'reni, te si'c guzobj diidx xten te dade' ni gunii xtidx Dios.

<sup>36</sup> Gurejtireni ro'c, gusloj canäjreni Jesús.

<sup>37</sup> Yejc cruzjga bacuaareni te guijt con letro. Lo guijtza rcaj xhini'c najc xtojł nani cayejt. Lo guijtza caj: “Dee najc Jesús reii xten rexpejn Israel.”

<sup>38</sup> Näjza tio'p gubaan cuaj lo stio'p cruzj con laani. Tejni cuaj lo te cruzj xladbee Jesús, steeni cuaj xladbäjgwini.

<sup>39</sup> Luxh renani sadejd nejzga guniyajreni Jesús, cagusniibreni yejcreni,

<sup>40</sup> cayäjpreni lojni:

—jja'ä! Luj ni nutiexhlu guidoo, luxh chontis dxej niunchesacluni; palga guli najclu Xi'n Dios, biäjt loj cruzjga.

<sup>41</sup> Näjza rebixhojz ni rnibee, näj remastr xten leii, baxhiznäjnrenini räjpreni loj sa'reni:

<sup>42</sup> —Baslaani xhidajł bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtni lo cruzj nañaj te chalilajznu xtiidxni.

<sup>43</sup> Huinälajzni Dios, ñaj suguslaa Diosni palga sanälajz Diosni; ni najni: “Narä nacä Xi'n Dios.”

<sup>44</sup> Regubaan ni caj lo recruzj sigajcza guniyajreni Jesús.

*Che gujt Jesús*

(Mr. 15:33-41; Lc. 23:44-49; Jn. 19:28-30)

<sup>45</sup> Dxejcti bicäjy guideb guedxliuj läidxej hasta rcachon gudxej.

<sup>46</sup> Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

<sup>47</sup> Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

<sup>48</sup> Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús.

<sup>49</sup> Dxejc reni tre' ro'c räjp:

—Basaan; guidon la siäd Elías te guslaanini.

<sup>50</sup> Dxejc guredxaduxh Jesús stehuält, baslaatini xpritni.

<sup>51</sup> Lagajc orga biräsya' ladro ni zääb neñ guidoro, gujcní tio'p la' jiaali hasta lo yuj. Gujc te xuro, sas gusuj bej reguiro.

<sup>52</sup> Dxejc gubicağ reguij ni niäuu ro' rebaa, luxh gubañsac xhidajł xpejn Dios ni gujt aguc xchej.

<sup>53</sup> Dxejcti, che huäjs Jesús lo rebengut, biriireni neñ baa, baluilojreni lo xhidajł bejn ni rbäjz guedx Jerusalén.

<sup>54</sup> Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

<sup>55</sup> Zijtru tre' xhidajł regunaa ni biädñajł Jesús che biriini nez Galilee te bahuiirenini. Cadxelojtisreni guiraa ni cayajc ro'c.

<sup>56</sup> Tej regunaaga najc Marii Magdalen, steeni najc Marii xnan Jacobo näjza José, steeni najc xnan rexi'n Zebedeo.

*Huicua'tzreni Jesús*

(Mr. 15:42-47; Lc. 23:50-56; Jn. 19:38-42)

<sup>57</sup> Che gojł gudxej, bidzujn te beñrajp ni siäd guedx Arimatea; laani José. Näjza dade'ga najc tej reni birinajł Jesús.

<sup>58</sup> Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni.

<sup>59</sup> Cua'ti José tiejxh Jesús, batejbnini neñ te bariadya,

<sup>60</sup> huitixhnini neñ xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini.

<sup>61</sup> Sobga'za Marii Magdalen nájza stee Marii nez loj baa, bahuiireni biga'tzni.

*Xhi räjp resoldaad ni cuanäj xpaá Jesús*

<sup>62</sup> Che gudej dxej xten ni gulec-cheereni lanij, bara yääl bidoj rebixhojz ni rnibee nájza rebejn ni laa refarisee, bidzujnreni loj Pila't,

<sup>63</sup> räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choñ dxej sibansacni loj rebengut.”

<sup>64</sup> Ni'c baxhal chu chacanäj ro' baaga dxejli guisa' choñ dxej, te di chää rexpejn pacni chaläärenini tiejxhni, dxej gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

<sup>65</sup> Räjp Pila't lojreni:

—La'tu rajptu te cuaa soldaad; colchäj, basäutu'tz ro' baaga si'ctis ni sajc guntu.

<sup>66</sup> Dxejcti sääreni, basäutu'tzreni ro' baaga; con resoldaad bacuaareni te sei lojni te tut fal'dini. Dxej basa'nreni resoldaad canäj ro'c.

## 28

*Sibansac Jesús loj rebengut*

(Mr. 16:1-8; Lc. 24:1-12; Jn. 20:1-10)

<sup>1</sup> Che gudejd sabd, dxej ni ruzilajz rexpejn Israel, che gosloj cayänij lo guedxliuj te jiu' stee xmaan, bidzujn Marii Magdalen nájza stee Mariiga, siädhuiireni lo baa.

<sup>2</sup> Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxej gurejni yejc guigja.

<sup>3</sup> Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb.

<sup>4</sup> Che bahuii resoldaadni, bichebduxhreni, sädiidxreni, gujcreni si'c bengut.

<sup>5</sup> Dxej räjp guixhajg xte Diosga loj regunaa:

—Na'c guidxejbtu. Ananä caguuiltu Jesús ni cuaj lo cruiz.

<sup>6</sup> Rutini ree sa'csi agubansacni sigajc ni najni. Coltahuii cadro gojtnei.

<sup>7</sup> Colguxun, colchaye'tz loj rexpejn pacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

<sup>8</sup> Dxejcti rusquenduxh regunaaga, biriireni ro' baaga. Cadxejbreni, cabalazduxharenini sanäreni diidx loj rexpejn pac Jesús.

<sup>9</sup> Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojñrenini.

<sup>10</sup> Dxej räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

*Rediidx ni räjp resoldaad*

<sup>11</sup> La'ni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga.

<sup>12</sup> Dxej rebixhojz ni rnibee bachagsa'zarenini con rebengool te bia'nreni diidx gudeedreni xhiroob meel lo resoldaad,

<sup>13</sup> räjpreni lojreni:

—Scree colye'tz lo rebejn: “La' ni nagayesnu, canäjnu ro' baa, biääd rexpejn pac Jesús guläxhiga'tzreni tiejxhni.”

<sup>14</sup> Palga jendiäijg gubernadoor dee, siohuiinuni te di yu' xhi gunni la'tu.

<sup>15</sup> Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijcreni si'c.

*Baxhal Jesús rexpejn pacni*

(Mr. 16:14-18; Lc. 24:36-49; Jn. 20:19-23)

<sup>16</sup> Dxejcti sää retzubiteeb xpejn pac Jesús lo región Galilee, lo dajn cadro bia'n Jesús diidx guidxaagnireni.

<sup>17</sup> Cheni bahuiireni loj Jesús, bazuxhijbreni, gojñrenini, per yu' reni ractio'p lajzreni.

<sup>18</sup> Dxej gubig Jesús lojreni, guninäjnireni, räjpni:

—Arapä guiraa yälrnibee xhaguibaa nájza lo guedxliuj.

<sup>19</sup> Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, naj laj Xi'n Dios nájza laj Sprit Dxañ xten Dios.

<sup>20</sup> Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

## Diidx Xcuent Jesucrist Nani Bacuaa San Marcw

*Baluu Juan ni rutiobnis*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Scree gusloj diidx xcuent Jesucrist, Xi'n Dios.

<sup>2</sup> Si'cni bacuaa toIsaías, ni gunii xtidx Dios, che räjp Dios:

Bahuii gan, guxhał ni chanã xtidxã,  
ganidni chãani lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Colyunsac xnezyuj Dad,  
colslui rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Rãpgajcni nanabpac gusiechljazreni, tiobnisgajcreni, te jia xtojłreni.

<sup>5</sup> Riãdquadijag xhidajł reni rbãjz Judea, nãjza reni rbãjz guedx Jerusalén. Dxejcti cheni ruxhobdojłreni lo Dios, rustiobnis Juanreni neñ gueu Jordán.

<sup>6</sup> Xhãj Juan nachee con guichlajd camei, xsindoorni nachee con guijd, niluxh gudajwni guxha't nãjza dzunbãserguijxh.

<sup>7</sup> Caguluiini rebejn, rãpgajcni:

—Detzã siããd tej nani sajrcu loã, nani nicla di nungãjł surloã, cuãã xcura'chni.

<sup>8</sup> Narã abatiobnisã la'tu con nis, biãdla laani guxhałni Sprit Dxcn xten Dios te cuããzni neñ lastootu. Si'c gustiobnis nani jiããd detzã la'tu.

*Batiobnis Juan Jesús*

(Mt. 3:13-17; Lc. 3:21-22)

<sup>9</sup> Dxejc, neñ redxejga, birii Jesús guedx Nasare't ni yu' Galilee. Dxejrcu batiobnis Juan Jesús neñ gueu Jordán.

<sup>10</sup> Che birii Jesús neñ nis, bahuiini bixal guibaa. siãdyãjt Sprit Dxcn xten Dios yejcn si'c te palom.

<sup>11</sup> Dxejcti guibaali bejn xse' te ni räjp:

—Luj najclu xi'nã ni sanãlazã; rbanãlazduxhãlu.

*Bateed bendxab prueb Jesús*

(Mt. 4:1-11; Lc. 4:1-13)

<sup>12</sup> Sas baxhał Sprit Dxcn xten Dios Jesús lo reyubijdz.

<sup>13</sup> Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejrcu biããd reangl xten Dios, biãdhuiirenini.

*Gusloj Jesús xtzuumni*

(Mt. 4:12-17; Lc. 4:14-15)

<sup>14</sup> Basãłreni Juan neñ latzguuib. Dxejcti huij Jesús nez Galilee, huiluiini xtidx Dios.

<sup>15</sup> Dxejc räjp Jesús:

—Abidzujñ dxej, luxh yãłrnibee xten Dios abidzujñ gajxh. Colsjech lajztu, colchalilaj xtidx Dios.

*Gurejdx Jesús tajp bejn ni rniaaz bãjł*

(Mt. 4:18-22; Lc. 5:1-13)

<sup>16</sup> Sasajti Jesús nez ro' nis xten Galilee, che bahuiini lo Simón nãjza loj Andrés bejtz Simón. Cazãłreni xquijxhreni lo nis, sa'csi rniaazreni bãjł.

<sup>17</sup> Dxejc räjp Jesús lojreni:

—Coltanajł narã, te gunã cuedxtu bejn lacuaa ni guiniaaztu bãjł.

<sup>18</sup> Lagajc dxejc basa'nreni rexquijxhreni, sanãtirenini.

<sup>19</sup> Dxejc gusaj Jesús sche'n, sas bahuiini loj Jacoob nãj Juan, rexi'n Zebedeo. Cayunsa'creni xquijxhreni neñ xcanuurenini.

<sup>20</sup> Guredxgajcni guiro'preni, dxejcti laareni basa'nreni xtadreni Zebedeo neñ canuu, nãjza rexmosni, sanãtirenini Jesús.

*Te bejn nani guyu' bendxab neñ lastooni*

(Lc. 4:31-37)

<sup>21</sup> Bidzujñtirenini guedx Capernaum. Dxejrcu sabd, dxej ni rusilajz rexpen Israel, biu' Jesús neñ guidobãz xten rexpen Israel. Dxejcti baluu Jesús rebejn ni tre' ro'c.

<sup>22</sup> Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi.

- <sup>23</sup> Neŋ xquidobäzreni yu' te bejŋ yu' te beŋdxab neŋ lastooni. Beŋdxabga guredxa', räjpni:  
<sup>24</sup> —Jesús, ni siädä Nazare't, ¿xhicuent riu'lu loonu? ¿La siädguntloju nuunu? Narä numbeälu, luxh nanä luj najclu beŋdxan ni siädä lo Dios.  
<sup>25</sup> Dxejcti gudidxa' Jesús lo beŋdxabga, räjpni lojni:  
 —Basäuu ro'lu, birii neŋ lastoo niguiire.  
<sup>26</sup> Sas beŋdxabga batienguij niguiiga, luxh cabedxa'ni biriini neŋ lastoo niguiiga.  
<sup>27</sup> Bidxejcti guiraareni, canabdiidx loj sa'reni:  
 —¿Xhi dee? ¿Xhi dzuun nacoobre ruluini? Niguiire rnibeeni näj rebeŋdxab, luxh ruzoobreni xtiidxni.  
<sup>28</sup> Di niaclaa gucbee rebejŋ guideb nez Galilee xhi rujn Jesús.

*Basiaj Jesús xnan suegr Pedr*  
 (Mt. 8:14-15; Lc. 4:38-39)

- <sup>29</sup> Che biriireni xquidobäz rexpejŋ Israel, huinä Jesús Jacoob näj Juan rolizj Simón näjza Andrés.  
<sup>30</sup> Luxh xnan suegr Simón naga', yu'ni xliaa. Dxejc räjpreni lo Jesús:  
 —Cayacxhuuni.  
<sup>31</sup> Dxejcti gubig Jesús lojni, gunaazni ŋaani, guläsnini; lagajc dxejc biriini xliaa. Dxejc gusloj cayunireni.

*Xhidajl beŋracxhuu basiaj Jesús che huääz gubijdx*  
 (Mt. 8:16-17; Lc. 4:40-41)

- <sup>32</sup> Che huääz gubijdx, luxh abiu' guxhijŋ, biädnäreni guiraa rebeŋracxhuu loj Jesús, näjza renani yu' beŋdxab neŋ lastooni.  
<sup>33</sup> Luxh guideb guejdxga bidojp ro' yu'ga.  
<sup>34</sup> Basiaj Jesús xhidajl renani rajc garen-garen yälguidx. Niluxh gulääzani xhidajl beŋdxab, niluxh dini nusaan ninii rebeŋdxabga, sa'csi najnreni chu najcni.

*Balüi Jesús nez Galilee*  
 (Lc. 4:42-44)

- <sup>35</sup> Che bara yääł, cäyru bistie Jesús, biriini sääni te laad cadre ruti bejŋ. Ro'c cabejdx-canabni loj Dios.  
<sup>36</sup> Dxejcti Simón näj resa'ni huitiilreni Jesús.  
<sup>37</sup> Che bidxälrenini, räjpreni lojni:  
 —Guiraa rebejŋ caguüllu.  
<sup>38</sup> Dxejc räjp Jesús lojreni:  
 —Cołcho' reguejdx ni yu' gajxh, te gusuleä xtidx Dios ro'c. Par ni'cpac biäljä.  
<sup>39</sup> Dxejcrü cuansaj Jesús guideb nez Galilee, caguluini xtidx Dios neŋ reguidobäz xten rexpejŋ Israel. Gunibeezani birii rebeŋdxab neŋ lastoo xhidajl rebejŋ.

*Basiaj Jesús te bejŋ ni rał tiejxhni*  
 (Mt. 8:1-4; Lc. 5:12-16)

- <sup>40</sup> Gubig te beŋracxhuu ni rał tiejxhni loj Jesús, bazuxhijbni. Dxejcti räjpni lojni:  
 —Narä nanä sajç gusiajxh narä palga rıajzlu.  
<sup>41</sup> Balasajç Jesús beŋracxhuuga, gunaazni ŋaani, räpçajcni:  
 —Rlazä jıajçlu. Bıajç naj.  
<sup>42</sup> Cheni guniini scree, bıaçajç beŋracxhuuga.  
<sup>43</sup> Dxejcti gulunejç Jesús bejŋga. Per räpçgaani lojni:  
<sup>44</sup> —Ahuire, rutlojdi guiniilu dee. Huilüi tiejxhlu lo bıxhojç. Badedgajç lo Dios nani räjp toMoisés gudeed bejŋ lo Dios si'c te seen, te gacbee rebejŋ abıajçlu.  
<sup>45</sup> Dxejc sää bejŋga. Sas gusloj cayujyini diidx lo rebejŋ xcuent guiraa nani gujçni. Ni'cni diru nıajçdi niu' Jesús niçla teç guejdx. Cansajni te laad cadre ruti bejŋ. Niluxh guiranejç riı rebejŋ, siädhuireni Jesús.

## 2

*Basiaj Jesús te bejŋ ni di guniib*  
 (Mt. 9:1-8; Lc. 5:17-26)

- <sup>1</sup> Che agudejd balti dxej, bıusac Jesús neŋ guedx Capernaum. Dxejcti biejç diajç rebejŋ arbäjçni.  
<sup>2</sup> Bidopçajç xhidalduxh bejŋ. Gudxajç neŋ yu'. Niçla rolä' di nıajç nisiujçreni. Dxejcti caguluini Jesús xtidx Dios lo rebejŋ.  
<sup>3</sup> Dxejcti bıdzujç tajp bejŋ, nuureni te bejŋ ni digacti guiniib; siädnärenini lo Jesús.

<sup>4</sup> Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejz cadro sujni. Dxejru cadro baxhalreni basiajtreni da' ni naga' beṅracxhuuga lojni.

<sup>5</sup> Che bahuii Jesús rililajzreni, dxejc räjpni loj beṅracxhuuga:

—Xi'nä, agubicaj rextojllu.

<sup>6</sup> Sas gaii bejn ni ruluii leii ni sobga' ro'c bejnreni xhigab neṅ lastooreni, naareni:

<sup>7</sup> “¿Xhicuent rñii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!”

<sup>8</sup> Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c neṅ lastootu?

<sup>9</sup> ¿La guyasiru gäbni loj beṅracxhuure: “Agubicaj rextojllu”, o la gäbni: “Huistie, cua' xta'lu, gusaj”?

<sup>10</sup> Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, caniä loj beṅracxhuure:

<sup>11</sup> —Lojlu rñiä, ¡Huistie, cua' xta'lu, huij rolizlu!

<sup>12</sup> Lagajc dxejc huistie beṅracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

### *Gurejdx Jesús Leví*

(Mt. 9:9-13; Lc. 5:27-32)

<sup>13</sup> Dxejru gubisac Jesús ro' nis xten Galilee, luxh che bidojpc guiraa rebejn lojni, baluiini xtidx Dios lojreni.

<sup>14</sup> Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup> Dxejc sobga' Jesús cayajwni rolizc Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejn pacni, lo mex. Xhidajlreni tre', luxh sanajlreni Jesús.

<sup>16</sup> Dxejru rebejn ni ruluii leii näj refarisee, che bahuiireni cayaunäjni renani rusquijx näjza rebendojl, räjpreni loj rexpejn pac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

<sup>17</sup> Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebensa'c, biädtedxä rebendojl, te gusiech lajzreni.

### *Gunabdiidxreni loj Jesús xcuent yälrucua'n*

(Mt. 9:14-17; Lc. 5:33-39)

<sup>18</sup> Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn pacu di gucua'n?

<sup>19</sup> Dxejcti räjp Jesús lojreni:

—¿La rucua'n rebejn ni rdoṅ chää cadro ru' yälrucuanaa che meer suga' bi'n? Che meer suga' bi'n lojreni, direni gucua'n.

<sup>20</sup> Per sidzujn dxej sibicaj bi'n lojreni, dxejc sii sucua'nreni.

<sup>21</sup> Rut rucuaadi tla' ladcoob loj tla' ladyux, sa'csi ladcoob rxu'nmi luxh rutiäjzni ladyuxga, dxejc xhiroobruni räjs.

<sup>22</sup> Rutza rusäldi bin ni gajd guilaj neṅ guidyux ni abigaa. Sa'csi bin ni gajd guilajga sutiäjzni guijdga che guilajni, luxh sinijt binga näjza guijdga. Ni'cni nanab gusälni bincoob neṅ guidcoobza.

### *Batojpc rebejn ni rinajl Jesús triuu sabd*

(Mt. 12:1-8; Lc. 6:1-5)

<sup>23</sup> Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädxc dojl lo triuu.

<sup>24</sup> Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejn pacu dzuun ni di guchaag gunni neṅ dxej ni rusilajznu, ä?

<sup>25</sup> Dxejcti räjp Jesús lojreni:

—¿La gajdtu gojl nani bejn toDavid te huält, laani näj resa'ni, ä? Che biäädxc xhi gauureni, gulaanreni.



<sup>26</sup> Biu' David nen xyu' Dios cheni guyu' toAbiatar loj Dios. Abiatar sajcr loj rebixhojz ni guyu' nen xquidobaz rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztiis rajc rajw yätxtiilga.

<sup>27</sup> Räjpa Jesús lojreni:

—Dios bejn dxe sabd sa'csi najnni naquinpac gusilajz bejn. Dini niujn sabd te gapda bejn.

<sup>28</sup> Ni'cni narä, Xi'n Dios ni gujc Niguui, näjza sabd rnibeä.

### 3

*Niguui ni nabijdz te naani*

(Mt. 12:9-14; Lc. 6:6-11)

<sup>1</sup> Biu' Jesús stehuält nen xquidobaz rexpejn Israel. Ro'c yu' te niguui nani nabijdz te naani.

<sup>2</sup> Niluxh ro'c cagula'tz rebejn Jesús don la susiajcn niguuiiga sabd, dxejc ni rusilajz rexpejn Israel, sa'csi rlaizreni cue'creni xquejni loj nani rnibee rexpejn Israel.

<sup>3</sup> Dxejc räjp Jesús lo niguui nani nabijdz naani:

—Huistie, guzuj galäiire.

<sup>4</sup> Dxejcti gunabdidxgajcni loj gaii rebejnnga, räjpni:

—¿La laaca gunni dzunza'c, o la dzunguijdx, sabd, ä? ¿La susläani yäl nabajñ, o la sugu'tni? Luxh laareni biacdxireni.

<sup>5</sup> Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguuiiga:

—Baslii naalu.

Dxejcti basliini naani. Biajctini.

<sup>6</sup> Dxejcru biunejz refarisee. Guslogajczeni caguchaagreni diidx con reni nadxaag Herodes, te don xho ju'treni Jesús.

*Xhidajl bejn bire' ro' nis*

<sup>7</sup> Jesús näjza rexpejnpacni sääreni ro' nis, luxh xhidajl ben Galilee birinajlni.

<sup>8</sup> Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejz stelaad gueu Jordán, biriizaren neuz guedx Tiro, näj nez guedx Sidón, biädhuiireni loj Jesús.

<sup>9</sup> Ni'cni räjp Jesús loj rexpejnpacni quilireni te canuu, te na'c gutää rebenxhidaalgani.

<sup>10</sup> Abasiajz Jesús xhidajl benracxhuu, ni'cni guiraasi benracxhuu caxa't lojni, te canreni te jiajcreni.

<sup>11</sup> Niluxh che rhuii rebenxax lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup> Dxejcti Jesús gudidxa' lojreni te na'c niäjbreni chu najcni.

*Gule Jesús tzubitiop bejn loj reni rinajlni*

(Mt. 10:1-4; Lc. 6:12-16)

<sup>13</sup> Birii Jesús sääni lo te dajne' cadro gurejdxni renani rlaizcni cueni. Gubigtireni lojni.

<sup>14</sup> Dxejcti guleni tzubitio'preni te sanäjreni laani, te guxhalnireni chaluiireni xtidx Dios;

<sup>15</sup> te ga'preni yäl rnibee te gusiajcreni benracxhuu, te cuääzaren rebenxax.

<sup>16</sup> Retzubitio'p bejn ni gule Jesús najc: Simón, ni gulälajzani Pedr.

<sup>17</sup> Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii.

<sup>18</sup> Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc,

<sup>19</sup> näj Judas Iscariot, ni bato' Jesús loj reni rdxechlajz lojni. Sä'tireni roliz te dade'.

*Yälriyay loj Sprit Dxan xte Dios*

(Mt. 12:22-32; Lc. 11:14-23; 12:10)

<sup>20</sup> Dxejc bidopsac rebenxhidaalga; nicla niajz niaunäj Jesús rexpejnpacni.

<sup>21</sup> Che biejn diajz resa' Jesús dee, biädxhiirenini, sa'csi naareni, yejcn cayajc.

<sup>22</sup> Rebejn ni ruluii leii ni birii guedx Jerusalén bidzujñza lo Jesús, dxejc räjpreni:

—Beelzebú, nani rnibee rebenxax, yu' nen lastoo niguuire. Niluxh nani rnibee rebenxax ruedeed yäl rnibee lo Jesús te cuääni benxax.

<sup>23</sup> Dxejc gurejdx Jesús rebejnnga, bijyni te cuent ni ruluii lojreni, räjpni:

—¿Xho gurilaagw benxax lagajc sabendxabni?

<sup>24</sup> Palga rebejn xten te yäl rnibee la'reni, luxh tilñaj te cuaani ste cuaaga, di yäl rnibeega chu xchej.

<sup>25</sup> Palga te famil rdilñaj lagajc sa'ni, di familga chu xchej.

<sup>26</sup> Palga beṇdxab nani rnibee tiṇāj lagajc laani, di xcālṛnibeeni chu xchej, sa'csi ni'c gun luuxni.

<sup>27</sup> Rut gacdi jiu' rolizj te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

<sup>28</sup> Rniliāpac lojtu guiraa dojl nājza yālṛniyaj xten rebejn sajc jia.

<sup>29</sup> Nani guiniyaj Sprit Dxan xten Dios, digacdi guibicaj rextojṇni, anuutisni xtojṇni par tejpas.

<sup>30</sup> Rājṇni si'c sa'csi caniireni yu' beṇdxab neṇ lastooni.

*Xnan con rebetzhuin Jesús*

(Mt. 12:46-50; Lc. 8:19-21)

<sup>31</sup> Dxejcru bidzujṇ xnan Jesús, nāj rebetzhuinni. Direni niu', baxhaṭisreni chu huitedxni.

<sup>32</sup> Rebejn ni sobga' gabi Jesús rājṇreni lojni:

—Xnanlu nāj rebejtzu suga' ro lā', caguilṛeni luj.

<sup>33</sup> Dxejcti rājṇ Jesús lojreni:

—¿Chu reni'c najc xnanā nāj rebetzä?

<sup>34</sup> Bahuiṇajcni loj renani sobga' gabini, dxejc rājṇni lojreni:

—Redee najc xnanā, rebetzä.

<sup>35</sup> Chutis ni rujn ni rlaiz Dios, ni'c najc betzä, bisianā, nājza xnanā.

## 4

*Xcuent niguii ni sale'c binij*

(Mt. 13:1-23; Lc. 8:4-15)

<sup>1</sup> Suga' Jesús ro' nis gulosac caguluini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús neṇ te canuu ni suga' ro' nisga. Dxejcti gurejni nenga, biāäd guiraa bejn bia'ntireni ro' nis.

<sup>2</sup> Dxejc baluiniireni guiraloj, ganax cuent ni ruluii guniini. Che caguluini, rājṇni lojreni:

<sup>3</sup>—Gucuadiajgtu dee. Guyu' te niguii. Biriini sale'cni binij.

<sup>4</sup> Che guslojni cabe'cni, yu' lajt biajb binijga cuä' nezyuj. Sas biāäd reman xhaguibaa, gudajwreni binijga.

<sup>5</sup> Stee lajt biajb binijga neṇ guij cadro xheti xhidajl yuj. Binijga gulengajcni, sa'csi xheti xhidajl yuj ro'c.

<sup>6</sup> Dxejc, sa'csi lo jiaa yu' xlobaani, che birii gubijdx, bigoṇni, gubijdzitini.

<sup>7</sup> Stee lajt biajb binijga neṇ yaguejch. Dxejcti biroob reyaguejchga, luxh bejnreni balaa loj binijga, ni'cni gujcn ganax bilii.

<sup>8</sup> Per stee lajtga biajb binij lo yusa'c. Gulejn reyājṇga, guroobreni, gusa'creni. Yu'reni cuaj galbitzuu xob, yu'reni cuaj gayojṇ xob, yu'zarenī cuaj tegayuu xob.

<sup>9</sup> Dxejc rājṇni lojreni:

—Chutis ni rlaiz guisieed, sucuadiajṇni.

<sup>10</sup> Che asii xhidajl bejn, rebejn nani suga' gajxh cadro suganāj Jesús guitzubitio'p xpejṇpacni gunabdiidx lo Jesús xhi säloj cuentre.

<sup>11</sup> Dxejc rājṇ Jesús:

—Dios abejn gacheetu te gantu xho najc yāṭxhiga'tz xten xcālṛnibee Dios nani najc xhiga'tz najli. Niluxh lo ste'ca bejn con cuenttis rniā guiraa recosre,

<sup>12</sup> te mase cahuiireni direni gumbee, te mase cayiejn diajṇreni, direni gacbee. Scree gacni, te na'c gusiejch lajzreni, te na'c guibicaj xtojṇreni.

<sup>13</sup> Rājṇzani lojreni:

—¿La ditu gacbee cuentre? ¿Xhocha gacheetu xhidajlru cuent?

<sup>14</sup> Niguiire nani sale'c binij najc si'c te nani ruluii xtidx Dios.

<sup>15</sup> Yu' bejn ni najc si'c binij ni biajb cuä' nezyuj: riejn diajṇreni xtidx Dios nani ruluii bejn. Dxejc che jiejn diajṇreni xtidx Dios, riāäd Satanás rbāṇajcni xtidx Dios ni yu' neṇ lastooreni.

<sup>16</sup> Yu'za rebejn ni najc si'c binij ni biajb neṇ reguij, renani che jiejn diajṇreni xtidx Dios, rbaa lajzreni rca'reni diidxga.

<sup>17</sup> Niluxh direni nisiudzu'tz, sa'csi guxii huilii lajzreni. Che rdejṇreni trabajw o che rusacsí bejnreni xcuent xtidx Dios, rusaanreni xtidx Dios.

<sup>18</sup> Yu'zarenī najc si'c binij ni biajb neṇ yaguejch, riejn diajṇreni xtidx Dios,

<sup>19</sup> dxejc che ru'rurenī yārsia' xcuent recos guedxliujre, rsia' lajzreni ga'preni meel, rlaizreni ga'prurenī guiraloj recos, dxejc riu' redee neṇ lastooreni, rusāuuni lo xtidx Dios, xlia'si biejn diajṇreni xtidx Dios.

<sup>20</sup> Yu'za bejn ni riejn diajṇreni xtidx Dios, rlii lajzreni diidxga, xhet xlia'ti biejn diajṇreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu

xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx*  
(Lc. 8:16-18)

<sup>21</sup> Räjpa Jesús lojreni:

—¿La riädñätu te bajl te suuni dejt te alm, o neñ te loon, ä? ¿La xhet nanabdi suuni jiaa te guzanijni, ä?

<sup>22</sup> Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni.

<sup>23</sup> Pal yu' chu rlajz guisieed, sucuadiajgni.

<sup>24</sup> Räjpa Jesús lojreni:

—Colyunxgaa xhigab rediidx ni riejn diajgtu. Nani rusäl'tu loj xhigabtu, ni'cza guniidx Dios xca'tu, luxh sisiojbru yej ni xca'tu.

<sup>25</sup> Renani rajp che'n yäl'najn, lojreni sudeedru Dios yäl'najn. Luxh renani xhetru rusäl'di loj xhigabreni, sudzucaj Dios yäl'najn nani rajpreni.

*Xcuent binij ni roob*

<sup>26</sup> Guniiza Jesús lojreni:

—Yäl'rnibee xten Dios najc si'c rsiajc te niguii che rbe'cni binij lo yuj,

<sup>27</sup> dxejc yäl' riguesni, rdxee ristieni, dxejcti rliejn binijga, luxh di niguiiga gan xho roobni.

<sup>28</sup> Acanajn yujga rajc binij lojni. Galoo riü cuane'ga, sas riü doj lojni. Dxej cru rdxaj bejzde' neñ dojga.

<sup>29</sup> Dxejcti che aguyajl bedze'ga, ruxhañni chu ritiuugni, sa'csi abidzujn dxej ni guidojpni.

*Xcuent bedz muxhtas*

(Mt. 13:31-32; Lc. 13:18-19)

<sup>30</sup> Räjpa Jesús:

—¿Xhini'c najc si'c najc xcäl'rnibee Dios? ¿Xhi te cuent guiniinu te guiluiununi?

<sup>31</sup> Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj.

<sup>32</sup> Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpañaani.

*Si'c baluii Jesús ganax con cuent*

(Mt. 13:34-35)

<sup>33</sup> Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni.

<sup>34</sup> Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

*Rusiadxi Jesús bej näj nisdo*

(Mt. 8:23-27; Lc. 8:22-25)

<sup>35</sup> Lagajc gudxejga räjpni loj rexpejn pacni:

—Col'cho', chonnu stelaad nis xten Galilee.

<sup>36</sup> Basa'ntireni rebejn, sanätireni Jesús neñ canuu cadro sobgajcni. Dxejcti sgaii canuu sanajlni.

<sup>37</sup> Chela gubi' te beduxh, gusloj cayu' nis neñ canuuga. Cadxaj canuuga nis.

<sup>38</sup> Nagayejs Jesús dejt canuuga, nagayejsni. Bacuäänneni Jesús, räpgajczeni lojni:

—Dad mastr, ¿la dilu jiu siääznu neñ nis, ä?

<sup>39</sup> Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biacdxini.

<sup>40</sup> Räjpa Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

<sup>41</sup> Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

## 5

*Nigui Gadara ni yu' bendxab neñ lastooni*

(Mt. 8:28-34; Lc. 8:26-39)

<sup>1</sup> Bidzujntireni stelaad ro' nisga, lo yuj xten Gadara.

<sup>2</sup> Si'ctis ni birii Jesús neñ canuu, biädgjajc te niguii lojni ni birii neñ rebiliää cadro rga'tz bengut. Yu' bendxab neñ lastoo niguiiga.

<sup>3</sup> Rbäjzni neņ rebiliääga luxh rut rajcdi rucuađuuni, nicla con cadenguuib.

<sup>4</sup> Xhidajl huält agacbacuađuureni ni', ñaa niguiiga con cadenguuib, luxh litis batiuugni recadenguibga, rut rajcdi rusiacdxini.

<sup>5</sup> Si'ctis canzajni, dxej, yääl. Rbedxa'ni neņ redajn, neņ rebiliäa, luxh cagutiugni tiejxhni con reguij.

<sup>6</sup> Che bahuiini loj Jesús zijtru, baxuņni huichaglojni Jesús, bazuxhijbni lojni.

<sup>7</sup> Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsilu narä.

<sup>8</sup> Sa'csi agac cayäjb Jesús lojni:

—Luj, beñdxab, birii neņ lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

<sup>10</sup> Sanuutis canabni lo Jesús na'c guxhalni rebeñdxabga ste'ca guejdx.

<sup>11</sup> Ro'c tre' xhidalduxh cuch cuä' dane'ga, cayajwreni.

<sup>12</sup> Dxejc gunab rebeñdxabga loj Jesús, räjpni:

—Baxhal nuure loj recuchre te jiu'nu neņ lastooreni.

<sup>13</sup> Dxejcti basaan Jesúsreni. Biriiti rebeñdxabga neņ niguiiga, dxejc biu'reni neņ lastoo recuchga. Yu' si'cti tiop mil cuch ro'c. Baxuņ recuchga, dxejc birołreni ro' guilaj, bitejbreni neņ nis, gujttireni neņ nisga.

<sup>14</sup> Renani cayajp recuchga baxuņreni, huiyeireni diidxga neņ guejdx, näjza loniaa. Dxejc biääd bejn biädhuii nani guj ro'c.

<sup>15</sup> Che bidzujņreni cadro suga' Jesús, bahuiireni loj niguii nani guyu' rebeñdxabga neņ lastooni. Sobga'ni ro'c, najcwni xhajbni luxh nasa'c yejcti. Niguiire najc nani guyu' beñdxab ni laa Legión neņ lastooni. Bidxejbti rebejn nani bahuii lojni.

<sup>16</sup> Dxejcru rebejn ni bahuii xhi guj ro', huiyeireni diidx xho guzajc niguiire nani guyu' beñdxab neņni galoo, näjza nani guzajc recuch.

<sup>17</sup> Dxejc gusloj canabreni loj Jesús jiunejzni.

<sup>18</sup> Che biu' Jesús neņ canuu, niguii nani guyu' beñdxab neņ lastooni gunabni loj Jesús, räjpni:

—Huinä narä.

<sup>19</sup> Per di Jesús nusaan nijni. Räjp Jesús lojni:

—Huij rolizlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

<sup>20</sup> Sä'ti niguiiga, gusloj cayujyni diidx neņ reguejdx xten Decápolis xho bennäj Jesúsni. Guiraa rebejn bidxeloj.

*Xindxa'p Jairo näjza gunaa ni bahual xhajb Jesús*

(Mt. 9:18-26; Lc. 8:40-56)

<sup>21</sup> Che bidzunsac Jesús stelaad ro' nisga neņ canuu, bidzujņ xhidalduxh bejn cadro suga'ni. Bia'nti Jesús ro' nisga.

<sup>22</sup> Dxejcru biääd te niguii nani laa Jairo, ni rnibee neņ xquidobäz rexpeņ Israel. Che bahuiini loj Jesús, bazuxhijbni lojni.

<sup>23</sup> Canabpacni lojni, räjpni:

—Xindxap'ä acayejt. Gudaa, guzujlu ñaalu yejcti, te jiajcti, te guibajņni.

<sup>24</sup> Sanäti Jesús bejnga. Xhidajl bejn sanajłni, luxh cagutääreneni.

<sup>25</sup> Loj rebeñxhidaalga yu' te gunaa ni agujc tzubitio'p ijz racxhuuni yälguidxbäii.

<sup>26</sup> Agudedduxhni trabajw, abahuii xhidajl doctoorni. Xlia'si abanijłni guiraa nani rajpni, luxh xhet racnäjdini, alga rxuuruni.

<sup>27</sup> Sa'csi biejn diajņni xhini'c canii rebejn xcuent Jesús, gubig gunaaga nez dejtž Jesús, guideb neņ rebejn, bahualni xhajb Jesús.

<sup>28</sup> Cayujņni xhigab, naani: “Palga narä falä xhajbtisni, siacä.”

<sup>29</sup> Lagajc dxejc guläjž caxe' xtiejņni, gucbeeza tiejxhni abirii xcälracxhuuni.

<sup>30</sup> Gucbegajc Jesús yu' chu abasiajcti. Gubiregajcti neņ rebeñxhidaalga, räjpni:

—¿Chuni'c bahual xhabä?

<sup>31</sup> Dxejcru räjp rexpejņpacni lojni:

—Rhuuilu beñxhidaal cagutäálu, luxh ñaalu: “¿Chuni'c bahual xhabä?”

<sup>32</sup> Sas cahuii Jesús nez ree, nez rec, te fini loj nani bahualni.

<sup>33</sup> Dxejc bidxejb gunaare, racejsni, sa'csi gucbeeni xhini'c gujcti. Dxejc biäädni, bazuxhijbni loj Jesús, räłliini loj Jesús guira'ti ni bejņni.

- <sup>34</sup> Dxejc räjp Jesús lojni:  
—Xindxa'pä, abiajclu sa'csi huililajzlu. Gulecdxi lajzlu, huij rolizlu, abiaj xcälracxhuulu.
- <sup>35</sup> Canisijc Jesús si'c che bidzujñ renani birii rolizj dade' ni rnibee neñ xquidobáz rexpejn Israel. Räjpreni:  
—Agujt xindxape'lu. ¿Xhicuent rusieedrulu Dad mastr?
- <sup>36</sup> Dxejc che bejn diajg Jesús nani caniireni, räjpni lo dade'ga:  
—Na'c guidxejblu. Billajztis.
- <sup>37</sup> Luxh dini nusaanru nij chu ninäni, Pedrtis näj Jacoob näjza Juan bejtzni.
- <sup>38</sup> Che bidzujñni rolizj dade'ga, bahuij Jesús biey ni cayujñ rebejn ni rbedxa' roon.
- <sup>39</sup> Biu'tini räjpni:  
—¿Xhicuent rujntu si'c? Gajd dxape're guet. Nagayejssini.
- <sup>40</sup> Alga baxhiznäjrenini. Dxejc gunibee Jesús birii guiraa rebejnğa. Dxejcti huinäni xcuzajñ dxape'ga con renani sanäni. Biu'reni cadro naga' dxape're.
- <sup>41</sup> Gunaazni naa dxape'ga, dxejc räjpni:  
—Talita cumi —nani säloj con xtiidxnu: Dxape', lojlu rniä, huistie.
- <sup>42</sup> Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuij guläs Jesús dxape'ga.
- <sup>43</sup> Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

## 6

### *Che guyu' Jesús Nazare't*

(Mt. 13:53-58; Lc. 4:16-30)

- <sup>1</sup> Dxejcru birii Jesús ro'c, huijni lajdxni, sanäzani rexpejn pacni.
- <sup>2</sup> Che bidzujñ sabd, dxej nani rusilajz rexpejn Israel, gusloj caguluiini neñ xquidobáz rexpejn Israel. Bidxeloj xhidajl bejn nani biejn diajg rextiidxni, räjpreni:  
—¿Caro bisieed niguiire guiraa recosre? ¿Xhi yälñajre cua'ni ni'c rajc rujñni rextzunduxh Dios con ñaani?
- <sup>3</sup> ¿La xhet laadi carpinteer, xi'n Marii, bejtz Jacoob, näj José, näj Judas, näjza Simón dee, ä?  
¿La xhet reedi rbäjz rebisianhuinni?  
Luxh bidxechlajzreni lojni.
- <sup>4</sup> Dxejc räjp Jesús lojreni:  
—Catis rinälajzreni te ni rniñ xtidx Dios. Lajdxtisni, lagajc loj resa'ni, rolizjtisni, ro'c rut rinälajzdini.
- <sup>5</sup> Luxh di niajcdi niujñ Jesús xhidajl milaagwr ro'c. Tiopchoñtis beñracxhuu basiajçni, bazujni ñaani yejçreni.
- <sup>6</sup> Bidxelo Jesús sa'csi di lajzreni nilii. Caguluiitini neñ guiraa reguejdx'e ni ria'n gajxh nejzga.

### *Baxhal Jesús tzubitio'p bejn ni rinajlñi chaluiireni xtidx Dios*

(Mt. 10:5-15; Lc. 9:1-6)

- <sup>7</sup> Dxejcru gurejdxni guitzubitio'p xpejn pacni. Gusloj caguxhalñi tiopgajreni; badeedzani yälñibee lojreni te guinibeereni loj rebendxab.
- <sup>8</sup> Gunibeeni xhet chanädireni lo nejz, ganaxhtis te yajg te sanäjreni. Di nungäjñ chanäreni nicla bisiuud, nicla yätxtiil, niclaza meel neñ dobdäjñ.
- <sup>9</sup> Nungäjñza xcaj gura'ch ni'reni, nägajc ga'preni tejtis gamangw, xhet tio'pdini.
- <sup>10</sup> Dxejcti räjpni lojreni:  
—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga.
- <sup>11</sup> Palga yu' te guejdx cadro direni gusaan jiu'tu luxh di rñajzreni cuadiajçreni diidx ni sanätu, colñii guejdxga, colçuijb guxhuj ni'tu si'c te seen te gacbeereni xhet laadi bejnreni. Rñiläpac lojtu, guxiiru trabajw ted rebeñ Sodoma näj rebeñ Gomorra quela rebejn ni yu' guejdx cadro direni gusaan jiu'tu.
- <sup>12</sup> Dxejc biriireni, sääreni. Cayäbgajçreni nanabpac gusiejch lajz rebejn.
- <sup>13</sup> Gulääzreni xhidajl beñdxab dxejcti gudääbreni se't yejç xhidajl beñracxhuu, luxh bñajçreni.

### *Xcälgujt Juan ni rutiobnis*

(Mt. 14:1-12; Lc. 9:7-9)

- <sup>14</sup> Herodes najc nani rnibee dxejc. Biejñ diajçni xpala'n Jesús, sa'csi guiraliñ rebejn calä'p xpala'nni. Dxejc räjp Herodes:  
—Juan nani rutiobnis ahuäjs loj rebeñgut, ni'c rajc rujñni remilagwre.
- <sup>15</sup> Sgaañ bejn räjç:  
—Laa Elías ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

<sup>16</sup> Che biejn diajg Herodes si'c, räjpni:

—Laa Juan dee, nani gunibeä biru' yejcn, luxh naj agubansacni loj rebengut.

<sup>17</sup> Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcäl'nasa'c Herodías. Herodías gujc chääł Lib, bejtz Herodes, dxejc cua' Herodes gunaaga si'c chääłni.

<sup>18</sup> Räjp Juan loj Herodes:

—Xhet laadi rbāznājlu chääł bejtzlu.

<sup>19</sup> Ni'cni rdexchlajz Herodías loj Juan, luxh rļajzni ju'tnini, luxh di niajcdini

<sup>20</sup> sa'csi rdxejb Herodes Juan, sa'csi najnni bens'a'c, bendxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuaadiagsa'cni xtiidxni.

<sup>21</sup> Niluxh guyu' xmood Herodías. Che gojł laj Herodes, bayaanni rexpejnni ni rnibee, nājza rebejn nani sajz nez regiōn Galilee.

<sup>22</sup> Dxejcti biu' xindxa'p Herodías cadro cayajwreni, baya'ni nez lojreni. Bidxaglazduxh Herodes nājza rexpioozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rļajztislu loä, narä sunidxāni.

<sup>23</sup> Dxejcru räpli Herodes lojni:

—Sunidxā xhitis ni guiniablu. Mase gala' yuj ni rnibeä.

<sup>24</sup> Biriitini nen yu', huiye'tzni loj xnanni, räjpni:

—¿Xhini'c guiniabā lojni?

Dxejc räjp xnanni lojni:

—Gunab yejc Juan ni rutiobnis lojni.

<sup>25</sup> Huigajcni loj reii, sas gunabni lojni, räjpni:

—Rlazā gunidxgajclu loä yejc Juan ni rutiobnis. Nen te pla't baniidx yejcn.

<sup>26</sup> Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganājni lo xmexni, ni'c dipac rļajzni nudxojnni nani gunab gunaaga lojni.

<sup>27</sup> Baxhalgajc reii te soldaad ni rcanāj ro'c, baxhalnini, te chaxiini yejc Juan.

<sup>28</sup> Ni'c huij, dxejcti bagu'tni Juan nen latzguiib, biādnātini yejc Juan nen te pla't. Badeed-tinini loj gunaaga. Dxejcti gunaaga badeednini loj xnanni.

<sup>29</sup> Che biejn diajg rexpejnpac Juan si'c, biādlāsreni togoolga. Dxejcti bacua'tzrenini nen te baa.

*Bayaan Jesús gaii mil bejn*

(Mt. 14:13-21; Lc. 9:10-17; Jn. 6:1-14)

<sup>30</sup> Che gubi' renani baxhal Jesús, bijreni diidx guiraa ni bejnreni nājza ni baluiireni.

<sup>31</sup> Dxejc räjp Jesús lojreni:

—Coltaa, xtebnu choņnu cadro rut rbājzdi, guisilaaazu tudxe'n.

Räjp Jesús si'c sa'csi yu' xhidajł bejn ni sää, ni siääd, nicla gal gauureni.

<sup>32</sup> Dxejcti sääreni nen te canuu cadro rut rbājzdi.

<sup>33</sup> Bahuii xhidajł bejn sääreni, biembeereni Jesús. Dxejc xhidajłreni huini' ro'c, xhidajł guejdx biriireni, ganidreni bidzujņreni loj Jesús nājza rexpejnpacni, dxejcti bidojņreni lojni.

<sup>34</sup> Birii Jesús nen canuu, bahuiini loj benxhidaalga. Dxejc balazļajznireni, sa'csi najczeni si'c rexilł ni ruti baxtoor xtenreni. Dxejc gusloj caguluiinireni guiraloj.

<sup>35</sup> Che gojł gudxej, gubig rexpejnpacni lojni, räjpreni:

—Rut rbājzdi ree, luxh agudxej naj.

<sup>36</sup> Baxhal rebejn te chääreni lo reguejdx, nājza rerench, te chasiireni yātxtiil gauureni sa'csi xheti xhi gauureni ree.

<sup>37</sup> Dxejc räjp Jesús lojreni:

—La'tu coldeed xhi gauureni.

Dxejc räjpreni loj Jesús:

—¿Xhixh sajł tiop gayuu meel yātxtiil chosiinu gauu guiraa rebenxhidajłre?

<sup>38</sup> Dxejcti räjp Jesús lojreni:

—¿Bal yātxtiil rajptu? Colchahuii.

Che gojņreni balni dxejc räjpreni:

—Gaii yātxtiil, nājza tiop bājł.

<sup>39</sup> Dxejcru gunibee Jesús räjpreni loj guiraa rebejn:

—Colcuej xcua-xcuaatu loj guixhaya'.

<sup>40</sup> Sas gurej xcua-xcuaaren. Yu' ļajt gurej tegayuuren, yu' ļajt gurej garol gayuuren.

<sup>41</sup> Dxejcti cua' Jesús guigaii yätxtiilga näjza guiro'p bājilga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bājil, badeednini loj rexpeljnpacni te badeedreneni loj guiraa rebenxhidaalga.

<sup>42</sup> Dxejc gudajw guiraareni, gudxaj xque'reni.

<sup>43</sup> Dxejcru batojpreni tzubitiop dxijm̄ guidxadoo yätxtiil näjza bājil ni bia'n.

<sup>44</sup> Luxh loj guiraa rebejn̄ ni gudajw yu' si'cti gaii mil niguii.

*Guzaj Jesús loj nis*

(Mt. 14:22-27; Jn. 6:16-21)

<sup>45</sup> Gunibee Jesús jiu' rexpeljnpacni neñ canuu, chägajcreni Betsaida, ni tre' dejtz nis stelaad, lałni cagusadiidxn̄ni rebejn̄.

<sup>46</sup> Che gulujx basadiidxn̄ireni, sääni neñ redane', sanabni lo Dios.

<sup>47</sup> Cheni acayu' guxhijñ, yu' rexpeljnpacni neñ canuu galäi ni suga' Jesús xtebni ro' nis.

<sup>48</sup> Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlałzni ninijdni lojreni.

<sup>49</sup> Dxejc che bahuiireni sasaj Jesús loj nis, naareni pet te beñmalni, ni'c guredxa'reni.

<sup>50</sup> Guiraareni bahuiireni lojni, bidxebduxhrenei. Sas gunigajcni lojreni, räjpni:

—Cołsutijp lałztu. Laa naräni. Na'c guidxejbtu.

<sup>51</sup> Dxejcti huä'p Jesús neñ canuu cadro yu'reni. Lagajc dxejc biacdx̄i bej, luxh laareni bidxeloduxhrenei,

<sup>52</sup> sa'csi direni niacbee xhini'c bennäj Jesús reyätxtiil. Guc najd lałzreni, ni'c direni niacbee.

*Bastajc Jesús rebenracxhuu neñ guedx Genesare't*

(Mt. 14:34-36)

<sup>53</sup> Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis.

<sup>54</sup> Che biriireni neñ canuu, biembegajc rebejn̄ Jesús,

<sup>55</sup> dxejcti birii rebejn̄ guideb nejzga. Guslojt̄i siädnärenei beñracxhuu loj Jesús, naga' rebenracxhuuga lo da'. Cadrotis riejñ diajgreni yu' Jesús riädnärenei rebenracxhuu.

<sup>56</sup> Niluxh cadrotis rij Jesús, neñ reguedxbäz, neñ reguedxro, näjza loj reñench, rguixhrenei rebenracxhuu cadro rajc guii. Dxejcti rniabreni loj Jesús te gac caanreni xhajbni, niluxh bñajc guiralii renani gudajñ xhajb Jesús.

## 7

*Nani runij̄t lastoo bejn̄*

(Mt. 15:1-20)

<sup>1</sup> Dxejcti refarisee, renani najc beñguidoo loj guedx Israel, näjza gaii rebejn̄ ni ruluii leii, renani birii Jerusalén, bidojpreni loj Jesús.

<sup>2</sup> Bahuiireni cayajw gaii rexpeljnpac Jesús, luxh canii rebejn̄ nacdxuudx naareni (dee säloj direni quiiib ñaareni si'ctis ni rdiib ñaa reben lałdxrenei). Ni'cni guniyajreni rexpeljnpac Jesús.

<sup>3</sup> (Guiraa rebejn̄ xten Israel, näjza refarisee, sasanäj nani baluii rebengool ni yu' guedx Israelreni. Direni gauu palga direni quiiib ñaareni balt̄i huält.)

<sup>4</sup> Che rbi'reni rijreni lo guii, rguibsa'creni ñaareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäj̄ruren̄i, luxh yu' mood rguuibreni rextrastreni näjza rexplooreni, näjza rextrastguiibreni, näjza rexloonreni.)

<sup>5</sup> Dxejc gunabdiid̄x refarisee näjza rebejn̄ ni ruluii leii loj Jesús, räjpreni:

—¿Xhicuent di rexpeljnpaclu gun si'cni baluii rebengool, niluxh rajwreni guideb nacdxuudx ñaareni?

<sup>6</sup> Dxejcti gunii Jesús lojreni räjpni:

—¡Beñ guijdx! Laaca gunii Isaias xcuenttu che guniini xtidx Dios. Scree cajni loj guijtz: Guejdxre sanälajz narä con rextiidxni, niluxh lastooreni zitro suga' loä.

<sup>7</sup> Xliasi ruzuxhijbreni, sa'csi direni chanälajz narä.

Ruluiireni si'c xtiid̄xpac Dios nani rnīi rebejn̄.

<sup>8</sup> Rusa'ntu xleii Dios, sasanäd̄z'zt̄tu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlr̄u cos sa' redee.

<sup>9</sup> Räjpza Jesús lojreni:

—Rusa'ntu xtidx Dios te risanäj̄tu recostumbr xtentu.

<sup>10</sup> Sa'csi räjp Moisés: "Huinälajz xtadlu con xnanlu." Räjpzani: "Suju'tpactu nani gudzubde yejc xtadni o yejc xnanni."

<sup>11</sup> Niluxh la'tu rniitu sajc gäb bejn loj xtdadni o loj xnanni: "Dina gapä xhi cojn gacnäälü" (nani säloj, abadedä guira'ti loj Dios).

<sup>12</sup> La'tu ditu gusaan gunru bejn por xtdadni nicla por xnanni.

<sup>13</sup> Si'c rbälaztu xtidx Dios, te sasanäjtü recostumbr nani ruluiitu, luxh xhidajl cos sa' dee rujntu.

<sup>14</sup> Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä.

<sup>15</sup> Rexhicos yälrajw ni rajw bejn, dini gunijt bejnğa, rediidx ni rii neñ lastoo bejn, näjza recos ni rujn bejn, ni'c runijt bejnğa.

<sup>16</sup> Pal yu' chu rlajz guisieed, sucuadiajgni.

<sup>17</sup> Dxejcti gula'reni loj rebeñxhidaal, biu'reni neñ yu'. Dxejc gunabdiidx rexejñpacni loj Jesús xhi säloj cuent ni guniini.

<sup>18</sup> Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neñ bejn digacdi gunijtni lastoo bejn, ä?

<sup>19</sup> Sa'csi dini jiu' neñ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya.

<sup>20</sup> Dxejc räjpni:

—Rediidx ni rii neñ lastoo bejn, näjza recos ni rujn bejn, ni'c sii runijt lastoo bejn.

<sup>21</sup> Sa'csi neñ lastoo rebejn rii rexhigabguijdx, näjza yälresnäjä chääl sa'ni, yälresnäjä ni xhet najcdi chäälni, yälругu't sa'ni,

<sup>22</sup> yälгубаан, yälrlajzni ga'pni xhixhten bejn, yällatsiaj, yälrusgueeni, yäl xheti xtuyj lojni, yälrdxechlajz, yälrudzubde sa'ni, yälnayechlajzni, yälгуаляјz.

<sup>23</sup> Guiraa reyällatsiajre neñ lastoo bejn riireni, luxh reni'csi runijt bejn.

*Tej guna Sirofenicia ni bililajz xtidx Jesús*

(Mt. 15:21-28)

<sup>24</sup> Dxejc birini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni.

<sup>25</sup> Biengajc diajg te gunaa ro'c yu' Jesús. Xindxape' gunaaga yu' bendxab neñ lastooni. Bidzujñ gunaaga, bazuxhijbni lo Jesús.

<sup>26</sup> Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni.

<sup>27</sup> Dxejc räjp Jesús lojni:

—Basaan gauxgaa rebuiux, sa'csi xhet laati gudzucajni xcuxtiil rebuiux te gudeednini loj rebä'cw.

<sup>28</sup> Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' neñ mex rajw nani rtejb ro' rebuiux.

<sup>29</sup> Dxejcti räjp Jesús lojni:

—Laaca rniliilu. Huij rolizlzu. Abirii bendxab neñ lastoo xindxape'lu.

<sup>30</sup> Luxh che bidzujñ gunaare rolizjni, a dxape' naga' lo da'. Gucbegajc gunaaga abirii bendxab neñ lastoo dxape'ga.

*Basiajc Jesús te bengop*

<sup>31</sup> Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujñtini ro' nis xten Galilee.

<sup>32</sup> Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biädnbreni lo Jesús nusujni naani yejc niguiiga.

<sup>33</sup> Dxejcti badzucajnini loj rebejn. Baquitzgajcni rebicuenaaani neñ diajgni, dxejcru batiobxhejnini, gudajntini lujdxni.

<sup>34</sup> Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

<sup>35</sup> Dxejcru bixalgajc rediajgni, gubangajc lujdxni, gunisa'cni.

<sup>36</sup> Dxejcti gunibee Jesús rutlojdi gäbreni, per che räjpni lojreni si'c, laareni batie'chrueni diidxga.

<sup>37</sup> Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

## 8

*Bayaan Jesús tajp mil bejn*

(Mt. 15:32-39)

<sup>1</sup> Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexejñpacni ni rinajlni, räjpni lojreni:



<sup>2</sup> —Rulaxlazä rebejnre, sa'csi naj rajc choñ dxej tre'reni loä, luxh xhet yu'di gauureni.

<sup>3</sup> Niluxh palga guxhaläreni rolizjzeni, xliajzzeni, sidxajgzeni lo nejz; sa'csi yu' renani zijtru siäädreni.

<sup>4</sup> Dxejcru räjp rexpejnpacni lojni:

—¿Caro chaca nu yätxtiil te cha xque' rebejnre ree, cadre rut rbäjzdi?

<sup>5</sup> Sas gunabdiidx Jesüs lojzeni:

—¿Bal yätxtiil rajptu?

Dxejcru räjpzeni:

—Gajdztsni.

<sup>6</sup> Gunibee Jesüs gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejnpacni te guteedrenini loj rebenxhidaal. Bateedireni yätxtiilga lo rebenxhidaalga.

<sup>7</sup> Rajpzareni gaii bälbáz, dxejcti badesac Jesüs xquixhtios lo Dios, gunibeeni bateedzareni rebälbázre loj rebenxhidaalga.

<sup>8</sup> Dxejc gudajwreni, gudxaj xque'reni. Dxejc batojp rexpejnpac Jesüs gajdz dxijm reyätxtiil näj rebäjil dxuc ni bia'n.

<sup>9</sup> Niluxh renani gudajwga najczeni si'cti tajp mil bejn. Dxejcti basadiidxnireni.

<sup>10</sup> Biunägajc Jesüs rexpejnpacni neñ canuu, biäädreni nez Dalmanuta.

#### *Gunab refarisee te senro loj Jesüs*

*(Mt. 16:1-4; Lc. 12:54-56)*

<sup>11</sup> Biääd refarisee, renani najc rebenguidoo loj guedx Israel, guslojzeni cayeinäjzeni Jesüs. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.

<sup>12</sup> Dxejcti bazaa lajz Jesüs neñ lastooni, räjpni:

—¿Xhicuent rlajz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

<sup>13</sup> Dxejcti basa'nnireni ro'c, biusacni neñ canuu, sä'tini stelaad nisga.

#### *Levaduur xten refarisee*

*(Mt. 16:5-12)*

<sup>14</sup> Biallajzreni nica'reni yätxtiil, luxh xhetliidi sanädireni. Tejts yätxtiil nuureni neñ canuu.

<sup>15</sup> Cagulijdx Jesüs rexpejnpacni, räjpni lojzeni:

—Colsusin, colnati levaduur xten refarisee, colnatiza levaduur xten Herodes. (Nalajznu, xtiidxreni najc si'c levaduur.)

<sup>16</sup> Dxejcti cayeinäj sa'reni diidx xcuent nani gunii Jesüs lojzeni, dxejc räjpzeni:

—Sa'csi dinu jia'p yätxtiil, ni'c rniini scree.

<sup>17</sup> Che guchee Jesüs xhini'c caniireni, räjpni:

—¿Xhicuent rniitu: "Sa'csi dinu jia'p yätxtiil"? ¿La gajdtu fii, la gajdtu gacbee? ¿La lałtis nacnajd lastootu?

<sup>18</sup> ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj?

<sup>19</sup> Che gula'a guigaii yätxtiil te gudajw gaii mil niguii, ¿bal dxijm yätxtil biujy batojptu?

Sas räjpzeni lojni:

—Tzubitio'pni.

<sup>20</sup> —Che gula'a guigajdz yätxtiil te gudajw tajp mil bejn, ¿bal dxijm yätxtil biujy batojptu?

Sas räjpzeni:

—Gajdzni.

<sup>21</sup> Dxejc räjpni lojzeni:

—¿La gajdtu gacbesa'c xhi benä?

#### *Basajc Jesüs te lotiä'p Betsaida*

<sup>22</sup> Bidzunäj Jesüs rexpejnpacni guedx Betsaida. Dxejc biädnäreni te lotiä'p loj Jesüs, gunabreni loj Jesüs caanni bejnga.

<sup>23</sup> Dxejc gunaazni naa lotiä'pga, guläänini neñ guejdx. Che batiobxhejnneñ rebalojni, basugajcni naani yejc baloj lotiä'pga, gunabdidxgajc Jesüs:

—¿La yu' xhi rhuiilu, ä?

<sup>24</sup> Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojzeni.

<sup>25</sup> Basusac Jesüs naani yejc rebaloj bejnga. Dxejc bejn Jesüs bahuii bejnga. Biajctini, zijtru gujc bahuisa'cni lo guiraa rebejn.

<sup>26</sup> Dxejcti baxhal Jesüsüni rolizjni, räjpni:

—Basquejn, huijga rolizlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

*Basule' Pedr Jesús najc Crist**(Mt. 16:13-20; Lc. 9:18-21)*

<sup>27</sup> Birinäj Jesús rexpejn<sup>u</sup>pacni lo reguejdx ni ria'n nez Cesarea xten Filipino. La<sup>u</sup>ni sasajreni lo nejz räj<sup>u</sup> Jesús loj rexpejn<sup>u</sup>pacni:

—¿Chuni'c rnii rebejn nacä narä?

<sup>28</sup> Sas räj<sup>u</sup>preni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

<sup>29</sup> Dxejc räj<sup>u</sup>pni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räj<sup>u</sup>pni lojni:

—Luj najclu Crist.

<sup>30</sup> Dxejcti räj<sup>u</sup> Jesús lojreni:

—Rutlojdi gäbtu chu nacä.

*Gunii Jesús xho guetni**(Mt. 16:21-28; Lc. 9:22-27)*

<sup>31</sup> Dxejcti gusloj Jesús caguluiini rexpejn<sup>u</sup>pacni, räj<sup>u</sup>pni:

—Narä nacä Xi'n Dios, ni gujc Niguui. Nanabpac tedä trabajwduxh. Sibälaz rebengool ni najc guxhtis neñ guedx Israel narä, najza renani rnibee loj rebixhojz, najza rebejn ni ruluui leii: sugu'treni narä, luxh ni riojn dxej guiba<sup>u</sup>sacä lo rebengut.

<sup>32</sup> Guyasi guniini rediidxre. Sas huinä Pedr Jesús telaad, dxejc räj<sup>u</sup>pni loj Jesús:

—Na'c guiniilu si'c.

<sup>33</sup> Dxejc batzuré loj Jesús, bahuiini loj rexpejn<sup>u</sup>pacni. Dxejc gudilñajni Pedr räj<sup>u</sup>pni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

<sup>34</sup> Dxejc gurejdxni rebexhidaal con reni najc xpejn<sup>u</sup>pacni, räj<sup>u</sup>pni lojreni:

—Palga yu' chu rlanj gac xpeñapac, sucuääz gunni ni rsia' lajzn gunni, sutedni trabajw si'c tej ni caj lo cruzj, sujiädñajni narä.

<sup>35</sup> Sa'csi nani rlanj guslaa xcälñabajni, sunijtni xcälñabajni. Luxh nani runijt xcälñabajni xcälñasa'c narä, xcälñasa'c xtidxä, siljaapac xcälñabajni.

<sup>36</sup> Xlia' ga'p bejn guiraloj lo guedxliujre palga nitni lo Dios par tejpas.

<sup>37</sup> Xhet gacdi gudeed bejn te guibañajni Dios.

<sup>38</sup> Nani guituinäj narä con rextidxä naj, cheni najc rebejn bendojl, narä, Xi'n Dios nani gujc Niguui, situinäazani che jiädñä reangl xten Dios che jiälää lo xcälrdimbicha' Xtaää.

**9**

<sup>1</sup> Dxejc räj<sup>u</sup> Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcälrmibee Dios.

*Gubixhlo Jesús garenca**(Mt. 17:1-13; Lc. 9:28-36)*

<sup>2</sup> Che gudejd xho'p dxej, Jesús cua' Pedr, naj Jacobo, najza Juan, laatisreni huinäni yejc te danro. Ro'c gubixhlojni garenca lojreni.

<sup>3</sup> Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni.

<sup>4</sup> Dxejc baluiioj Elías najza Moisés lojreni, cayuinäjreni Jesús diidx.

<sup>5</sup> Sas räj<sup>u</sup> Pedr loj Jesús:

—Dad, laaca dxunnu ree. Naj jiennu choñ yuguixa', tejni xtenlu, steeni xten Moisés, steeni xten Elías.

<sup>6</sup> Si'c guniini sa'csi nicla niacbeeni xhini'c guiniini, sa'csi cadxebduxhrenei.

<sup>7</sup> Dxejc biääd te za bejn balaa yejcreni. Neñ zaga biejn xse' te ni räj<sup>u</sup>:

—Dee najc xi'nä nani sanälazä, colcuadijg xtiidxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjiätreni dajnga, gunibee Jesús rut lojdi guiniireni xcuent ni bahuiireni, guiba<sup>u</sup>xgaasi Xi'n Dios nani gujc Niguui lo rebengut.

<sup>10</sup> Basälcheereni rediidxre neñ lastooreni. Dxejcru canabdiidx lo sa'reni xhicha säloj guiba<sup>u</sup>sacni lo rebengut.

<sup>11</sup> Sas gunabdiidxreni lojni, räj<sup>u</sup>preni:

—¿Xhicuent rnii remastr xten leii naquiinpac jiädxgaä Elías?

<sup>12</sup> Dxejcti bazejcti diidx lojreni, räj<sup>u</sup>pni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtz xcuent Xi'n Dios ni gujc Niguui, sidejndi trabajwduxh, rutza jiidini?

<sup>13</sup> Luxh narä rniä lojtu, abiaäd Elías, luxh bennäjrenini si'tctis ni rlanjreni, si'cpac ni caj loj guijtz ni rusule' xcentni.

*Basiac Jesús te biuux ni guyu' bendxab neñ lastooni*  
(Mt. 17:14-21; Lc. 9:37-43)

<sup>14</sup> Che asiäädreni cadro tre' sgaii rexpeljpac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluu leireni.

<sup>15</sup> Che bahuii guiraa rebejn loj Jesús, bidxeloduxhreni, baxuñreni, huiye'tzreni xchan lojni.

<sup>16</sup> Dxejc gunabdiidx Jesús lojreni:

—¿Xhini'c rusieinäjtu laareni?

<sup>17</sup> Sas gunii tej reni yu' lo bexhidaalga, räjpni:

—Dad, ree siädnää xi'nä lojlu, yu' bendxab neñ lastooni, nani rujn najcni gop.

<sup>18</sup> Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpeljpacu cuääreni bendxabga, niluxh di niajcdi nibäärenini.

<sup>19</sup> Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Coltanäni loä!

<sup>20</sup> Dxejc biädnäreni biuuxga lojni. Che bahuii bendxab lo Jesús, basnijni bi'nga, basälta'tinini lo yuj. Sädiidxni, luxh car'i bitzun ro'ni.

<sup>21</sup> Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbáz.

<sup>22</sup> Balti huält rusäl'nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

<sup>23</sup> Sas räjp Jesús lojni:

—¿Xhicuent rniabdiidxlu la sajc gacnäálu? Xhitis sajc gac par nani rililajz.

<sup>24</sup> Guredxa' xtad bi'nga, räjpni:

—¡Rililazä! Gucnäj narä te chaliiru lazä.

<sup>25</sup> Che bahuii Jesús bixa't xhidajl bejn lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii neñ lastoo bi'nga. Na'cru chulu neñ lastooni.

<sup>26</sup> Dxejcru guredxa' bendxabga, luxh hasnibzejsni bi'nga, dxejcru biriini neñ lastooni. Astoo te bengut bia'n bi'nga ro'c. Xhidajl rebejn räjp:

—Agujtni.

<sup>27</sup> Dxejc gunaaz Jesús naa bi'nga guläsni. Guzuliiti bi'nga.

<sup>28</sup> Dxejcti che abiu' Jesús neñ yu', gunabdiidx rexpeljpacni lojni:

—¿Xhicuent di niajcdi nibäänu bendxabga?

<sup>29</sup> Dxejc räjp Jesús lojreni:

—Di gacdi cuäätu sa' bendxabre palga ditu cuedx-guinab lo Dios, palga ditu gucuanxgaa.

*Gunisac Jesús xho guetni*

(Mt. 17:22-23; Lc. 9:43-45)

<sup>30</sup> Dxejc biriireni ro'c, gudejdreni Galilee. Luxh di rlanj Jesús niacbee rebejn sadejdreni nejzga,

<sup>31</sup> sa'csi caguluiini rexpeljpacni. Cayäjpni lojreni: “Xi'n Dios ni gujc Niguii sidejdni ladznaa rebejn, niluxh sugu'trenini. Che guiza' choñ dxej gujtni, sibajjni stehuält.”

<sup>32</sup> Niluxh laareni direni niacbee xhini'c guniini, bidxeljzarenini niniabdiidxreni lojni.

*¿Chuni'c sajcru?*

(Mt. 18:1-5; Lc. 9:46-48)

<sup>33</sup> Bidzujntireni Capernaum. Che biu'ni neñ yu' räjpni lojreni:

—¿Xhini'c cagusiejytu lo nejz?

<sup>34</sup> Dxejc xhet guniitireni, sa'csi laareni cagusieinäj sa'reni lo nejz don chuni'c sajcru lojreni.

<sup>35</sup> Sas gurej Jesús, dxejc gurejdxni guitzubitio'p xpejnpacni, räjpni lojreni:

—Palga yu' chu rlanj gasajcru lojtu, sugacxgaani si'c te nani xhet sajcti, sugunzani xtzuum chutis.

<sup>36</sup> Dxejcti cua'ni tej biuxbáz, huinänini galäiireni. Dxejc gudääzni biuxbázga, räjpni lojreni:

<sup>37</sup> —Chutis ni gacnäjä te rebixue're sa'csi rinälajzni narä, sacnäjäni narä, luxh nani gacnäjä narä, xhet narätis gacnäjtini, näjza xtadä nani baxhaļ narä racnäjni.

*Nani di guiniyaj nuunu, xladnu yu'ni*

(Lc. 9:49-50; Mt. 10:42)

<sup>38</sup> Dxejcti gunii Juan räjpnj lojni:

—Bahuiinu lo te bejn ni rbää bejdxab con xcäl̄rnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup> Dxejc räjpnj Jesús lojni:

—Na'c gudxojuantu gunni si'c sa'csi bejn nani rujn milagwr con xcäl̄rnibee laä digacdi guiniyagajcni narä.

<sup>40</sup> Nani di guidxagdijl nuunu, xlaadnu yu'ni.

<sup>41</sup> Rniliäpac lojtu, chutis ni guniidx te bas nis lojtu sa'csi najctu xpejñpac Crist, siguijx Diosni xcuent nani bejnni.

*Nani rujn jiajb bejn lo dojl*

*(Mt. 18:6-9; Lc. 17:1-2)*

<sup>42</sup> 'Chutis ni gusiu' tej rebixue' ni rililajz narä neñ dojl, sugal te guimolin yejnni dxejcti gucuaarenini lo nisdoo.

<sup>43</sup> Palga tej ñaalu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ñaalu gusälreni luj gabijl, loj bajl ni di jiuui,

<sup>44</sup> cadre diza xpisiujgreni guet, diza bajl jiuui.

<sup>45</sup> Luxh palga tej ni'lu gun gunlu dojl, batiu'ni: hueenru natiujnglu chaläjzlu cadre yu' Dios quela sojb guiro'p ni'lu luxh chäälü gabijl, lo bajl ni di jiuui,

<sup>46</sup> cadre di xpisiujgreni guet, diza bajl jiuui.

<sup>47</sup> Luxh palga tej baloju gun gunlu dojl, gulääni: hueenru chäälü cadre rnibee Dios natiä'p lojlu quela sojb guiro'p baloju chäälü gabijl,

<sup>48</sup> cadre di xpisiujgreni guet, diza bajl jiuui.

<sup>49</sup> 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios.

<sup>50</sup> Hueen najc sejd, luxh palga agudejd yäl̄nadzij yejcnj, ¿xho guntu te gacsacni nadzij? Colyajc nadzij la'tu, col̄guibaññäsa'c sa'tu.

## 10

*Baluii Jesús xcuent rälrur'o'n sa'ni*

*(Mt. 19:1-12; Lc. 16:18)*

<sup>1</sup> Dxejcru birii Jesús ro'c huijn nez Judea näjza nez ro' gueu Jordán stelaad. Ro'c bidojpn xhidajl bejn lojni stehuält, sas guslosacni caguluiinireni si'ctis ni ruluiinireni.

<sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidixreni, räjpnj:

—¿La laaca gun niguii gusaan chääl̄ni, ä?

<sup>3</sup> Dxejc laani bazejcnj diidix, räjpnj lojreni:

—¿Xhini'c gunibee Moisés guntu?

<sup>4</sup> Dxejcru räjpnj:

—Moisés basaan gudeedni te guitz gusaan chääl̄ni che guro'n̄nini.

<sup>5</sup> Dxejc Jesús räjpnj lojreni:

—Sa'csi guyaa lajztu, ni'cni bacuaa Moisés diidxga lojtu.

<sup>6</sup> Niluxh che birixtiej beñ guedxliuj, “niguii con gunaa benchee Diosreni.”

<sup>7</sup> “Ni'cni te niguii siriini loj xtadni, loj xnanni te cuäznäjni chääl̄ni.

<sup>8</sup> Niluxh renani gujc tiop bejn sajcreni si'c tejsi bejn”, dirurenj gac tiop bejn, si'c tejsi bejn gacreni.

<sup>9</sup> Na'c gudzucaj bejn lo sa bejn̄ni nani abachaag Dios lo sa'ni.

<sup>10</sup> Che biu'reni neñ yu' gunabdiidixsac rexpejñpacni lojni xcuent rediidixre.

<sup>11</sup> Dxejc räjpnj lojreni:

—Chutis niguii ni gusaan chääl̄ni, sas guchñaani ste'cani, rujn̄ni dojl.

<sup>12</sup> Niluxh palga gunaa guro'n chääl̄ni sas guchñaani ste'ca niguii, rujnzani dojl.

*Gunab Jesús gunle' Dios yejc rebixbáz*

*(Mt. 19:13-15; Lc. 18:15-17)*

<sup>13</sup> Biädnäza rebejn biuxbáz lojni te gutzuub Jesús ñaani yejcreni, sas gudidxa' rexpejñpacni lojreni.

<sup>14</sup> Che bahuii Jesús xhi cayujn rexpejñpacni, bidxe'chni räjpnj lojreni:

—Col̄saan jiaäd rebixbáz loä. Na'c gudxojuentureni, sa'csi xcäl̄rnibee Dios najc xten reni najc nadolajz si'c najc biuxbáz.

<sup>15</sup> Rniliäpac lojtu, chutis ni rlaiz jiu' lo xcäl̄rnibee Dios nanab guzobdiajgreni xtidx Dios si'c ruzobdiajg rebixue' xtidx xtadreni. Palga dini gun si'c, dini jiu' lo xcäl̄rnibee Dios.

<sup>16</sup> Dxejcti gudääz Jesús rebixbáz, bazujzani ñaani yejcreni, gunab Jesús gunle' Dios yejcreni.

*Te bi'n ni rapduxh guninäj Jesús  
(Mt. 19:16-30; Lc. 18:18-30)*

<sup>17</sup> Che birii Jesús loj xnejzni, ruxun te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beṇsa'c, ḡxhini'c gunä te xca'ä yälṇabajṇ par tejpas?

<sup>18</sup> Sas räjp Jesús lojni:

—ḡxhicuent rniilu loä beṇsa'c? Tejtisni najc beṇsa'c; Diostis najc beṇsa'c.

<sup>19</sup> Najnlu xhini'c gunibee Dios gunni: “Na'c guesnäjlü chääl sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajṇ xtadlu, xnanlu.”

<sup>20</sup> Dxejc räjp niguiiga lojni:

—Dad, guiraa redee cayunä cheni gucäli bi'n.

<sup>21</sup> Che bahuii Jesús lojni, huinälajznini, räjpni lojni:

—Tejtis nani cayäädḡ gunlu. Huij, huito' guiraa xhixtenlu, badeed xcuentni loj rebejn nani dig'aḡ, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

<sup>22</sup> Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

<sup>23</sup> Dxejc bahuii Jesús guideb gabi lojreni, räjpni loj rexpejṇpacni:

—Naganduxh jiu' rebejn nani yu'duxh xhixtenni lo xcälṇriṇabee Dios.

<sup>24</sup> Dxejc bidxelo rexpejṇpacni che biejn diajgṇeni rextiidxni. Dxejc räjp Jesús lojreni stehuaäl:

—ḡAiitu xi'nä!, lacti naganduxh gusaan renani sanälajṇ xhixtenni guinibee Diosreni.

<sup>25</sup> Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxhṇeni, räjpṇeni lojni:

—ḡChuxhni'c sajḡ laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi guslaa sabejṇni, Diostis rajc ruslaa bejn lo dojl, sa'csi Dios rac rujṇ guira'ti.

<sup>28</sup> Sas gusloj Pedr cayäjp lojni:

—Naj nuure ahuilälaznu guira'ti te siopnajlṇu luj.

<sup>29</sup> Dxejc räjp Jesús:

—Rniliäpac lojtu, chutis nani cuälaz rolizjni, rebejzṇni, rebisiajṇni, xtadni, xnanni, chäälṇi, rexi'ṇni, rexyujṇi, xcälṇnasa'c narä, näjza xcälṇnasa'c xtidx Dios,

<sup>30</sup> sica'ni lo guedxliujre te gayuu huälṇ xhidajlru. Sica'ni rolizjni, rebejzṇni, rebisiajṇni, xnanni, rexi'ṇni, rexyujṇi. Sisiunajlṇenini naj, dxejc xhaguibaa sica'ni yälṇabajṇ par tejpas.

<sup>31</sup> Xhidajl rebejn nani sajḡ lo guedxliujre xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajcṇeni.

*Gunisac Jesús diidx xho guetṇi  
(Mt. 20:17-19; Lc. 18:31-34)*

<sup>32</sup> Dxejcru sasaj Jesús, nijdṇi lo rexpejṇpacni sääreni Jerusalén, luxh cadxelojreni. Cadxejbza rebejn nani sanajlṇeni. Dxejcti guläsac Jesús rexpejṇpacni lo rebejn, gusloj cayäjpni lojreni guira'ti nani sacni.

<sup>33</sup> Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladzṇaa rebixhojz nani rṇabee näjza rebejn ni ruluui lei. Luxh sinibeereni guetä. Suteedreni narä lo rebejnziṇ nani digac xpejṇ Israel.

<sup>34</sup> Suxhisnäjreni narä, siguijṇreni narä, sutiobxhejzarenini loä, dxejcru sugu'treni narä. Che riojṇ dxej sibansacä.

*Gunab Jacob näjza Juan te yälṇnasa'c  
(Mt. 20:20-28)*

<sup>35</sup> Dxejcti gubig Jacob näjza Juan, rexi'n Zebedeo, räjpṇeni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc räjp Jesús lojreni:

—ḡXhini'c rlanjtu gunä xcuent la'tu?

<sup>37</sup> Räjpṇeni:

—Cue tejnu cuä'lu ladbee, xteenu cue cuä'lu ladbäjgw che acanibeelu.

<sup>38</sup> Dxejc räjp Jesús lojreni:

—Ditu gan xhini'c rniabtu. ḡXhixh sajḡ yäṇ nani yä'ä? ḡXhixh sajzca guirobnistu si'cni guirobnisä? Nalajznu, xhixh sajḡ tedtu trabajw nani tedä narä.

<sup>39</sup> Sas räjpṇeni lojni:

—Sajḡ tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä.

<sup>40</sup> Te cue tejtü ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

<sup>41</sup> Luxh che biejn diajg stzuureni bidxe'chreni loj Jacoob näjza loj Juan.

<sup>42</sup> Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglazj gasajcrueni lo rebejn. Luxh rebejn ni sajc rnibeduxhreni lo rebejn.

<sup>43</sup> Xhet si'c di guntu la'tu. Chutis nani rlazj gasajcru lojtu, riäjł gacni mos lojtu.

<sup>44</sup> Luxh chutis la'tu nani rlazj gasajcru, riäjł gacni xmos guiraatu.

<sup>45</sup> Di Xi'n Dios ni gujc Niguii niääd, te ga'ptisni mos, biäädzani te quixni con xcälñabajñni te laa xhidajł bejn lo dojl.

*Basajc Jesús Bartimeo, ni natiä'p lojni*

(Mt. 20:29-34; Lc. 18:35-43)

<sup>46</sup> Dxejcti biäädreni Jericó. Che birii Jesús ro' guedx Jericó con rexpeljnpacni näjza rebejñhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabäáni gojn.

<sup>47</sup> Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlazj narä.

<sup>48</sup> Xhidajłreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlazj narä.

<sup>49</sup> Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

<sup>50</sup> Sas rołca xhablazni gudixhni, huisuliini, biäädtni lo Jesús.

<sup>51</sup> Dxejc räjp Jesús lojni:

—Naja', çxhini'c rlazzlu gunä?

Dxejc räjp lotiä'pga loj Jesús:

—Dad, rlazä gunlu fiä.

<sup>52</sup> Dxejcti räjp Jesús lojni:

—Huij, abiajclü sa'csi rililajzlu.

Lagajc dxejc gujc bahuiini. Sanajłtini Jesús lo nejz.

## 11

*Biu' Jesús Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Cheni sadzujñreni gajxh Jerusalén, gudejdrēni neñ reguedx Betfagē näjza neñ guedx Betania nez cuä' dajne' ni laa dan Oliib. Baxhał Jesús tiop xpejñpacni,

<sup>2</sup> räjpni lojreni:

—Colçhäj guedxe' ni ria'n nez lojtu. Che guidzujntu ro' guejdxga, sidxäłtu te buře' ni caduu. Gajd bejn cuibni. Colçhečni, coltanägajcni.

<sup>3</sup> Palga yu' chu naa lojtu: “çXhicuent rujntu si'c?” Colçe'tztis: “Dad caquiinni.” Dxejc suxhalgajcni buře'ga ree.

<sup>4</sup> Säätireni ro'c. Dxejcru ronejz bidxälreni te buře' caduu ro' te lä'. Dxejcti baxhecrenini.

<sup>5</sup> Gaii bejn ni tre' ro'c räjp lojreni:

—çXhicuent caguxhectuni?

<sup>6</sup> Dxejc räjpreni loj rebejnga si'cni räjp Jesús lojreni gäbreni. Basangajc rebejnga sanäreni buře'ga.

<sup>7</sup> Dxejcru biädnäreni buře'ga loj Jesús. Badzuubreni xhablazreni dejtz buře'ga. Gubijbti Jesús buře'ga.

<sup>8</sup> Xhidajłza bejn gudixh xhablazreni lo nezyuj, sgaiireni gudi'ch balajg lo reyajg te gudixhrenini lo nezyuj.

<sup>9</sup> Rebejn ni nijd lojni näj reni sanajł dejtznı guredxa'reni, räjpreni:

—çColguiliä'p xpala'nni! Coldeed xquixhtiooz loj Dios sa'csi baxhałni nani siääd xcuentni.

<sup>10</sup> Coldeed xquixhtiooz loj Dios sa'csi agubiré xcälñribee toxtadnu David. çColguiliä'p xpala'n Dios ni yu' jiaro!

<sup>11</sup> Dxejcti biu' Jesús neñ guedx Jerusalén. Biu'zani neñ guidoro. Che bahuii Jesús guira'ti ni cayajc nenga, sanäni guitzubitio'p xpejñpacni, sääreni Betania sa'csi agudxej.

*Batzubde Jesús yejc te yagügw ni xhet cajdi lojni*

(Mt. 21:18-19)

<sup>12</sup> Che bara yääl, biunejzreni Betania. Dxejcti gusloj calaan Jesús,

<sup>13</sup> bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc.

<sup>14</sup> Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpeljnpacni.

*Gulää Jesús renani ruto' näj renani rsii neñ guidoo*

*(Mt. 21:12-17; Lc. 19:45-48; Jn. 2:13-22)*

<sup>15</sup> Dxejcti bidzujnreni guedx Jerusalén. Biu' Jesús neñ guidoro. Gusloj cabääni renani ruto' näj renani rsii neñ guidooga. Niluxh batiejxhni rexmex renani ruchaa meel, näjza reyagxhil xten renani ruto' paloom.

<sup>16</sup> Diruni nusaan nidednäjäreni xhicos nez neñ guidooga.

<sup>17</sup> Dxejc caguluiinireni, räpgajcni lojreni:

—¿La et screedi caj loj guiijt? “Xyu'ä sirilaj yu' cadro rninab guiraa rebeneguedxliuj lo Dios.” La'tu abejntuni si'c xpiliää gubaan.

<sup>18</sup> Rebixhojz ni rnibee näjza remastr xten leii biejn diajgreni nani gunii Jesús. Sas gudilreni xho ju'trenini, sa'csi rdxejbreni Jesús, sa'csi guiraa rebejn rdxeloy rextidx Jesús.

<sup>19</sup> Che biu' guxhijñ, birii Jesús guejdxga.

*Gubijdz yagiigw ni bidzubde*

*(Mt. 21:20-22)*

<sup>20</sup> Che bara yääl gudejdreni, bahuiireni agubijdz guideb yagiigw, näj rexlobaani.

<sup>21</sup> Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

<sup>22</sup> Dxejcti gunii Jesús räjpni lojni:

—Colchalilajz Dios.

<sup>23</sup> Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztsini scree gac nani guniini, sajcpac nani guniini.

<sup>24</sup> Ni'cni rniä lojtu, xhitis nani guiniabtu lo Dios che rninäjtni, colchalilajz xca'tuni, dxejc sica'tuni.

<sup>25</sup> Luxh che guiniabtu Dios, palga yu' chu loj rdxechlajztu, colsiäjla lajztu, te näjza Xtadtu nani yu' xhaguibaa gusiäjla rextojltu.

<sup>26</sup> Palga ditu gusiäjla lajztu con resa'tu, diza Xtadtu nani yu' xhaguibaa gusiäjla lajzni rextojltu.

*Yälrnibee xten Jesús*

*(Mt. 21:23-27; Lc. 20:1-8)*

<sup>27</sup> Sas bidzunsacreni guedx Jerusalén. La'l ni sasaj Jesús neñ guidoro, rebixhojz nani rnibee, näjza rebejn ni ruluii leii, näjza reguxhtis gubig lojni.

<sup>28</sup> Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

<sup>29</sup> Dxejc räjp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre.

<sup>30</sup> ¿Chu baxhal Juan ni batiobnis? ¿La Dios o la rebejn? Colni loä naj.

<sup>31</sup> Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?”

<sup>32</sup> Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

<sup>33</sup> Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

## 12

*Te xcuent rebenquijdx ni rbäzlaa*

*(Mt. 21:33-46; Lc. 20:9-19)*

<sup>1</sup> Dxejcti gusloj cagusee Jesús rebejn con recuent ni ruluii, räjpni:

—Yu' te bejn bazuj yaguub loj xyujni, bejnzani bazaani, dxejcru gudääni te lajt cadro jiä't uubga. Dxejcti bejn ni te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt.

<sup>2</sup> Che bidzujñ xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäjla xca' bejnga.

<sup>3</sup> Dxejc rebejn ni rbäzlaa ro'c gunaazreni mosga, gudijnreneni, luxh bazejcrenini siini ganaxni.

<sup>4</sup> Dxejcru baxhaḷ baxhuaanga stee mos lojreni. Niluxh laareni bacuaareni guijni, gudilgujdxreni yejc mosga, xho rniajni gubi'ni.

<sup>5</sup> Dxejc baxhaḷ bejnga stee mos, dxejc bagu'treneni. Baxhaḷni xhidajlruren. Gaii gudilgujdxreni, sgaiini bagu'treni.

<sup>6</sup> Yu'za tejtis xi'nni, luxh sanälajznini. Por lult näjza xi'nni baxhaḷni, naani: "Siucareni xi'nä."

<sup>7</sup> Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre."

<sup>8</sup> Sas gunaazreneni, bagu'treneni. Guläätirenini lo yujga.

<sup>9</sup> '¿Xhicha gun baxhuaan yaguubga rebejnre? Siäädni luxh sugu'tni rebejnre, dxejcti gudeedni yujga loj ste'ca bejn.

<sup>10</sup> '¿La gajdtu goḷ guijtz ni rnii scree?

Guij nani guläcaj renani runchee yu', ni'c agujc mastr ni guzuj galoo.

<sup>11</sup> Dad xtenu bejn scree, cos sacduxhni nezlojnu.

<sup>12</sup> Dxejc rlaiz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

*Diidx xcuent reimpuet*

(Mt. 22:15-22; Lc. 20:20-26)

<sup>13</sup> Dxejcti baxhaḷreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús.

<sup>14</sup> Dxejcti biäädreni, räjpreni lojni:

—Dad, nadonnu luj najclu te bejn ni rnii. Par luj guiraasi bejn sajc tebloj, sa'csi dilu fii la sajc bejn o la xhet sajcde bejn. Luj ruluiipaclu xhini'c rlaiz Dios gun bejn. ¿La laaca quix bejn reimpuet lo xcubieer César o la xhet laadi? ¿La guidiixnu o la dinu guidiix?

<sup>15</sup> Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtu narä scree? Coltanä te meelga loä, te fiä lojni.

<sup>16</sup> Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup> Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejnğa con xtiidxni.

*Yälriabdiidx xcuent yälrbansacni lo rebengut*

(Mt. 22:23-33; Lc. 20:27-40)

<sup>18</sup> Sas biädhuii resaducee loj Jesús. Resaducee najc rebejn nani rnii di rebengut guibansac. Dxejc gunabdiidxreni lojni, räjpreni:

<sup>19</sup> —Dad, xleii Moisés ruluii loonu, palga guet te niguui luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni.

<sup>20</sup> Guyu' gajdz niguui, bejtz najczeni. Sas cua' niguigalooga chäälni. Che gujtni ruti xi'nni.

<sup>21</sup> Dxejcti cua' ni rojppga gunaaga. Che gujtni, rut gajcde xi'nni. Si'cza gusajc ni riojnğa.

<sup>22</sup> Si'cza gulänäj gunaaga guigajdzreni. Per nicla tej reni di xi'nreni niu'. Dxejcti gujtzna gunaaga.

<sup>23</sup> Guigajdzreni gulänäjreni gunaare. Cheni guibansacreni lo rebengut, ¿chu chääl gacni?

<sup>24</sup> Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguui lo guijtz, dizatu gumbee yälrmibee xten Dios.

<sup>25</sup> Che guibansacreni loj rebengut, direni guchnaa, rutza gudeedtireni te guchnaareni. Niluxh sajcreni si'c najc rexangl Dios nani yu' xhaguibaa.

<sup>26</sup> Palga canabdiidxtu la rbansac rebengut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen bajl, räjpni: "Narä nacä Xtios Abraham, Xtios Isaac, Xtios Jacob."

<sup>27</sup> Palga Dios najc Xtios rebejnre, direni gac bengut, nabannäjreni Dios. Et laadi najc xhigabtu.

*Yälrmibee ni sajcru*

(Mt. 22:34-40)



<sup>28</sup> Dxejcru bidzujñ tej rebejn ni najn leii, biejn diajgni xhi caniiireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajrcu lo guiraareni?

<sup>29</sup> Dxejc räjp Jesús lojni:

—Mandamient nani sajrcu loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni.

<sup>30</sup> Chanälajzlu Dad Xtioslu guideb lastoolu, näj xaimlu, näj guideb xcäriejnlu, näjza guideb xcälñadiplajzlu.”

<sup>31</sup> Sigajcza najc mandamient ni rojpga: “Huinälajz sabejnlu si'ctis sanälajzlu lagajc luj.” Redee najc remandamient nani sajrcu loj guiraareni.

<sup>32</sup> Dxejcti räjp bejnğa ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

<sup>33</sup> Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcälñadiplajzni, luxh chanälajzni resabejnni sigajc laani. Redee sajrcu loj ni rujn bejn che rudeedreni gojn lo Dios.

<sup>34</sup> Che bahuii Jesús laaca guniini, räjpni lojni:

—Guxii cayäädx te jiu'lu loj xcälñabee Dios.

Sas rutru biajxhdi gunabdiidx loj Jesús.

*Chu xi'n najc Crist*

*(Mt. 22:41-46; Lc. 20:41-44)*

<sup>35</sup> Che caguseed Jesús nen guidoro, räjpni:

—¿Xho mood rnii rebejn ni najn leii Crist najc xi'n David?

<sup>36</sup> Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup> Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

*Gule'c Jesús xquej remastr xten leii*

*(Mt. 23:1-36; Lc. 11:37-54; 20:45-47)*

<sup>38</sup> Lalni caguseedni rebejn, räjpni lojreni:

—Cołsusin, na'c gu'chtu loj rebejn ni ruluii leii. Laareni rlanj sanäj reladsiool xtenreni. Rdxagljazreni rnii bejn lojreni nez lo reguii.

<sup>39</sup> Rlajzarenı cuerenı cadro rbej renani sajrcu nen reguidoo näjza cadro ru' relanij.

<sup>40</sup> Rudzucjazarenı xhixten rebıuud, rniızarenı xhidalduxh diıdix che rolrenı le', te rusäuurenı loj rebejn. Castigwruru gac redee.

*Gojn xten te biud prob*

*(Lc. 21:1-4)*

<sup>41</sup> Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga.

<sup>42</sup> Che biäd te biud prob, basälñi tiop melbäz ni sajc si'cti tej centaab.

<sup>43</sup> Dxejcru gurejdx Jesús rexpejnıpacni, räjpni lojreni:

—Rniliäpac lojtu, biud probre basäl xhidajlru lo guiraa renani basäl nen cajre,

<sup>44</sup> sa'csi guiraareni abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

## 13

*Gunii Jesús sibijl guidoo*

*(Mt. 24:1-2; Lc. 21:5-6)*

<sup>1</sup> Cheni sariireni nen guidoro, räjp tej rexpejnıpacni lojni:

—Dad, bahuii lacti reguij, lacti reyu'.

<sup>2</sup> Dxejcti räjp Jesús lojni:

—¿La rhuiilu loj reyu're? Nicla tej guiı dijia'n dzuub yejc sa'ni, guiraliireni sire'ch.

*Recos ni gac che ameer nitloj guedxliuj*

*(Mt. 24:3-28; Lc. 21:7-24; 17:22-24)*

<sup>3</sup> Dxejc sobga' Jesús yejc dajne' ni laa dan Oliib, cahuiini nez ro' guidooğa. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

<sup>4</sup> —Gunii loonu, ¿gac gac dee? ¿Xhi guihuiinu te gacbeenu asiädzıngajxh soob guiraa rediıdxre?

<sup>5</sup> Dxejcti gusloj gunii Jesús lojreni, räjpni:

—Colhunii, te rut gusgueedi la'tu,

<sup>6</sup> sa'csi xhidalduxh bejn jiaäd con laä, gäbreni: “Narä nacä Crist”, luxh rniisireni si'c, susgueezareni xhidajl bejn.

<sup>7</sup> Che jiejn diajgtu yu' guer näj yäl'nadxeeb xten guer, na'c guidxejbtu. Nanabpac gacni; et dxejcdi nitloj guedxliuj.

<sup>8</sup> Säjs naciön yejc sanacionni, näj yäl'rnibee yejc sayäl'rnibeeni. Xhidajl lajt sajc xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

<sup>9</sup> 'Dxejc la'tu col̄susin sa'csi suteedreni la'tu ladznaa reguxhtis, siguijnzareni la'tu neñ reguidoo. Sacrejdxtu lo regubieer näjza loj rereii xcäl'nasa'c narä, te si'c gac guiniitu xtidxä lojreni.

<sup>10</sup> Nanabpac guirechxgaa xtidx Dios loj guiraa rebeñ guedxliuj.

<sup>11</sup> Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jiaätjis yejctu dxejc, sa'csi xhet la'ditu ni guinii, Sprit Dxan xten Dios ni guinii.

<sup>12</sup> Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga.

<sup>13</sup> Sidxechlajz guiraa rebeñ lojtu sa'csi najctu xpenä; nani ted guiraa retrabajwre, ni'c gudeed Dios xcäl'nabajnni.

<sup>14</sup> Che fiitu loj nani najc yäl'rdxechlajz, nani najc yäl'runitloj, nani gunii Daniel ni gunii xtidx Dios. Che fiitu nani suga' cadro di nunyäjł suuni, dxejcti suguxun renani yu' nez Judea chääreni nez neñ redajn. (Nani goł guijtze sugacheenini.)

<sup>15</sup> Bejn nani suga' yejc yu' na'c jiaätjni jiu'ni neñ te yu' xca'ni gaii xhixtenni.

<sup>16</sup> Nani yu' loj niaa, di gal jiaät te xca'ni xhablajzni.

<sup>17</sup> ¡Aiii! Xhiza nalas chu regunaa ni nuu báz, luxh renani rusiä' xi'nni, neñ redxejga.

<sup>18</sup> Col̄nab loj Dios na'c sactu scree neñ rebäinajł.

<sup>19</sup> Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni.

<sup>20</sup> Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpeljnni nani aguleni.

<sup>21</sup> 'Dxejc palga yu' chu naa lojtu: “Col̄hunii, aree Crist”, o “Col̄huniiire, ani suga' rec”, na'c challajztuni.

<sup>22</sup> Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajnci, rlaizreni gusguelireni renani agule Dios.

<sup>23</sup> Ni'cni la'tu col̄susin; agunixgää lojtu guira'ti ni gac.

*Xho gac che jiaäd Xi'n Dios ni gujc Niguii*

*(Mt. 24:29-35, 42-44; Lc. 21:25-36)*

<sup>24</sup> Neñ redxejga, cheni luux retrabajwduxhga, sicäy lo gubijdx, luxh diru bäii gusanij.

<sup>25</sup> Sitejb rebalxhaguibaa, sinibsejs recos nani nasnä rebalxhaguibaa.

<sup>26</sup> Dxejcti suhiii rebeñ loä, Xi'n Dios nani gujc Niguii, siälä neñ reza guideb yäl'rnibeduxh xtenä, näjza xcäl'dimbicha'ä.

<sup>27</sup> Dxejcti guxhalgacä rexanglä jiaättojpreni renani guleä guideb lo guedxliuj, cat nalooli guedxliuj näjza cadro nalooli guibaa.

<sup>28</sup> Col̄guisieed nani ruluii yagiigw. Cheni rii rebäte' lojni luxh che rcaj balajz lojni, acaxhnajntu bäii gusguij asadzun̄gajxh.

<sup>29</sup> Sigajcza, che fiitu acayajc recosre, sacbeetu asiädgaxhä, ameer guidzunä.

<sup>30</sup> Rniliäpac lojtu, rebeñ ni nabajñ dxejc, direni nitloj, fixgaareni gac recosga.

<sup>31</sup> Sinitloj guibaa näjza guedxliuj, rextidxä di nitloj.

<sup>32</sup> Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

<sup>33</sup> Col̄hunii, col̄susin, col̄nab loj Dios, sa'csi ditu gan guc guidzujñ redxejga.

<sup>34</sup> Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'.

<sup>35</sup> Si'cza col̄susin, sa'csi ditu gan guc jiaäd baxhwaan yu'ga, la jiaädni gudxej, o la jiaädni garol yääl, o la cäy, o la jiaädni r̄sil.

<sup>36</sup> Col̄susin, te di guiga'tu nagayejstu che guidzujñni.

<sup>37</sup> Rediidx nani rniä lojtu, loj guiraa rebeñ rniäni: col̄susin.

## 14

*Ruchaagreni diidx te guiniaazreni Jesús*

*(Mt. 26:1-5; Lc. 22:1-2; Jn. 11:45-53)*

<sup>1</sup> Riäädx tiop dxej guidzujñ lanij, dxej ni ruzaa lajzreni gułaareni ladzñaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejñ Israel näj rebejñ ni ruluii leii rlaizreni niniaazreni Jesús con yälrusguee, te nugu'trenini.

<sup>2</sup> Dxejcti räjpreni lo sa'reni:

—Na'c jiennu scree neñ redxelanij, te na'c gun benguejdx biejej.

*Te gunaa ni basäl se't yejc Jesús Betania*

(Mt. 26:6-13; Jn. 12:1-8)

<sup>3</sup> Yu' Jesús Betania, rolizj Simón, nani guyu' guejch ni raļ tiejxhni. Che sobga'ni lo mex, biääd te gunaa ca' te bo'tguij yu' setnard neñni. Rlianexhduxhni, sacduxhni. Dxejç gudi'chni yejn bo'tguijga, te basälni se'tga yejc Jesús.

<sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga?

<sup>5</sup> Paru nido' se'tga, nijni si'cti chon gayuu denar, te nica' meelga rebejñ ni xhet rajpdi meel.

Luxh caguidxa'reni loj gunaaga.

<sup>6</sup> Dxejç räjp Jesús lojreni:

—Colšaanni, ¿xhicuent ruxdojntu nani cayujñ gunaare? Cos sacduxh dee bennäjni narä.

<sup>7</sup> Guideb ni guibajntu, su' rebejñ nani xhet rajpdi lojtu, luxh che rlaiztu sajç gacnäjturenii. Narä et xchejdi chu'ä lojtu.

<sup>8</sup> Gunaare abejñni nani gujctis bejñni. Abaslanexhxgaani tiexhä, te chää tiexhä neñ baa.

<sup>9</sup> Rniliäpac lojtu, cadrotis guidzujñ xtiidx Dios, guideb lo guedxliuj, siniizareni xcuent nani bejñ gunaare, te guinaj lajzreni gunaare.

*Rlaiz Judas guto' Jesús*

(Mt. 26:14-16; Lc. 22:3-6)

<sup>10</sup> Dxejcti huij Judas Iscariot, nani najc tej retzubitio'p xpejñpac Jesús, loj rebixhojz nani rnibee te guto'ni Jesús lojreni.

<sup>11</sup> Che biejñ diajç rebixhojz xtiidxni, bibalajzreni. Räjpreni sudeedreni meel lojni. Dxejcti caguilil Judas xho guto'ni Jesús.

*Gudauxchej Dad con rexpejñpacni*

(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup> Biu'ti xmaan che rajwreni yätxtiil ni di saguij. Dxej lanijga, rugu'treni xiił, te ruzaa lajzreni dxej ni gułaareni ladzñaa reEgipto. Räjp rexpejñpacni loj Jesús:

—¿Caro rlaizlu chosucheenu te gauulu nadxej, dxelanij?

<sup>13</sup> Dxejç baxhałni tiop rexpejñpacni, räjpni lojreni:

—Colchäj neñ guejdx, ro'c guidxaagtu te niguii ni nuu te re' nis. Colchanajł niguiiga.

<sup>14</sup> Cadro jiu'ni colye'tz loj bejñ ni najc rolizjni ro'c: “Naj Dad mastr, ¿con yu' cadro ria'n rebiooz, cadro gauñäjni rexpejñpacni nadxej, dxelanij?”

<sup>15</sup> Dxejcti guluiini lojtu te yu' ni sojb jiaaliga yejc sa'ni, ni asuchexga neñni. Colyujñ xhi guidaunu ro'c.

<sup>16</sup> Sas huij rexpejñpacni, bidzujñreni neñ guejdxga. Bidxälreni te yu' si'cni räjp Jesús lojreni. Ro'c bejñreni xhi gudajwreni dxelanij.

<sup>17</sup> Che huääz gubijdx, bidzunñäj Jesús guitzubitio'p xpejñpacni.

<sup>18</sup> Lałni sobga'reni lo mex cayajwreni, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

<sup>19</sup> Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajç steeni:

—¿La naräni?

<sup>20</sup> Dxejcti guniini, räjpni lojreni:

—La tej retzubitio'p, tej ni cayajw loj xpla'tä.

<sup>21</sup> Sa'csi narä Xi'n Dios nani gujç Niguii, sia'ä, si'cpacni caj loj xtiidx Dios, per xhiza nalajç niguii ni guto' narä. Huentejti na'c niäjł niguiire.

<sup>22</sup> Lałni cayajwreni, cua' Jesús yätxtiil, badeedzani xquixhtiooz loj Dios dxejç guła'nini, badeednini lojreni. Dxejcti räjpni:

—Colca' yätxtiilre. Dee najc si'c tiexhä.

<sup>23</sup> Cuagajçni te bas. Che abadeedni xquixhtiooz loj Dios, badeednini lojreni, gu' guiraareni neñ basga.

<sup>24</sup> Dxejcti räjp Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajł rebejñ.

<sup>25</sup> Rniliäpac lojtu, diruna yä'ä bin nani rii yejc uub, dxejli yä'äni stehuält loj xcä|rnibee Dios.

*Gunii Jesús sinii Pedr dini gumbeeni*  
(Mt. 26:30-35; Lc. 22:31-34; Jn. 13:36-38)

<sup>26</sup> Che gulujx bilreni te dij xten Dios, biriireni, sääreni nez dajne' ni laa dan Oliib.

<sup>27</sup> Dxejcru räjp Jesús lojreni:

—Guiraatu sibälaztu narä naguxhijñ, sa'csi si'c cajni lo guijtz: “Sugu'tä baxhtoor luxh suxuñ rexiiil.”

<sup>28</sup> Che guibansacä loj rebengut, ganidä cha'a Galilee, dxejcti jiaädutu.

<sup>29</sup> Dxejc räjp Pedr loj Jesús:

—Palga guiraareni cuälazlu, narä dina cuälazälu.

<sup>30</sup> Dxejc räjp Jesús lojni:

—Rniliäpac lojlu, lagajc guxhijñre, nicla gajd guidgaii cuedxa' tiop huält, luj aguiniilu choñ huält dilu gumbee narä.

<sup>31</sup> Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn pacni gunii si'c.

*Gunab Jesús loj Dios che yu'ni Getsemaní*  
(Mt. 26:36-46; Lc. 22:39-46)

<sup>32</sup> Dxejcti bidzujñreni te lajt cadro laa Getsemaní. Dxejc räjpni loj rexpejn pacni:

—Colcuj ree lalni chanabä lo Dios.

<sup>33</sup> Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh.

<sup>34</sup> Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc.

<sup>36</sup> Räjpni:

—Abba, xtadä, luj rajc rujnlu guira'ti: badzucaj re TRABAJWRE loä. Xhet si'cni rlazädi narä, bejn si'cni rlazlu luj.

<sup>37</sup> Dxejc biädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcädi nutie'chlu bacal?

<sup>38</sup> Coltie'ch bacal, colnab lo Dios, te na'c guntu dojl. Lastootu rlanj gutie'chtu bacal, luxh tiejxhtu abadxajc.

<sup>39</sup> Huij Jesús stehuält, binabni loj Dios, guniini lagajc rediidx ni guniini galoo.

<sup>40</sup> Dxejcti biädsacni cadro tre'reni, gunaazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni.

<sup>41</sup> Ni riojn huält biädni, dxejc räjpni lojreni:

—Agojl colguejs, colsilajc, agujc, abidzujñ or ni ted Xi'n Dios ni gujc Niguii ladzñaa rebendojl.

<sup>42</sup> Colchastie, colcho'. Asiäddzungajxh ni guto' narä.

*Gunaazreni Jesús*  
(Mt. 26:47-56; Lc. 22:47-53; Jn. 18:2-11)

<sup>43</sup> Canisijcni scree, che bidzujñ Judas, ni najc te retzubitio'p xpejn pacni, siädni xhidajl bejn. Ca'reni spaad, ca'reni yajc biriireni lo rebixhojz nani rnibee, näjza rebejn ni ruluui leii, näjza rebengool nani najc guxhtis.

<sup>44</sup> Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup> Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini.

<sup>46</sup> Dxejcru gunaazreni Jesús ro'c.

<sup>47</sup> Dxejc tej reni suga' ro'c, gulää xspaadni, gudilguijdxni xmos bixhojz nani sajrcru, batiu'ni diajgni.

<sup>48</sup> Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan?

<sup>49</sup> Guiraa dxej guyu'ä lojtu nen guidoo, caguluüatu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

<sup>50</sup> Dxejcru rexpejn pacni gulälazrenini, baxuñtirenini.

*Bi'n nani baxuñ*

<sup>51</sup> Sanajlza te bi'n Jesús, nadejbni ganaxhtis te bariaad. Si'c gunaazrenini.

<sup>52</sup> Dxejcti baxunni, libasa'nmi bariaadga, sä'tini xhabäälni.

*Suga' Jesús loj reguxhtis*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Dxejc biädnäreni Jesús loj bixhojz ni sajrcu. Bidojpb rebixhojz nani rnibee, näj rebengool ni najc guxhtis, näjza rebejn ni ruluii leii.

<sup>54</sup> Luxh Pedr zijt zijt sanajlni Jesús. Che bidzujntini lo xle' bixhojz ni sajrcu, gurenäjni rebejn nani rajp ro'c, cagucha' lajzni lo bajl.

<sup>55</sup> Rebixhojz nani rnibee, näjza guiraa rebengool ni najc guxhtis, caguillreni xhi tej xquej Jesús nidxälreni, te nugu'treni Jesús, xhet bidxäldireni.

<sup>56</sup> Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni.

<sup>57</sup> Dxejc huisulii gaii bejn ni guniireni stee didxxhii xcuent Jesús, räjpreni:

<sup>58</sup> —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh chontis dxej guncheä steeni, ni nac-chee et con ñaadi rebejn.”

<sup>59</sup> Nicla si'c di xtiidxreni nile', sa'csi garen garenza guniireni.

<sup>60</sup> Dxejcti huisulii bixhojz ni sajrcu galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

<sup>61</sup> Laani niäutis ro'ni, xhet guniidini. Dxejcti gunabdiidxsac bixhojz ni sajrcu lojni, räjpni:

—¿La luj ni najc Crist, xi'n Dios nani rliä'p bejn xpala'nmi, ä?

<sup>62</sup> Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza

neñ reza ni tre' xhaguibaa.

<sup>63</sup> Dxejrcu bixhojz ni sajrcuga, batiäjsni tla' xhajbni, räjpni:

—¿Xhi jienrunu guidiilnu diidx xcuentni?

<sup>64</sup> Abiejn diajgtu xho guniyajni Dios. Naja', ¿xhi najtu?

Dxejcti guiraaareni räjp nungäjlpac guetni.

<sup>65</sup> Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

*Gunii Pedr dini gumbee Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Dxejc suga' Pedr lo yuj, nez lo le'ga, che biääd te xcriaad bixhojz ni sajrcu.

<sup>67</sup> Luxh bahuini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

<sup>68</sup> Dxejc Pedr basgueeni, räjpni:

—Dina gumbeäni. Dizana ganä xhini'c canilu.

Dxejcti biriini säani ro' suaan. Dxejcti guredxa' guidgaii.

<sup>69</sup> Dxejc bahuisc criaadga lojni, räjpni loj renani suga' ro'c:

—Niguiire najc laa tejreni.

<sup>70</sup> Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beñ Galileelu, luxh guyasi riejn rniilu si'c rni reben Galilee.

<sup>71</sup> Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

<sup>72</sup> Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa' tiop huält, luj gacla chon huält aräjplu dilu gumbee narä.”

Dxejc guslojni cayoönni.

## 15

*Suga' Jesús loj Pila't*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibrengeni Jesús, sanätirenini, niluxh baadedrenini loj Pila't.

<sup>2</sup> Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guniilu, si'c najcni.

<sup>3</sup> Dxejc gusloj rebixhojz nani rnibee cabe'c rexquej Jesús.

<sup>4</sup> Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

<sup>5</sup> Bidxeloj Pila't sa'csi nicla si'c xhetru guniidi Jesús.

*Gunibeereni guet Jesús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Dxelanijpac ruslaa Pila't tej rebejn ni yu' latzguuib. Ruslaani chutis te ni rniab rebejn.

<sup>7</sup> Lo rebejn ni yu' latzguuib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer.

<sup>8</sup> Dxejc bidojp xhidajl bejn loj Pila't, gunabreni lojni gunni si'ctis rujnni casob lanij.

<sup>9</sup> Dxejc gunabdiidx Pila't lojreni, räjpni:

—¿La rlanjtu guslaä reii xten rexpejn Israel, ä?

<sup>10</sup> Sa'csi gucbegajcni rdexchlajz rebixhojz loj Jesús, ni'c bateedrenini lojni.

<sup>11</sup> Ni'cni baquiiiza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup> Dxejc räjp Pila't lojreni stehuält:

—¿Xhini'c rlanjtu gunnä nani rniitu reii xten rexpejn Israel?

<sup>13</sup> Dxejcru guredxa'reni:

—¡Bacuaani lo cruzj!

<sup>14</sup> Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rueni:

—¡Bacuaani lo cruzj!

<sup>15</sup> Baslaati Pila't Barrabás, sa'csi rlanjz ni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

<sup>16</sup> Dxejc huinä rexsoldaadni Jesús neñ Pretoor, yu' cadro rujnreni yälguxhtis, ro'c batopjreni guiraa resa'reni.

<sup>17</sup> Dxejcti bashuajcwreni Jesús te lad moraad, bencheereni te coron guejch basälreni yejcnj.

<sup>18</sup> Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

<sup>19</sup> Batiäjlrjeni te yabixhijl yejcnj, batiobxhejnreni lojni, luxh guzuxhijbreni te rajnrenini.

<sup>20</sup> Che gulujx basacsireni Jesús, gulääreni lad moraad ni najcwni, sas bashuajcwrenini xhajbpcni. Gulägajceni Jesús te cuaarenini lo cruzj.

*Bacuaareni Jesús loj cruzj*

(Mt. 27:32-44; Lc. 23:26-43; Jn. 19:17-27)

<sup>21</sup> Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtdad Alejandro näjza Rufo. Che sadejdni nejzga, la fuerz basguurenini xcruzj Jesús.

<sup>22</sup> Dxejcti huinäreni Jesús cadro laa Gólgota, nani säloj: dan Calabeer.

<sup>23</sup> Ro'c badeedreni lo Jesús bin nani nu'ch mir lojni, dxejc laani naaddini niä'ni binga.

<sup>24</sup> Che gulujxti bacuaareni Jesús loj cruzj, gudzujtreni yejc rexhajbni, te don xhini'c xca'tejgareni.

<sup>25</sup> Agujc choñ or gulejn gubijdx che bacuaareni Jesús lo cruzj.

<sup>26</sup> Letreer cadro bacuaareni xtojlni scree bejnrenini: “Reii xten rexpejn Israel.”

<sup>27</sup> Bacuaazareni lo stiop cruzj tiop gubaan, tejni xladbee Jesús, xtee xladbäjgwni.

<sup>28</sup> Dxejc guzobj diidx ni caj loj guijtznani rni: “Loj rebenguijdx bigabni.”

<sup>29</sup> Luxh renani sadejd nejzga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh choñtis dxej niunchesacluni.

<sup>30</sup> Naj baslaa lagajc luj, biäjt loj cruzjga.

<sup>31</sup> Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani.

<sup>32</sup> Naj sujiäjt Cristre, reii xten rexpejn Israel, lo cruzj te guihuuiinu, te chalilaaazu.

Näj regubaan ni caj lo cruzj guniyajzareni Jesús.

*Xcälgujt Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Che gojl läidxej, bicäjy si'cti choñ or.

<sup>34</sup> Che gudejd choñ orga, guredxa' Jesús dipro, räjpni con xtiidxnj:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

<sup>35</sup> Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

<sup>36</sup> Sas baxun tejni, bahuajdxni te sponj loj binagr. Dxej cru basäl'nini yejc te yabixhiļ, badeednini loj Jesús te yänini, räbgajcni:

—Colgusaan guihuiinu don la siädläjd Eliäsi loj cruzj.

<sup>37</sup> Dxej cru guredxaduxh Jesús, gujttni.

<sup>38</sup> Dxejc lajd ni najļ neņ guidoro biräjsni, gujcni tiop la', jiaali lo yujli.

<sup>39</sup> Suga' capitän nani rnibee te gayuu soldaad nez loj Jesús, luxh che bahuini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

<sup>40</sup> Suga' za gaii gunaa, zijt cadxelorejneni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee.

<sup>41</sup> Che guyu' Jesús Galilee birinajļ regunaare Jesús, luxh bahuiireneni. Yu'za xhidajlrū regunaa ni biädnaļ Jesús che biädni Jerusalén.

### *Biga'tz Jesús*

(Mt. 27:57-61; Lc. 23:50-56; Jn. 19:38-42)

<sup>42</sup> Biu' gudxhiļ, luxh najcni dxe bispr che rusucheereni par sabd, dxej ni rusilajz rexpejn Israel.

<sup>43</sup> Biääd José ni siääd Arimatea, najcni te rebejn ni sajc loj reguxhtis. Näjza laani cabäjnzi xcäl'rnibee Dios. Guideb yäl'nabajñ gunabni tiexh Jesús lo Pila't.

<sup>44</sup> Bidxelo Pila't alagujt Jesús, sas gurejdxni capitän ni rnibee tej gayuu soldaad, gunabdiidxni lojni la balagujt Jesús.

<sup>45</sup> Che räjp capitänga lojni agujt Jesús, dxejc badeed Pila't tiexh Jesús loj José.

<sup>46</sup> Agusii José te bariaad, luxh che gulätni Jesús lo cruzj, batejbnini neņ bariaadga. Dxejc gudixhni Jesús neņ te biliää ni caj cuä' te guilaj, dxej cru batzugni te guiro ro' biliääga.

<sup>47</sup> Bahuii Marii Magdalen näj Marii xnan José cadro biga'tz Jesús.

## 16

### *Huäjz Jesús loj rebengut*

(Mt. 28:1-10; Lc. 24:1-12; Jn. 20:1-10)

<sup>1</sup> Che gudejd sabd, dxej ni rusilajz rexpejn Israel, Marii Magdalen näj Marii xnan Jacob näjza Salomee gusii setnejxh te chatäábreni se'tga tiexh Jesús.

<sup>2</sup> Che biu' xmaan, rsildooru, che calejn gubijdx, biädreni ro' xpaani.

<sup>3</sup> Cayäjp loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaļ guijga, luxh najcni te guiroduxh.

<sup>5</sup> Che biu'reni neņ biliääga, bahuiireni lo te bi'n sobga' ladbee neņ biliääga. Najcw bi'nga te ladnol ni najc siool. Dxejc bidxejb regunaaga.

<sup>6</sup> Dxejcti räjp bi'nga lojreni:

—Na'c guidxejbtu. Caguilltu Jesús ni siääd Nazare't, nani cuaj lo cruzj. Rutiruni ree. Agubajñni lo rebengut, col'tahuii cadro gudixhneni tiejxhni.

<sup>7</sup> Colchäj, colchaye'tz lo rexpejnpacni, loj Pedr, ganidla Jesús guidzujñ Galilee, dxejcti guidzujñtu. Ro'c fitu lojni, si'cni guniini lojtu.

<sup>8</sup> Biriitireni ro' biliääga, rarsejliireni sa'csi cadxejbreni. Rut lojdi guniidireni sa'csi cadebduxhneni.

### *Baluiloj Jesús loj Marii Magdalen*

(Jn. 20:11-18)

<sup>9</sup> Gubajñ Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz bendxab neņ lastooni.

<sup>10</sup> Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni.

<sup>11</sup> Che biejn diajgreni ahuäsac Jesús lo rebengut, luxh Marii abahuii lojni, di lajzreni nilii.

### *Baluiloj Jesús loj tiop xpejñpacni*

(Lc. 24:13-35)

<sup>12</sup> Ste'ca najc Jesús baluilojni loj tio'p renani sasaj sääreni lo nejz.

<sup>13</sup> Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

### *Baxhal Jesús repost*

(Mt. 28:16-20; Lc. 24:36-49; Jn. 20:19-23)

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut.

<sup>15</sup> Räjp Jesús lojreni:

—Cołchäj guideb lo guedxliuj, cołnii xtidx Dios lo guiraa rebejn.

<sup>16</sup> Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl.

<sup>17</sup> Niluxh remilagwre jiannäj renani chalilajz: sibääreni beñdxab xcuentä; siniireni ste'ca diidx;

<sup>18</sup> guiniaazreni bäl con ñaareni; masque yäreni xhicos ni rugu't bejn, xhet gacdireni; susujreni ñaareni yejc rebeñracxhuu luxh siajc rebeñracxhuu.

*Huä'p Jesús xhaguibaa  
(Lc. 24:50-53)*

<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee.

<sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnii milagwr te gucbee bejn laapac xtidx Dios ni caniiireni. Sugacni si'c.



## Rediidx Nani Bacuaa Lucas Xcuent Jesucrist

*Xhicuent bacuaa Lucas rediidxre*

<sup>1</sup> Xhidajl bejn abacuaa lo guijt xcuent guiraa redzuun ni gujc nez loonu te cuäxnejzreni redzuunga

<sup>2</sup> si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu.

<sup>3</sup> Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo,

<sup>4</sup> te gachesa'c guejblu ni najc didxlii xcuent guiraa rediidx ni abisieed guejblu.

*Te xangl Dios gunii xho gaal Juan ni rutiobnis*

<sup>5</sup> Cheni gujc Herodes reii xten región Judea, guyu' te bixhojz ni laa Zacarias, ni nadxaag lo rexpejn Abías. Chäälni laa Elisabe't, ni najcza te xagdoos bixhoz Aarón.

<sup>6</sup> Guiro'preni najczeni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl.

<sup>7</sup> Luxh ruti xi'nreni, sa'csi chäälni digacdi chu xi'nni. Luxh guiro'preni anajczeni bengool.

<sup>8</sup> Te dxej, laj ni cayujn Zacarias dzuun nen guidoro si'c bixhojz nez loj Dios,

<sup>9</sup> dxejc con daad bibee chuni'c jiu' nen yudxan xten guidoro te guze'czeni yaal si'cni najc costumbr xten rebixhojzga. Dxejc si'c gulereni Zacarias gunni.

<sup>10</sup> Laj ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios.

<sup>11</sup> Dxejcti baluiloj te xangl Dios lo Zacarias, suliini ladbee lo dxan cadro cayejc guxhyaal.

<sup>12</sup> Che bahuii Zacarias lo xangl Dios, di jien xhi gunni, lacti bidxebduxhni.

<sup>13</sup> Sas xangl Dios räjp lojni:

—Na'c guidxejblu, Zacarií, sa'csi Dios abiejn diajgni xtiidxlu, luxh su' te xi'n chäálu, Elisabe't; cuälajluni Juan.

<sup>14</sup> Sibalazduxhlu, siroob lastoolu; xhidajl bejn sibalajz sa'csi gaalni,

<sup>15</sup> sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dhan xten Dios nen lastooni cheni gaallni.

<sup>16</sup> Sujnni gusiechljaz xhidajl rexpejn Israel, guibi'reni lo Gueb Dios.

<sup>17</sup> Juanre sinijdni loj Dad, sujni lagajc xhigab, sajppi lagajc yälrnibee ni gojp profe't Elías, te che jiejen diajgzeni xtiidxni susiechljaz redad, susiälzarenii diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jääd.

<sup>18</sup> Gunabdiidx Zacarií loj anglga, räjpni:

—¿Xho mood gacheä guliilu? Sa'csi anacä bengol, sigajcza chälä.

<sup>19</sup> Dxejcti räjp anglga lojni:

—Narä nacä Gabriel, runä dzuun lo Dios. Laani baxhañni narä te guininää luj, jäädnää didxhuenre lojlu.

<sup>20</sup> Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisojib che guidzujn dxej che riäjil gacni.

<sup>21</sup> Lañni cayajc dee, cadxeloj rebejn ni suga' nez ro' yudxan cabäjzreni guirii Zacarií sa'csi cayaclaani nen yudxan.

<sup>22</sup> Che birii Zacarií, di niajcdiru niniini loj rebejn; dxejc gucheereni yu' xhi cosro bahuiini nen yudxan xten guidoo. Dxejc con seen guninäjni rebejnğa, sa'csi xheti xse'ni te niniini.

<sup>23</sup> Che gulujx bejnii dzuun nen guidoro, gubi'ni rolizjni.

<sup>24</sup> Che gudejd redxej dxejcti bazen nuu Elisabe't, chäälni, báz, gatii bäii diruni niri rolizjni. Bejnii xhigab, räjpni:

<sup>25</sup> “Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

*Biädeed te xangl Dios diidx lo Marii gaal Jesús*

<sup>26</sup> Che gudejd xho'p bäii, baxhañ Dios xanglni Gabriel lo te guedx Galilee ni laa Nazare't, <sup>27</sup> te chahuini te dxapxteeb ni laa Marii. Agojt xtiidxni te guchñaani te dade' ni laa José. Dade're najc xagdoos toreei David.

<sup>28</sup> Biu' angre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjl. Abenle' Dioslu loj guiraa regunaa.

<sup>29</sup> Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?”

<sup>30</sup> Dxejc räjp xangl Dios lojni:

—Na'c guidxejblu, Marii; agule Dios luj.

<sup>31</sup> Bacuadiajg diidx. Suulu báz, su' te xi'nlu. Che gaalni guirilajni Jesús.

<sup>32</sup> Laani sajni te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David,

<sup>33</sup> te tejpas guinibeeni loj rexi'n Israel, luxh dipac xcälrnibeeni nitloj.

<sup>34</sup> Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

<sup>35</sup> Badzu' xangl Dios diidxre lojni, räjpni:

—Sprit Dxi'an xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajni te bendxi'an, sibälaj bejnmi Xi'n Dios.

<sup>36</sup> Näjza sa'lu Elisabe't su' te xi'nni luxh anajni te bengool; ni'cni gunaa nani najreni digacdi chu xi'nni agujc xho'p bäii nuuni báz.

<sup>37</sup> Xheti te cos ni naganduxhtej nez loj Dios —räjp Xangl Dios.

<sup>38</sup> Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunej angl xten Dios lojni, sä'tini.

*Bihuii Marii lo Elisabe't*

<sup>39</sup> Neñ redxejga, basquejn Marii sääni lo te guejdx ni tre' neñ redajn xten Judea.

<sup>40</sup> Biu'ni rolizj Zacari, guniini xtiidxbee loj Elisabe't.

<sup>41</sup> Che biejn diajg Elisabe't guniini, biniib xi'nni xque'ni, gudxaj Sprit Dxi'an xten Dios lastoo Elisabe't.

<sup>42</sup> Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu.

<sup>43</sup> ¿Chu narä te siädhuui xnan Xtioozä narä?

<sup>44</sup> Biejntis diagä xtiidxlu, bibalazgajc xi'nä, biniibni xque'ä.

<sup>45</sup> Sibaa lajzlu, luj ni huililajz sisiojbpac nani gunii Xtadnu Dios.

<sup>46</sup> Dxejc räjp Marii:

Xaimä rliä'p xpala'n Xtadnu Dios.

<sup>47</sup> Rbalazduxhza lastoä xcuent Dios ni ruslaa narä lo dojl.

<sup>48</sup> Sa'csi agule Dios narä,

nacä te mos gunaa ni xhet sajcdi,

luxh najli sinii rebejn näjza reni churu chu lo guedxliuj,

chicbaani loj guiraa regunaa.

<sup>49</sup> Sa'csi Gueb Dios ni rajp guiraa yälrnibee abejn xhidajl cosro loä,

dxanduxh najc lajni.

<sup>50</sup> Dini cuääz gulaslajzni guiraa rebejn ni riu xtiidxni, reni rajjni.

<sup>51</sup> Xhidajl cosnagajn abejnmi con lagajc naani,

abatie'chni renani rustioob lastooreni rliä'p lagajc xpala'nreni.

<sup>52</sup> Abasajbni reni rnibee,

per rebennadolajz bejnmi gacreni beñro.

<sup>53</sup> Bachajni xque' reni calaan,

badeedni ganax cossa'c,

niluxh badzu'ni rebejn ni yu' xhixtenreni xhet badeed dini lojreni.

<sup>54</sup> Gucnäjmi naciön xten xpejn Israel, ni najc xmos Dios.

Di lajzni niäl nulaslajznireni

<sup>55</sup> sa'csi si'c bia'nmi diidx con retoxtadgoldoonu,

sinuu gulazlajzni toAbram näjza rexagdooni par tejpas.

<sup>56</sup> Dxejc bia'n Marii rolizj Elisabe't si'cti chon bäii, dxejc gubisacni rolizjni.

*Che gojl Juan ni rutiobnis*

<sup>57</sup> Che baza' xpäi Elisabe't, dxejc gojl xpäzni te báz niguiini.

<sup>58</sup> Dxejc bidzujñ rexpisinni näjza resa'ni biädhuiireni guiro'preni che gucbeereni lacti huen gujc Dios con laani. Bibalaznäjreneni.

<sup>59</sup> Che gudejd xhujn dxej, huinäreni baze'ga chuni bee. Rlajz rebejn nirilaj baze'ga si'c laa xtadni, Zacari.

<sup>60</sup> Niluxh xnanni räjp:

—Na'c, guirilajpacni Juan.

<sup>61</sup> —¿Xhicuent? —räjpreni—. Ruti xfamillu ni laa si'c.

<sup>62</sup> Dxejcti gunabdiidxreni con seen lo xtad baze'ga te gacbeereni xho rlanjni guirilaj baze'ga.

<sup>63</sup> Xtadni gunab te la' guiijt, dxejc bacuaani: “Lajni najc Juan.” Dxejc guiraareni bidxelojreni.

<sup>64</sup> Luxh lagajc dxejc gujc gunii Zacarí stehuält, dxejc guslojni calä'pni xpala'n Dios.

<sup>65</sup> Bidxeloduxh rexpisünreni xhini'c gujc ro'c. Luxh bire'ch diidx xcuent recosre guideb neñ redajn xten Judea.

<sup>66</sup> Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

### *Dij ni bil Zacarí*

<sup>67</sup> Dxejcti biääd Sprit Dxiän xten Dios neñ lastoo xtdadni Zacarí, gusloj caniini rediidx ni badeed Dios lojni, räjpni:

<sup>68</sup> Guiliä'pnu xpala'n Dios, Xtios rexpejn Israel, sa'csi abiädhuüini loonu, ni najcnu rexpejn, te siädguslaani nuurnu neñ dojl.

<sup>69</sup> Abaxhalni loonu te bejn ni rajp yälrusladuxh bejn neñ dojl. Najcni te rexagdo toxmosni David.

<sup>70</sup> Lagajc si'cni badeed Dios gunii redade' ni bacuaa xtiidxni lo guijtz galoo:

<sup>71</sup> Suslaani nuurnu loj reni rdxe'ch loonu, näjza ladznaa rebejn ni gulälaz nurnu.

<sup>72</sup> Te gulaslajzni retoxtadgoldoonu, te soob diidx ni bia'nni con rebejnga.

<sup>73</sup> Scree bia'nni diidx con toxtadgoldoonu, Abram:

<sup>74</sup> Suslaani nuurnu ladznaa rebejn ni rdxe'ch loonu, te na'c guidxeebnu chunu lojni gusoobnu xtiidxni, te con yäl'nabansa'c näjza yälguxhtis guiraa redxej ni guibajnu.

<sup>76</sup> Luxh luj, baze', sirilajlu dade' nani nni xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyulajzni, te gunlu gacbee rexpejn xho gac laani lo dojl,

te gac guibicaj xtojreni.

<sup>78</sup> Sa'csi Dios sanälajz bejn,

näjza rulaslajzni bejn ni'cni xhaguibaali suxhalni xi'nni te jäändäni te dxecoob,

<sup>79</sup> te gusanijni lo rebejn ni nabajn lo yälxcäy xten dojl,

näjza rebejn ni nabajn lo xpalaä yälgujt, te guluüini xho sänu lo xnez yälrbecdilajz.

<sup>80</sup> Dxejc gunis biuxe'ga, guyuduxh xcäriejn xcuent recos xten Dios. Gubajni nez loj reyubijdz cheni bidzujni dxej che baluilojni loj rexpejn Israel, che gusloj cagusule'ni xtidx Dios.

## 2

### *Che gojl Jesús*

(Mt. 1:18-25)

<sup>1</sup> Neñ redxejga, gunibee Augusto César xcaj laj rebejn guideb guedxliuj lo xquijtzni.

<sup>2</sup> Ni'c nacogujc yälbigabre cheni najc Cirenio gobernadoor xten Siria.

<sup>3</sup> Guiraa rebejn nanab chääreni lagajc lajdxreni te ro'c guigabreni.

<sup>4</sup> Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdo toDavid.

<sup>5</sup> Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz.

<sup>6</sup> Lalsi yu'reni guedx Belén, bidzujn dxej ni gaal xi'n Marii.

<sup>7</sup> Ro'c gojl xi'n galooni, dxejc batejbnini te xzuudni. Dxejc gudixhnini cadro rusälreni guijxh rajw reguidxaa sa'csi xhetiru yu' xcalaareni jia'nreni.

### *Rexangl Dios näjza rebaxtoor*

<sup>8</sup> Gajxh guejdxga guyu' gaii baxtoor cayajpreni xhiilreni lo niaa guxhijn.

<sup>9</sup> Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhrenei.

<sup>10</sup> Sas anglga räjp lojreni:

—Na'c guidxejbtu, narä siändnä lojtu te didxsa'c ni suspalajz guiraa beñ guedxliuj.

<sup>11</sup> Nadxej gojl neñ guejdx xten toDavid, tej ni guslaa bejn neñ dojl, laani najc Crist ni najc Dad.

<sup>12</sup> Dee najc te seen lojtu, sidxältu baze'ga nadejbni neñ te xzuudni, naga'ni cadro rusälreni guijxh rajw reguidxaa.

<sup>13</sup> Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

<sup>14</sup> Collä'p xpala'n Dios ni yu' xhaguibaali.

Suchu yälrbedcxilajz lo rebeñ guedxliuj ni balazlajzni.

<sup>15</sup> Che gubi' rexangl Dios xhaguibaa, gusloj rebaxtoor canii loj sa'reni:

— Colcho' guedx Belén colchohuii ni guzajc ro'c ni gunii Xtradnu Dios loonu.

<sup>16</sup> Rusquenduxhreni sääreni, dxejc bidxälreni Marii näjza José näjza bäze' ni naga' neñ cadro rusälreni guijxh rajw reguidxaa.

<sup>17</sup> Cheni bahuiireni loj rebejnğa, bijreni diidx xhi räjp rexangl Dios lojreni xcuent bäze'ga.

<sup>18</sup> Niluxh guiraa reni bejn diajg rediidxre bidxeloduxhreni xtidx rebaxtoorga.

<sup>19</sup> Niluxh Marii gulucheeni guiraa rediidx ni bejn diajgni neñ lastooni, rujntisni xhigab xcuent rediidxga.

<sup>20</sup> Dxejcti rebaxtoorga gubisacreni cayolreni, calä'pzarenı xpala'n Dios xcuent guiraa rediidx ni bejn diajgreni näjza ni bahuiireni sa'csi guiraani gujc si'cni räjpreni lojreni.

*Cheni huinäreni Jesús chuni bee*

<sup>21</sup> Che gudejd xhujñ dxej, huinäreni bäze'ga chuni bee, dxejc gulälajreni Jesús, lagajc laj ni räjp xangl Dios loj Marii guirilajni galooli guuni bäzga.

<sup>22</sup> Che basa' redxej ni gac naya te nan si'cni gunibee toMoisés loj xquijtzni, huinäjreni bäze'ga guedx Jerusalén, neñ guidoro gunabreni gacnäj Diosni par tejpas.

<sup>23</sup> Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios.

<sup>24</sup> Bidzujñreni ro'c ca'reni te gojn si'cni rnibee rexquijtz Dios: “Tio'p gague' o tio'p palombäz.”

<sup>25</sup> Neñ redxejga, neñ guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzni jiäd te bejn ni gusläa rexpejn Israel. Rbäjz Sprit Dxañ xten Dios neñ lastoo Simeón.

<sup>26</sup> Sprit Dxañ abejn gacbeeni dini guet ansde fiini loj Crist ni guxhañ Dios.

<sup>27</sup> Dxejcti räjp Sprit Dxañ xten Dios lojni chääni guidoro. Lañi yu'ni neñ guidoo, bidzujñ José con Marii, biädnäreni báz Jesús, te gunnäjreni Jesús nani rnibee xtidx Dios gunreni.

<sup>28</sup> Dxejc gudääz Simeón bäze'ga, gusloj calä'pni xpala'n Dios, räjpni:

<sup>29</sup> Dad, asajc gusaanlu guetä con yälrbedcxilajz,

sa'csi abasooblu nani bia'n diidx gunnäjlu xmoslu.

<sup>30</sup> Sa'csi abahuiloä nani siädgusläa nuurnu neñ dojl,

<sup>31</sup> ni abasuñlu nez loj guiraa reben guedxliuj.

<sup>32</sup> Laani najc bianij ni susanij loj rebejn ni di gac xpejn Israel,

näjza nani gac xpala'n rexpejnlu guedx Israel, lajdxlu.

<sup>33</sup> Bidxeloj José näjza xnan Jesús rediidx ni canii Simeón xcuent bäze'ga.

<sup>34</sup> Dxejc benle' Simeón yejceni, dxejc räjpni lo Marii xnan Jesús:

— Bahuii gan; bäze're biäd te loj rexpejn Israel chu reni sibälaz xtiidxni, te chuzä reni sililajz xtiidxni. Laani gacni te seen nani sibälaz bejn,

<sup>35</sup> te si'c jienloj xhi xhigab rujn cade tej rexpejn Israel neñ lastooreni. Dxejcti par luj sajcnı asdoo chääz te spaad lastoolu, sa'csi gac-huinduxh lastoolu.

<sup>36</sup> Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famiñ xten Aser. Anajcni bengolduxh. Bachñaani che najcni dxaphuin, luxh gajdztis ijz guläznäjni chäälni che bia'nni biuud.

<sup>37</sup> Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-rniab lo Dios.

<sup>38</sup> Che gubigni lojreni lagajc dxej, badeedni xquixtios lo Dios sa'csi abidzujñ tej ni gusläa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälrusläa xten Jerusalén.

*Cheni gubi'reni guedx Nazare't*

<sup>39</sup> Che gulujx bejn xcuzajjni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni.

<sup>40</sup> Gunis biuxe'ga, guc nadaanni, guc nasiñruzani sa'csi cayacnäj Diosni.

*Cheni biu' Jesús guidoro*

<sup>41</sup> Casob ijz rij rexuczajn Jesús guedx Jerusalén te rinäreni te gojn xten lanij pascw.

<sup>42</sup> Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga.

<sup>43</sup> Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni.

<sup>44</sup> Bejnreni xhigab pet siädsanäjni rebeŋsa'ni. Si'c guzajreni tebdxey, dxejc gudiilrenini loj resa'reni, näjza loj reni rumbeereni,

<sup>45</sup> direni nidxälni. Dxejc gubisacreni guedx Jerusalén te huitiilrenini ro'c.

<sup>46</sup> Choŋ dxej gudiilrenini dxejc bidxälrenini neŋ guidoro, sobga'ni nez galäii rebejn ni najn leii, cacuadiajgni xtiidxreni, cayujnzani yälgunabdiidx lojreni.

<sup>47</sup> Luxh guiraareni cacuadiajg xtiidxni, cadxeloduxhreni yälnajn xtenni, näjza rediidx ni cagudzu'ni lojreni.

<sup>48</sup> Che bahuii rexcuzajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtadlu cayunduxhnu xhigab caguuilnu lu j nezree, nezre'c.

<sup>49</sup> Dxejcti räjp Jesús lojreni:

—¿Xhicuent caguuilu narä? ¿La ditu gan riäj l gunä xtzun Xtadä, ä?

<sup>50</sup> Luxh laareni direni niacbee rediidx ni guniini lojreni.

<sup>51</sup> Dxejcti gubinäjnirenini guedx Nazare't, sanuuni rusoobni xtiidxreni. Luxh Marii gulcheetisni guiraa recosre neŋ lastooni.

<sup>52</sup> Duurtis gunis Jesús, caroobruza xcälnajnni. Sanälajz Diosni, sanälajzza guiraa rebejnni.

### 3

#### *Yälrusule' Juan ni rutiobnis*

(Mt. 3:1-12; Mr. 1:1-8; Jn. 1:19-28)

<sup>1</sup> Neŋ redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia.

<sup>2</sup> Lagajc neŋ redxejga Anás näjza Caifás najc rebixhojzro xten guidoro guedx Jerusalén. Neŋ redxejga biääd xtiidx Dios lo Juan, xi'n Zacarí cheni rbäjzni nez lo reyubijdz.

<sup>3</sup> Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechlagz, yälrobni ni nanab gunreni te gudzucaj Dios xtojreni.

<sup>4</sup> Si'cni caj lo xquijtz Isaías, dade' ni gunii xtiidx Dios, cadro räjpni:

Riejn xse' te ni rbedxa' nez loj reyubijdz:

“Colyunsac' xnezyuj Dad, colslíi rexnezyulajzni.”

<sup>5</sup> Guiraa cadro sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, sacsa'creni.

<sup>6</sup> Dxejcti guiralii bejn suhuii loj nani guxha l Dios.

<sup>7</sup> Che bahuii Juan siääd xhidalduxh bejn te guirobnisreni, räjpni lojreni:

—jLa'tu benguijdx ni najc si'c bälñalajz! ¿Chuni'c balijdxtu guxuntu loj xcälrdxe'ch Dios ni siädgajxh, ä?

<sup>8</sup> Colguchaa xmoodtu te si'c fii bejn guliini abasiechlagztu. Na'c cuentis rniitu lagajc neŋ lastootu “Abram najc xtadnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdo toAbram.

<sup>9</sup> Aguijbyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

<sup>10</sup> Dxejcti gunabdiidx rebejn lojni, räjpreni:

—¿Xhini'c nanab jiennu?

<sup>11</sup> Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

<sup>12</sup> Näjza gaii bejn nani rusquijx xcuent reimpuest bidzujn lojni te guirobnisreni, dxejc gunabdiidxreni lo Juan räjpreni:

—Dad, mast; ¿Xhini'c nanab jiennu?

<sup>13</sup> Räjp Juan lojreni:

—Na'c gusquijxtu bejn maazdi ni nungäj l quiixreni.

<sup>14</sup> Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

<sup>15</sup> Cadxeloj rebejn, cayujnreni xhigabduxh, naareni, “pet Juan najc Crist ni jiääd.”

<sup>16</sup> Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcro loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni nen lastootu näjza con guiboo, sa'csi rajpruni yälrnibee loä.

<sup>17</sup> Aca'ni pal te gusiani triuu te cuääni triusa'c lo guixh te cucheeni triuu nen ngodx xtenni, dxejcti reguixhtriuuga suze'cnini lo bajl ni rejc par tejpas.

<sup>18</sup> Rediidxre näjza xhidajl yälrujidx gunii Juan te basule'ni redidxcoob loj rebejn.

<sup>19</sup> Näjza lo Herodes ni najc gobernadoor basule' Juan diidx, gudil'näjnini sa'csi xhet laadi cayujnni, sa'csi rbäznäjni Herodias, chääl bejtzni Felipe, näjza xcuent sgaii dojl ni bejnni.

<sup>20</sup> Di Herodes niu xtidx Juan, alga bejnni stee dojl, basäl'ni Juan nen latzguuib.

*Che gurobnis Jesús*

(Mt. 3:13-17; Mr. 1:9-11)

<sup>21</sup> Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa,

<sup>22</sup> dxejc biäjt Sprit Dxan xten Dios si'c te palom, bidzujnni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

*Resa' Jesús*

(Mt. 1:1-17)

<sup>23</sup> Yu' Jesús galbitzoo ijz che gusloj cayujnni dzuun ni badeed Dios gunni. Rchalo rebejn najcni xi'n José, xi'n Elí.

<sup>24</sup> Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José.

<sup>25</sup> José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai.

<sup>26</sup> Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá.

<sup>27</sup> Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri.

<sup>28</sup> Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er.

<sup>29</sup> Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. <sup>30</sup> Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim.

<sup>31</sup> Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán.

<sup>32</sup> Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón.

<sup>33</sup> Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá.

<sup>34</sup> Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor.

<sup>35</sup> Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala.

<sup>36</sup> Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec.

<sup>37</sup> Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán.

<sup>38</sup> Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

## 4

*Che biricaj bendxab loj Jesús*

(Mt. 4:1-11; Mr. 1:12-13)

<sup>1</sup> Jesús, sa'csi rbäjz Sprit Dxan xten Dios lastooni, biunejzni gueu Jordán, dxejc huinä Sprit Dxan xten Diosni lo reyubijdz.

<sup>2</sup> Ro'c bia'nni tiuu gubijdx, tiuu guxhijñ. Ro'c bidzujñ bendxab ni rnibee te rlanjñi gunni gusoob Jesús xtiidxní. Luxh calaan Jesús, sa'csi gajdní gau guiraa nen redxejga.

<sup>3</sup> Dxejc räjp bendxab lojni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajñ bejn, näjza guiraa diidx nani rñii Dios sujñ guibajñ bejn.”

<sup>5</sup> Dxejcti huinā bendxab Jesús jiaa yejc te dajn. Teratbāztis baluilojni guiraa reguedxro ni tre' lo guedxliuj.

<sup>6</sup> Dxejc rājp bendxab lojni:

—Narā sunidxā guiraa yāl̄rnibee nājza reyāl̄nasa'c ni yu' loj reguejdxga sa'csi xtenā guiraareni, luxh sajc gudedāni lo chutis ni rlazā.

<sup>7</sup> Palga luj suzuxhijblu loā, guliā'plu xpala'nā, guiraani sajc xtenlu.

<sup>8</sup> Dxejc Jesús badzu' diidx, rājpni lojni:

—Acāj loj xquijtz Dios: “Dad Xtioistislu ganlu, luxh lojtisni chulu gunlu dzuun.”

<sup>9</sup> Dxejcti huinā bendxabni lo guedx Jerusalēn, huinānini jiaa yejc xques guidoro. Dxejc rājp bendxab lojni:

—Palga guliilu najclu Xi'n Dios, gutiājs lo yuj

<sup>10</sup> sa'csi si'c caj loj rexquijtz Dios:

Suxhal Dios rexangni te ga'preni luj,

<sup>11</sup> guiniaazreni luj didi jiajblu lo guij.

<sup>12</sup> Badzu' Jesús diidx lojni, rājpni:

—Cajza lo rexquijtz Dios: “Na'c fallu Dad ni najc Xtioozlu.”

<sup>13</sup> Che baluux bendxab rextiidxni, gubicajni lo Jesús sa'csi dini niujn gaan nusoob Jesús xtiidxni. Gulājzni guidzujn stee dxej te gusacsiruni Jesús.

*Gusloj Jesús cayujn xtzuunni*

*(Mt. 4:12-17; Mr. 1:14-15)*

<sup>14</sup> Dxejc gubi' Jesús lo rexyuj Galilee rājpni yāl̄rnibee xten Sprit Dzan. Bire'ch diidx xcuentni guiraa neñ reguejdx ni tre' nejzga.

<sup>15</sup> Ruluini neñ reguidobāz luxh guiraa rebejn rliā'p xpala'nni.

*Jesús guyu' guedx Nazare't*

*(Mt. 13:53-58; Mr. 6:1-6)*

<sup>16</sup> Dxejcti huij Jesús guedx Nazare't cadro gulaani. Che gojl dxej ni rusilajz rexpejn Israel, biu'ni neñ guidobāz sigajc ni rujnpackni, dxejc huisuliini te bil̄ni

<sup>17</sup> reguijtz xten Dios. Badeedreni lojni guijtz ni bacuaa Isaiās; cheni baxhalni guijtzga, bidxāl̄ni cadro rnii scree:

<sup>18</sup> Sprit Dzan xten Dios suganāj narā, sa'csi agule Dios narā te gusule'ā xtidxcoobni lo rebenproob.

Baxhalni narā te gusiaca lastoo renani di lastooreni cuedxi,

te gusule'ā yāl̄ruslaa lo rebejn ni yu' lo dojl,

te gusiaca baloj reben lotiā'p, te guslaā reben ni cadejd trabajw,

<sup>19</sup> te gusule'ā abiu' ijzsa'c che rulaslajz Dios rebejn.

<sup>20</sup> Dxejc basāu Jesús reguijtzga, badeednini loj bejn ni cayacnāj neñ guidooga, dxejc gurejni. Sa'csi guiraa rebejn ni sobga' neñ guidooga cahuidzu'tzreni lojni,

<sup>21</sup> gusloj guniini, rājpni lojreni:

—Lagajc nadxej guzobj rediidx ni caj lo reguijtzre nez loj guiraatu.

<sup>22</sup> Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, rājpreni:

—¿La et xi'ndi José dade're, ā?

<sup>23</sup> Dxejc rājp Jesús lojreni:

—Siniipactu rediidxre loā: “Doctoor, basiajc lagajc luj”; siniizatu loā: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

<sup>24</sup> Dxejc huinuu xtiidxni, rājpni lojreni:

—Rniliāpac lojtu, nicla tej redade' ni rnii xtidx Dios, di reben lajdxreni jiu xtiidxni.

<sup>25</sup> Luxh rniliā lojtu, che gubajn Elías lo guedxliuj, guyu' xhidajl gunabiuud guedx Israel che di nisguij niabj chon ijz garol, dxejc guyu' yāl̄rlianduxh guideb guejdxga.

<sup>26</sup> Luxh di Dios nuxhal Elías rolizj te gunabiuud ni rbājz Sarepta, gajxh guedx Sidón.

<sup>27</sup> Sigajzca che gubajn Eliseo lo guedxliuj, guyu' xhidajl beñ racxhuu ni ral̄ tiejxhreni guedx Israel, luxh dini nusiajc nicla tejreni, alga basiajcnici dade' ni laa Naamán, ni siāād te guedxzij̄t ni laa Siria.

<sup>28</sup> Che biejn diajg reni sobga' neñ guidoo rextidx Jesús, bidxechduxhreni,

<sup>29</sup> huisuliireni, gulāārenini neñ guejdxga. Dxejc huinārenini yejc dajn cadro tre' guejdxga cadro yu' te balaro, te ro'c rlazreni nustejbrenini.

<sup>30</sup> Dxejc Jesús sigaj gudejdnici galāiireni, sá'tini ste'ca lajt.

*Gulāā Jesús bendxab lastoo te dade'*

*(Mr. 1:21-28)*

<sup>31</sup> Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel.

<sup>32</sup> Bidxeloduxhrenei xtiidxni sa'csi rusule'ni si'c te be<sub>n</sub>najn, si'c te ni rnibee.

<sup>33</sup> Ne<sub>n</sub> guidooga suga' te dade' ni rbäjz te be<sub>n</sub>dxab ne<sub>n</sub> lastooni. Guredxa'ni

<sup>34</sup> räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siäd Nasare't? ¿La siädlu te gunitlojlu nuurnu, ä? Narä numbeälu, nanä najclu Xin Dxan Dios.

<sup>35</sup> Gudidxa' Jesús lo be<sub>n</sub>dxabga, räjpni lojni:

—Basäu ro'lu, birii lastoo niguiire.

Dxejcti be<sub>n</sub>dxabre basäl niguiiga lo yuj nez loj guiraareni, dxejc biriini ne<sub>n</sub> lastoo dade'ga, per xhet bejndini dade'ga.

<sup>36</sup> Bidxeloduxh rebejnğa, dxejc gusloj caniireni lo sa'reni, räjpni:

—¿Xhi diidx najc redee? Bahuii xho rnibee dade're rebe<sub>n</sub>dxab con yälrnibee, luxh rusooob rebe<sub>n</sub>dxab xtiidxni, riireni lastoo bejn.

<sup>37</sup> Dxejc gusäab xtidx Jesús lo guiraa reguejdx ni tre' guideb gabi guejdxga.

*Rusiajc Jesús xnan xueerg Pedr*

(Mt. 8:14-15; Mr. 1:29-31)

<sup>38</sup> Birii Jesús guidobäz, huijni roliz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrenei lojni te gusiajcnini.

<sup>39</sup> Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujcni mandaad, cahuiireni.

*Rusiajc Jesús xhidajl yälracxhuu*

(Mt. 8:16-17; Mr. 1:32-34)

<sup>40</sup> La<sub>l</sub> ni cayäz gubijdx, guiraa reni rajp be<sub>n</sub>racxhuu ni rajc garen garen yälracxhuu biädnärenei rebejnğa lo Jesús. Dxejc laani batzuubni naani yejc teygareni, dxejc bjaic rebe<sub>n</sub>racxhuuga.

<sup>41</sup> Loj rebe<sub>n</sub>racxhuuga, yu'reni birii rebe<sub>n</sub>dxab ne<sub>n</sub> lastooreni, rbedxa'reni räjpni:

—Luj najclu Xi'n Dios.

Luxh Jesús gudilnäjni rebe<sub>n</sub>dxab, dini nusaa niniireni sa'csi laareni najnreni najcni Crist ni cabäjzreni.

*Rusule' Jesús xtidx Dios*

(Mr. 1:35-39)

<sup>42</sup> Che bianij, biriini lo guejdx, huijni te lajt cadro rut rbäjzdi. Niluxh gudiil rebejn<sub>n</sub>i, dxejc bidzuj<sub>n</sub>reni cadro suga'ni. Rlajzreni nuscuääzrenini te di niuiini.

<sup>43</sup> Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruza guejdx, ni'cni baxhalpac Dios narä.

<sup>44</sup> Dxejc si'ctis cuanzaj Jesús basule'ni xtidx Dios ne<sub>n</sub> guiraa reguidobäz ne<sub>n</sub> reguejdx xten Galilee.

## 5

*Che gunaazreni xhidajl bäj*

(Mt. 4:18-22; Mr. 1:16-20)

<sup>1</sup> Cheni suga' Jesús ro' nis ni laa Genesare't, gubig xhidajl bejn lojni te jiejn diajgrenei xtidx Dios.

<sup>2</sup> Dxejc bahuu Jesús tio'p barcw ni suga' ro' nisga, rud yu'di ne<sub>n</sub>reni sa'csi rebejn ni rniaaz bäj abiriireni ne<sub>n</sub> rebarcw te caguiireni xquijxhrenei ro' nisga.

<sup>3</sup> Dxejc biu' Jesús ne<sub>n</sub> te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús ne<sub>n</sub> barcwga, ro'cli guslojni caguluuini rebejn.

<sup>4</sup> Che gulujx xtiidxni, räjpni loj Simón:

—Huinä barcw cadro jätru, colcuua xquijxhtu lo nis te guiniaaztu bäj.

<sup>5</sup> Räjp Simón lojni:

—Mastr, guideb yäl biennu dzuun, luxh dinu niniaaz nicla tej bäj, niluxh naj agunibeelu gusa<sub>l</sub>sacnu guijxh lo nis.

<sup>6</sup> Cheni basälreni xquijxhrenei lo nis, gunaazreni xhidalduxh bäj, dxejc guslojli caräjs xquijxhrenei.

<sup>7</sup> Dxejc bejnreni seen loj resa'reni ni yu' ne<sub>n</sub> stee barcwga te jädyacnäjnenei. Bidzuj<sub>n</sub>tireni, bachajreni guiro'p barcw. Gudxaduxh rebarcw, ameer niääzreni ne<sub>n</sub> nis.

<sup>8</sup> Che bahuu Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te be<sub>n</sub>dojl.



<sup>9</sup> Si'c gunii Simón sa'csi bidxejb laani nájza guiraa rebejn ni yunäjni sa'csi gunaaazreni xhidalduxh bájł.

<sup>10</sup> Nájza Jacoob nájza Juan, rexi'n Zebedeo, ni runnäj Simón dzuun, nájzareni bidxejbreni. Per Jesús räjł lo Simón:

—Na'c guidxejbł, najłi guisloj cueedxlu bejn lacuaa ni guiniaazlu bájł.

<sup>11</sup> Dxejc, che bidzunnäjreni rebarcw ro' nis, basa'nreni guiraa xhixtenreni, te sanajłreni Jesús.

*Basiajc Jesús te bejn ni ral tiejxhni*  
(Mt. 8:1-4; Mr. 1:40-45)

<sup>12</sup> Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjłni lojni:

—Dad, palga rłajzlu, sajç gusiajçlu narä.

<sup>13</sup> Dxejc batzuub Jesús naani yejçni räjłni lojni:

—Rlazä jıajçlu. Susiacälu.

Che guniini rediıdxre, biacgajç bejn racxhuuga.

<sup>14</sup> Dxejcti gunibee Jesús lojni rut lojdi gäbni xhi guzajçni. Räjłni lojni:

—Huijtis lo bixhojz te fiini lojlu, huisa'nza gojn xcuent ni biajçlu si'çni rnibee xleii Moisés, te filoj rebejn abiajçlu.

<sup>15</sup> Luxh xpala'n Jesús sanuutis cayä'pruni, guixe-guixee care'ch diıdx xcuentni. Rdojppa xhidalduxh bejn te gucuadiajçreni xtıdx Jesús nájza te gusiajçni yälracxhuu xtenreni.

<sup>16</sup> Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

*Basiajc Jesús te bejn ni digacdi guiniib*  
(Mt. 9:1-8; Mr. 2:1-12)

<sup>17</sup> Te dxej lałni caculıiini rebejn, nejzga sobga' gaii farisee nájza gaii bejn ni ruluii leii garen-garen reguejdx, siädreni guıdeb nez reguejdx xten Galilee, nájza regiön Judea, nájza guedç Jerusalén. Dxejc huenliisi rluiloj suganäj xcälrnibee Dios Jesús te rajc russiajçni rebenracxhuu.

<sup>18</sup> Dxejc bidzujn gaii dade' nuureni lo te lonbäz te bejn ni di gacdi guiniib, rłajzreni gusiurenini neñ yu' te quixhrenini nez loj Jesús.

<sup>19</sup> Niluxh direni nidxäl canejz niu'reni sa'csi nadäduxh ro'c sa'csi tre' xhidajł rebejn. Dxejc huäpnäjrenini yejç yu'ga, badzucajreni gaii tej, dxejc basajbreni xloon bejnracxhuuga yejçli yu'ga te gujç bidzujłni nez loj Jesús.

<sup>20</sup> Che bahuii Jesús yälrililajz xtenreni, räjłni loj bejnracxhuuga:

—Dade', agubicaj xtojlł.

<sup>21</sup> Dxejc rebejn ni ruluii leii nájza refarisee gusloj cayujnreni xhigab, naareni: “¿Chucha niguiire ni caniyajni Dios con rextııdxni? Ruti te bejn ni sajç gudzucaj xtojl rebejn, Diostis rudzucaj dojl.”

<sup>22</sup> Dxejc guçbee Jesús xhi xhigab cayujnreni, ni'ç räjłni lojreni:

—¿Xhicuent rujntu xhigab si'ç neñ lastoottu?

<sup>23</sup> ¿Xhini'ç najç guyasiru guiniini: “Agubicaj rextojłł”, o guiniini: “Huıstie, guzaj”, ä?

<sup>24</sup> Mbaj naj, suluiä nez lojtu Xi'n Dios ni gujç Xi'n Niguii rajp yälrmibee, yälınadip lo guedxliujre te gudzucajni xtojl rebejn.

Dxejc räjłni lo bejnğa ni digacdi guiniib:

—Lojlu rniä, jıuıstie, guläs xloonlu, huij rolıjzlu!

<sup>25</sup> Lagajç dxejc nez lojreni huıstieğajç bejn ni digacdi guiniib, guläsi xlooni cadro naga'ni, dxejc siini rolıjzni, calä'pni xpala'n Dios.

<sup>26</sup> Guiraaareni rdxeloduxhreni recosga, dxejc guslojreni calä'preni xpala'n Dios, rdxejblireni räjłreni:

—Abihuiinu cosro, cos ni guidxeloj bejn nadxej.

*Rbejdx Jesús Levi*  
(Mt. 9:9-13; Mr. 2:13-17)

<sup>27</sup> Che gudejd gulujx recosre, birii Jesús ro'c. Dxejc bahuiini lo te bejn ni rusquıjx xcuent impuest, nani laa Levı. Sobga'ni lo te mex cadro rusquıjçni impuest; ro'c bahuii Jesús lojni. Räjł Jesús lojni:

—Gudanajł narä.

<sup>28</sup> Dxejc huisu Levı, basa'nni guiraa recosga, dxejc sanajłni Jesús.

<sup>29</sup> Dxejc bejn Levı te lanıj rolıjzni par Jesús. Biädä xhidajł bejn ni rusquıjx xcuent impuest nájza sgaii bejn; sobganäjnireni lo mex.

<sup>30</sup> Dxejcti refarisee nájza rebejn ni rului leii guslojreni cayeinäjreni rexpeljpac Jesús, rájpreni:

—¿Xhicuent raunäjtu, ránäjtu rebejn ni rusquijx impuest nájza rebendoj, ä?

<sup>31</sup> Dxejc badzu' Jesús diidxre, rájjni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor:

<sup>32</sup> Dina niädtedxä rebensa'c, narä biädtedxä rebendoj te gusiechlazreni.

*Gunabdiidxreni loj Jesús xcuent yälrucua'n*

(Mt. 9:14-17; Mr. 2:18-22)

<sup>33</sup> Dxejc gunabdiidx rebejnga loj Jesús, rájpreni:

—¿Xhicuent lacti rucua'n rexpelj Juan nájza rexpelj refarisee, lacti rbedx-rniabreni loj Dios; niluxh rexpeljpaclu alga rajwreni, rá'reni?

<sup>34</sup> Badzu' Jesús diidxre lojreni, rájjni:

—¿La sajc gucua'n rebejn ni yu' lo te sa' la'ni yunäjreni bi'n, ä?

<sup>35</sup> Niluxh sidzujñ dxej cheni sibicaj bi'n lojreni, dxejc sii sucua'nreni.

<sup>36</sup> Guniiza Jesús cuentje lojreni, rájjni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh.

<sup>37</sup> Di gacdi gusäl'ni bincoob neñ te guidbiejw sa'csi bincoobga sutiäsy'a'ni guidbiejwga dxejc sixe' binga, sixijñza guidbiejwga.

<sup>38</sup> Ni'cni nanab gusäl'ni bincoob neñ guidcoob si'c sigucheeza guiro'preni.

<sup>39</sup> Luxh nicla tej bejn ni agu' bin ni yu' agujc xchej rlanj yä bincoob, sa'csi säjbn: “Bin ni yu' agujc xchej najc huenru.”

## 6

*Rutie' rexpelj Jesús triuu dxej nani rusilajzreni*

(Mt. 12:1-8; Mr. 2:23-28)

<sup>1</sup> Te dxej ni rusilajz rexpelj Israel sasaj Jesús nájza rexpeljpacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini.

<sup>2</sup> Dxejc gunabdiidx gaii refarisee ni najc benguideo, rájpreni lojreni:

—¿Xhicuent rujntu dzuun ni di nungäj'l guntu che rajl dxej ni rusilajznu?

<sup>3</sup> Dxejc rájpn Jesús lojreni:

—¿La gajdtu gol loj reguijtz xhi bejn toDavid cheni calannäjni rebejn nani sanäni, ä?

<sup>4</sup> Biu'ni neñ xquideo Dios, gudajwni yäxttiil nani di nungäj'l gau bejn sa'csi xtebtis rebixhojz rajc rajwni, luxh badeedni yäxttiilga gudajw resa'ni.

<sup>5</sup> Rájpa Jesús lojreni:

—Sigajcza narä, Xi'n Dios ni gujc Niguüi, rnibeä dxej ni rusilajztu.

*Niguüi ni nabijdz naani*

(Mt. 12:9-14; Mr. 3:1-6)

<sup>6</sup> Che gojl stee dxej ni rusilajz rexpelj Israel, biu'ni neñ te guidobäz, dxejc guslojni caguluiini rebejn. Lagajc ro'c sobga' te dade' ni nabijdz naani ladbee.

<sup>7</sup> Dxejc remastr xten leii nájza refarisee cagula'tzreni te don la susiajcní bejnga dxej ni rusilajzreni, sa'csi caguilreni xho gucuaquijreni Jesús.

<sup>8</sup> Niluxh laani najnni xhi xhigab cayujnreni, dxejc guniini lo dade' ni nabijdz naani, rájjni:

—¡Huisulii! ¡Gudaa nez galäiire!

Dxejc huisulii bejnga, gubigni lojni.

<sup>9</sup> Dxejc rájpn Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguidx? ¿La gacnäjnu bejn laa xcäl'nabajnni o la gudzucajnu yäl'nabajnni, ä?

<sup>10</sup> Che gulujx bahuii Jesús loj guiraa rebejn ni tre' guideb gabini, rájjni loj bejn ni nabijdz naani:

—¡Baslii naalu!

Dxejc bejnni si'c, luxh biacgajc naani.

<sup>11</sup> Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

*Gule Jesús guitzubitio'p rexpeljpacni*

(Mt. 10:1-4; Mr. 3:13-19)

<sup>12</sup> Neñ redxejga, huij Jesús loj te dajn te huininäjni Xtdadni Dios. Ro'c gudejdní yääl cabedx-canabni lo Dios.

<sup>13</sup> Che bianij lo yuj, gurejdxni rexpeljñni. Ro'c guleni tzubitio'preni te gacreni xpejnñpacni. Gulälajñnini reapost.

<sup>14</sup> Renani guleni najc Simón ni gulälajni Pedr; Andrés, bejtz Simón; Jacoob; Juan; Felipe; Bartolomé;

<sup>15</sup> Mateo; Tomás; Jacoob xi'n Alfeo; Simón ni nagab loj rexpeljñ cananista;

<sup>16</sup> Judas, bejtz Jacoob; nájza Judas Iscariote ni guto' Jesús loj rebixhojz.

*Ruluüi Jesús xhidajl bejn*

(Mt. 4:23-25)

<sup>17</sup> Che biätñäj Jesúsreni yejc dajnga, guzudxireni yejc te danbáz sa'csi suga' xhidajl bejn ro'c. Siäädreni guiraa nez reguedx Judea, nájza guedx Jerusalén nájza reguejdx ni tre' gajxh nisdoos Tiro con Sidón. Rebejnnga bidzujñreni te gucuadiajgreni xtidx Jesús, te gusiajczanireni xcälñracxhuureni.

<sup>18</sup> Guiraa ni rdejdz trabajw yu' beñdxab neñ lastooreni nájza reni'c biajc.

<sup>19</sup> Guiraa rebejn rñajz caan Jesús, sa'csi rusiajçni guiraareni con xcälñrñibeeni.

*Baliçdx Jesús rebejn*

(Mt. 5:1-12)

<sup>20</sup> Dxejc bahuii Jesús loj rexpeljñpacni räjpni lojreni:

—Chichaatu, bejn nani xheti xhixtentu, sa'csi xtentu najc cadre rñibee Dios xhaguibaa.

<sup>21</sup> Chichaatu, bejn nani calaan naj, sa'csi suniidx Dios lojtu nani rñiabtü.

'Chichaatu, bejn nani roon naj sa'csi susiäjñl Dios lajztu dxejçru suxhijztu.

<sup>22</sup> Chichaatu, bejn nani rdxeçhlajz bejn lojtu, rbääreni la'tu te laad, rñiyajreni la'tu, luxh rbälazreni lajtu si'c te cos guiçdx sa'csi rililajztu xtidx Xi'n Dios ni gujç Niguii.

<sup>23</sup> Colguibalajz nen redxejga, na'c gac-huin lastootu sa'csi suniidxduxh Dios xhi xtentu xhaguibaa. Sigajca basacsi retoxtadgoldooreni rebejn nani gunii xtidx Dios galoo.

<sup>24</sup> 'Probe'zatu, la'tu benrajp, sa'csi agojçtu xcälñnasa'ctu, xcälñbalajztu lo guedxliujre.

<sup>25</sup> 'Probe'tu nani rajp guiralajz xhixtentu naj, sa'csi sidejçtu yälñrñiaan.

'Proobzatu ni ruxhijztu naj, sa'csi sonduxhtu sidejçtu yälñhuinduxh, yälñnalas.

<sup>26</sup> 'Probe'tu palga rñiä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

*Chanälajzni rebejn nani rdxe'ch lojni*

(Mt. 5:38-48; 7:12)

<sup>27</sup> Räjçzani:

—La'tu ni cacuadiajçtu rextidxä rñiä diidxre lojtu: colçchanälajz rebejn ni rdxe'ch lojtu, colyujñ dzunsa'c loj rebejn ni rdxeçhlajz lojtu.

<sup>28</sup> Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu.

<sup>29</sup> Palga yu' chu rñajz quiin te laad lojlu, badeedza stelaad quiinni. Palga yu' chu gudzucaj xhablojñaalü, badeedza náj xcamangwlu xca'ni.

<sup>30</sup> Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniab-sacluni lojni.

<sup>31</sup> Sigajç ni rñajzlu gunñäj bejn la'tu, si'cza la'tu colyennäj bejn.

<sup>32</sup> 'Palga la'tu sanälajzistu rebejn nani sanälajz la'tu, xhli'sini, sa'csi sigajçza rujñ rebendojñl.

<sup>33</sup> Palga guntu hueen lojtis rebejn ni rujñ hueen lojtu, xhet laadi cayujntu, sa'csi sigajçza rujñ rebejn ni nabajñ nen dojñl.

<sup>34</sup> Palga gudedlaatu lojtis reni rujntu xhigab gunidxsacni lojtu, çxhi cos hueen rchalotu rujntu? Ni rebendojñl rudedlaazareni loj rebejn ni najñreni siguiçsac ni nasääbreni.

<sup>35</sup> La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajñ xhaguibaa. Sa'csi si'cza najc Dios huenduxh loj reni di gudeed xquixtios lojni, nájza loj rebendojñl.

<sup>36</sup> Colgulasajz resa'tu si'c rulasajz Xtdanu Dios guiraa rebejn.

*Colgulasajz sa'tu*

(Mt. 7:1-5)

<sup>37</sup> Räjçzani:

—Na'c guntu yälñguxhtis nani rujñ bejn, naatu xhet laadi rujñni; te na'cza gun Dios yälñguxhtis rextojñtu. Na'c gucuacquijtu bejn te sigajçza di Dios gucuacquij la'tu. Colgusiäjñl-lajz dojñ ni rujñ sa'tu, te si'cza gusiäjñl-lajz Dios rextojñtu.

<sup>38</sup> Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guiçxadoo, sibetijp ni yu' neñni, cupe'tlini gusälñreni nen xpolstu. Dios suniidx lojtu lagajç con mediid ni rudeedtu loj rebejn.

<sup>39</sup> Guniiiza Jesús stee cuent räjpni:

—¿La sajc guluii te beñ lotiä'p nez yuj lo stee beñ lotiä'p, ä? ¿La di guiro'preni guitejb nen te gueed, ä?

<sup>40</sup> Te beñ ni casieed di gacdi guisieedruni loj ni najn xmastrni. Te beñ, che aguluix bisieedni, sajni si'cni najc mastr xtenni.

<sup>41</sup> ¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu?

<sup>42</sup> O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¡Beñguijdx! Guläxgaa yagro ni yu' balojlu, dxejc sajc fisa'clu te cuälu guixhbäz ni yu' baloj bejtzlu.

*Ninexhsa'c ni rcaj loj te yajg sujn gumbeeni yajg*

(Mt. 7:17-20; 12:34-35)

<sup>43</sup> Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c.

<sup>44</sup> Sa'csi tebgaj reyajg ruseñlojni xhi yajgni xcuent ninejxh ni rcaj lojni. Di beñ gutie' iigw lo reyaguejch, diza beñ gutiu' uub lo te yag balagrejñ.

<sup>45</sup> Rebeñsa'c rñii didxsa'c, sa'csi xhigabsa'c yu' neñ lastooni. Niluxh rebeñguijdx rñii ganax didxguijdx sa'csi xhigabguijdx yu' neñ lastooni, sa'csi ro'ni rñii nani yu' neñ lastooni.

*Tio'p beñ ni benchee tio'p yu'*

(Mt. 7:24-27)

<sup>46</sup> Räjpzani:

—¿Xhicuent rñiitu loä: “Dad, Dad,” luxh ditu gun nani rñiä guntu?

<sup>47</sup> Guiniä lojtu chuni'c najc si'c beñ ni riääd loä, rucua diajgni xtidxä luxh rusoobni xtidxä.

<sup>48</sup> Najcni si'c te beñ ni benchee rolijzni, ganid gudäänni jiät, dxejcti bejnini cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj.

<sup>49</sup> Niluxh reni rcua diajg xtidxä, dxejc direni guzoob xtidxä, najcreni si'c te beñ ni beñ xyu'ni loj yujxh, dini niujñ cimient xten yu'ga. Dxejcti biäjt nisro, bidijnni cuä' yu'ga, dxejc li gurebä'n yu'ga, gunitlojtini.

## 7

*Basiajc Jesús xmos te beñ roman ni rnibee*

(Mt. 8:5-13)

<sup>1</sup> Che guluix gunii Jesús loj rebeñ, huijni te guejdx ni laa Capernaum.

<sup>2</sup> Ro'c yu' te beñ roman ni rnibee, yu' te mos lojni, luxh sanälazduxhni mosga. Cayacx-huduxh mosga, ameerli guetni.

<sup>3</sup> Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajñreni Jesús jiädni te gusajcni xmos dade'ga.

<sup>4</sup> Che gubigreni loj Jesús, gusloj gunabduxhreni lojni, räjpreni lojni:

—Dade're najc bensa'c, nungäjl gacnäjluni

<sup>5</sup> sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

<sup>6</sup> Dxejcti huinä Jesúsreni. Cheni siädzungajxhreni royu', baxhal capitán gaai xamiigwni, gäbreni loj Jesús:

—Si'c naj capitán: “Di rlazä gutalä xtzuuunlu. ¿Chu narä te jiu'lu rolizä? Xhet sacädi.

<sup>7</sup> Ni'c dina niapä baloor te lagajc narä niädganä guejblu, sa'csi rajpju yäl'rnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni.

<sup>8</sup> Sa'csi narä nacä xmos rebeñ ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcni.”

<sup>9</sup> Che biejn diajg Jesús rediidxre, bidxeloduxhni, gubiréni loj rebeñ ni siädnajlñi, räjpreni lojreni:

—Rniliäpac lojtu, nicla lo rexpejn Israel gajdna guidxälä te beñ ni rililajzduxh si'c ni rililajz capitánre.

<sup>10</sup> Che gubi' rebeñ ni huij loj Jesús rolijz capitán, bahuiireni abiajc xmosni.

*Baspansac Jesús xi'n te gunabiuud*

<sup>11</sup> Neñ redxejga, huij Jesús te guejdx ni laa Naín. Huinäni rexpejn pacni näjza xhidajl beñ ni sanajlñi.

<sup>12</sup> Che bidzujñni gajxh ro' guejdxga, bahuiini sacua'tzreni te beñgut, te bi'n ni najc xtebtis xi'n te gunabiuud. Xhidalduxh beñ sacua'tzni.

<sup>13</sup> Che bahuii Jesús loj gunabiuudga, biani nane'ga, räjpreni lojni:

—¡Na'c roonlu!

<sup>14</sup> Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

<sup>15</sup> Dxejc huistie bengutga, sobga'ni guslojni caniini. Dxejc badeed Jesúsni lo xnanni.

<sup>16</sup> Che bahuiireni xhini'c gujc, bidxebreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujñ nez loonu.

Caniizaren:

—Lagajc Guejb Dios abiädhuüi rexpejnñi.

<sup>17</sup> Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

*Xpejn Juan ni rutiobnis huinabdiidx loj Jesús*

(Mt. 11:2-19)

<sup>18</sup> Rexpejnñac Juan ni rutiobnis bij rediidxga lojni che yu'ni latzguiib.

<sup>19</sup> Dxejc baxhalni gaireni lo Jesús te sanabdiidxreni: “¿La gulliipac najclu Crist ni jiädä o sibäjznu chu stee bejn, ä?”

<sup>20</sup> Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La luj najc Crist ni jiädä o la sibäjznu chu stee bejn?”

<sup>21</sup> Lagajc dxejc che bidzujñreni, basiajc Jesús xhidajl bejn ni rajc garen-garen yälgujdx, ni yu'za rebeñxab lastooreni, basiajczani baloj ni di fii.

<sup>22</sup> Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebeñcoj rsiasa'c; reben ni raj guejdx tiejxhni, abiajc tiejxhni; rediagcua't riensac diajgreni; rebeñgut, agubansacreni; luxh loj rebeñproob nani cabäjz xcälracnäy Dios riejn diajgreni rsiule' xtidx Dios xcuent xho laa bejn lo dojl.”

<sup>23</sup> Chicbaa nani rumbee narä, nani di cuälaz narä.”

<sup>24</sup> Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuüitu nez lo reyubijdz? ¿La te niyt ni rusniib bej, ä?”

<sup>25</sup> ¿Xhini'c huihuüitu? ¿Te bejn ni sucheduxh, ä? La'tu najntu rebejn ni sucheduxh näjza reni nabañsa'c, rolizj regeii yu'reni.

<sup>26</sup> ¿Chuxhni'c biriüitu huihuüitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios.

<sup>27</sup> Juan najc niguii ni ruzä't rexquijtz Dios cadro caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

<sup>28</sup> Rniliäpac, loj guiraa rexingaan regunaa, nicla tejni gajd guiricaj ni najc te beñsacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiädä, sajcrumi loj Juan.

<sup>29</sup> Che biejn diajg rebejn näjza reni rusquijx impuest rextiidxni xcuent Juan, gucebereni rujn Dios yälguxhtissa'c, sa'csi abatiobnis Juanreni.

<sup>30</sup> Niluxh refarisee näjza rebejn ni rulüüi leii gulälazreni nani niujn Dios par laaren, sa'csi direni nicäjb nutiobnis Juanreni.

<sup>31</sup> Räjpza Jesús lojreni:

—¿Xhocha guiniä najc rebejn nani tre' naj?

<sup>32</sup> Najceni si'c rebiuxbäz nani rguijt nez lo guii cadro rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.”

<sup>33</sup> Sa'csi che biädä Juan, dini niauxha't, dizani niä' bin, luxh räjptu: “Yu' beñdxab lastooni.”

<sup>34</sup> Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahuilaa, dade're rauxha't, rä'zani, najcni xamiigw rebeñdojl näjza rebejn ni rusquijx reimpuet xten giubier.”

<sup>35</sup> Ni'cni xcälñajn Dios huenliisi rienloj loj dzuun ni rujn rebejn ni najn.

*Jesús huüj rolizj Simón ni najc farisee*

<sup>36</sup> Dxejc tej refarisee gunii loj Jesús, räjpni:

—Jiädädu rolizä te guidaunu.

Dxejc huüj Jesús rolizjni, ro'c gurejni lo mex.

<sup>37</sup> Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzujñajni te bo't guidxa se't nejxh, luxh bo'tga najc si'c onix, botsa'cni.

<sup>38</sup> Che biu' gunaaga, bidzujñni lo ni' Jesús, guslojni cayoouni. Con nisbee caguiibni ni' Jesús, dxejc caguspjdzni ni'ni con xquidxejñi. Dxejc bachagro'ni ni'ni bazaazani setnejxhga ni' Jesús.

<sup>39</sup> Che bahuii farisee ni gurejdx Jesús rolizjni, recosre, bejnñi xhigab: "Palga gulii najc niguiire Xi'n Dios, sacbeeni chu najc nájza xho najc gunaare ni cagajñ ni'ni, sacbeezani najcni te gunadolduxh."

<sup>40</sup> Dxejc gunii Jesús loj fariseega, rájpnñi:

—Simón, yu' xhi rlazá guiniá lojlu.

Dxejc rájñ fariseega lojni:

—Guniini, Dad mastr:

<sup>41</sup> Dxejc rájñ Jesús lojni:

—Tio'p bejñ nazááb meel lo te bejñ ni rudedlaa meel. Tej reni nazááb si'cti gaiigayuu meel. Steeni nazááb si'cti tiubitzuu meel.

<sup>42</sup> Cheni di niacdi niguijxreni xti'nreni, basiäl lajzñi xti'n guiro'preni. Naj gunii loá, ¿chu tejreni sianälajzru dade'ga, á?

<sup>43</sup> Badzu' Simón diidxre lojni, rájpnñi:

—Rchaloá bejñ ni nazáábru lojni.

Dxejc rájñ Jesús:

—Laaca rniilu.

<sup>44</sup> Dxejc gubiré Jesús, bahuiini loj gunaaga. Dxejc rájpnñi loj Simón:

—¡Bahuii loj gunaare! Che biu'á rolijzlu, dilu nuniidñ nis te nidiib ni'á. Per gunaare gudibñajñi ni'á nisbee ni birii balojni, dxejc baspijdzni ni'á con xquidxejñi.

<sup>45</sup> Dilu nuchagro' nará, luxh laani cheli biu'á ree, gajdñi cuááz guchagro'ni ni'á.

<sup>46</sup> Dilu nusäl se't yecá, niluxh laani basälñi se't ni rlianexhduxh ni'á.

<sup>47</sup> Ni'cni rniá lojlu, dojl xten gunaare, luxh xhidalduxh najcreni, abadzucáj Dios redojlga sa'csi huenliisi sanälajzñi Dios. Luxh rebejñ ni rudzucáj Dios guxii xtojñreni, guxiiza sanälajzreni Dios.

<sup>48</sup> Dxejcti rájpnñi loj gunaaga:

—Agubicáj rextojñlu.

<sup>49</sup> Dxejc rebejñ ni sobga' lo mex con laani, che biejn diajgreni rediidxre, gusloj canii lo sa'reni, rájpnñi:

—¿Chuchani'c najc niguiire, ni'cni rudzucájñi xtojñ bejñ, á?

<sup>50</sup> Rájñ Jesús loj gunaaga:

—Aguláalu lo xtojñlu sa'csi ahuililajzlu; huij ñaj, bascuedxñ lajzlu.

## 8

### *Regunaa ni gucñaj Jesús*

<sup>1</sup> Dxejcti gusloj huij Jesús guiraa reguejdx nájza rerench, cagusule'ni xtidñ Dios, cagului-ñi xcuent xcálmibee Dios loj rebejñ. Sanáni rexpejñpacni

<sup>2</sup> nájza gaii gunaa ni abasiajñi, agulááni rebendxab lastooreni, nájza basiajñi xcálguijdxreni. Tejñi laa Marii ni laaza Magdalen, ni guláá Jesús gajdz bendxab neñ lastooni.

<sup>3</sup> Stee gunaa laa Xuan, ni najc cháäl Chuzá, ni ruhuii xhixten Herodes. Stee gunaa laa Susañ. Guyu'za sgañ gunaa. Guiraa reni'c ruedeñ lagajc xhixtenreni te rio' recos ni rquiniñreni.

### *Xcuent bejñ ni rbe'c binij*

(Mt. 13:1-9; Mr. 4:1-9)

<sup>4</sup> Dxejcti bire' xhidajñ bejñ lojni ni birii xhidajñ reguejdx. Lojreni gunii Jesús con te cuent ni rluui, rájpnñi:

<sup>5</sup> —Birii te bejñ sale'c binij. Cheni cabe'cni binij, yu' binij ni bitejb cuá' nezyuj. Che sadejd rebejñ baläjreni yejc binijga, biáádza remane' ni rutajñ xhaguibaa, gudajwrenini.

<sup>6</sup> Yu'za lajñ bitejb binijga neñ reguij cadro xheti xhidajñ yuj. Che gulejñ binijga, gubidz-gajñi sa'csi xheti xcojñ ro'c.

<sup>7</sup> Yu'za lajñ bitejbni nez neñ reyaguejch. Che gulejñni, di reyaguejch nusaan niroob gájlga.

<sup>8</sup> Yu'za lajñ bitejb binijga lo yusa'c, ro'c gucduxhni. Cheni guroobni, yu' binijga gujç te gayuu xob loj tejga binij ni gule'c dade'ga.

Ché gulujx guniini scree, dxejc guniini dip rájpnñi:

—Palga sajç gucucadijgtu rediidxga, colcucadiagsa'cni.

### *Xhicuent gunii Jesús recuent*

(Mt. 13:10-17; Mr. 4:10-12)

<sup>9</sup> Dxejcti gunabdiidñ rexpejñpacni lojni rájpnñi:

—¿Xhi säloj cuentre?

<sup>10</sup> Dxejc räjpni lojreni:

—Lojtu ni najc rexpejnä suniidx Dios yälnejn te gacheetu reyälxhiga'tz xten xcälrnibeeni. Loj chutis stee bejn, siniä recuent lojreni te mase cadxelorejreni, direni fisa'c, luxh mase cacuadiajgteni, direni gachesa'c.

*Rusule' Jesús xcuent ni rbe'c binij*

(Mt. 13:18-23; Mr. 4:13-20)

<sup>11</sup> Räjpzani:

—Scree säloj cuentre, rebini najc si'c xtidx Dios.

<sup>12</sup> Binij ni biajb lo nezyuj najc si'c rebejn ni rucuardiajg xtidx Dios. Dxejc riääd bendxab, riädzucajni rediidxga lastooreni te na'c chalilajzteni xtidx Dios, te na'cza laareni lo dojl.

<sup>13</sup> Binij ni biajb nejn reguij najc si'c rebejn ni rucuardiajg xtidx Dios, rbaalajzteni; per sa'csi xheti xlobaareni, näljaznu, direni gandzu'tz xtidx Dios, rililajzteni te bo'c, per che rsacsi rebejnreni, rbälazteni xtidx Dios.

<sup>14</sup> Binij ni biajb nejn reyaguejch najc si'c rebejn ni rucuardiajg xtidx Dios, per laj ni sanuureni xnejzteni, rijia'nreni lo recos guedxliuj, lo yälmasa'c ni ruhuiireni, näjza rujnreni si'tis ni rlanj tiejxhenti. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios.

<sup>15</sup> Binij ni riajb lo reyusa'c najc si'c rebejn nani rucuardiajg xtidx Dios, ni rililajz diidxga guideb te lastoya ni najc hueen. Randzu'tzteni xtidx Dios, dxejc rudeedreni te yälmasa'c, nalajznu ruzoobreni xtidx Dios, rujnreni xtzunsa'c Dios.

*Xhet yu'di ni naga'tz par tejpas*

(Mr. 4:21-25)

<sup>16</sup> Räjpzani:

—Ruti te bejn ni rucuauij te bajl dxejc rusäuni te caj yejc bajlga, dizani gusujnini dejtz te loon. Alga rusoobnini nejn candilieer loj te mex te guzanijni guideb nejn yu'ga te reni jiu' fiireni lo bajlga.

<sup>17</sup> Xhet yu'di ni yuchetzu'tzdi ni di guidzujn dxej guiluini; xhet yu'diza ni naga'tz naj ni di guidzujn dxej gachee bejnini.

<sup>18</sup> Ni'cni colcuadiagsa'c diidx; sa'csi guiraa rebejn ni rajp yälracbee, sajprureni yälnejn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najjni.

*Xnan Jesús con rebejtzni*

(Mt. 12:46-50; Mr. 3:31-35)

<sup>19</sup> Dxejc bidzujn xnan Jesús näjza rebejtzni cadre suga'ni, niluxh di niajcdi nibigteni lojni sa'csi tre' xhidalduxh bejn ro'c.

<sup>20</sup> Dxejcti huisa'n te bejn diidx loj Jesús, räjpni:

—Xnan guejblu näjza rebejtz guejblu suga' rolä', luxh rlanjzteni fiireni lo guejblu.

<sup>21</sup> Badzu' Jesús diidxre lojreni, räjpni:

—Xnanä näjza rebetzä najc rebejn ni rucuardiajg, ni ruzoobza xtidx Dios.

*Basiacdxí Jesús te beduxh*

(Mt. 8:23-27; Mr. 4:35-41)

<sup>22</sup> Te dxej biu' Jesús näjza rexpejn pacni nejn te barcw. Dxejc räjpni lojreni:

—Colcho' stelaad ro' nisre.

Basyu'reni barcw lo nis, sä'tireni.

<sup>23</sup> Cheni sadejdreni galäi nisga, gudiejs Jesús nejn barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis nejn barcw, ameerli jääd barcwga lo nis.

<sup>24</sup> Dxejcti huicuäänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajjni, huistieni, dxejc guididxa'ni lo bejga näjza lo nis ni cayäsjaa. Dxejc guläjz bejga, guredxiza nisga.

<sup>25</sup> Dxejc räjpni lojreni:

—¿Con xcälrililajztu, ä?

Per laareni bidxeljbrene, bidxeloduxhrene, canabdiidxrene lo sa'reni:

—¿Chuni'c najc niguiire te rnibeeni bej näjza nis, luxh rusobdiajg bej näjza nis xtiidxni?

*Te beñ Gadara ni guyu' rexspit bendxab lastooni*

(Mt. 8:28-34; Mr. 5:1-20)

<sup>26</sup> Bidzujntireni lo yuj xten Gadara ni tre' stelaad ro' nis nez loj reyuj xten Galilee.

<sup>27</sup> Cheni biäjt Jesús nejn barcw baläjni lo yuj, gubig te bejn ni siäd guejdxga lojni. Agujc xchej yu' rebendxab nejn lastooni. Dini gacw xhajbni, dizani cuääz nejn yu', alga rbäjzni cadre yu' rebaa.

<sup>28</sup> Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsilu nuurnu.

<sup>29</sup> Guniini rediidxre sa'csi canibee Jesús guirii rebendxabga nen lastoo bejnre. Agujc xchero cazob rniaaz rebendxabga bejnğa ruliib rebejn ni'ni, naani con cadenguib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz.

<sup>30</sup> Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' nen lastooni.

<sup>31</sup> Dxejc gunabduxhrene loj Jesús na'c guxhalsacnireni cadro biriireni.

<sup>32</sup> Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni nen recuchga. Che cuäjz Jesús,

<sup>33</sup> birii rebendxabga nen lastoo dade'ga, biugajcreni nen recuchga. Che biu'reni nen recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

<sup>34</sup> Baxun reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo reben rench.

<sup>35</sup> Dxejc biädhuii rebejn xhini'c gujc ro'c. Che bidzujnreni cadro suga' Jesús, bahuiireni loj bejn ni birii bendxab lastooni. Sobga'ni cuä' ni' Jesús, najcwni xhajbni, luxh xhetru rajcdi yejnci; dxejc bidxebduxh rebejnğa.

<sup>36</sup> Sas reni bahuiloj xho gujnci, bijreni diidx xho basiajc Jesús bejn ni guyu' rebendxabre lastooni.

<sup>37</sup> Dxejc guiraa reben Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhrene. Ni'cni biu' Jesús nen barcw te gubisacni nejz cadro siäädni.

<sup>38</sup> Dade' ni birii rebendxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

<sup>39</sup> —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

*Xindxa'p Jairo näjza te gunaa ni gudajn xhajb Jesús*

*(Mt. 9:18-26; Mr. 5:21-43)*

<sup>40</sup> Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni.

<sup>41</sup> Dxejc bidzujn te bejn ni laa Jairo, ni rnibee te guidobáz, bazuxhijbni nez loj Jesús, gunabni chanänini rolijzni

<sup>42</sup> sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lałsi sää Jesús rolijzni, birinajl xhidalduxh bejnni, cataälirenini.

<sup>43</sup> Loj rebejnğa nadxaag te gunaa ni agujc tzubitio'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed.

<sup>44</sup> Gubig gunaaga dejtz Jesús te gudajnni ro' xhajbni. Lagajc dxejc biacgajcni.

<sup>45</sup> Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäi reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

<sup>46</sup> Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

<sup>47</sup> Che gucbee gunaaga anajn Jesús gudajnni xhajbni, bidxejbni, racejsliini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

<sup>48</sup> Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

<sup>49</sup> Lałni canii Jesús si'c bidzujn te bejn ni siääd rolijz Jairo, ni rnibee te guidobáz. Räjpni loj Jairo:

—Agujt xindxa'plu. Na'cru gutajllu xtzuun Dad Mastr.

<sup>50</sup> Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

<sup>51</sup> Che bidzujnreni rolijzni, xtebtis Pedr, Jacoob, Juan näjza xcuzejn dxape'ga biunäjni nen yu'ga. Peta rebejn ni siädnajlni bia'nreni rolä'.



<sup>52</sup> Cayonduxh guiraa rebejn ni sobga' neñ yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

<sup>53</sup> Alga baxhiznäjnreni, sa'csi anajnreni agujt dxape'ga.

<sup>54</sup> Dxejcti gunaaz Jesús naa dxape'ga, dip guniini, räjpni lojni:

—jDxape', huistie!

<sup>55</sup> Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

<sup>56</sup> Bidxeloduxh rexuczajnni. Per gunibee Jesús na'c güireni diidx xhini'c gujc ro'c.

## 9

*Ruxhal Jesús guitzubitio'p rexpejnpacni*

(Mt. 10:5-15; Mr. 6:7-13)

<sup>1</sup> Batie' Jesús guitzubitio'p rexpejnpacni te badeedni yälrmibee lojreni te cuääreni reben dxab lastoo rebejn, näjza te gusiajcreni rebenracxhuu.

<sup>2</sup> Baxhalnirenini te gusule'reni diidx xcuent xcälrmibee Dios näjza te gusiajcreni rebenracxhuu.

<sup>3</sup> Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu.

<sup>4</sup> Chutis rolizj bejn cadro guidzujntu, ro'c coljia'n cheni guiriilltu lo guejdxga.

<sup>5</sup> Palga direni gusaan jiu'tu rolizjreni, che jiunejztu lo guejdxga, colcuujb guxhuj ni'tu si'c te seen direni nililajz xtiidxtu.

<sup>6</sup> Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

*Xho gujt Juan ni rutiobnis*

(Mt. 14:1-12; Mr. 6:14-29)

<sup>7</sup> Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut.

<sup>8</sup> Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac.

<sup>9</sup> Per räjp Herodes:

—Lagajc narä gunibeä biru' yejc Juan ni rutiobnis, çchuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

*Bayaan Jesús gaii mil bejn*

(Mt. 14:13-21; Mr. 6:30-44; Jn. 6:1-14)

<sup>10</sup> Che gubi' rexpejnpacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida.

<sup>11</sup> Che gubee rebejn caro sääreni, huinajnrenini bidxälrenini. Che siädreni lojni huichaglojnreni, sas gusloj cagusule'ni lojreni xcuent xcälrmibee Dios. Basiajczani rebejn ni cayacxhuu.

<sup>12</sup> Che gusloj cayäaz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jiiireni te chatiilreni xhi gaureni, näjza cadro tedreni guxhijn lo rerench, neñ reguedxbäz, sa'csi ree xhet yu'di.

<sup>13</sup> Dxejcti räjp Jesús loj rexpejnpacni:

—jLa'tu colgudeed xhi gaureni!

Dxejc räjpreni lojni:

—Xhet rajpdinu, gaitis yätxtiil näjza tio'p bäjl. Ni'ctis yu' palga dinu chasiiru xhi gau reben xhidajlre.

<sup>14</sup> Luxh najc rebejn ga si'cti gaii mil niguii. Dxejc räjp Jesús loj rexpejnpacni:

—Colyejtz lojreni cuereni xcua-xcuareni, si'cti tiuubitzugajreni te cuaa.

<sup>15</sup> Si'c bejnrenini, sas gurej guiraa rebejn ga si'c.

<sup>16</sup> Dxejc cua' Jesús gaii yätxtiilga näjza tio'p bäjlga, guläsi lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlga, dxejc sanuutis badeednini loj rexpejnpacni te gudisrenini loj rebejn ga.

<sup>17</sup> Guiraa reben xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtiilbiujy näjza bälbiujy ni bia'n.

*Gunii Pedr Jesús najc Crist*

(Mt. 16:13-19; Mr. 8:27-29)

<sup>18</sup> Te dxej lajñi cabedx-canab Jesús lo Dios, xtebni näjza rexpejnpacni, gunabdiidxni lojreni, räjpni:

—¿Chuni'c rnii rebejn nacä?

<sup>19</sup> Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubaṣac.

<sup>20</sup> Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabääznu.

*Jesús rnixgaa xho guetni*

(Mt. 16:20-28; Mr. 8:30-9:1)

<sup>21</sup> Dxejc gunibee Jesús lojreni, räjpni:

—Na'c gäbtu si'c lo rebejn.

<sup>22</sup> Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibaṣacä ni riojn dxej.

<sup>23</sup> Dxejc räjpni loj guiraareni:

—Palga chu tejturu rälaz guirinajl narä, nanab jällajzni xhixtenni, te guixe-guixee guntisni nani gudedä gunni.

<sup>24</sup> Sa'csi nani rälaz guiniazdzu'tzni xcäl'nabajṣni, sunijtni yäl'nabajṣ lo Dios; luxh nani runijt xcäl'nabajṣni xcuent xtidxä, sica'ni yäl'nabajṣ par tejpas.

<sup>25</sup> Sa'csi ¿xhi gaan gun te bejn palga xca'ni guideb guedxliuj, luxh gunijtni xcäl'nabajṣni lo Dios?

<sup>26</sup> Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäazani cheni jäälä si'c reii guideb yäl'rdimbicha' xten Xtradä näjza rexanglni.

<sup>27</sup> Guliipac rniä lojtu, yu' gaii reni suga' ree, ni di guet, suhuixgaareni xcäl'rnibee Dios.

*Bachaa xho rluiloj Jesús*

(Mt. 17:1-8; Mr. 9:2-8)

<sup>28</sup> Gudejdti xhujṣ dxej gunii Jesús diidxre, dxejcru huinä Jesús Pedr näjza Jacoob näjza Juan, huijreni jiaa yejc te dajn te guredx-gunabni loj Dios.

<sup>29</sup> Laṣni cabedx-canab Jesús lo Dios, bidxaa xho ruluii lojni; dxejc xhajbni gujc nolbäj, rdimbicha'lini.

<sup>30</sup> Biricajza tio'p dade' caninäjrenini. Redade'ga najc toMoisés näjza Elías.

<sup>31</sup> Rdimbicha'za redade'ga. Caninäjreni Jesús xcuent xho guetni guedx Jerusalén.

<sup>32</sup> Luxh Pedr näjza resa'ni guyuduxh bacaṣ lojreni; che bire'ch bacaṣ lojreni bahuiireni lo yäl'rdimbicha' xten Jesús näjza loj guiro'p redade'ni caninäjni.

<sup>33</sup> Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choṣ yue', tejni par luj, tejni par Moisés, steeni par Elías.

Luxh di Pedr gaan xhini'c caniini.

<sup>34</sup> Laṣni caniini si'c, bire' te za gusloj cayäjt yejcreni, dxejc bidxejbreni che biu'reni nen zaga.

<sup>35</sup> Dxejcti biejn diajgreni nen zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

<sup>36</sup> Che gulujx guniini rediidxga, bahuiireni sugaxteb Jesús. Dxejc niäutis ro'reni nen redxejga, rut lojdi bijreni diidx xcuent ni bahuiireni ro'c.

*Basiajc Jesús te biuux ni guyu' bendxab lastooni*

(Mt. 17:14-21; Mr. 9:14-29)

<sup>37</sup> Barayääl cheni biäjtreni yejc dajnga, xhidalduxh bejn cabäjz Jesús.

<sup>38</sup> Dxejcti te dade'ni nadxaag rebejnga guredxa'ni, räjpni loj Jesús:

—Mastr, balaslajz narä, gudahuui xi'nä, sa'csi xtebtisni najcni xinganä.

<sup>39</sup> Luxh bendxab rniaazni, sas ruscuedxa'nini, rajcni si'c yäl'guidxbej, rbääni bitzuṣ ro'ni, rusacsiduxhnini, luxh dini gusaanni.

<sup>40</sup> Agunabä loj rexpejnpaclu nibääreni bendxabga, luxh di niajcdini.

<sup>41</sup> Dxejc badzu' Jesús diidxre, räjpni:

—¡Bejn ni di chailajz, benguijdx! ¿Gucli chunäätu, gucli gunä huant la'tu? ¡Gudanä xi'nlu ree!

<sup>42</sup> Dxejc che cabig biuuxga lojni, basälta' bendxabga biuuxga lo yuj, sas gusloj cayajcni si'c yäl'guidxbeduxh. Dxejc gudidxä' Jesús loj bendxabga, basiacgajcni biuuxga, dxejc badeednini lo xtadni.

<sup>43</sup> Guiraa rebejn bidxeloduxh yäl̄rnibeduxh xten Dios.

*Rnii Jesús stehuält xho guetni*  
(Mt. 17:22-23; Mr. 9:30-32)

Lalni cadxeloj rebejn lo recos ni bejn Jesús, räjpni loj rexpejn pacni:

<sup>44</sup> — Colcuadiajgsa'c rediidxre, na'cza jiäl̄lajztreni, sa'csi sutedreni narä Xi'n Dios ni gujc Niguii ladznaa rebejn.

<sup>45</sup> Niluxh di rexpejn pacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzareni niniabdiidxreni loj Jesús xhi säloj rediidxga.

*Chuni'c sajcru*  
(Mt. 18:1-5; Mr. 9:33-37)

<sup>46</sup> Guslojza rexpejn Jesús canabdiidx lo sa'reni:

— ¿Chuchani'c sajcru loonu?

<sup>47</sup> Per gucbee Jesús xhi xhigab cayujnreni. Dxejc cua'ni te biuxbáz, bazujnini cuä'ni,

<sup>48</sup> räjpni lojreni:

— Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtaädä ni baxhał narä. Ni najc maazru nadolajz lojtu, ni'c najc ni sajcru.

*Nani di guiniyaj nuurnu, xladnu yu'ni*  
(Mr. 9:38-40)

<sup>49</sup> Dxejc räjp Juan loj Jesús:

— Mastr, bihuiinu loj te bejn ni rbää repxendxab nen lastoo bejn con xcäl̄rnibee lajlu. Dxejc ri'e'tznu lojni na'cru gunni si'c, sa'csi dini sanäj nuurnu.

<sup>50</sup> Dxejc räjp Jesús lojreni:

— Na'c gudxojtuni, sa'csi nani di guiniyaj nuurnu, xlaadnu yu'ni.

*Jesús gudiäxa' loj Jacoob näjza Juan*

<sup>51</sup> Che siäddzujn redxej ni chää Jesús xhaguibaa, bejn ni xhigab chää pacni guedx Jerusalén.

<sup>52</sup> Baxhałni gaii bejn gunijd lojni chääreni te guejdx xten Samaria te satiilreni cadro jia'nreni ro'c.

<sup>53</sup> Luxh rebejn samaritan di rlajzreni gudedlaareni te lajt cadro jia'nreni, sa'csi najnreni chääreni guedx Jerusalén.

<sup>54</sup> Che biejn diajg Jacoob näj Juan, tio'p xpejn pacni, si'c, sas räjpreni loj Jesús:

— Dad, ¿La rlajzlu guinibeenu jäjt guiboo xhaguibaali te guze'cni guiraa rebenguejdxga si'cni bejn Elías?

<sup>55</sup> Dxejc bahuii Jesús lojreni, gudidxa'ni lojreni, räjpni:

— Ditu gaan chuni'c rnibee lastootu.

<sup>56</sup> Sa'csi narä Xi'n Dios ni gujc Niguii dina niälä te gudzucaä xcäl̄nabajn rebejn. Narä biälä te guslaäreni lo dojl.

Dxejcti huijreni garenca guejdx.

*Reni rlajz nirinajl Jesús*  
(Mt. 8:19-22)

<sup>57</sup> Lalni sääreni lo nezyuj, biääd te bejn gunii loj Jesús, räjpni:

— Dad, narä rlazä jäädnalä guejblu cadrotis chää guejblu.

<sup>58</sup> Dxejc badzu' Jesús diidxre lojni, räjpni:

— Rebäjz rajp xpitiääreni, remane' ni rutajt rajp xpitiääzreni, niluxh narä Xi'n Dios ni gujc Niguii, dina gapä nicla te lajt cadro guscugä yecä.

<sup>59</sup> Dxejcti räjp Jesús lo stee bejn:

— Gudanajl narä.

Luxh laani räjpni:

— Dad, basaan suchacua'tzxgaä xtaädä, dxejcru jäädnalä guejblu.

<sup>60</sup> Dxejc räjp Jesús lojni:

— Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl̄rnibee Dios.

<sup>61</sup> Dxejc räjp steeni lojni:

— Dad, rlazä jäädnalälu, niluxh basanxgaä chasadixä resa'ä ni tre' rolizä.

<sup>62</sup> Dxejc räjp Jesús lojni:

— Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl̄rnibee Dios.

<sup>1</sup> Che gulujx reni'c, gule Jesús gayonbitzuu bejn, baxhalnireni tio'pgajreni te basnijdnireni lojni loj reguejdx cadro nanab tedni.

<sup>2</sup> Räjpmi lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie'xcose'chni.

<sup>3</sup> Colchäj la'tu; colhuui xho ruxhajä la'tu si'c xiil galäii recuyo't sa'csi sunnäjreni la'tu si'ctisni rlanjreni.

<sup>4</sup> Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz.

<sup>5</sup> Cheni jiu'tu rolizj te bejn, ganiddoo colye'tz: “Sucuedxilajz reni rbäjz ree.”

<sup>6</sup> Palga najcni te bejn ni rdxagljaz yälrbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu.

<sup>7</sup> Coljia'n lagajc rolizj bejn cadro guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäj\_l xca'ni xcuent dzuunga. Coljia'n tejtis lajt dxejtis ni chutu lo guejdxga.

<sup>8</sup> Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu.

<sup>9</sup> Colgusajc rebenracxhuu ni yu' ro'c, colye'tz lojreni: “Abidzujngajxh xcälrnibee Dios.”

<sup>10</sup> Palga jiu'tu te guejdx cadro di rlanjreni gucuadiajgreni xtiidxtu, colrii lo nezyuj, ro'c colye'tz lojreni:

<sup>11</sup> “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzujngajxh xcälrnibee Dios lojtu.”

<sup>12</sup> Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

*Reguejdx ni di niu xtidx Jesucrist  
(Mt. 11:20-24)*

<sup>13</sup> Räjpzani:

—iProbe'tu bejn guedx Corazín! iProbe'zatu bejn guedx Betsaida! Paru nuhuui rebenzajt ni gubajñ guedx Tiro näjza Sidón remilaagwr ni benä nez lojtu, pet gucli nusiechlajzreni, najcwrreni ladnagas, nibejzarenı lo cobdäj si'c te seen abasiechlajzreni.

<sup>14</sup> Che gun Dios fis rextolj rebejn guedxliuj, guxiiru gac xfis Dios lo rebenzajt ni gubajñ guedx Tiro näjza Sidón. Fisroru gun Dios reguedx Corazín näjza Betsaida.

<sup>15</sup> Luxh luj guedx Capernaum, rchalolu siäjslu xhaguibaa, alga siajblu gabijlli, cadro gaclu fisro xten Dios.

<sup>16</sup> Rajpzani lo rexpejn pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

*Rbi' regayonbitzuu*

<sup>17</sup> Che gubi' regayonbitzuu bejn nani baxhal Jesús, rbaduxh lajzreni, räjpreni:

—Dad, näjza rebenđxab rusobdiajg xtiidxnu che rusä'tnu lajlu.

<sup>18</sup> Räjpmi Jesús lojreni:

—O'n. Ni'cni narä bahuiä che gunijt xcälrnibee beñđxab, bitejbni xhaguibaa si'c bianij xten guzii.

<sup>19</sup> Colgacbee. Narä runidxä yälrnibee lojtu te guläjtu yejc bäl näjza yejc naxejb; runidxäza yälrnibee te guntu gaan lo xcälrnibee beñđxab. Xhetliidi gun daan la'tu.

<sup>20</sup> Na'c guibalajztistu sa'csi rusobdiajg rebenđxab xtiidxtu; colguibalajzru sa'csi acuaj lajtu lo xquijtz Dios xhaguibaa.

*Bibalajz Jesús  
(Mt. 11:25-27; 13:16-17)*

<sup>21</sup> Lagajc dxejc bibalaznäj Jesús Sprit Dxan xten Dios, dxejc räjpmi lo Dios:

—Rliä'pä xpala'nlu Xtädä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluulu xnezyujlu loj rebejn ni najc nadolajz si'c te biuxbäz. O'n, Xtädä, sa'csi si'c rlanjlu gunlu.

<sup>22</sup> Guiraa recosre abaniidxlu loä Xtädä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtädä, xtebtis narä ni najc Xi'nlu, con rebejn ni rlazä gumbee luj.

<sup>23</sup> Dxejc bahuii Jesús loj rexpejn pacni, räjpmi lojtisreni:

—Chicbaa la'tu näjza renani ruhuui guiraa nani cahuilojtu.

<sup>24</sup> Sa'csi rniliä lojtu, balti redade' ni gunii xtidx Dios galoo, baltiza regei rlanj nuhuiireni guiraa ni cahuilojtu, niluxh direni nuhuiini. Rlajzreni niejn diajgreni rediidxre ni cayejn diajgtu, luxh di diajgreni niejnini.

*Xcuent te beñhuen ni siääd Samaria*

<sup>25</sup> Dxejc huisulii te mastr xten leii, huininäjni Jesús, rlanjni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibannää Dios par tejpas?

<sup>26</sup> Sas räjp Jesús lojni:

—¿Xhini'c caj lo guijtj xten leii? ¿Xho rolluni?

<sup>27</sup> Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälajzza resa'lu si'ctis ni sanälajzlu lagajc luj.

<sup>28</sup> Dxejc räjp Jesús lojni:

—O'n, laaca rudzu'lu diidx. Palga gunlu si'c, sajjplu yälñabajnre.

<sup>29</sup> Per mastr xten leii, rlanjni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

<sup>30</sup> Dxejc räjp Jesús lojni:

—Te beñ laadxnu birii guedx Jerusalén, sääni guedx Jericó. Dxejc lo nezyuj biricaj gatii gubaan, gulajnneni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini.

<sup>31</sup> Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

<sup>32</sup> Gudejzta te levita, beñ ni rujnza dzuun neñ guidoo. Che bidzujñni cadro naga' bejnga, gudejdni stelaad, sä'tini.

<sup>33</sup> Dxejcti te beñ Samaria, lañi sääni biaj, gudejdni nezyujga, bidzujñni cadro naga' bejnga. Che bahuiini lojni, balaslajznini.

<sup>34</sup> Gubigni loj bejnga, basälni se't näjza bin loj bejn ni nadxälguijd, dxejc batejbnini te la' lajd. Dxejc bascuibnini dejtz lagajc xmanni, huinänini cadro rudedlaareni yu', ro'c cuanäjnini.

<sup>35</sup> Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

<sup>36</sup> Dxejc räjp Jesús lo mastr xten leii:

—¿Chu tej lo guidxon rebejnga najc si'c sa' xten dade' ni biajb ladzña gubaan?

<sup>37</sup> Dxejc räjpni loj Jesús:

—Ni balaslajz bejnga.

Dxejc räjp Jesús lojni:

—Huij te sigajzta chayejnlu.

*Bidzujñ Jesús rolijz Mart näjza Marii*

<sup>38</sup> Lañi huinuu xnezyujni, bidzujñni te guejdx. Ro'c bidxaagni te gunaa ni laa Mart ni huinänini rolijzni.

<sup>39</sup> Yu' te bäjil Mart ni laa Marii, luxh laani gurejni cuä' ni' Jesús te cacuadiajgni xtiidxni.

<sup>40</sup> Mart cagusquejñni cayujñni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

<sup>41</sup> Dxejc räjp Jesús lojni:

—Mart, Mart, cayuduxhlu yärsia', riulu xhidajl cos,

<sup>42</sup> luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

## 11

*Rului Jesús xho guiniabni lo Dios*

(Mt. 6:9-15; 7:7-11)

<sup>1</sup> Te huält cabedx-canab Jesús loj Xtdadni Dios, suga'ni te lajt. Che gulujx cabedx-canabni, gunii te xpejnpacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejnpacni.

<sup>2</sup> Dxejc räjp Jesús lojreni:

—Che cuedx-guiniabtu lo Dios, scree colnii:

Xtdadnu ni yu' xhaguibaa,

suchä'p xpala'nlu, sujiaäd xcälñibeelu.

Sugac si'ctisni rlanjzlu gac lo guedxliuj si'cpac rajcni xhaguibaa.

<sup>3</sup> Guira dxej baniidx xcu'nnu si'ctis ni rquiinnuni.

4 Basiäj] lajzlu redojl xtenu si'cni riäj] lajznu redojl ni rujn rebejn loonu.

Na'c gusaanlu jiajbnu lo xcäl]rniee bendxab.

Bas]laa nuurnu lo dojl.

<sup>5</sup> Dxejc räjpza Jesús lojreni:

—Paru tejtü yu' te xamiigwni, luxh guidzuj]ni rolijzni garol yääl, gäbni: “Xamigwä, banidxlaa choñ yätxtiil,

<sup>6</sup> sa'csi bidzuj]n te xamiigwä rolizä ni bazaj biaj, luxh xhet ra'pädi te gudedä xhi gauni.”

<sup>7</sup> Xhixh sinii ni naga' neñ xyu'ni, gäbni: “Na'c riädte'chlu baca] loä. Niäu rolä' luxh rexi'nä naga' cuä'ä, digacdi chästieä te gumidxä xhi gumidxä lojlu.”

<sup>8</sup> Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisini te na'cru gutie'chni bacia]ni.

<sup>9</sup> Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu.

<sup>10</sup> Sa'csi chutis ni rniab, rca'ni nani rniabni; chutis ni rguuil xhi cos, rdxäl]nini; nani rusejz rolä', suxhalzarenä lojni.

<sup>11</sup> 'Paru tejtü ni najc dad, jiaäd te xi'ntu guiniabni te yätxtiil lojtu, ç]la sudeedtu te guij, ä? O palga guiniabni te bäjl, ç]la sudeedtu te bäj, ä?

<sup>12</sup> O palga guiniabni te tzutbejt, ç]la sudeedtu te naxejb, ä?

<sup>13</sup> Palga la'tu, ni najc bendoj], rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenu loj renani rniabni lojni.

*Rucuaquijreni Jesús, rniireni rajpni yäl]rniee xten bendxab  
(Mt. 12:22-30; Mr. 3:19-27)*

<sup>14</sup> Gulää Jesús te bendxabgop lastoo te bejn. Che birii bendxabga lastoo bej]nga, guslogajc canii bej]nga, dxejc bidxeloduxh rebeñ xhidaalga.

<sup>15</sup> Dxejc yu' reni räjp:

—Niguiire rbää rebeñdxb con yäl]rniee xten Beelzebú ni rniee loj rebeñdxb.

<sup>16</sup> Sgaiireni r]ajz guquiilrenini, ni'c canabreni gunni te seen ni siääd xhaguibaali.

<sup>17</sup> Niluxh laani gucbeeni xhi xhigab cayuj]reni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä] te cuaani stee cuaaga, di gaç]laa sinijt gubierga lo guedxliuj. Palga te fami] rdilnä] lagajc sa'ni, di gaç]laa sinitloj fami]ga.

<sup>18</sup> Palga guiliä' sa' rebeñdxb, ç]xho mood chanuu xcäl]rnieeberenä? Dee rniä sa'csi la'tu rniitu narä rbää rebeñdxb con lagajc yäl]rniee xten Beelzebú.

<sup>19</sup> Palga si'c najcni, ç]chuni'c rudeed yäl]rniee loj rexej]ntu te rbääreni bendxab? Lagajc laareni ruluii xhet laadi rujntu xhigab.

<sup>20</sup> Palga narä rbää rebeñdxb con xcäl]rniee Dios, ni'cni rului]loj abidzuj]n xcäl]rniee Dios lojtu.

<sup>21</sup> 'Cheni suga' te bendaan, ca'ni guiib, canä]ni rolijzni, rutliidi ruhualdi rexhixtenni.

<sup>22</sup> Niluxh che jiaäd stee ni nadipru lo bendaanga, rudxagdij]lnini, ruj]ni gaanni, dxejc rudzucajni xquiibni ni badeed yäl]bendaan lojni, dxejc sajç] chanäni guiraa rexhixtenni.

<sup>23</sup> Reni xhet yu' di xladä, rdxe'chreni loä. Ni di gutopnä] narä, rutie'chni.

<sup>24</sup> Räjpzani:

—Cheni rii te bendxab nen lastoo te bejn, ricansajni nez lo reyubijdz, caguuilni cadro gusilajzni. Che cad rdxäldini, ruj]ni xhigab, naani: “Guibisacä rolizä cadro birii.”

<sup>25</sup> Cheni guibi'ni, rdxäl]ni lastoo bej]nga si'c te yu' ni entis guluj]x bilioobni, suchesa'cni.

<sup>26</sup> Dxejç]ti rixiini sgajdz bendxab ni ruj]nru latsiaj lojni. Dxejc riu'reni neñ lastoo bej]nga, dxejc nalasru ria'n bej]nga loj ni gujç]ni galoo.

*Chicbaa renani riu xtidx Dios*

<sup>27</sup> La] ni canii Jesús rediidxre, te nane' ni yu' lo rebeñ xhidaalga dipli guniini, räjpni:

—ç]Chicbaa nan ni biäd]nalu guedxliuj! Chicbaaza nani bas]laa lu].

<sup>28</sup> Luxh laani räjpni:

—Xhet si'c di najcni; chicbaaru rebejn ni rucua diajç] xtidx Dios, ni ruzoobza xtiidxni.

*Rebenguidx rniab te milagwr si'c te seen  
(Mt. 12:38-42; Mr. 8:12)*

<sup>29</sup> Sanuutis cadojç] rebejn gabi Jesús, dxejc guslojni caniini, räjpni:

—Rebejn ni yu' naj benguidxduxh]reni, rniabzarenä te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni.

<sup>30</sup> Lagajc si'c ni gujç] Jonás te seen loj rebejn guedx Nínive, si'cza narä, Xi'n Dios ni gujç] Niguüi, gacä te seen lo rebejn ni nabaj]n naj.

<sup>31</sup>Cheni guidzujñ dxej ni gac fis sistie te nane' ni gujc rein lo reuy ni tre' ladbäjgw, sucuaquijni rebejn ni tre' guedxliuj ñaj sa'csi laani biriini zitduxh te bacuadiajpacni yälñajn xten Salomón. Ree suga' galäiitu tej ni sacduxhru lo Salomón,

<sup>32</sup>luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn ñaj neñ redxej ni gac fis. Dxejc sucuaquijreni rebejn ni nabajn ñaj sa'csi laareni, che huinäli Jonás xtidx Dios lojreni, basiechlajzreni, basa'nreni xtojreni. Ni suga' lojtu ñaj sajcruni lo Jonás, niluxh ditu jiu xtiidxni.

*Ni rusanij xcäriejn bejn*

*(Mt. 5:15; 6:22-23)*

<sup>33</sup>Räjpzani:

—Rut rucuaquijdi te bajl, te gusujnini te lat xhiga'tz, niclaza neñ te caj. Susujni bajlga jiaa te rajc ruhuisa'c chutis ni riu' neñ yu'.

<sup>34</sup>Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäjy.

<sup>35</sup>Gunatiro te di gac xpianijlu yälñacäjy.

<sup>36</sup>Palga guideb xcäriejnlu yu' bianijtis, xheti te lajt nacäjy, sajc fisa'clu guira'ti, si'c najc che rusanij te bajl neñ yu'.

*Rucuaquij Jesús refarisee näjza rebejn ni najn lei*

*(Mt. 23:1-36; Mr. 12:38-40; Lc. 20:45-47)*

<sup>37</sup>Che gulujx gunii Jesús, biädgajñ te farisee Jesús chääni rolijzni te chatajwni. Sä'tireni. Che biu' Jesús, gurejni lo mex.

<sup>38</sup>Bidxeloy fariseega sa'csi dini niguiib ñaani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios.

<sup>39</sup>Dxejcti räjp Jesús lojni:

—La'tu ni najc refarisee, rguiibtu nez dejtz te bas näjza te pla't, niluxh la'tu guidxa lastootu yälgubaan näjza yällatsiaj.

<sup>40</sup>¡Beñ nadduxh! ¿La ditu gacbee? Nani benchee dejtzni, bencheeza neñni.

<sup>41</sup>Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

<sup>42</sup>¡Probe'zatu, beñ farisee! Rudeedtu lo Dios tej lo tejsa tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguxhtis Dios näjza xcälñälajz Dios. Dee nanab guntu ganid, luxh na'cza gusaantu guntu ni alacayujntu par Dios.

<sup>43</sup>¡Proobza la'tu rebeñ farisee! Rchagljaztu rbejtu lo reyagxhil xten rebejn ni sajc neñ reguidobäz; rchagljaztu saru rnii rebejn "xchan Dad" lojtu che rijtu lo guii.

<sup>44</sup>¡Probe'zatu! La'tu najctu si'c rebaa ni di guzen, rsiaj rebejn yejc cadro naga'reni luxh direni gan.

<sup>45</sup>Dxejcti badzu' tej rebejn ni ruluii leiü diidxre lojni, räjpni:

—Dad mastr, che rniilu rediidxre, rniyajlu nuurnu.

<sup>46</sup>Dxejc räjp Jesús lojreni:

—¡Probe'za la'tu rebejn ni ruluii leiü! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlanjtu fałtuni nicla con te bicuenabäztu.

<sup>47</sup>¡Proobzatu! Sa'csi runcheetu xpaä redade' ni gunii xtidx Dios galoo, luxh najctu rexajg renani bagu't redade'ga.

<sup>48</sup>Ni'cni najnpactu xhi gusajcreni, rchagljaztatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

<sup>49</sup>Ni'cni gunii Dios, sa'csi yuduxh xcälñajjni, räjpni: "Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaireni."

<sup>50</sup>Loj rebejn ni nabajn ñaj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj.

<sup>51</sup>Guislojni xtiejn toAbel, näjza xtiejni Zacarías ni bagu'treni galäii nez lodxan neñ guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn ñaj.

<sup>52</sup>¡Probe'za la'tu, rebejn ni ruluii leiü! Sa'csi rniitu la'tistu rajptu yälñajn, luxh di rlanjtu chalilajztu xtidx Dios, dizatu gusaan chalilajz rebejn ni rlanj chalilajz xtidx Dios.

<sup>53</sup>Cheni räjp Jesús rediidxre, bidxe'ch rebejn ni ruluii leiü näjza refarisee lojni. Dxejc guslojreni canabdiidxreni xhidalduxh diidx,

<sup>54</sup>te cagula'tzreni don la sajc guiga'ni lo xhitis te diidx ni guiniini.

<sup>1</sup> Laḷ ni caniini, bidojp xhidajl miḷ bejn ro'c, calaro'li sa'reni. Dxejc gusloj canixgaa Jesús loj rexpejn pacni, räjpni lojreni:

— Colḷnati levaduur xten refarisee, rusgueerene rniitisreni xhidajl diidx luxh direni gunni.

<sup>2</sup> Sa'csi xheti xhi niäu lojni ni di guxal lojni luxh xheti xhi naga'tz ni di jienloj.

<sup>3</sup> Ni'cni guiraa ni guniitu lo nacäy, sienḷi lo bianij xten dxej. Luxh ni gunii xhiga'tztu nen reyu' ni niäudzu'tz, sibedxa'renini rediidxga yejcli reyu'.

*Chuni'c nanab guidxejbtu*

(Mt. 10:28-31)

<sup>4</sup> Räjpzani:

— Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni.

<sup>5</sup> Guiniä lojtu chuni'c nanab guidxejbtu. Colguidxejb nani che abadzucajni yälḷnabajn rajpni yälḷrniee gusälḷni la'tu gabijl lo bajl ni cayejc par tejpas. Ni'csii colguidxejb.

<sup>6</sup> 'Anajntu sajc jio' gaaḷ mane' tio'p melbäz, luxh di Dios jiälḷajz nicla tej remane'ga.

<sup>7</sup> Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

*Reni riembee Jesús nez loj rebejn*

(Mt. 10:32-33; 12:32; 10:19-20)

<sup>8</sup> Räjpzani:

— Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguui sicäpä najcni xpenä nez loj rexangl Dios.

<sup>9</sup> Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

<sup>10</sup> 'Chutis ni guinii te didxnaj xcuentä, susiälḷajz Dios laani. Niluxh chutis ni guiniyaj Sprit Dxaḷ xten Dios, di Dios gusiälḷajz xtojḷni.

<sup>11</sup> 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu,

<sup>12</sup> sa'csi che guidzujḷ or ni guiniitu, Sprit Dxaḷ xten Dios suluini xhini'c guiniitu.

*Reyälḷnasa'c rusajb bejn nen dojl*

<sup>13</sup> Te niguii ni nadxaag rebejn xhidaalga räjpni loj Jesús:

— Dad, Mastr, gojs lo betzä guniidxni gala' xhixtenä ni basa'n toxtadnu loonu.

<sup>14</sup> Dxejc räjp Jesús lojni:

— Dade', ḷchuni'c gule narä gunä yälḷguxhtis o gacä abogaad lojlu, ä?

<sup>15</sup> Dxejc räjp sac Jesús lojreni:

— Colḷnatiro, colgantz' te di rlaajtistu ga'ptu yälḷnasa'ctis sa'csi xcälḷnabajn bejn dini gac yälḷrajtis xhidajl xhi cos.

<sup>16</sup> Dxejcti bij Jesús te cuent, räjpni lojreni:

— Guyu' te beḷ rapduxh. Racduxh cose'ch lo rexcälḷni.

<sup>17</sup> Dxejcti gusloj bejnḷni xhigab: “ḷXhocha gunä? Dina gapä cadro cucheä recose'ch.”

<sup>18</sup> Sas bejnḷni xhigab: “Ananä xhini'c gunä. Gudzulä reyu' cadro rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.”

<sup>19</sup> Dxejcti siniä lo lastoä: “Lastoä, agulucheelu xhidajl xhi cos, sajḷni xhidajl ijz. Basilajz naj, gudajw, gu', bibalajz.”

<sup>20</sup> Dxejc räjp Dios lojni: “ḷBeḷ najd! Lagajc guxhijḷre siniabä xaimlu. ḷDxejca'? ḷChu xca' guiraa recos ni gulucheelu?”

<sup>21</sup> Si'c sisiajc guiraa rebejn ni rguiltis xcälḷnasa'creni lo guedxliujre, niluxh xhet rajpdireni loj Dios.

*Rcanäj Dios rexi'nni*

(Mt. 6:25-34)

<sup>22</sup> Che gojḷ stera't, räjp Jesús loj rexpejn pacni:

— Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu.

<sup>23</sup> Yälḷnabajn sajcruni lo yälḷrajw; tiejxhni sajcruni lo lajd ni rajcw bejn.

<sup>24</sup> ḷColḷhuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ḷLa xhet sajcdirutu loj rebalooga, ä?

<sup>25</sup> Luxh ḷChu tejtḷ palga runduxhni xhigab sajc tioobruni sgarol metr?

<sup>26</sup> Palga di gacdi guntu nicla te cosbäz, ḷxhicuent ru'tu yärsia' xcuent xhi stee cos?

<sup>27</sup> ḷColḷhuii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla ḷreii Salomón con guiraa xcälḷnasa'cni, dini nisiuchee si'c rsiuchee reguuiḷga.



<sup>28</sup> Palga rusucehe Dios recuaan ni rga' lo niaa, ni rial nadxej, luxh guixee-huijdx, che agubijdzni, rejčni lo dāj, aticaxh Dios suniidx xhi gacw la'tu, ibejn nani guxii rililajz!

<sup>29</sup> Ni'cni rniā na'c runtejtu xhigab xho quiiltu xhini'c gautu, xhini'cza yātu, na'c chutistu yārsia'.

<sup>30</sup> Si'ttis rujn rebenguedxliuj guideb xtijpreni rguilreni rexhicosre. Niluxh xtadtu ni yu' xhaguibaa anajnni xhini'c rquiintu.

<sup>31</sup> La'tu colquiiltis xcālribee Dios, dxejcti laani suniidxzani guiraa recos ni rquiintu.

*Yālnasa'c ni yu' xhaguibaa*  
(Mt. 6:19-21)

<sup>32</sup> Rājpxani:

—La'tu ni najc rexilā'ā, na'c guidxejbtu, sa'csi rbaali lajz Dios, aguleni la'tu te la'tu guntu yālguxhtis lo xcālribeeeni.

<sup>33</sup> Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuuxh, te chu yālnasa'c nenñi xhaguibaa cadro di gubaan jiu' niclaza xcabāj rexhicos.

<sup>34</sup> Sa'csi cadro rajptu xcāl'nasa'ctu, ro'cza yu' lastootu.

*Nanab susintu*

<sup>35</sup> Rājpxani:

—iColsusin! iColhualguij rebajl!

<sup>36</sup> Colyujn si'c remos ni cabājz guibi' xlamreni ni sää te sa', te cheni guibi'ni guxhalgajczeni rolā'.

<sup>37</sup> Chichaa remos ni susin che guibi' xlamreni. Rniliāpac lojtu, lagajc xlamreni sajcwni xhajbni sibe'cni rexmosni lo mex, dxejc lagajc laani sudeedni xhi gaureni.

<sup>38</sup> Mase guidzujñni garol yāäl, mase guidzujñni cājyru, palga guidxālmi arexmosni susin, i'chicbaa remosga!

<sup>39</sup> Colyacheepac, paru gacbee baxhuaan xten yu' xhi or guidzujñ gubaan rolizjni, dini gusaan guxhalreni rolizjni te cuanreni xhixtenni.

<sup>40</sup> Nājza la'tu colsusin, sa'csi or ni ditu gun xhigab jiāädni, sidzujñ Xi'n Dios ni gujc Niguii.

*Te mos guijdx*  
(Mt. 24:45-51)

<sup>41</sup> Dxejc gunabdiidx Pedr lojni, rājpxani:

—Dad, ¿la lootisnu rujylu cuentre o la najcni par guiraa rebejn?

<sup>42</sup> Dxejc rājpx Jesús lojreni:

—¿Chuni'c najc mos hueen, mos nasin, ni rusannāj xlamni guiraa rexmosni te gudeedni xhi gaureni che gal oor, ā?

<sup>43</sup> Chichaa mosga palga laaca cayujñni che guibi' xlamni.

<sup>44</sup> Rniliāpac lojtu, lamga sudeed guiraa rexhixtenni te xcanāj mosgani.

<sup>45</sup> Per palga gun mosga xhigab nen lastooni: “Saclaa guibi' xlamā”, sas guislojni gusacsini resamosni, gunaa sigajc niguii, dxejc guisloj gauni, yāni, soozni;

<sup>46</sup> sibi' xlamni te dxej ni xhet cabājzdinini, or ni dini gun xhigab guidzujñni. Dxejc sii sudeedni te castigwro lojni, sutiājlni te duu dejtzni dxejc sinibeeni jini, guidxaagni rebejn ni di gusobdiajg diidx.

<sup>47</sup> Mosga ni najn xhini'c rlanj xlamni gac, luxh dini susin, dizani guzoob xtiidzni, sutiālduxhni duu dejtzni.

<sup>48</sup> Niluxh mos ni di gan xhi rlanj xlamni gac, ni'c rujñni redzuun ni di xlamni guidxagljaz gac, guxiiru castigw gacni. Reni rca' xhidajl, xhidajlza riāj gudeedreni; loj reni rca' yālrnibeduxh, xhiroobza siniabni lojni.

*Rlia' Jesús bejn lo sa'ni*  
(Mt. 10:34-36)

<sup>49</sup> Rājpxa Jesús:

—Narā biälā te gucuaguiā guedxliujre; imalaii alagusloj cayejčni!

<sup>50</sup> Niluxh nanab tedā te yālrobnis ni sāloj te trabajwduxh, ni'c cayuduxhā yārsia' cheni chale'lini.

<sup>51</sup> ¿La rujntu xhigab biälā te jiādnāā yālrbedxi loj guedxliuj, ā? Rniā lojtu, dini gac si'c. Alga biälā te guilia'ā bejn lo sa'reni.

<sup>52</sup> Silia' sa' te famil; loj gaireni, sidxe'ch choñreni loj tio'preni, luxh tio'preni sidxe'chza lo choñreni.

<sup>53</sup> Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retieimp*  
(Mt. 16:1-4; Mr. 8:11-13)

<sup>54</sup> Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguj.” Luxh riabni.

<sup>55</sup> Che rbi' bej nez lad danbägw, rniitu: “Sacnalaa nadxej”, luxh si'c rajcni.

<sup>56</sup> ¡Bejn ni rusguee! La'tu racbeetu xhi säloj reseen ni rien lo guedxliuj näjza xhaguibaa, ¿xhicuent ditu gan xhi säloj retieimp ni dxunnu naj, ä?

*Basiäj] diidx con rebejn ni rdxe'ch lojlu*  
(Mt. 5:25-26)

<sup>57</sup> Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni?

<sup>58</sup> Sa'csi palga yu' chuni'c chale'c xquejlu lo guxhtis, lañi sanäni luj ro jusgaad, basiäj] diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusaüreni luj nen latzguiib.

<sup>59</sup> Luxh rniä lojlu, dilu guirri ro'c hasta gusa'lu quiixlu guiraa lojreni.

## 13

*Colgusiejch lajztu te di guettu*

<sup>1</sup> Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios.

<sup>2</sup> Sas räjp Jesús lojreni:

—¿La rujntu xhigab si'c gusajc reben Galileega sa'csi najcrureni ben dojl lo rebejn lajdxreni?

<sup>3</sup> Narä rniä, dini gac si'c. Palga di'tu gusiechljaz sigajcza sejt guiragajctu.

<sup>4</sup> O xcuent guitzunchon rebejn nani gujt che gubixh te or ni laa Siloe yejcreni, ¿La rujntu xhigab najcrureni ben dojl lo rebejn ni rbäjz guedx Jerusalén, ä?

<sup>5</sup> Narä rniä, dini gac si'c. Palga di'tu gusiechljaz, sigajcza sejt guiragajctu.

*Xcuent te yag iigw*

<sup>6</sup> Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuini don la caj ninejxh lojni. Luxh xhet ninejxhdi bidxälni.

<sup>7</sup> Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj!

<sup>8</sup> Luxh xmosni räjp lojni: “Dad, basaanni steb ijz, guslää yuj ni'ni, gusälä abonni.

<sup>9</sup> Palga xcaj ninejxh lojni steb ijz, laaca, palga dini xcaj, dxejc guitinnuni.”

*Rusiajc Jesús te gunaa*

<sup>10</sup> Te dxej ni rusilajz rexpejn Israel caguluii Jesús nen te guidobäz.

<sup>11</sup> Ro'c suga' te nane' ni agujc tzunchon ijz racxhuuni. Bendxab caguscoodni, niluxh di gacdi suliini.

<sup>12</sup> Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

<sup>13</sup> Che basujni naani yejcn, lagajc dxejc gujc gusulii nane'ga. Dxejc guslojni calä'pni xpala'n Dios.

<sup>14</sup> Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajg gun bejn dzuun; nen redxejga sajg jiäädte te jiajctu, per na'c jiäädte dxej ni rusilajz rexpejn Israel.

<sup>15</sup> Dxejc badzu' Jesús diidxre, räjpni lojni:

—¡Ben rusguee! ¿La di chutis tejtü guxhec xconni o xpurni te chanänini yäni nis, mase najcni dxej ni rusilajz bejn, ä?

<sup>16</sup> Luxh nane're najc te xagdo to Abram, nani numbee Dios, ni agujc tzunchon ijz baliib bendxabni, ¿la digacdi guixecni lo xcälguijdxni mase najcni dxej ni rusilajz bejn, ä?

<sup>17</sup> Che gunii Jesús rediidxre, bianxujy rebejn ni rdxe'ch loj Jesús, luxh reben xhidaalga cabalazduxhrene sa'csi cayujn Dios redzunro nez lojreni.

*Xcuent bedz muxhtas*  
(Mt. 13:31-32; Mr. 4:30-32)

<sup>18</sup> Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj?

<sup>19</sup> Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xptiääzni loj rexhajcwni.

*Xcuent cojb ni rusaguij**(Mt. 13:33)*<sup>20</sup> Guniiza Jesús stehuält te gacheereni xho guire'ch rextidx Dios. Räjpnj lojreni:

—¿Xhicha cojn guntebloä xcälrnibee Dios?

<sup>21</sup> Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.*Dää rolä' cadre jiu'ni xhaguibaa**(Mt. 7:13-14, 21-23)*<sup>22</sup> Huinuu Jesús xnejzni sääni guedx Jerusalén. Lañni sadejdn reguejdx nájza rerench caguluiini rebejn.<sup>23</sup> Dxejc gunabdiidx te bejn lojni, räjpnj:

—Dad, ¿la guxii najc rebejn ni cañaa loj rextoljreni, ä?

Dxejc räjpnj lojreni:

<sup>24</sup> —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlanj jiu'reni ro'c, niluxh direni gun gaan.<sup>25</sup> Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä'”, dxejc laani sudzu'ni diidx, siniini: “Dina ganä caro siäädta.”<sup>26</sup> Dxejc guislojtu guiniitu: “Bidxunnänu, bidaunänu, bidunnänu luj, baseedlu nuurnu lo xnezyuunu.”<sup>27</sup> Dxejc siniini lojtu: “Rniliä lojtu, dipacnä gumbeä la'tu. Coljij guiraatu, beñlatsiaj.”<sup>28</sup> Dxejcti sonduxhtu, chubejli läjyту che fiitu abiu' toAbram, con toIsaac, con toJacob, nájza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu.<sup>29</sup> Dxejga sidzujñ xhidajl beñzajt ni siääd ladjiaa, ladjiaät, ladbäjägw, nájza ladbee, te jiu'reni lo xcälrnibee Dios xhaguibaa, ro'c sibejzarenj lo mex.<sup>30</sup> Luxh yu' reni rujntu xhigab guxii sajcreni naj, sacduxhrenj dxejc. Yu'za reni rchalotu sacduxh naj, xhet sajcdireni dxejc.*Jesús biin xcuent guedx Jerusalén**(Mt. 23:37-39)*<sup>31</sup> Lagajc dxejga, bidzujñ gaii refarisee, räjpreni lojni:

—Huij, biunejz ree, sa'csi Herodes rlanj ju'tlu.

<sup>32</sup> Dxejc laani badzu'ni diidxre lojreni, räjpnj:

—Gojz lo bäjzga, beñ rusguee: “¡Bahuii! cabää rebeñdxab lastoo rebejn, cagusiaca rebejn ni racxhuu nadxej nájza guixee, luxh huijdxli guluxä tztzunä.”

<sup>33</sup> Niluxh mase si'c gacni nanab chanaü xnezyuä nadxej nájza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxctis Jerusalén sajç guetni.<sup>34</sup> “¡Probe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhal Dios lojtu. Balti huält rlanzä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp.”<sup>35</sup> Bahuii xho bianxteb xquidootu. Ni'cni arnixgaä lojtu, dirutu fii loä cheni guidzujñli dxej ni guiniitu loä: “Chicbaa ni siääd xcuent Dios.”**14***Rusiajc Jesús te bejn ni guidxa guij*<sup>1</sup> Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús,<sup>2</sup> sa'csi nez loj Jesús suga' te dade' ni guidxa guij tiejxhni.<sup>3</sup> Dxejc gunabdiidx Jesús lo rebejn ni ruluii leiñ nájza lo refarisee, räjpnj lojreni:

—¿La sajç gusiajçni te beñracxhuu dxej ni rusilajz bejn o la di gacdiñi?

<sup>4</sup> Per laareni dxitis suga'reni, niäutis ro'reni. Dxejc cua' Jesús beñracxhuuga, basiajçnini, gunibeezani biunejçni.<sup>5</sup> Dxejc räjpnj loj refarisee:

—Chu la'tu ni rajp te bur o te gon, palga jiajbni nen te bisie, ¿la ditu chalägajçni mase najçni dxej ni rusilajz bejn, ä?

<sup>6</sup> Dxejc di niajçni nudzu'reni diidx lojni.*Reni bidon chää sa'*<sup>7</sup> Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, räjpnj:

<sup>8</sup> —Cheni guidon<sup>tu</sup> cháatu te sa', na'c guntu te cuetu cuä' rebenro, te di guidzuj<sup>n</sup> te benroru lojlu,

<sup>9</sup> dxejc jiääd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li.

<sup>10</sup> Maazru hueen, cheni guidon<sup>lu</sup> cháálu te sa', huicue lo mex ni zuj lo le' te che guidzuj<sup>n</sup> bejn ni cayujn lanij, naani lojlu: “Xamigwä, gudaa cuelu nen<sup>n</sup> yu' cadro rbej rebenro.” Si'c sä'p xpala'nlu nez loj guiraa rebejn ni sobganäjlu lo mex.

<sup>11</sup> Sa'csi ni rlanj chá'p xpala'n<sup>ni</sup> nez loj rebejn, sianxtujyni nez lojreni. Luxh bejn ni najc nadolajz, sä'p xpala'n<sup>ni</sup> nez loj guiraa rebejn.

<sup>12</sup> Räjpzani loj bejn ni cagudeed xhi gaureni:

—Cheni gunlu te lanij o guteedlu bejn lo xmexlu, na'c cuedextislu rexamigwlu con rebejtzlu, con resa'lu, niclaza rexpisn<sup>lu</sup> ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni.

<sup>13</sup> Che gunlu te lanij, alga gurejdx reben<sup>n</sup>proob, reben<sup>n</sup>coj, näjza reben<sup>n</sup>lotiä'p,

<sup>14</sup> dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal<sup>n</sup> dxej ni guibañsac rebejn loj reben<sup>n</sup>gut.

### *Xcuent te laniro*

<sup>15</sup> Che biejn diajg tej reni sobga' lo mex, räjpni loj Jesús:

—Chichaa rebejn ni gau yätxtiil cadro rnibee Dios.

<sup>16</sup> Dxejc räjp Jesús lojni:

—Guyu' te dade' ni bejn te laniro rolizni. Gunibeeni bidon<sup>n</sup> xhidajl bejn te jiädtaunäjreni.

<sup>17</sup> Che bidzuj<sup>n</sup> or<sup>n</sup> ni gaureni, baxhal<sup>n</sup> dade'ga te xmosni chatejdxni rebejn ni abidon<sup>n</sup>, räjpni lojreni: “Colchäj, asuchee lo mex.”

<sup>18</sup> Dxejc guiragajcreni gusloj cayäjb di gacdi cháäreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.”

<sup>19</sup> Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.”

<sup>20</sup> Steeni räjp: “Entis bachnaä ni'cni di gacdi jiälä.”

<sup>21</sup> Che gubi' mosga, badeedni diidx lo xlam<sup>n</sup>i xhi räjp rebejn<sup>n</sup>ga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä reben<sup>n</sup>proob, reben<sup>n</sup>coj, reben<sup>n</sup>lotiä'p, reben<sup>n</sup>natiujnc.”

<sup>22</sup> Si'c bejn mosga. Che gubi'ni räjpni lo xlam<sup>n</sup>i: “Dad, abenä si'c ni gunibeelu, luxh lajtru yagxhiil.”

<sup>23</sup> Dxejc räjp lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä.

<sup>24</sup> Rniliä lojtu, nicla tej reni bidon<sup>n</sup> ganid di gau xhuj nani benä.”

### *Ni nanab gunni te chanajlni Crist*

<sup>25</sup> La<sup>n</sup> sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

<sup>26</sup> —Palga yu' chu tej ni jiääd loä, ni di cuälaz xtadni, xnanni, cháäl<sup>n</sup>i, rexi'n<sup>ni</sup>, rebejtzn<sup>i</sup>, näjza rebisiajn<sup>ni</sup>, nägajcza xcäl<sup>n</sup>abajjn<sup>ni</sup>, di gacdi gacni te rexpənä.

<sup>27</sup> Palga yu' chutis tej ni di rlanj tedni trabajw te jiädnajlni narä, di gacdi gacni te rexpənäpac.

<sup>28</sup> Chu tejt<sup>n</sup> ni rlanj gun te yuro, ni di gunxgaa xhigab lacti meel chanä yu'ga, te guidon la sajc guluuxnini.

<sup>29</sup> Didi cheni abejn<sup>ni</sup> recimient, di gacdi guluuxnini, dxejc guiraa reni fii lojni suxhiznajreni,

<sup>30</sup> säjpreni: “¡Bahuilaa! Bejn<sup>n</sup>re gusloj bencheeni te yu' per di niajcdi nuluuxnini.”

<sup>31</sup> ¿Chu te rei<sup>n</sup> ni gun xhigab chachagdijlni stee rei<sup>n</sup>, ni di gunxgaa xhigab don laa sajc gunni gaan con tzuu mi<sup>n</sup> soldaad loj stee rei<sup>n</sup> ni siääd con gal<sup>n</sup> mi<sup>n</sup> soldaad, ä?

<sup>32</sup> Palga di gacdi gucuanäjnini, che gacbeeni zijlti siääd stee rei<sup>n</sup>iga, suxhal<sup>n</sup>i te xpejn<sup>n</sup>i chanab yäl<sup>n</sup>bedxi lojni.

<sup>33</sup> Ni'cni palga chutis tejt<sup>n</sup> di gusaan rehxixtenni te jiädnajlni narä, di gacdi gacni te rexpənäpac.

### *Che diru sejd gac nadzujy*

(Mt. 5:13; Mr. 9:50)

<sup>34</sup> Räjpzani:

—Huen najc sejd. Per cheni diruni gac nadzujy, ¿xho gacru gac nadzujyni?

<sup>35</sup> Xhetru sajcdini, nicla te cháäni loj yuj, niclaza te cháäni lo abon<sup>n</sup>. Gusäl<sup>n</sup>tis bejn sejdga. Reni rlanj gucuadiajg xtidxä, sucuadiagsacreni.

## 15

*Xcuent xiił ni gunijt  
(Mt. 18:10-14)*

<sup>1</sup> Guiraa reni rusquix impuest nájza rebendojł cabigreni loj Jesús, te cuadiajgreni rextiidxni.

<sup>2</sup> Refarisee nájza rebejn ni ruluii leił gusloj camojmreni, rájpreni:

—Bejnre rusaan rbig rebendojł lojni, luxh raunájzanireni.

<sup>3</sup> Dxejcti bij Jesús cuent ni ruluiire lojreni, rájpnı:

<sup>4</sup> —Chutejtu ni rajp tegayuı xiił, palga chanijtnı tejni, ıla dini gusaan stapbitzuubigaa rexiilni lo nıaa te chatiilni xile' ni gunijt, hasta guidxállinini, ä?

<sup>5</sup> Luxh che guidxállnıni sıbaduxh lajznı, dxejc sutzuubnıni ro xhajcwnı.

<sup>6</sup> Che guidzujnıni rolıjznı sutojpnı rexamiıgwnı nájza rexpısiıni te gábni lojreni: “Colguıbalaznáj narä sa'csi abıdxälä xile' ni gunijt.”

<sup>7</sup> Rniä lojtu, sigajcza su'ru yälrbalajz xhaguıbaa xcuent tejtis bejn ni guıbig lo Dios ni gusiechlajz xtojłni quela xcuent tapbitzubıgaa bejn ni di guıquıın gusiechlazreni xtojłreni.

*Xcuent meel ni gunijt*

<sup>8</sup> Rájpzani:

—Sigajcza te gunaa ni rajp tzuu meel, palga chasälıni tejni, ıla dini gusanıj te bajł te guloobni nen yu' hasta guidxállnıni, ä?

<sup>9</sup> Luxh che guidxállnıni, sutojpnı rexamiıgwnı nájza rexpısiıni, säjpnı lojreni: “Colguıbalaznáj narä sa'csi abıdxälä meel ni gunijt.”

<sup>10</sup> Rniäza lojtu, sigajcza sibalajz rexangł Dios xhaguıbaa xcuent te benđojł ni rusiechlazjznı.

*Te bejn ni baxuı te xi'nıni*

<sup>11</sup> Dxejc bıjza Jesús cuentre lojreni:

—Guyu' te dade' ni yu' tio'p xingaaıni.

<sup>12</sup> Dxejc xi'nıni ni najc huınruga, rájpnı lo xtadni: “Dad, baniıdx yälıasa'c nani nungäjł xca'a.” Sas badeed xtadni xerensni.

<sup>13</sup> Di nıaclaa, balsı dxej gudejd, chela bato' xınhuınnı guiraa xhıxtenni, dxejc säanı, bıdzujnıni te guedxzıjt. Ro'c baniıtnı guiraa xmeelni lo recosguıjdx.

<sup>14</sup> Che abaniıtnı guiraa xhıxtenni, bıääd te gubınduxh guedxzıjtga cadro yu'ni. Sas guslojzani calaaıni.

<sup>15</sup> Dxejc huıtilni dzuun lo te benđuejdxga. Baxhał bejnıgani te huıgajpnı cuch lo xyuj dade'ga.

<sup>16</sup> Luxh calanduxhni bejnıni xhıgab malaiı sajc gaıni recuaan ni najc sı'c lia ni cayajw recuch, niluxh rut badeeddi xhi nıajwnı.

<sup>17</sup> Lał ni cadejdnı trabajwga, bıanıj xcärejnnı bejnıni xhıgab, naanı: “Baltı rexmos xtadä rausa'c, ri'a'nru xhi gaureni. Luxh narä ree calanduxhä, ameerlı guetä.

<sup>18</sup> Guıbi'älis ladxä, rolıjz xtadä, gäpä lojni, Dad, banıtä lo Dios nájza lojlu.

<sup>19</sup> Diru nungäjł guırılää xi'nlu. Cua' narä sı'c te xmoslu.”

<sup>20</sup> Dxejc gunazgajcnı nejz te gubi'ni rolıjz xtadni.

<sup>21</sup> Chenı zıjtru sıäädni, bahuiı xtadni lojni. Dxejc balasajznıni, ruxuıłnıni, huıchaglojnıni, sas gudääznıni, bachagro'ni lojni.

<sup>22</sup> Dxejc rájp xi'nıni lojni: “Dad, abanıtä lo Dios nájza lojlu. Diru nungäjł guırılää xi'nlu.”

<sup>23</sup> Per rájp xtadni loj rexmosni: “Coltanä te ladsa'c, colshuajcwnıni xi'nä, colgusäl te nııl bicuenaanı, xcajza te gura'ch ni'ni.

<sup>24</sup> Coltanä te bıser ni guro' colgu'tnı. ¡Colsqıejn te guıdaıuunu, jıennu te lanıj!

<sup>25</sup> Sa'csi xi'näre abenä xhıgab gujtnı, luxh naj sı'cni agubansacni, gunıjtnı niluxh naj abıdxäjłni.” Dxejc guslojreni bejnreni te lanıj.

<sup>26</sup> ‘Lał ni cayajc dee, xıngangalooni cayujn dzuun lo nıaa. Che gubi'ni, sıäädzungajxhni rolıjznı, che bıejn diajgnı cayej rolıjznı, caguya'zarenı.

<sup>27</sup> Dxejctı gurejdxni te mos, gunabdııdxni lojni xhi cayajc royu'.

<sup>28</sup> Dxejc rájp mosga lojni: “Gubısaç bejtzlu, luxh xtadlu guııbee gujt te bıser guro' te gac lanıj sa'csi nadaanı gubi'ni.”

<sup>29</sup> Dxejc bıdx'e'ch xıngangalooni. Naadtıni jıu'ni rolıjznı. Che guçbee xtadni naadtıni jıu'ni, bıhuıı xtadnıni te gunabni jıu'gani.

<sup>30</sup> Dxejc rájpnı lo xtadni: “¡Bahuiılaare! Agujc xchej cayunä dzuun lojlu, luxh rusobdıagä guiraa xtiıdxlu, per nıcla tej huält gajdlu gunııdx nıcla te dxıbe' loä te gunä te lanıj çon rexamiıgwä.

<sup>30</sup> Luxh naj ni abidzujñ xi'n'lure, ni banijt xmeellu con regunadxab, xhoxh bagu'tlu te biser guro' te cayujñlu xlanijni."

<sup>31</sup> Dxejc räjp xtdadni lojni: "Xi'nä, sugagajclu loä, luxh guiraa ni rapä najc xtenlu.

<sup>32</sup> Niluxh naj riäjpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni."

## 16

### *Xcuent te ni rnibee loj remos*

<sup>1</sup> Dxejc cayujyza Jesús stee cuent loj rexpejn pacni, räjpni:

—Guyu' te benrajp ni guyu' lojni te ni rnibee loj rexmosni. Dxejc biääd reni badeedreni didix lojni, räjpreni: "Bejn ni rnibee loj rexmoslu xhetlaadi cayujñni cagunijtni rexhixtenlu."

<sup>2</sup> Dxejcti gurejdx xlamnini, räjpni lojni: "Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä."

<sup>3</sup> Dxejc bejnga bejn xhigab: "Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn.

<sup>4</sup> Ananä xhini'c gunä te dzunbäz, sibejdx rexamigwä narä rolizjreni."

<sup>5</sup> Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzuxgaa: "Lac nazääblu lo xlamä?"

<sup>6</sup> Dxejc räjpni: "Nazäbä si'c te gayuu baril se't." Dxejc räjpni lojni: "Basquejn, cua' guijtze, bacuaa tiubitzuutis baril nazääblu lojni."

<sup>7</sup> Dxejc gunabdiidxni loj steeni, räjpni: "Luj a'? Lac nazääblu lo xlamä?" Dxejc räjpni lojni: "Te gayuu dximro triuu." Dxejc räjpzani: "Aree xquijtzlu; bacuaa tajtis dximro."

<sup>8</sup> Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzruren lo rextzuunreni con sa'reni loj rebejn ni arumbee xtidx Dios.

<sup>9</sup> Rniä lojtu, colquuil rexamiügwu con reyäl'nasa'c ni räjpju loj guedxliujre, te che abaraj xhixtentu, sica' Diostu xhaguibaa cadro yu' rolizju par tejpas.

<sup>10</sup> Renani runsa'c dzuun lo te dzunbäz, sajca gansa'cni dzuun lo te dzunro, luxh reni di gacdi gansa'c dzuun lo te dzunbäz, di gacdiza gansa'cni dzuun lo te dzunro.

<sup>11</sup> Ni'cni palga xhetlaadi cuaräl'näjtu reyäl'nasa'c xten guedxliuj, xho guniidx Dios reyäl'nasa'c xtenni lojtu!

<sup>12</sup> Palga xhetlaadi cuaräl'näjtu xhixten bejn, xchu guniidx lojtu ni gac xtenpactu, ä?

<sup>13</sup> Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajpacni xtidx tejni, sibälazni steeni. Di gacdi gun bejn xtzun Dios laj ni sanälajzismi xcäl'nasa'cni.

<sup>14</sup> Mbaj naj, refarisee, sa'csi rchaglazduxhrene meel, cacuadiagdzu'tzreni xtiidxni, dxejc caguxhisnäjreni Jesús.

<sup>15</sup> Dxejcti räjp Jesús lojreni:

—La'tu najctu bejn ni ruhuii rebejn lojtu, naareni bensacduxhtu, niluxh acanajn Dios xhi xhigab rujntu nen lastootu. Sa'csi guiraa ni rchalajt najc yäl'nasacduxh, guiraa ni'c rbixhlajz Diosni.

### *Xleii Moisés con xcäl'rnibee Dios*

<sup>16</sup> Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcäl'rnibee Dios, ni'cni xhidajl bejn cagusutijp lajzni te jiu'reni loj yäl'rnibeega.

<sup>17</sup> Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

### *Rului Jesús xcuent ruro'n sa' bejn*

(Mt. 19:1-12; Mr. 10:1-12)

<sup>18</sup> Räjpzani:

—Palga guro'n te bejn chääl'ni, dxejc guchnaani stee gunaa, rujnni dojl, luxh nani ruchnaa te gunaa ni abaro'n chääl'ni, niguiiga rujnzani dojl.

### *Te benrajp näjza Lázaro*

<sup>19</sup> Räjpzani:

—Guyu' te benrajp ni rchaglajz rajcwni ganax reladsacduxh, luxh guixe-guixee rujnni laniro.

<sup>20</sup> Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni.

<sup>21</sup> Rlajzni maläii xho gunni gauni nani rtejb loj xmex beñrajpğa, luxh direni gusaan. Dxejc rebä'cw siääd rileyj loj reguejdx ni rgaadz ni guidxa tiejxhni.

<sup>22</sup> Guyu'ti te dxej gujt beñproobğa, biädläs rexangl Dios xaimni, huinärenini cadro yu' Abram xhaguibaa. Dxejcti näjza beñrajpğa gujt, huicua'tztirenini.

<sup>23</sup> Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro.

<sup>24</sup> Dxejcti guredxaduxh beñrajpğa, räjpni lo Abram: “ıxtadä Abram! Balazlaj narä, baxhał Lázaro guhuajdxni yejc bicueñaani nis te gusiälyujni luxkä, sa'csi ree cadedä trabajwduxh lo guiboo.”

<sup>25</sup> Luxh räjp Abram lojni: “Xi'nä, basaa lajzlu che gubajñlu lo guedxliuj gojplu guira'ti xhixtenlu, luxh sigajcza Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.”

<sup>26</sup> Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.”

<sup>27</sup> Dxejcti räjp beñrajpğa lojni: “Rniabduxhä lojlu, xtdä, baxhałlaa Lázaro chääni rolizj xtdä,

<sup>28</sup> sa'csi ro'c yu' gaii betzä, te chalijdxni laareni, te gusiechlazjreni, te di näjza laareni jäädreni ree cadro redej bejn trabajwduxh.”

<sup>29</sup> Dxejc räjp Abram lojni: “Arajpreni guijtz cadro caj xleii Moisés näjza xtidx redade' ni gunii xtidx Dios, sugusobdiajgřeni rediidxga.”

<sup>30</sup> Luxh beñrajpğa badzu' diidxre, räjpni lojni: “Gulii dad Abram, per palga chäs te bejn loj rebengut, chaniı lojreni, dxejc sii pet susiechlazjreni.”

<sup>31</sup> Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibañsac loj rebengut.”

## 17

### *Riesgw jiajbni lo dojl*

(Mt. 18:6-7, 21-22; Mr. 9:42)

<sup>1</sup> Räjp Jesús loj rexpejn pacni:

—Siääd pac recos ni gun jiajb bejn lo dojl. Proobza bejn ni rujn riabj bejn lo dojl.

<sup>2</sup> Maaz gulii bni te guij xten molin guejnı, gusał bejnı lo nisdoo cadro jäätro quela gunni jiajb rexi'nä ni ahuililajz xtidxä.

<sup>3</sup> ıColşusın!

‘Palga gun bejtzlu dojl lojlu, baliidxni. Palga gusiechlazjni, basiäjł diidx con laani.

<sup>4</sup> Masque gajdz huält neñ teb dxej gunni dojl lojlu, palga jäädniini lojlu gajdz huält, naani: “Xhet laadi benä, basiäjł lajzlu”, basiäjł lajz con laani.

### *Bastioob xcärlililaznu*

<sup>5</sup> Gunii rexpejn pacni lo Jesús, räjpreni:

—Dad, baniidxru yälřilililajz loonu.

<sup>6</sup> Dxejc räjp Jesús lojreni:

—Palga rajptu yälřilililajz, mase najcni si'cti te bedzböz xten muxhtas, sajcz gäbtu lo yagro rec: “Biliädxä' ro'c, guzuj galäii nisdoo”, susobdiajg yajgga xtiidxtu.

### *Ni riäjł gun te mos*

<sup>7</sup> Räjpznı:

—ıChu tejtı ni rajp te mos ni riga'n o ni rigajp rexquidxaani ni gäbni lojni che guibi'ni lo nia: “Biu'ga, gurej lo mex te gaulu”?

<sup>8</sup> Dini gäb si'c. Niluxh säjpni lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajcz gauzalu, yäzalu.”

<sup>9</sup> Dini gudeed xquixtıos lo mosga sa'csi rujnıni recos ni gunibeeni sa'csi si'c riäjł gunni.

<sup>10</sup> Sigajcza la'tu, che luux guntu guiraa redzuun ni guniä guntu, riäjł guiniitu lo Dios: “Najcnu mos ni xhet sajcdi, nani riäjł jıennu, ni'ctis biennu.”

### *Bastajc Jesús tzuu bejn ni rał tiejxhřeni*

<sup>11</sup> Lał ni sasaj Jesús nez guedx Jerusalén, gudejdni loj región Samaria näjza región Galilee.

<sup>12</sup> Che biu'ni tej reguejdxga, huichagloj Jesús tzuu bejn ni rajcz te yälřıuijdx ni rał tiejxhřeni, niluxh zijtru guzujreni.

<sup>13</sup> Dxejc rbedxa'reni räjpreni:

—Jesús, Dad, Mastr, balaslajz nuurnu.

<sup>14</sup> Che bahuii Jesús lojreni, räjpni lojreni:

—Colchäj, te fıi rebixhojz abiajctı.

Lał ni sääreni, bia tiejxhřeni.

<sup>15</sup> Dxejc tejreni, che bahuiini abiajčni, gubiguxuñni, cabedxa'ni calä'pni xpala'n Dios.

<sup>16</sup> Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te beñzajt, te beñ Samaria.

<sup>17</sup> Dxejcti räjp Jesús lojni:

—¿La et tzuudi najc reni biajc, ä? ¿Con sgaareni?

<sup>18</sup> ¿La rutru gubi'di loä te guiliä'preni xpala'n Dios, xtebtis beñzajt, ä?

<sup>19</sup> Dxejc räjp Jesús loj bejnre:

—¡Huisulii, huij! Abiajclu sa'csi huililajzlu.

*Xho guidzujñ xcäl'rnibee Dios*

(Mt. 24:23-28, 36-41)

<sup>20</sup> Dxejc, sa'csi agunabdiidx refarisee loj Jesús guc guidzujñ xcäl'rnibee Dios, badzu'ni diidxre, räjpni lojreni:

—Di xcäl'rnibee Dios guidzujñ con seen ni sajc fiitu.

<sup>21</sup> Diza bejn naa: “Bahuii, aniree”, o “Anirec”, sa'csi abidzujñ xcäl'rnibee Dios lojtu.

<sup>22</sup> Dxejc räjp Jesús lo rexpeñpacni:

—Sidzujñ dxej rlaizgatu fiitu te dxej sa' ni chu che jädsac Xi'n Dios ni gujc Niguui, luxh ditu fiini.

<sup>23</sup> Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii.

<sup>24</sup> Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jäälä narä, Xi'n Dios ni gujc Niguui, che gal dxej guibi'ä.

<sup>25</sup> Luxh ganiddoo sidedä trabajwduxh, sa'csi sibälaz reben guedxliuj ni tre'ñaj narä.

<sup>26</sup> Si'cni gujc neñ redxej cheni gubajñ toNoé, si'cza gac neñ redxej che jäälä narä, Xi'n Dios ni gujc Niguui.

<sup>27</sup> Neñ redxej ni gubajñ toNoé gudajwreni, gu'reni, bachñaareni, badeedzareni xindxa'preni guchñaaj bejn, bidzujñli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa rebeñ dojl, guzääbreni lo nis.

<sup>28</sup> Sigajcza gujc neñ redxej ni gubajñ toLo't: gudajwreni, gu'reni, gusiireni, bato'reni, gule'creni binij, bencheezareni rolizreni.

<sup>29</sup> Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebeñ dojl, huejcreni.

<sup>30</sup> Sigajcza gac neñ redxej cheni jäälä narä, Xi'n Dios ni gujc Niguui.

<sup>31</sup> Dxejga, palga yu' chu niä'p yejc yu', diru gal'di jäjtni te chalääni rehxixtenni ni yuchee nen yu'; palga yu' chu suga' nezjäät, di gal'diruni guibi'ni rolizjni.

<sup>32</sup> Colgusnaj lajztu xhi gujc chää'l toLo't.

<sup>33</sup> Ni rlaiz ga'p xcäl'nabajñni lo guedxliujre, sunijtnini, nani gunijt xcäl'nabajñni lo guedxliujre xcuent rextidxä, xcäl'nabajñni räjpni xhaguibaa.

<sup>34</sup> Rniä lojtu, guxhijnga ni jäälä lo tio'p reni naga' lo te da', chää tejni, steeni jia'n.

<sup>35</sup> Lo tio'p gunaa ni cayo't, chää tejni, steeni jia'n.

<sup>36</sup> Lo tio'p bejn ni yu' lo niaa, chää tejni, steeni jia'n.

<sup>37</sup> Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

## 18

*Xcuent te gunabiuud con te juejz*

<sup>1</sup> Bijza Jesús te cuent ni ruluii lojreni, te guiseedreni xho riajl cuedx-guiniabreni lo Dios lacuaa gac-huin lajzreni,

<sup>2</sup> räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn.

<sup>3</sup> Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni.

<sup>4</sup> Balti dxej naadti juejzga gun yälguxhtisga. Dxejcti bejnni xhigab, naani: “Mase dina guidxebä Dios, dizana jiuä rebejn,

<sup>5</sup> sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädguiseedni narä.”

<sup>6</sup> Dxejc räjp Jesús lojreni:

—Riejn diajgtu xtidx juejzgujdxga,

<sup>7</sup> Naj ¿xho di Dios, ni najc hueen, gcuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni.



<sup>8</sup> Ni'cni rniä lojtu, sungajcni yälguختis par laareni. Luxh che guibi' Xi'n Dios ni gujc Niguii, çla sidxälni bejn ni rililajz xtiidxni lo guedxliuj?

*Xcuent te farisee con te ni rusquijx impuest*

<sup>9</sup> Bij Jesús stee cuent ni ruluü loj rebejn ni rluüsi najc beñsa'c, ni rchalo xhet sajcdi resabejnreni. Räjpnj:

<sup>10</sup> —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest.

<sup>11</sup> Suli fariseega laļ ni canabni lo Dios, räjpnj: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc beñdojļ, dizana gacä si'c najc bejnre ni rusquijx impuest.

<sup>12</sup> Rucua'nä tio'p huält nen te xmaan, luxh rudedä te tzuu lo te beex loj guiraa ni runä gaan.”

<sup>13</sup> Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälnaatisni lastooni, caniini lo Dios, räjpnj: “Dad, Dios, įbalasajz narä, nacä te beñdojļ!”

<sup>14</sup> Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextojļni, niluxh di Dios nudzucaj rextojļ beñ farisee. Sa'csi guiraa rebejn ni rlajz guiliä'p lagajc xpala'nni, susanxtiujy Diosreni, dxejc reni di rlajz guiliä'p lagajc xpala'nreni, siliä'p Dios xpala'nreni.

*Benle' Jesús yejc rebixbäz*  
(Mt. 19:13-15; Mr. 10:13-16)

<sup>15</sup> Yu'reni siädnä rexpixbäzreni loj Jesús te guzujni naani yejcreni. Che bahuii rexpajnpacni si'c, gusloj cadilidixreni con rebejn te na'c įiädnäreni rebixue'.

<sup>16</sup> Dxejc gurejdx Jesúsreni, räjpnj lojreni:  
—Colgusaan įiäd rebixue' loä, na'c gudxoįntureni, sa'csi xcälrnibee Dios najc xten reni najc nadolajz si'c rebixbäze're.

<sup>17</sup> Rniliäpac lojtu, chutis ni rlajz jiu' lo xcälrnibee Dios nanab gusobdiajgreni xtidx Dios si'c rusobdiaj rebixue' xtidx xtadreni. Palga dini gun si'c, dini jiu' lo xcälrnibee Dios.

*Te bi'n ni rajp xhidajļ xhixtenni*  
(Mt. 19:16-30; Mr. 10:17-31)

<sup>18</sup> Te bi'n ni rnibee gunabdiidx loj Jesús, räjpnj:  
—Dad, mastrsa'c, çxhini'c nanab gunä te xca'ä yälñabajn par tejpas?

<sup>19</sup> Dxejc räjpn Jesús lojni:  
—Çxhicuent rniilu narä: “Mastrsa'c”? Rutru najcdi beñsa'c, xtebtis Dios.  
<sup>20</sup> Anajnlx xho najc remandamient ni caj lo xleii Moisés: “Na'c guesnäjlu gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtadlu, xnanlu, bahuiizareni.”

<sup>21</sup> Dxejc räjpn bi'nga lojni:  
—Guiraa remandamientre rusobä cheni gucäli biuux.  
<sup>22</sup> Che biejn diajg Jesús xtiidxni, räjpnj lojni:  
—Tejtis cayäädx gunlu. Bato' guiraa rehxixtenlu, gudisni loj rebejn ni xhet rajpdi dxejc sajplu xcälñasa'clu xhaguibaa. Dxejc gudanajļ narä.

<sup>23</sup> Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh.  
<sup>24</sup> Dxejc rdxelojtis Jesús lojni, guc-huinza lajzni räjpnj:  
—Naganduxh jiu' rebenrajp lo xcälrnibee Dios.

<sup>25</sup> Guyasiru ted te cameii ni' te guux lo ni jiu' rebenrajp lo xcälrnibee Dios.  
<sup>26</sup> Reni biejn diajgni rediidxre, räjpreni:  
—Çchuxhni'c sajç laa lo dojļ, palga si'c najcni?

<sup>27</sup> Dxejc räjpn Jesús lojreni:  
—Guira'ti ni di gacdi gun rebejn, guyasi rajc rujn Diosni.

<sup>28</sup> Dxejc räjpn Pedr lojni:  
—Dad, nuurnu abasa'nnu guiraa rehxixtenu te siopnalnu luj.

<sup>29</sup> Dxejc badzu' Jesús diidxre lojni, räjpnj:  
—Rniliäpac lojtu, chutis ni gusaan rolijzni näjza rexcuzajnni, rebejtzni, chäällni, xi'nni xcuent xcälrnibee Dios,

<sup>30</sup> sica'ni xhiroobru lo guedxliujre, luxh sica'ni yälñabajn par tejpas.

*Rusule' Jesús stehuält xho guetni*  
(Mt. 20:17-19; Mr. 10:32-34)

<sup>31</sup> Gurejdx Jesús rexpajnpacni te laad, te räjpnj lojreni:  
—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii.

<sup>32</sup> Sutedrenini ladz<sup>n</sup>aa rebenzijt, suxhiznäjrenini, susacsřrenini, sutiobxhejnłreni lojni,  
<sup>33</sup> luxh che luxh quineneni, dxejc sugu'trenini, luxh ni riojn dxej sibansacni loj rebenğut.  
<sup>34</sup> Dxejc laareni direni niacbee rediıdxre, dizareni gan xhini'c caniini, sa'csi najcreni diıdx ni di gacdi gacbeereni.

*Rusiajc Jesúš te beñ lotiä'p*  
 (Mt. 20:29-34; Mr. 10:46-52)

<sup>35</sup> Cheni sadzujñ Jesúš te guejdx ni laa Jericó, sobga' te beñ lotiä'p ro' nezyuj, canabni gojn.  
<sup>36</sup> Che bejn diajgni cadejd xhidajł bejn lo nezyujga, gunabdiıdx beñ lotiä'pga xhini'c cayajc.

<sup>37</sup> Dxejc räjpreni:

—Jesúš ni siääd Nazare't cadejdni nezga.

<sup>38</sup> Dxejc guredxa'ni räjpreni:

—Jesúš, xi'n toDavid, balaslajz narä!

<sup>39</sup> Rebejn ni nijd lojreni gudılñäjreni beñ lotiä'pga te jiäu ro'ni, niluxh laani dipru guredxa'ni, räjpreni:

—Ji'xi'n toDavid, balaslajz narä!

<sup>40</sup> Dxejc guzudxi Jesúš ro'c, gunibeeni jiädñäreni bejnğa lojni. Che bidzujñni lojni, gunabdiıdx Jesúš lojni, räjpreni:

<sup>41</sup> —¿Xhini'c rıajlzlu gunnäå luj?

Badzu' beñ lotiä'pga diıdxre, räjpreni:

—Dad, rıazä jien loä.

<sup>42</sup> Dxejc räjpre Jesúš lojni:

—Jıujien balojlu! Abıajc lu sa'csi huıllıajzlu.

<sup>43</sup> Lagajc dxej, biengajc lojni, calä'pni xpala'n Dios, huınajłni Jesúš. Luxh guıraa rebejn ni bahuii xhi guzajcni, gulä'pzareni xpala'n Dios.

## 19

*Huij Jesúš rolıjz te bejn ni laa Zaqueo*

<sup>1</sup> Dxejc biu' Jesúš guedx Jericó, sadejdzani guejdxga.

<sup>2</sup> Ro'c rbäjz te benrapduxh, ni laa Zaqueo, ni rııbee lo reni rusquıjx xcuent impuest.

<sup>3</sup> Rıajz Zaqueo fiini loj Jesúš te gumbeenini, per digacdi fiini lojni sa'csi najcni te beñxhate', luxh xhidajł bejn siädsaj guideb gabi Jesúš.

<sup>4</sup> Ni'c baxunni gunıjđni lojreni, huä'pni lo te yajgro ni suga' gajxh nez cadro ted Jesúš te si'c sajc fiini loj Jesúš.

<sup>5</sup> Che gudejd Jesúš nejzga, guläsni lojni jıaa, bahuiini cadro sobga' bejnre. Dxejc räjpreni lojni:

—Zaqueo, basquejn biäjł ro'c, lagajc nadxej rıazä chajia'nä rolıjzlu.

<sup>6</sup> Dxejcti biätguxun Zaqueo lo yajgga, rbalazduxhni huınäni Jesúš rolıjzni.

<sup>7</sup> Che bahuii guıraa rebejn xhi gujc, gusloj camojmreni, direni jıulajz, räjpreni:

—Jesúš saıia'n rolıjz te beñdojl.

<sup>8</sup> Dxejcti huısulii Zaqueo, räjpreni loj Jesúš:

—Bahuiılaare, Dad, gala' xhıxtenä gudedä loj rebenproob; luxh palga yu' chu loj cua'ä xhıxtenni con yäırusguee, sudzu'ä lojni tajp huält si'cti ni cua'ä.

<sup>9</sup> Räjpre Jesúš lojni:

—Lagajc nadxej gubıcaj xtojłlu näjza xtojł reni rbäjz rolıjzlu, sa'csi guliıpac najclu te xagđoo toAbram.

<sup>10</sup> Pues Xi'n Dios ni gujc Nıguıi biädııl rebendojl te guslaani rebejnğa ni gunıjł neñ dojl.

*Xcuent tzuu meel*

<sup>11</sup> Lał ni cagucuadıajgreni xtidx Jesúš, bıjzani te cuent ni ruluii, sa'csi asiädđzujñgajxhreni guedx Jerusalén, luxh laareni rujñreni xhıgab sısloj guıııbee Jesúš si'ctisni guidzujñni guejdxga.

<sup>12</sup> Dxejc räjpreni lojreni:

—Guyu' te bejn, benrajpreni, huijni te guejdx zijtro te gacni řeiı, dxejc guıııbisacni.

<sup>13</sup> Che gajđni guırii, gurejdxni tzuu xmosni, te badeedni lo tebgajreni te melpla't ni sacduxh, räjpreni lojreni: “Colıujñ dzuun con meelre che guıııbisacäli.” Sä'tini.

<sup>14</sup> Per reben lajdxni dipacreni guıchagıajz bejnğa, ni'c baxhalreni gaııı bejn te saye'tzreni: “Di rıajzđinu gacni xreiınu.”

<sup>15</sup> Luxh empac gujıcni řeiı, dxejc guıııbisacni lajdxni. Che bidzujñni gurejdxni rexmosni ni badeedni meel cua'reni, te gacbeeni lac bejn teıjgareni gaan.

<sup>16</sup> Ni bidzujñ ganıđ räjpreni lojni: “Dad, xmeellu bejn gaan stzuu meel.”

<sup>17</sup> Dxejc räjp rei lojni: “Hueenca, luj najclu te mossac, sa'csi laaca bejnlu dzuun lo te dzunbáz, naj sunidxá guinibeelu loj tzuu guejdx.”

<sup>18</sup> Bidzujñ stee mos lojni, räjpni: “Dad, xmeellu bejn gaan gatii meel.”

<sup>19</sup> Dxejcti räjpni lojni: “Luj guinibeelu loj gatii guejdx.”

<sup>20</sup> Bidzujñti stee mos lojni, räjpni: “Dad, aree xmeellu, guluchedzu'tzäni nen te baii sa'csi bidxebä guejblu, sa'csi najc guejblu te beñ nadiplajz, rutojñ guejblu cadro di guejblu nuzuj, luxh rliäs guejblu cose'ch cadro di guejblu nibe'c.”

<sup>22</sup> Dxejcti räjp rei lojni: “¡Mosguijdx! lagajc ro'lu birii diidx ni gunälu yälguختis. Palga najnlu nacä te beñ nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä,

<sup>23</sup> ¿xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?”

<sup>24</sup> Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.”

<sup>25</sup> Laareni räjpni: “Dad, per laani arajpni tzuu meel.”

<sup>26</sup> Dxejc badzu' rei diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbáz ni rajpni.

<sup>27</sup> Luxh xcuent reni rdxe'ch loä, ni di rrajz niacä rei lojreni, coltanäreni ree, colgugu'treni nez loä.”

*Che biu' Jesús guedx Jerusalén*

(Mt. 21:1-11; Mr. 11:1-11; Jn. 12:12-19)

<sup>28</sup> Che gulujx guniini guiraa rediidxre, huinuuni xnejzni, sääni nez lo guejdx Jerusalén.

<sup>29</sup> Che asadzungaxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejn pacni,

<sup>30</sup> räjpni lojreni:

— Colchäj lo guejdx' ni suga' lad rec. Che guidzujñtu, guidxälту caduu te bur huin ni gajd bejn cuib. Colguxhectni, coltanäni ree.

<sup>31</sup> Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

<sup>32</sup> Sä'ti rexpejn pacni nani baxhalni, bidxälreni manga sigajctisni räjp Jesús.

<sup>33</sup> Cheni caguxhecteni bure'ga, rexpaxhuaan bure'ga räjp lojreni:

— ¿Xhicuent caguxhectuni bure'ga, ä?

<sup>34</sup> Dxejc badzu' reni diidxre, räjpni:

— Sa'csi caquiin Dadni.

<sup>35</sup> Sas huinäreni bure'ga loj Jesús, gudixhreni xhajbreni dejtzni, te gubijb Jesúsni.

<sup>36</sup> Guideb cadro gudejd Jesús gudixhreni xhajbreni lo nezyuj cadro tedni.

<sup>37</sup> Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnni.

<sup>38</sup> Räjpni:

Chicbaa rei ni siääd xcuent Xdadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

<sup>39</sup> Dxejc gatii refarisee ni suga' galäii rebejn, räjpni loj Jesús:

— Mastr, guididxa' lo rebejn ni siädnajllu te na'cru guiniireni si'c.

<sup>40</sup> Dxejc Jesús räjp lojreni:

— Rniliä lojtu, palga redee gusa'u ro'reni, sibedxa' reguijre.

<sup>41</sup> Che bidzujñni gajxh, che bahuiini guedx Jerusalén, biin Jesús xcuent guejdxga,

<sup>42</sup> räjpni:

— ¡Maläii gacbeelu, masque nen redxrejre, xhini'c sajc guniidx yälrbexdilajz lojlu! Per naj naga'tzni, luxh digacdi fiilu lojni.

<sup>43</sup> Sidzujñ dxejga lojlu, cheni jiääd reni rdxe'ch lojlu sujñreni si'c te guralyuj guideb gabilu, nez lojlu sigajc nez dejtzlu sisiujreni.

<sup>44</sup> Susälta' reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuiilu.

*Rusia Jesús nen guidoro*

(Mt. 21:12-17; Mr. 11:15-19; Jn. 2:13-22)

<sup>45</sup> Dxejcti biu' Jesús nen guidoro, guslojni cabääni rebejn ni caguto' näjza reni casii.

<sup>46</sup> Dxejc räjpni lojreni:

— Loj rexquijtз Dios caj rediidxre: “Rolizä sajc te yu' cadro jiädnabtu lo Dios”, niluxh la'tu abejntuni si'c te biliää xte gubaan.

<sup>47</sup> Guixe-guixee cagului Jesús nen guidoro, luxh reni rnibee loj rebixhojz näjza rebejn ni ruluii lei, näjza rebengool xte guejdxga caguilreni mood te ju'trenini,

<sup>48</sup> luxh direni nidxäjл xho niujñrenini sa'csi guiraa rebejn cacuadiagdzu'tzreni xtiidxni.

## 20

*Xcälrmibee Jesús**(Mt. 21:23-27; Mr. 11:27-33)*

<sup>1</sup> Te dxej suga' Jesús nen guidoro, caguluiini rebejn, cagusule'zani diidx xcuent xho guibicaj xtojreni, che bidzujn reni rnibee loj rebixhojz näjza rebejn ni ruluii leii näjza rebengool,

<sup>2</sup> räjpreni lojni:

—¿Xhi yälrmibee rujnlu recosre? ¿Chu baniidx yälrmibeega lojlu?

<sup>3</sup> Dxejcti räjp Jesús lojreni:

—Nará sigajcza gunä te yälgunabdiidx lojtu, colgudzu' diidxre loä,

<sup>4</sup> ¿chuni'c baxhal Juan te gutiobnisni rebejn? ¿La Dios o la rebejn, ä?

<sup>5</sup> Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?”

<sup>6</sup> Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

<sup>7</sup> Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

<sup>8</sup> Dxejc räjp Jesús lojreni:

—Dizana guiniä xhi yälrmibee rapä te runä recosre.

*Xcuent remsguijdx**(Mt. 21:33-44; Mr. 12:1-11)*

<sup>9</sup> Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gatii bejn chääreni meed, sa'tnini zijt, gucladuxhni ro'c.

<sup>10</sup> Che bidzujn dxej ni guidojpc cose'ch, baxhalni te xmosni sanab cose'ch ni riäj' xca'ni. Per laareni gudijnreni mosga, xhetliidi badeedreni chanäni lo xpaxhuaan yujga.

<sup>11</sup> Dxejcti baxhalni stee mos lojreni. Dxejc sigajcza gudilnäjrenini, gudijnrenini, luxh xhetza badeeddireni lojni, ganaxni gubi'ni lo xlamni.

<sup>12</sup> Dxejcti baxhalni ni riojn mos lojreni, per sigajcza gudinduxhrenini, barilaagwrenini.

<sup>13</sup> Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.”

<sup>14</sup> Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gacxtenni reyujre. Do'o guigu'tnuni te nuurnu xca'nu yujre gacni xtenuu.”

<sup>15</sup> Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnä xpaxhuaan yujga reben guijdxre, ä?

<sup>16</sup> Sidzujnni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgrenti rediidxre, räjpreni:

—¡Na'c gusaan Dios gacni si'c!

<sup>17</sup> Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

<sup>18</sup> Chutis ni jiajb yejc guijga, sianduxhni, per nani jiajb guijga yejcti siujypacni, li däj gacni.

*Xcuent reimpuest**(Mt. 21:45-46; 22:15-22; Mr. 12:12-17)*

<sup>19</sup> Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi guchbeereni lojreni gunii Jesús cuentre, luxh xhet bejndireni sa'csi rdxejbrene rebejn.

<sup>20</sup> Dxejc cagula'tztisrenini, baxhalreni gatii bejn te gunsireni si'c ni najcreni bendxan, te gucua diajgrenti xtiidxni don gaxäjssi guiga'ni lo te diidx te gutedrenini lo yälguxhtis, yälrmibee xte gubernadoor.

<sup>21</sup> Dxejc gunabdiidxreni lojni, räjpreni:

—Dad, Mastr, nadonnu laaca rñii guejblu, laaca ruluii guejblu, luxh di guejblu fixgaa la yu' chu najc bejn, ruluisa'c guejblu xnez lo Dios.

<sup>22</sup> Gunilaa loonu, ¿la laaca guidiixnu reimpuest loj xcubieer César o la xhet laadini, ä?

<sup>23</sup> Sas guchbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree?

<sup>24</sup> Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

<sup>25</sup> Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

<sup>26</sup> Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

*Rniabdiidxreni xcuent yälr̥bansac lo rebengut*

(Mt. 22:23-33; Mr. 12:18-27)

<sup>27</sup> Dxejc huij gaii resaduceos huihuiireni loj Jesús. Di resaduceos chalilajz r̥bansac bejn lo rebengut. Ni'cni gunabdiidxreni loj Jesús,

<sup>28</sup> räjpreni:

—Dad, Mastr, basa'n Moisés guijtz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.”

<sup>29</sup> Guyu' gajdz niguii, bejtz najczeni. Sas cua' niguigalooğa chäälni. Che gujtni ruti xi'nni.

<sup>30</sup> Dxejcti cua' ni rojpağa gunaaga. Che gujtni, rutiza xi'nni.

<sup>31</sup> Sigajcza guzajc ni riojnga. Si'cza gulásnäj gunaaga guigajdzreni. Guiraareni gujt, nicla tejreni di xi'nreni niu'.

<sup>32</sup> Dxejcti näj gunaaga gujt.

<sup>33</sup> Guigajdzreni gulásnäjreni gunaare, ni'cni, che guibansaceni lo rebengut, ¿chu chäälgacni, ä?

<sup>34</sup> Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxä'preni ruchnaa.

<sup>35</sup> Niluxh rebejn ni agule Dios te chääreni xhaguibaa, näjza te guibansaceni lo rebengut, di reni'c guchnaa, dizaren i gudeed xindxä'preni guchnaa,

<sup>36</sup> sa'csi diru gac guetreni, anajczeni si'c najc rexangl Dios. Laareni najc xi'n Dios sa'csi abaspansac Diosreni.

<sup>37</sup> Moisésli basule' xcuent ni r̥bansac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacobb”, ni'cni nabajnpaceni lo Dios.

<sup>38</sup> Sa'csi di Dios gac Xtios rebengut; najcni Xtios rebejn ni nabajnpaceni par laani guiraa rebejn nabajnpaceni.

<sup>39</sup> Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

<sup>40</sup> Sa'csi dirureni niajx niniabdiidxruren i lojni.

*Chu xi'n najc Crist*

(Mt. 22:41-46; Mr. 12:35-37)

<sup>41</sup> Dxejcti räjp Jesús lojreni:

—¿Xho mood rniireni Crist najc xi'n toDavid, ä?

<sup>42</sup> Ni lagajc toDavid bacuaa lo reguigtz ni laa reSalmo:

Dad Dios räjp lo Xtadä:

<sup>43</sup> “Gurej xladbeä cheni guidzujnli dxej ni gudzugä guiraa ni rdxe'ch lojlu te gacbeereni luj rniibeelu guira'ti.”

<sup>44</sup> ¿Xho mood gacni xi'nni palga rniü toDavid lojni “Dad”?

*Rucuaquij Jesús reni ruluii leii*

(Mt. 23:1-36; Mr. 12:38-40; Lc. 11:37-54)

<sup>45</sup> Guiraa rebejn cagucuaadijg che räjp Jesús loj rexpejn pacni:

<sup>46</sup> —Colyajp cuidaad reni ruluii leii, sa'csi rdxagljazreni rajcwreni lajd siool, rljazreni saru guinii guiraa rebejn “xchan” lojreni, rljazreni jiu bejnreni nez loguii, rljazreni cuereni lo reyagxhilsa'c nen reguidobäz, näjza cadro rajc lanij.

<sup>47</sup> Rudzucajzaren i rexixhten regunabiuud, dxejc rolr̥reni rele' siolduxh che rniabreni lo Dios te fii rebejn, te naa bejn najczeni ben dxan, luxh lojreni suxhał Dios te castigwruru.

## 21

*Gojn xten te gunabiuud*

(Mr. 12:41-44)

<sup>1</sup> Nen guidoro bahuii Jesús cagusäl rebenrajp gojn nen te guijn cadro rdojp gojn.

<sup>2</sup> Bahuiizani lo te gunabiuud, lacti proobni. Basäl ni xcojnni nen guijnga, tio'ptis melbäz basäl ni.

<sup>3</sup> Dxejc räjp Jesús:

—Rniliäpac lojtu, gunabiuud proobga basäl r̥runi loj guiraa reni casäl gojn,

<sup>4</sup> Sa'csi guiraa redex ni cagasäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

*Räj Jesüs sibijl guidoro*  
(Mt. 24:1-2; Mr. 13:1-2)

<sup>5</sup> Yu' reni cayujy diidx xcuent guidoro, räjpreni:

—Lacti sacruduxh rieni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesüs lojreni, räjpni:

<sup>6</sup> —Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

*Reseen ni chu che nitloj guedxliuj*  
(Mt. 24:3-28; Mr. 13:3-23)

<sup>7</sup> Dxejc gunabdiidx rexejnpacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

<sup>8</sup> Räj Jesüs lojreni:

—¡Colsusin te na'c gusgueereri la'tu! Sa'csi xhidajl reni jääd sinii: “Narä nacä Crist”, o “Asiädgajxh redxej che jäädni”, per na'c chalilajztu xtiidxreni, na'cza chanajltureni.

<sup>9</sup> Luxh che jiejn diajgtu cayajc gue' cadilnäjä sa' bejn, na'c guidxejbtu, sa'csi ganid recosga gac, luxh gad gal'di nitloj guedxliuj.

<sup>10</sup> Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn.

<sup>11</sup> Sajcza xuro, su' gubijn, su'za yälgujdx nez ree nez rec. Luxh xhaguibaali sien guiraloj ni ruchejb näjza seenro.

<sup>12</sup> Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo rebejn guidobäz, susälzareni la'tu nejn latzguuib, sinäzareni la'tu nez loj reii näjza gubernadoor sa'csi rinälajztu xtidxä.

<sup>13</sup> Luxh guiraa dee sajctu te gac gusule'tu xtidxä lojreni.

<sup>14</sup> Na'c gunxgaatu xhigab nejn lastootu xhini'c guiniitu lojreni,

<sup>15</sup> sa'csi narä sunidxä diidx guiniitu, sunidxäza yäl'najni lojtu te digac gudzu'reni diidx lojtu niclaza gacdi guiniyajreni xtiidxtu.

<sup>16</sup> Näjza rexcuzajntu sibire lojtu, suto'reni la'tu, sigajcza rebejztu, resa'tu, rexamiigwtu, luxh yu'tu sugu'treni.

<sup>17</sup> Guiraa rebejn guedxliuj sibälaz la'tu sa'csi rinälajztu xtidxä.

<sup>18</sup> Niluxh ni'cla tej xquidxejctu di nitloj.

<sup>19</sup> Luxh palga sutijptis lajztu, sajptu yäl'nabajn par tejpas.

<sup>20</sup> Che fiitu tre' xhidajl soldaad guideb gabi guedx Jerusalén colyacbee abidzujn dxej ni guibijlni.

<sup>21</sup> Dxejc reni yu' guedx Judea, nanab guxunreni chacuatzlojreni nejn redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga,

<sup>22</sup> sa'csi nejn redxejga sujn Dios fis lo guejdxga te soob rediidx ni caj lo reguijtz xten Dios.

<sup>23</sup> Probe'za regunaa ni nuu báz nejn redxejga, näjza regunaa ni ca' báz, sa'csi su' yälhuinduxh lo guedxliuj, näjza fis ni gun Dios loj rebejnğa.

<sup>24</sup> Yu'reni guet lo gue', yu'zaren chää pres, sijreni balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

*Cheni jääd Xi'n Niguii*  
(Mt. 24:29-35, 42-44; Mr. 13:24-37)

<sup>25</sup> Räjzani:

—Dxejc su' seen lo gubijdx näjza lo bäii, näjza loj rebajle' ni yu' xhaguibaa. Luxh lo renacion guedxliuj su' rebejn yärsia', di jieñ xhi gunreni, sidxebduxhrenei sa'csi siejn diajgreni chubeduxh lo nisdoo, säsduxh nis ni räjs lo nisdoo.

<sup>26</sup> Sitiol rebejn xcuent yälrdxebduxh che gunreni xhigab xhicharuni'c gac lo guedxliuj, sa'csi näj guideb guibaa sinibsejs.

<sup>27</sup> Dxejcti suhuiireni lo Xi'n Dios ni gujc Niguii, siäädni lo te za guideb xcälrnibeeni, näjza yälrdimbichaduxh.

<sup>28</sup> Che guisloj gac recosre, colsutijp lajztu, colguiliäs yejctu, colguibalajz sa'csi asadzujn dxej gusilajztu.

<sup>29</sup> Guniizani stee cuent lojreni, räjpni:

—¡Colhuii lo yagiigw näjza lo guiraa reyajg!

<sup>30</sup> Che fiitu acabääni be'n, colyacbee lagajc la'tu, abidzujungajxh bäii nisguij.

<sup>31</sup> Sigajcza che fiitu agusloj cayajc recosre, colyacbee asiäddzujn xcälrnibee Dios.

<sup>32</sup> Rniliäpac lojtu, guiraa recosre sajz ansde guet rebejn ni yu' ñaj.

- <sup>33</sup> Guibaa näjza guedxliuj sinitloj, rextidxä dini nitloj.  
<sup>34</sup> 'Col̄susiñ lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujñ dxejga.  
<sup>35</sup> Sa'csi si'c sidzujñ dxejga loj guiraa rebeñ guedxliuj.  
<sup>36</sup> Col̄susiñ, col̄bejdx, col̄guiniabts lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguui.  
<sup>37</sup> Rdxee rului Jesús neñ guidoro dxejc guxhijñ sajjia'nni yejc dan Oliib.  
<sup>38</sup> Rsilru ristie rebejñ te rdzujñreni lo Jesús neñ guidoro casob rsil, te gucua diajgreni rextiidxni.

## 22

*Ria'nreni diidx xho guiniaazreni Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

- <sup>1</sup> Siäddzungajxh dxe lanij che rajwreni yätxtiil ni di säguuj, laaza lanijga pascw.  
<sup>2</sup> Dxejc reni rnibee loj rebixhojz näjza rebejñ ni rului lei caguilreni xho gunreni te ju'treni Jesús, sa'csi rdxejbreni rebeñguejdx.  
<sup>3</sup> Dxejc biu' beñdxab lastoo Judas ni laaza Iscariote, ni najc tej retzubitio'p xpejñpacni.  
<sup>4</sup> Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni.  
<sup>5</sup> Dxejc bibalazreni, bia'nreni diidx gudeedreni meel lojni.  
<sup>6</sup> Cuäjti Judas, dxejcn guslojni caguilni xho gunni guteedni Jesús ladzñaareni che rut bejñdi suga'.

*Xchej xten Dad Jesús*

(Mt. 26:17-29; Mr. 14:12-25; Jn. 13:21-30; 1Co. 11:23-26)

- <sup>7</sup> Bidzujñ dxe lanij che rajwreni yätxtiil ni di säguuj, che rugu'tzaren te xiil si'c ni caj lo xleii to Moisés.  
<sup>8</sup> Dxejc baxhał Jesús Pedr näjza Juan, räjpni lojreni:  
 —Col̄chayejñ xchej xten pascw te guidaununi.  
<sup>9</sup> Dxejc laareni gunabdiidxreni lojni, räjpreni:  
 —¿Caro rlažzlu choyennuni?  
<sup>10</sup> Räjp Jesús lojreni:  
 —Cheni jiu'tu lo guejdx, sidxaagtu te dade' ni nuu te re' nis. Col̄chanajlni, col̄jiu' rolizj bejñ cadro jiu'ni laani.  
<sup>11</sup> Dxejc colye'tz lo bejñ ni najc rolizjni ro'c: "Si'c naj Dad Mastr: ¿Con yu' cadro sajc gauxchenää rexpəñä naj pascw?"  
<sup>12</sup> Dxejc guluini lojtu te yu' ni sojb jiaa yejc stee yu'. Asuchexgaa yu'ga. Ro'c colyejñ xhi guidaunu.  
<sup>13</sup> Sä'tireni. Si'ttis ni räjp Jesús lojreni, si'cpac bidxälreni. Dxejc bejñreni xchej xte lanij pascw gaureni.  
<sup>14</sup> Che bidzujñ or, gurenäj Jesús rexpejñpacni lo mex.  
<sup>15</sup> Dxejc räjpni lojreni:  
 —Guyuduxhä gaan gaunääpactu xchej xten pascw ansde tedä trabajwduxh.  
<sup>16</sup> Sa'csi rniä lojtu, diruna gaunää la'tu pascw cheni guidzujñli dxej ni gacni lo xcälrnibee Dios.  
<sup>17</sup> Dxejc cua'ni te co'p, badeedni xquixtios lo Dios, räjpni:  
 —Colyä' dee, col̄gudeedni lo sa'tu.  
<sup>18</sup> Sa'csi rniä lojtu, diruna yä'ä nis ni rii yejc uub stehuält cheni guidzujñli xcälrnibee Dios.  
<sup>19</sup> Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:  
 —Dee najc si'c tiexhä ni gudedä ju'treni xcuenttu. Colyejñ screeza te guinalajztu narä.  
<sup>20</sup> Si'cza bennäjni co'p che gulujx gudajwreni, räjpni lojreni:  
 —Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejñ ni aguleni.  
<sup>21</sup> 'Per bahuilaare, bejñ ni guto' narä sobganäj narä lo mexre.  
<sup>22</sup> Guliipacni, Xi'n Dios ni gujc Niguui sinuu tedni loj nezuyj ni abalui Dios lojni. Luxh proobza bejñ ni guto' narä.  
<sup>23</sup> Dxejc gusloj canabdiidxreni lo sa'reni, ¿chuchani'c gunni?  
*Cayejyreni chuni'c najc beñroru*  
<sup>24</sup> Sas gusloj cayejyreni, don chuni'c guibee gac beñro lojreni.  
<sup>25</sup> Dxejcti räjp Jesús lojreni:  
 —Re'reii ni rnibee lajdx bejñ ni digac xpejñ Israel, rnibeereni lojreni astoo xtenpacreni najc reguejdxga. Luxh rebeñguejdxga rni lacti hueen najc re'reiiga.

<sup>26</sup> Per la'tu na'c gactu si'c. Nani najc bengoolru lojtu, ni'c riäjł gacni si'c najc ni huinru lojtu. Luxh nani rnibee riäjł gacni si'c mos.

<sup>27</sup> ¿Chuni'c sajcro lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'a lojtu si'c ni ruteed xhi gauni.

<sup>28</sup> La'tu najctu ni gusunäj narä guideb ni gudedä re TRABAJW ni gudedä.

<sup>29</sup> Ni'cni narä runidxä yälrnibee lojtu sigajc ni baniidx xtad yälrnibee loä,

<sup>30</sup> te gautu, yätu lo xmexä xhaguibaa, te cuezatu lo yagxhıl cadro guntu yälğuxhtis loj rexepejn guitzubitio'p rexagdoos Israel.

*Räpxгаа Jesús di Pedr guicäjp numbeeni*

(Mt. 26:31-35; Mr. 14:27-31; Jn. 13:36-38)

<sup>31</sup> Räjп Jesús loj Simón:

—Simón, Simón, agunab beñdxab ni laa Satanás luj te gusniibni luj si'c rusniib bejn xob te jiani.

<sup>32</sup> Narä agunabä lo Dios xcuentlu te na'c jiäädx xcälřililajzlu. Luxh luj che gusiejch lajzlu, guibi'lu, bastioob lastoo resa'lu.

<sup>33</sup> Räjп Simón lojni:

—Dad, narä sirinalälu; mase gusaureni luj latzguuib, näjza narä siäunäálu; mase ju'treni luj, näjza narä setnäálu.

<sup>34</sup> Dxejcti räjп Jesús loj Simón:

—Pedr, rniä lojlu, nicla gajd guidgaaı cuedxa' nadxej niluxh luj alaräjplu chonli huält, dipaclu gumbee narä.

*Nanab soob rediıdx ni bacuaareni xcuent Jesús*

<sup>35</sup> Dxejc gunabdiıdx Jesús lojreni räjпni:

—Che ganaxtu baxhalä la'tu, xhet bolsdi sanätu, nicla carteredi, niclaza stee gura'chdi, ¿la yu' xhi biquiıntu, xhi biäädx lojtu, ä?

Dxejc räjпni:

—Xheti.

<sup>36</sup> Dxejc räjпni lojreni:

—Luxh naj rniä lojtu, ni rajp bols, suchanänini; sigajcza carter. Luxh ni di ga'p espaad, guto'ni xchamarni te siini tejni.

<sup>37</sup> Sa'csi rniä lojtu, sisiojb rediıdx ni caj lo requijtz Dios xcuentä, cadro caj: “Bigabnäjni reben latsiaj.” Guıraa ni caj lo reguijtz xten Dios xcuentä nanab soobpacni.

<sup>38</sup> Dxejc räjпni lojni:

—Dad, aree tio'p espaad.

Dxejc räjпni lojreni:

—Sajl reni'c.

*Rbedx-rniab Jesús loj Dios*

(Mt. 26:36-46; Mr. 14:32-42)

<sup>39</sup> Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexepejn pacni.

<sup>40</sup> Che bidzujņreni ro'c, räjпni lojreni:

—Colcuedx, colnab lo Dios te na'c jiajbtu lo dojl.

<sup>41</sup> Dxejc gubicaj Jesús lojreni, huijni te lajt zite' cadro suga'reni, si'cti cadro rdzujņ te guij che rucuaanini. Ro'c bazuxhijbni, gurejdx-gunabni lo Dios,

<sup>42</sup> räjпni:

—Xtadä, palga rıajzlu, basıaa narä loj trabajwduxhre. Niluxh na'c gacni si'c ni rıazä narä. Bejn si'cni rıajzlu gunlu.

<sup>43</sup> Dxejc biricaj te xangl Dios lojni te badeedni yälřrutiplajzni.

<sup>44</sup> Laıni cadejdni trabajwduxh, cayac-huınduxh lajzni, cabedx-canabruni lo Dios. Guzunıslini gusloj catejb lo yuj binıduxh si'c rejn lojni.

<sup>45</sup> Cheni huiısunı, gulujx gurejdx-gunabni lo Dios, huijni cadro suga' rexepejn pacni. Ro'c bidxälnireni nagayejs guıraareni sa'csi cayac-huin lajzreni.

<sup>46</sup> Dxejc räjпni lojreni:

—¿Xhicuent nagayejstu? ¿Colchastiel! ¿Colnab lo Dios te na'c jiajbtu lo dojl!

*Che gunaazreni Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Laı ni canii Jesús lojreni, bidzujņ xhidajł bejn. Tej rexepejn pacni ni laa Judas, nijdni nez loj rebejnga. Dxejcti gubigni loj Jesús, te bachagro'ni loj Jesús.

<sup>48</sup> Dxejc räjп Jesús lojni:

—Judas, ¿la con te yälřuchagro' ruteedlu Xi'n Dios ni gujc Nıguıı ladzınaa rebejņre, ä?



49 Che bahuii reni suganäj Jesús xhini'c cayajc ro'c, gunabdiidxreni loj Jesús, rájpreni:

—Dad, ¿la sixa'tnu yejcreni con spaad, ä?

50 Sas tej rexpejn Jesús gudilnäj te mos xten ni rnibee loj rebixhojz, batiu'ni diajgni ladbee.

51 Dxejc ráj Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini.

52 Gunigajc Jesús loj reni rnibee loj rebixhojz nájza reni najc guixhajg xten guidoo nájza rebengool, guiraa reni siädxini, rájpreni:

—¿La siädnätu spaad nájza garo't, astoocanu siädxiiitu te gubaan, ä?

53 Cheni suga'a lojtu guixe-guixee neñ guidoo, ditu nuhual narä. Per dee najc xortu, luxh arnibee yälñacäjy la'tu.

*Di Pedr guicäj numbeeni Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Dxejcti gunaazreni Jesús huinäreni roliz bixhojz ni rnibee lo guiraa rebixhojz. Siädnäj Pedrni zit-zijt.

55 Che bidzujnreni gule'creni guiboo galäi lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c.

56 Dxejc te gunaa ni rujn dzuun ro'c, che bahuiini sobga' Pedr ro'c, rdxelojtisni lojni, rájpreni:

—Näj niguiire gyunäj Jesús.

57 Dxejc basuni' Pedr rájpreni:

—Nan, dina gumbeäni.

58 Che gojl stera't, che bahuii stee bejn lojni, rájpreni lojni:

—Näj luj najclu te rexpejn.

Per Pedr rájpreni lojni:

—Gurniälojlu, Dad, dina gacä xpejn.

59 Che gudejd si'cti teb or, rájpreni stee bejn lojni:

—Guliipacni, näj bejnre gyunäjni, sa'csi laani najczani te beñ Galilee.

60 Dxejc ráj Pedr lojni:

—Gurniälojlu Dad, dipacna ganä xhini'c canii luä.

Lañ canii Pedr rediidxre, guredxa' te guidgaii,

61 luxh gubiréza Jesús, bahuidzu'tzni lo Pedr, dxejc banalajz Pedr nani guni Jesús lojni, rájpreni: "Che gajd guidgaii cuedxa', abazuni'lu choñ huält, rájplu dilu gumbee najrä."

62 Dxejcti guc-huin lajz Pedr, biriini ro'c, ronduxhni.

*Rniyajreni Jesús*

(Mt. 26:67-68; Mr. 14:65)

63 Rebejn ni canäj Jesús, gusloj caguxhisnäjreni, caguijnarenini.

64 Dxejc basäuren lojni, gudajpreni lojni, rájpreni lojni:

—¡Gunii chuni'c gudijnlu!

65 Luxh guiraloj cayäjbreni lojni, caniyaduxhreni.

*Bidzunäjreni Jesús nez loj rebixhojz*

(Mt. 26:59-66; Mr. 14:55-64; Jn. 18:19-24)

66 Che bara yääl, bidojp rebengool ni rnibee, nájza reni rnibee loj rebixhojz, nájza rebejn ni ruluü lei, huinäreni Jesús te suuni nez lojreni neñ yu' cadro rujnreni yälguxhtis. Dxejcti rájpreni lojni:

67 —Palga luj najclu Crist, bicäjpeni loonu.

Dxejc badzu' Jesús diidxre lojreni, rájpreni:

—Palga guicäpäni, ditu chalilajz.

68 Luxh palga gunä te yälgunabdiidx lojtu xcuent Crist, ditu gudzu' diidxga loä.

69 Per najli sibej Xi'n Dios ni gujc Niguii xladbee Gueb Dios ni yu' xhaguibaa.

70 Dxejc gunabdiidx guiraaren lojni, rájpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni rájpreni:

—Nacäni, si'cni najtu la'tu.

71 Dxejc rájpreni lo sa'reni:

—¿Xhirucxhamaaz rlajztu? Dirunu guiquiin diidx guini bejn, sa'csi lagajc nuurnu abiejn diajgnu diidx ni guini lagajc laani.

## 23

*Jesús nez loj Pila't**(Mt. 27:1-2, 11-14; Mr. 15:1-5; Jn. 18:28-38)*

- <sup>1</sup> Dxejc huisu guiraareni, huinäreni Jesús nez loj Pila't.  
<sup>2</sup> Ro'c guslojreni cabe'creni xquejni, räjpreni:  
 —Bidxälnu bejnre cayujnni bieje lo rexpejnnu. Räjpzani xhet nanabdi quixnu impuest lo reii César. Caniizani laani najcni Crist, nalajznu najczani reii.  
<sup>3</sup> Dxejc gunabdiidx Pila't lojni, räjpmi:  
 —¿La luj ni najc reii xten rexpejn Israel, ä?  
 Sas badzu' Jesús diidxre räjpmi:  
 —Najcni lagajc si'c ni guniilu.  
<sup>4</sup> Dxejc räjpmi Pila't loj reni rnibee loj rebixhojz nájza loj guiraa rebejn:  
 —Dina guidxälä nicla tej dojl xten bejnre.  
<sup>5</sup> Niluxh laareni sanuutis caniireni, dipru caniireni, räjpreni:  
 —Guiraa reben Judea cayu' yärsia' xcuent xcäl'ruluini. Guslojni guedx Galilee, luxh reeli sanuu caguluini.

*Jesús nez loj Herodes*

- <sup>6</sup> Che biejn diajg Pila't rediidxre, gunabdiidxni: “¿La Galilee siäd bejnğa?”  
<sup>7</sup> Cheni räjpreni ro'c siädni, baxhalnini loj Herodes ni najc gubernadoor xten Galilee, sa'csi neñ redxejga yu' Herodes guedx Jerusalén.  
<sup>8</sup> Che bahuii Herodes loj Jesús, bibalajzni sa'csi agujc xchej rlanjzi fiini lojni, sa'csi abiejn diagni diidx xcuent ni cayujnni. Luxh rlanjzi fiini gunni te milaagw.  
<sup>9</sup> Xhidajl yäl'gunabdiidx bejn Herodes, luxh xhet guniidi Jesús.  
<sup>10</sup> Ro'c suga'za reni rnibee loj rebixhojz nájza rebejn ni ruluii leii, cabecduxhurenii xquejni.  
<sup>11</sup> Dxejc gulälaz Herodes náj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't.  
<sup>12</sup> Lagajc dxejga, Pila't nájza Herodes gujcreni amiigw, luxh galoo bidxe'ch lo sa'reni.

*Gunibeereni guet Jesús**(Mt. 27:15-26; Mr. 15:6-15; Jn. 18:39-19:16)*

- <sup>13</sup> Dxejc gurejdx Pila't reni rnibee loj bixhojz, nájza rebengool ni najc guxhtis, nájza rebenguejdx.  
<sup>14</sup> Dxejc räjpmi lojreni:  
 —La'tu biädñatu bejnre loä, najtu caguquilni rebejn gunreni bieje, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni.  
<sup>15</sup> Niclaza Herodes di nidxälä nicla tej dojl, ni'cni baxhalsacnini loonu, luxh abahuiitu xhet dojldi bejnni te guetni.  
<sup>16</sup> Ni'cni quinäni, dxjecti guslääni.  
<sup>17</sup> Najc costumbr rusläa Pila't te bejn ni yu' neñ latzguuib casob rajc lanijre.  
<sup>18</sup> Per guiraareni guredxa'reni si'c tejsi bejn, räjpreni:  
 —¡Bagu't bejnre, basläa Barrabás!  
<sup>19</sup> Barrabás najc ni basäl'reni latzguuib sa'csi batojpni te cuaa bejn ni bacuanäj resoldaad xten Rom, nájza sa'csi yu' chu bagu'tni.  
<sup>20</sup> Rlajzpac Pila't gusläani Jesús, ni'c gunisacni lojreni,  
<sup>21</sup> niluxh rebejn dipru guredxa'reni, räjpreni:  
 —¡Bacuaani lo cruuj, bacuaani lo cruuj!  
<sup>22</sup> Riojn gunisac Pila't lojreni, räjpmi:  
 —¿Xhi dojduxh bejnni? Xhetliidi dojl rdxälä bejnni te guetni. Ni'cni siguinäni dxejc suslääni.  
<sup>23</sup> Luxh laareni sanuutis guredxa'reni, gunabreni xcajni lo cruuj. Luxh sa'csi guredxa'tisreni, bejntireni gaan gujc si'c ni rlanjreni.  
<sup>24</sup> Dxejc cuäjb Pila't gunibeeni gac si'c ni gunabreni.  
<sup>25</sup> Dxejc basläani bejn ni yu' latzguuib sa'csi bejnni bieje, bagu'tzani bejn, dxejc badeedni Jesús lojreni te gunnäjrenini si'ctis ni rlanjreni.

*Che cuaj Jesús lo cruuj**(Mt. 27:32-44; Mr. 15:21-32; Jn. 19:17-27)*

- <sup>26</sup> Cheni sanäreni Jesús xcaj lo cruuj, gunaazreni te bejn ni laa Simón ni siäd guedx Cirene; basaj bejnğa lo niaa. Dxejc basguurenini cruuj, siädnajltini dejt Jesús.  
<sup>27</sup> Siädnajlza xhidalduxh bejn, nájza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús.

- <sup>28</sup> Dxejc gubiré Jesús, rájpmi lojreni:  
—Gunaa Jerusalén, na'c roontu xcuentá, colyoon lagajc xcuenttu nájza xcuent rexi'ntu.
- <sup>29</sup> Sa'csi sidzujn dxej gábreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiá' báz.”
- <sup>30</sup> Dxejc guisloj rebejn gáb loj redajn: “Coljiajb yejcnu”, sájbzarení loj relom: “Colgucua'tz nuurnu.”
- <sup>31</sup> Palga scree runnájreni nará ni nacá si'c te yagnaga, aticaxh gunnájreni la'tu ni najc si'c te yagbijdz.
- <sup>32</sup> Sanázarení tio'p benguijdx xcajzarení loj recrújz, guetnájrení Jesús.
- <sup>33</sup> Che bidzujnreni te lajt ni laa Calabeer, ro'c bacuaareni Jesús lo te crujz, bacuaazarení guiro'p rebenguijdxga lo stio'p crujz, tejni xladbee, steeni xladbájgwmi.
- <sup>34</sup> Cheni cagucuaa rebejn reni lo crujz, gunii Jesús, rájpmi:  
—Xtadá, badzucaj xtojł rebejnre, sa'csi direni gan xhini'c cayujnreni.  
Dxejc gudzujt resoldaad daad yejc xhajbni, te gudisreni xhajbni cua'renini.
- <sup>35</sup> Suga' rebejn ro'c cadxlojtisreni. Nájza reguxhtis caguxhisnájreni laani, cayájpreni:  
—Balti bejn baslaani, naj suguslaani lagajc laani palga guliini laani najcni Crist ni gule Dios.
- <sup>36</sup> Nájza resoldaad caguxhisnájni, gubigreni lojni te badeedreni bin-nii yáni.
- <sup>37</sup> Dxejc rájpmi lojni:  
—Palga gulií najclu reii xten rexpejn Israel, baslaa lagajc luj.
- <sup>38</sup> Luxh bacuaareni gaíi diidx loj te barájd ni cuaj yejc crujz. Con didx griegw, con didx latin, nájza didx hebreo, bacuaareni scree: “Dee najc Reii xten rexpen Israel.”
- <sup>39</sup> Te reben guijdx ni najl lo te crujz ni caj cuá'ni caniyajni Jesús, rájpmi lojni:  
—Palga luj najclu Crist, baslaa lagajc luj nágajcza nuurnu.
- <sup>40</sup> Per benguijdx ni najl lo crujz stelaadga gudidxa'ni loj stee benguijdx ni caniyaj Crist, rájpmi:  
—¿La dila guidxejb Dios? ¡Ni cayajczalu tejsi castiigw!
- <sup>41</sup> Per nuurnu cayajcnu castiigw ni riájl gacnu te guidiixnu redojl ni biennu. Luxh laani xhet dojlđi bejnmi.
- <sup>42</sup> Dxejc rájpmi loj Jesús:  
—Bazalajzlu nará che guidzujnlu lo xcálmibeelu.
- <sup>43</sup> Dxejc badzu' Jesús diidxre, rájpmi lojni:  
—Rniliápac lojlu, lagajc nadxej chunájlú nará xhaguibaa.
- Che gujt Jesús*  
(Mt. 27:45-56; Mr. 15:33-41; Jn. 19:28-30)
- <sup>44</sup> Agojl si'cti láidxej. Dxejc bicájy guideb guedxliuj, si'c bianxčáiy si'cti rcachonti.
- <sup>45</sup> Bicájy lo gubijdx, luxh ladró ni najl neñ yudxanro xten guidoro, birájsni gucni tio'p la'.
- <sup>46</sup> Dxejcti guredxa' Jesús, rájpmi:  
—Xtadá, ladznaala rutedá xaimá.  
Che guniini si'c, gujtini.
- <sup>47</sup> Che bahuii capitán ni rnibee loj resoldaad guiraa ni guzajc, gulá'pni xpala'n Dios, rájpmi:  
—Guliiipacni, xhet dojlđi bejnre.
- <sup>48</sup> Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayáázreni lagajc lastooreni.
- <sup>49</sup> Luxh guiraa reni rumbee Jesús, nájza regunaa ni biädnajlmi che biriilini Galilee, zijtru bia'nreni cahuiireni guiraa recos ni cayajcre.
- Che biga'tz Jesús*  
(Mt. 27:57-61; Mr. 15:42-47; Jn. 19:38-42)
- <sup>50</sup> Guyu' te bejn ni laa José, lacti huen najcni, luxh laaca rujnni guira'ti. Siáadni guedx Arimatea, región Judea. Nadxaagzani loj reni rnibee neñ guidoro xten rexpejn Israel.
- <sup>51</sup> Cabájza José jáäd yálmibee xten Dios, ni'cni dini nidxagłajz nani bejn resa'ni.
- <sup>52</sup> Dxejcti huijni lo Pila't, gunabni tiejxh Jesús.
- <sup>53</sup> Che gulátnini lo crujz, batejbnini neñ te bariaad, dxejcti bacua'tznini neñ te baa ni guc-chee cuá' te guilaj. Nacoob baaga, nicla tej bejn gajd guiga'tz ro'c.
- <sup>54</sup> Dxejga najc dxej ni rusucheereni guira'ti, luxh agojl jiu' dxej ni rusilajzreni.
- <sup>55</sup> Regunaa ni guzanáj Jesús che biriilini Galilee huihuiireni robaaga te bahuiireni xho gudixhrenei togoogla neñ baa.
- <sup>56</sup> Che gubi'reni rolizreni bencheereni recuaan ni rlianexhduxh náj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo kleii Moisés gunreni.

## 24

*Che gubansac Jesús lo rebengut*  
(Mt. 28:1-10; Mr. 16:1-8; Jn. 20:1-10)

<sup>1</sup> Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni.

<sup>2</sup> Che bidzujñreni, bahuiireni agubicaj guij ni rusäu ro' baa.

<sup>3</sup> Dxejc che biu'reni neñ baaga, direni nidxäl tiejxh Jesús.

<sup>4</sup> Laļ ni cadxelojreni, di jien xhi gunreni, biricaj tio'p dade' gusuj cuä'reni. Rdim-bichaduxh xhajbreni.

<sup>5</sup> Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajñ lo rebengut, ä?

<sup>6</sup> Rutini ree. Agubansacni. Colgusnaj lajztu rediidx ni guniini cheni guyusijcni Galilee,

<sup>7</sup> che najni lojtu: “Riäjl jiajñ Xi'n Dios ni gujc Niguii ladzña rebendoj, xcajzani lo cruzj, dxejc ni riojn dxejga sibansacni loj rebengut.”

<sup>8</sup> Dxejc banaj lajz regunaa xtidx Jesús,

<sup>9</sup> biriireni robaa, gubi'tireni te bijreni diidx lo retzubiteeb rexpejñpacni näjza loj rebejn ni yunäjreni.

<sup>10</sup> Reni huisa'n diidx loj rexpejñpac Jesús najc redee: Marii Magdaleñ, näjza Xuan, näjza Marii xnan Jacoob, näjza sgaii gunaa.

<sup>11</sup> Niluxh rexpejñpacni bejn xhigab didxnayäälni, direni nililajz xtidx regunaaga.

<sup>12</sup> Dxejc huisu Pedr, ruxunlini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolizjni, rdxelajtisni xcuent ni gujc.

*Ni guzajc lo nezyuj ni sii guedx Emaús*  
(Mr. 16:12-13)

<sup>13</sup> Lagajc dxejga, tio'p rexpejñpacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén.

<sup>14</sup> Laļ ni sasajreni lo nezyujga, cayuyjreni diidx xcuent reni gujc ro'c.

<sup>15</sup> Laļ ni caniireni gubig Jesús lojreni, gusloj sasanäjñreni.

<sup>16</sup> Luxh mase cahuiireni lojni, yu' xhi badxojn niembeereni.

<sup>17</sup> Dxejc gunabdiidx Jesús lojreni, räjpni:

—¿Xhini'c rujyту laļ ni sasajtu, ä? ¿Xhicuent cayac-huin lajztu?

<sup>18</sup> Tejreni ni laa Cleofas badzu' diidxre, räjpni:

—Guiraasi bejn najñ xhi gujc neñ guedx Jerusalén. ¿La lujtis bia'ñlu neñ guejdxga ni di gan xhi gujc ro'c, ä?

<sup>19</sup> Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, räjpni yälñribeduxh xten Dios loj redzuun ni rujñni näjza loj rediidx ni rniini, nez loj Dios näjza nez loj rebejn.

<sup>20</sup> Näjza xho bejn reni rnibee loj rebixhojz näjza rexcuxhtisnu, bateedrenini ladzña reni gunibee guetni, dxejc bacuaarenini lo cruzj.

<sup>21</sup> Niluxh nuurnu cabääznu laani gacni nani nuslaa rexpejñ Israel ladzña rebenzajt. Naj agujc choñ dxej ni gujc recosre.

<sup>22</sup> Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni,

<sup>23</sup> direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebengut.

<sup>24</sup> Dxejcti huihuii gaii sa'nu robaa, bahuiizarenini najcni si'ctis ni naj regunaaga loonu, niluxh direni nuhuii loj Jesús.

<sup>25</sup> Dxejc räjp Jesús lojreni:

—¡Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist.

<sup>26</sup> ¿La di nungäjł tedxgaa Crist retrabajwduxhre dxejcti jiu'ni lo xcälrdimbicha' Dios, ä?

<sup>27</sup> Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjñni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

<sup>28</sup> Che bidzujñreni guejdx cadro sääreni, bejn Jesús si'cni chanuuni chääni lo nezyuj.

<sup>29</sup> Dxejc laarenini bascuääzrenini te jiannäjñreni, räjpreni lojni:

—Biannäj nuurnu, sa'csi acayajc gudxej, agojł jiu' guxhijñ.

Dxejcti biu' Jesús te jiannäjñreni.

<sup>30</sup> Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni.

<sup>31</sup> Lagajc dxejc, baxhal Dios balojreni, biembeereni Jesús, dxejc laani gunitlojni lojreni.

<sup>32</sup> Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

<sup>33</sup> Dxejc dirureni nibäjz ro'c, alga gunasgajcreni nez, gubi'reni guedx Jerusalén. Ro'c bidxälreni abidojox pejn<sup>pac</sup> Jesús näjza sgaii bejn.

<sup>34</sup> Dxejcti bijreni diidx loj guiro'preni bidzujn, räjpreni:

—Guliipac gubansac Jesucrist, luxh baluilojni loj Simón.

<sup>35</sup> Dxejc guiro'p reni bidzujn bijzaren diidx ni gusajcreni lo nezyuj, näj xho biembeezaren Jesús che gula'ni yätxtiil.

*Baluiloj Jesús loj rexpejn<sup>pac</sup>*

(Mt. 28:16-20; Mr. 16:14-18; Jn. 20:19-23)

<sup>36</sup> Canisi'creni rediidxre chela baluiloj lagajc Jesús galäireni, guniini xchan lojreni, räjpni:

—¡Coluecdxi lajztu!

<sup>37</sup> Per laareni rdxelojreni bidxeljreni, naareni cahuiireni lo te sprit.

<sup>38</sup> Dxejc räjp Jesús lojreni:

—¿Xhicuent cadxeljbtu? ¿Xhicuent rac tio'p lastootu?

<sup>39</sup> ¡Colhuii reñaä, näjza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

<sup>40</sup> Che guniini rediidxga, baluigajcni reñaani näjza reni'ni.

<sup>41</sup> Lał ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

<sup>42</sup> Dxejc badeedreni te la' bälbigue', näjza te la' seer ni yu' tzujn.

<sup>43</sup> Ni'c cua'ni gudajwnini nez lojreni.

<sup>44</sup> Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjł soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

<sup>45</sup> Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni.

<sup>46</sup> Dxejc räjpni lojreni:

—Scree caj lo reguiztz: Nanab guet Crist, dxejc ni riojn dxej, guibansacni loj rebengut.

<sup>47</sup> Sire'chza diidx xcuent xho rusläa Crist rebejn neñ dojl che rusiejchreni lajzreni, che riililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

<sup>48</sup> La'tu najctu testiigw guiraa recosre.

<sup>49</sup> Narä suxhalä Sprit Dxan xten Dios lojtu, ni'c coljia'n guedx Jerusalén cheni jiädläjzlini neñ lastootu, guniidxni yäl<sup>rn</sup>ibee ni siääd xhaguibaali.

*Huäjs Jesús xhaguibaa*

(Mr. 16:19-20)

<sup>50</sup> Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni naani, benle'ni yejcreni.

<sup>51</sup> Lał ni cayujni si'c, gubicajni lojreni, huäjsni xhaguibaa.

<sup>52</sup> Peta laareni gulujx gojnrenini, dxejc cabalazduxhreni gubi'reni guedx Jerusalén.

<sup>53</sup> Ro'c guixe-guixee guyu'reni neñ guidoro, calä'preni xpala'n Dios. Sugacni si'c.

## Redidxhuen Xten Jesucrist Ni Bacuaa San Juan

*Xtidx Dios najc te Niguui*

<sup>1</sup> Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios.

<sup>2</sup> Che gajd gac-cheeli guedxliuj, yunäjni Dios.

<sup>3</sup> Xcuent laani benchee Dios guedxliuj nájza guira'ti ni yu' lojni. Guiraa recos ni yu' di gacdi niu'reni paru rutini.

<sup>4</sup> Laani gojp yäl'nabajn. Yäl'nabajnga najc bianij xten rebejn.

<sup>5</sup> Luxh bianijga rdimbicha' nez lo yäl'cäjy, niluxh yäl'cäjyga di niajcdi nusuiinini.

<sup>6</sup> Guyu' te niguii birilaj Juan, ni baxhal Dios.

<sup>7</sup> Laani biädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij.

<sup>8</sup> Laani dini gac bianij, laani biädsule'ni diidx xcuent bianij.

<sup>9</sup> Laa bianijpacga ni rusanij lastoo guiraa rebejn, luxh najc abiädni lo guedxliujre.

<sup>10</sup> Nani najc Diidxga guyu' lo guedxliujre, xcuent laazani gac-chee guedxliujre, luxh di reben guedxliujre nililajz chu najni najcni.

<sup>11</sup> Biädni loj rexpən Israel, niluxh rexpejnni direni nicäjb niu'ni lojreni.

<sup>12</sup> Dxejc loj guiraa reni cuäjb guyu'ni lojreni, loj renani huililajz xtidxni, loj reni'c baadeedni yäl'rnibee gacreni xi'n Dios.

<sup>13</sup> Laa reni'c ni di gac si'c xi'n beñ guedxliuj, ni gojl sa'csi rlaiz te biniet chu xi'nni, dee najcpacreni Xi'n Dios sa'csi sudeedni yäl'nabajn par tejpas lojreni.

<sup>14</sup> Diidxga gujc te beñ guedxliuj. Guläjzni lo guedxliujre, bahuilojzanu xcäl'rdimbicha'ni, si'c yäl'rdimbicha' xten xingan xteb xtdäni, laani najcpacni nani sanälajz nuurnu, nani rniü didxlii loonu.

<sup>15</sup> Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabajnni loä.

<sup>16</sup> Sa'csi guiraanu cua'nu xcäl'nasacduxhni, yäl'racnäj detz yäl'racnäj.

<sup>17</sup> Leii xten Dios biädni to Moisés, niluxh yäl'racnäj nájza redidxlii biädni Jesucrist.

<sup>18</sup> Rut chu tejdi abahuii lo Dios, xinxtetni ni yunäjpac Dios, laani basule'ni diidx xcuent Dios loonu.

*Juan ni rutiobnis gunii chuni'c najc Jesucrist*

*(Mt. 3:11-12; Mr. 1:7-8; Lc. 3:15-17)*

<sup>19</sup> Dee najc diidx nani gunii Juan ni rutiobnis che baxhal rexpejn Israel rebixhojz nájza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

<sup>20</sup> Dxejcti bicäjpn lojreni, xhet bacua'tzdini lojreni, räjpni:

—Et narädi nacä Crist ni jiäd.

<sup>21</sup> Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabääznu jiäd?

Dxejc räjpni:

—Dina gacäni.

<sup>22</sup> Räjpreni:

—¿Chuxhni'c najclu? Te chonänu diidx loj reni baxhal nuure. ¿Xhi rniilu, chuxhni'c najclu?

<sup>23</sup> Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: "Colyensa'c xnezyuj Dad."

<sup>24</sup> Rebejn ni baxhal redee najc reni rniireni "farisee".

<sup>25</sup> Dxejc gunabdiidxreni stee, räjpreni lo Juan:

—¿Xhicuent rutiobnisluga palga dilu gac Crist ni jiäd niclaza Elías niclaza stee niguii ni rniü xtidx Dios ni cabääznu jiäd, ä?

<sup>26</sup> Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee.

<sup>27</sup> Laa dee ni siääd detzä niluxh di nungäj] nicla surloä cuää xcura'chni, sa'csi sajcruni loä.

<sup>28</sup> Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

*Jesús najc Xile' xten Dios*

<sup>29</sup> Che bara yääl, bahuii Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucax xtoj] rebeñ guedxliuj.

<sup>30</sup> Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabajñni.”

<sup>31</sup> Luxh dina niembeäni, per biädtiobnisä con nis te guluiä lo rexpejn Israel chu najcni.

<sup>32</sup> Guniaza Juan stee diidx xcuentni, räjpni:

—Narä bahuiä biäjt Sprit Dxan xten Dios xhaguibaa si'c te palom guzudxini yejcn.

<sup>33</sup> Dina niembeäni, per nani baxhal narä gutiobnisä con nis, laani najni loä: “Cheni filu jäjt Sprit Dxan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxan xten Dios.”

<sup>34</sup> Narä abahuiä lojni, ni'cni rniä: “Dee ni najc Xi'n Dios.”

*Reni gujc xpejn Jesús ganiddoo*

<sup>35</sup> Che bara stee yääl, sugasac Juan ro'c, suganäjni tio'p rexpejn.

<sup>36</sup> Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiil xten Dios!

<sup>37</sup> Biejn diajg guiro'p rexpejnpac Juan diidxga, dxejc sanajlreni Jesús.

<sup>38</sup> Che gubiré Jesús bahuiini siädñajlreni, dxejc räjpni:

—¿Xhi caguilltu?

Räjp rebejnğa:

—Mastr, ¿caro rbäjzlu?

<sup>39</sup> Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

<sup>40</sup> Tej reni biejn diajgni xtidx Juan laa Andrés, bejtz Simón Pedr dxejc huinäjlni Jesús.

<sup>41</sup> Ganiddoo huitiilni bejtzni, dxejc räjpni lojni:

—Abidxälnu Mesias nani sälojza Crist ni cabääznu jääd.

<sup>42</sup> Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

*Gurejdx Jesús Felipe näjza Natanael*

<sup>43</sup> Bara yäälga rlajz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

<sup>44</sup> Felipe siääd guedx Betsaida, guedxro ni najcza lajdx Andrés näjza Pedr.

<sup>45</sup> Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

<sup>46</sup> Räjp Natanael:

—¿La sajc guirii te beñsa'c guedx Nazare't, ä?

Räjp Felipe lojni:

—Gudaa, te filu.

<sup>47</sup> Che bahuii Jesús siääd Natanael nez lojni, räjpni:

—Colhuii te beñ Israelpac nani dipacni gusguee.

<sup>48</sup> Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

<sup>49</sup> Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

<sup>50</sup> Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c riililajzlu, ä? Xhidajl cosroru suhuiilu.

<sup>51</sup> Dxejcti räjpzani:

—Rniälpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

## 2

*Te sa' ni guyu' guedx Caná xten Galilee*

- 1 Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús.  
 2 Huijza Jesús nájza rexejñpacni, sa'csi bidonreni cháäreni lo sa'ga.  
 3 Gubijdz bin. Dxejc rájp xnan Jesús lojni:  
 —Dirureni ga'p bin.  
 4 Dxejc badzu' Jesús diidxre rájpní:  
 —¿Xhicuent rniilu si'c loá, xnaná? Gajd xhorá guidzujñ.  
 5 Niluxh rájp xnanni loj remos ni tre' ro'c:  
 —Colyejñ guira'ti si'ctis ni guiniini lojtu.  
 6 Suga' xho'p guesguij nani rdaxaj nis te rdiib naa rexejñ Israel te racnayareni te si'c guisa' xleii to Moisés. Neñ tejsa guesguijga ru' si'cti te gayuu litr nis.  
 7 Rájp Jesús loj remos:  
 —Colguchaj reguesguijre nis.  
 Dxejcti bachadoo rebejñgani.  
 8 Dxejcti rájp Jesús lojreni:  
 —Colca' che'nni ñaj te colchanáni lo nani cahuii cayajc sa're.  
 Dxejc huiná remosga che'n bin lojni.  
 9 Che gu' dade'ga che'n nis ni gubixhloj bin (luxh dini gan caro siáadni, remostis ni gulá'p nis, ni'ctis najñ). Dxejcti gurejdx dade'ga bi'n.  
 10 Dxejcti rájpní:  
 —Guiraa rebejñ rudeedreni binsa'c ráxgaa rebejñ, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre ñajli.  
 11 Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazábdiidx yálmibee xtenni luxh ni'cni huililajz rexejñpacni xtiidxni.  
 12 Che gudejd sa'ga, huijni guedx Capernaum con xnanni, rebejtzni nájza rexejñpacni. Ro'c bia'nreni tio'p-choñ dxej.

*Basia Jesucrist guidoro*

*(Mt. 21:12-13; Mr. 11:15-18; Lc. 19:45-46)*

- 13 Sa'csi abidzungajxh lanij pascw xten rexejñ Israel cheni rnalajzreni guxhijñ ni gudejd guixhajz xten yálgujt neñ Egipto, ni'c sää Jesús guedx Jerusalén.  
 14 Neñ guidoro bidxalni xhidajl bejn nani ruto' gon, xiil, palom nájza reni sobga' caguchaa melzijt.  
 15 Dxejc bejnne te chico't con gaii duu, gulääni regon con rexiil neñ guidoo. Batie'chni xcoobr rebejñ nani ruchaa melzijt, barexh-xhátni rexmexreni.  
 16 Rájpzani loj reni caguto' repalom:  
 —Colcuää redee, na'c rujntu rolizj xtadá si'c te guii cadro rdo' guiraloj.  
 17 Dxejcti banajlajz rexejñpacni xhi caj lo reguijtz ni bacuaa redade' ni gunii xtidz Dios: “Gucnaj lazä xcuent ni runnájreni rolizjzlu.”  
 18 Dxejcti gunabdiidx reni najc xpejñ Israel lojni, rájpreni:  
 —¿Xhi seen guluilu loonu ñaj te fiinu arajplu yálmibee te abejnlu recosre?  
 19 Badzu' Jesús diidxre rájpní:  
 —Colgutzujl guidoore, luxh narä neñ choñtis dxej sunchesacäni.  
 20 Rájp rexejñ Israel lojni:  
 —Tiubixho'p ijz guclaa ni guc-chee guidoore, ¿xhixh sajç gunchesacluni neñ choñtis dxej, ä?  
 21 Niluxh laani caniini xcuent guidoo ni najc lagajc tiejxhni.  
 22 Ni'cni cheni gubansacni loj rebengut, banajlajz rexejñpacni rediidxre ni guniini, dxejc huililajzreni nani caj lo rexquijtz Dios nájza rediidx ni gunii Jesús.
- Numbee Jesús guiraa rebejn*
- 23 Cheni guyu' Jesús guedx Jerusalén cadre cayajc lanij pascw, lañ ni cayajc lanijga, xhidajl rebejn huililajz xtiidxni, bahuiizareni remilagwr ni bejnne.  
 24 Luxh di Jesús nililajz xtidz rebejñga, sa'csi arumbeeni xho najc rebejñ.  
 25 Niluxh dini niqiuin chu gäb lojni xho najc bejn, sa'csi lagajc laani anancheeni xho najc lastoo tejsa bejn.

## 3

*Jesús con Nicodem*

- 1 Guyu' te niguii lo rexejñ refarisee ni laa Nicodem, najcni te beñroru loj reni rnibee rexejñ Israel.



<sup>2</sup> Te guxhijñ biädxhiga'tzni nez loj Jesús, räjpni lojni:

—Mastr, nadonnu lo Dios siäädlu si'c te ni ruluii, sa'csi rut rajcđi rujn sa' remilagwr nani rujnlu palga di Dios sunäjni.

<sup>3</sup> Dxejcti räjp Jesús lojni:

—Rniliäpac lojlu, nani di gaal stehuält, di gacđi fiini xcäl̄rnibee Dios xhaguibaa.

<sup>4</sup> Dxejcti räjp Nicodem lojni:

—¿Xho gac gaal te bejn stehuält niluxh anajcni bengool? ¿Xhixh sajc chusacni xque' xnanni stehuält te galsacni, ä?

<sup>5</sup> Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit Dxan xten Dios, di gacđi jiu'ni lo xcäl̄rnibee Dios xhaguibaa.

<sup>6</sup> Nani rajl xi'n bejn guedxliujre, ni'c najctisni bejn guedxliuj, luxh nani rajl por Sprit Dxan xten Dios, Spritza najcni.

<sup>7</sup> Na'c rdxelojlu sa'csi rniä: “Nanabpac gaallu stehuält.”

<sup>8</sup> Rbi' bej cadrotis rlajzni; riejn diajloj rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxan xten Dios.

<sup>9</sup> Badzu' Nicodem diidxre, räjpni:

—¿Xho mood sajc gac recosre?

<sup>10</sup> Räjp Jesús lojni:

—¿La najclu te maestr xten rexpejn Israel luxh dilu gan recosre, ä?

<sup>11</sup> Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu.

<sup>12</sup> Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

<sup>13</sup> 'Rut chutejdi ahuä'p xhaguibaa, xtebtis nani biäjť xhaguibaa, lagajc Xi'n Dios ni gujc Niguii.

<sup>14</sup> Lagajc si'cni guläsjiiaa to Moisés bäl̄ guuib lo yajg neñ reyubijdz, sigajcza nanab chäs Xi'n Dios ni gujc Niguii jiaa;

<sup>15</sup> te guiraa renani chalilajz xtiidxni direni nit lo Dios, sica'reni yäl̄nabajñ par tejpas.

*Xho huinälajz Dios reben guedxliuj*

<sup>16</sup> 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl̄nabajñ par tejpas.

<sup>17</sup> Sa'csi di Dios nuxhal xi'nni te gusnijtni rebejn guedxliuj, alga baxhal̄nini te laa rebejn neñ xtoj̄reni xcuentni.

<sup>18</sup> 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios.

<sup>19</sup> Ni'cni dee najc yäl̄nijtga: abiääd bianijga loj guedxliuj, biädñ Xi'n Diosni, niluxh rebejn guedxliuj bidxaglajzruren yäl̄nacäy cadro tre'reni, gulälazreni bianijga sa'csi xhet laadi najc xtzuunreni.

<sup>20</sup> Guiraa reni rujn dzunguijdx, rbälaz bianijga, dizareni guibig loj bianijga, didi gululioj bianijga rextzunguijdxreni.

<sup>21</sup> Luxh reni rusoob didxlii, rbigreni loj bianijga, te bianijga rululioj najc rextzuunreni redzunsac xten Dios.

*Rnisac Juan ni rutiobnis xcuent Jesús*

<sup>22</sup> Dxejcti biääd Jesús näjza rexpejn pacni nez lo reyuj xten Judea. Ro'c guyunäjñreni, batiobnisa rexpejn pacni rebejn.

<sup>23</sup> Juan ni Rutiobnis cagutiobnizsani bejn te lajt ni laa Enón ni tre' gajxh Salim, sa'csi ro'c yu' sijn nis. Ro'c sää rebejn lojni te cagutiobnisñreni.

<sup>24</sup> Dxejc gajdreni gusäu Juan neñ latzguuib.

<sup>25</sup> Dxejcti gusloj rexpejn Juan cayujy diidx con gaii xpejn Israel xcuent yäl̄rđiib ñaareni ni najc xcostumbr rexpejn Israel.

<sup>26</sup> Dxejc biäädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

<sup>27</sup> Dxejc badzu' Juan diidxre, räjpni lojreni:

—Nicla tej bejn digacđi ga'p te xhi cos palga di Dios gudeedni lojni.

<sup>28</sup> Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädñid lojni.”

<sup>29</sup> Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgn rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuenti.

<sup>30</sup> Nanab gacni laani beñroru, beñsajcru, biädla narä rijaļ gacä beñhuinru, ni guxiiru sajc lojni.

*Nani siääd Xhaguibaa*

<sup>31</sup> Nani siääd jiaali, ni'c rnibee guiralii, niluxh nani najc beñ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii.

<sup>32</sup> Nani bahuini, nani biejn diajgni, ni'c rusule'ni niluxh guxii rililajzreni xtiidxni.

<sup>33</sup> Nani rililajz diidx ni rusule'ni, bejnga ruluiloj guliipac najc xtidx Dios.

<sup>34</sup> Nani baxhaļ Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini.

<sup>35</sup> Dad Dios sanälajzni xingaanni, abadeedzani guiraliiti chu ladznaani.

<sup>36</sup> Nani rililajz xtidx xingaanni arajp yälñabajñ par tejpas, luxh ni di chalilajz xtidx xi'nni, dini fii yälñabajñ, siääd xcälrdxe'ch Dios yejci, sujn Dios castiigwni.

## 4

*Rdxaag Jesús te gunaa Samaria*

<sup>1</sup> Che gucbee Jesús abiejn diajg referisee xhidajlru beñ sanajl Jesús luxh guxiiru sanajl- reñi Juan, luxh cagutiobnisreni,

<sup>2</sup> (niluxh xhet Jesúsdi cagutiobnis. Rexpejñni ni catiobnis), dxejc

<sup>3</sup> biriini Judea gubisacni nez Galilee.

<sup>4</sup> Laļ ni sasajni, nanab tedni nez Samaria.

<sup>5</sup> Ni'c bidzujñni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé.

<sup>6</sup> Ro'c sojb te bisie ni rniireni "xpisie Jacobo". Sa'csi abadxajg Jesús siädsajni, gurejni ro bisiega. Agojļ läidxej.

<sup>7</sup> Bidzujñ te gunaa siädlä'pni nis, dxejc räjp Jesús lojni:

— Baniidx che'n nis yä'ä.

<sup>8</sup> Sa'csi rexpejñpacni asääreni guejdxga sasiireni xhi gaureni.

<sup>9</sup> Räjpti guna samaritanga lo Jesús:

— ¿Xho mood rniablu nis loä, luj ni najc te beñ Israel luxh narä nacä gunaa samaritan?

(Sa'csi di rexpejñ Israel chanä sa'reni rebejñ Samaria.)

<sup>10</sup> Räjpt Jesús lojni:

— Paru najnlu xhini'c najc yäjrulasajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajñ lojlu.

<sup>11</sup> Räjpti gunaaga lojni:

— Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nisnabajnga, ä?

<sup>12</sup> ¿La beñrorulu lo toxtadgoldoonu Jacobo ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

<sup>13</sup> Badzu' Jesús diidxre lojni, räjpni:

— Guiraa reni rä' nis bisiere, siojłreni stehuält.

<sup>14</sup> Luxh nani yä nis nani gudedä, diruni jiojļ, sa'csi nis nani gudedä neñ lastooni sajcni si'c te bisie nani rdatis nisini te gudeedni yälñabajñ par tejpas.

<sup>15</sup> Dxejcti räjp gunaaga lojni:

— Dad, baniidx nisga yä'ä, te na'cru jioļä, te na'cruza guibi'ä jiädlä'pä nis ree.

<sup>16</sup> Räjpt Jesús:

— Huij, huitejdx chäälu gudanäni ree.

<sup>17</sup> Räjpt gunaa loj Jesús:

— Rutı chälä.

Räjpt Jesús lojni:

— Laaca guniilu,

<sup>18</sup> sa'csi aguyu' gaili chäällu. Luxh nani rbäznäjlu naj dini gac chäällu; guliica najlu.

<sup>19</sup> Che biejn diajg gunaaga si'c, räjpni:

— Dad, rchaloä najclu te niguii ni rnii xtidx Dios.

<sup>20</sup> Retoxtadgoldoonu gojñreni Dios lo dajnre, luxh la'tu rniitu guedx Jerusalén najc cadro nanab ganni Dios.

<sup>21</sup> Räjpt Jesús lojni:

— Gunaa, huililajz xtidxä, sidzujñ or cheni nicla lo dajnre, niclaza guedx Jerusalén ditu chagajñ Dad Dios.

<sup>22</sup> La'tu rajntu Dios nani ditu gumbee, nuunu rajnnu Dios nani rumbeenu; sa'csi yäl<sub>rus</sub>laa bejn lo dojl siädä xcuent rexpejn Israel.

<sup>23</sup> Niluxh sidzujn or, luxh alabidzujn<sub>ni</sub>, che reni guliipac rajn Dad, reni'c neñ lastooreni, lo xcäriejnreni sajñreni Dios. Sa'csi sa' bejnre rguuil Dad Dios te ganrenini.

<sup>24</sup> Dios najc te Sprit. Reni rajn Dios nanab ganrenini neñ lastooreni, lo xcäriejnreni, guideb xtijpreni sa'csi rumbeerenini.

<sup>25</sup> Räj<sub>p</sub> gunaa lojni:

—Ananä siädä Mesías ni laaza Crist. Cheni jiädäni, laani susule'ni guiraliiti loonu.

<sup>26</sup> Räj<sub>p</sub> Jesús lojni:

—Narä ni caniä lojlu, nacä laani.

<sup>27</sup> Dxejc bidzujn rexpejn<sub>pacni</sub>, bidxelojreni sa'csi gunii Jesús lo gunaaga, niluxh rut gunabdiid<sub>xdi</sub> xhi rlajz<sub>ni</sub>, ni claza rut gunabdiid<sub>xdi</sub> xhini'c caninäjni gunaaga.

<sup>28</sup> Dxejcti basa'n gunaaga xtie'ni, sä'tini guedxroga. Dxejcti räj<sub>pni</sub> loj rebejn:

<sup>29</sup> —Col<sub>t</sub>aa, fiitu te niguii ni gunii loä guira'ti nani abenä. ¿La et laadi dee Crist ni cabäaznu jiädä, ä?

<sup>30</sup> Dxejc birii rebejn<sub>guejdxga</sub>, bidzujntireni lojni.

<sup>31</sup> Reni najc rexpejn<sub>pacni</sub> canabduxhreni gau Jesús, räj<sub>preni</sub>:

—Mastr, gudajw.

<sup>32</sup> Laani räj<sub>pni</sub>:

—Narä rapä xhi gauä nani ditu gumbee.

<sup>33</sup> Dxejcti räj<sub>p</sub> rexpejn<sub>pacni</sub> lo sa'reni:

—¿Xhaa yu' chu abiäd<sub>nä</sub> xhi gudajw<sub>ni</sub>, ä?

<sup>34</sup> Räj<sub>p</sub> Jesús:

—Yäl<sub>rajw</sub> xtenä najc gunä si'cni rlajz nani baxha<sub>l</sub> narä, näj guluxä xtzuunni.

<sup>35</sup> La'tu rniitu riääd<sub>x</sub> tajp bäii te guire' cose'ch. Narä rniä col<sub>guiliiläs</sub> lojtu, col<sub>fisa</sub>'c loniaa, abiquijt<sub>z</sub> regä<sub>l</sub>, agojl<sub>g</sub> guire' cose'ch.

<sup>36</sup> Nani rujn dzuun rutie' cose'ch rca'ni xcuentni, luxh ni caca'ni najc par yäl<sub>nabajn</sub> par tejpas, te tejsi guibalaznä<sub>j</sub> nani gule'c binij näj nani batie' cose'ch.

<sup>37</sup> Sa'csi guli<sub>i</sub> najc diid<sub>x</sub> nani rni<sub>i</sub> bejn, rniireni: “Tejni rbe'c binij, ste'ceni rutie'ni.”

<sup>38</sup> Narä abaxhalä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

<sup>39</sup> Xhidaj<sub>l</sub> reben<sub>u</sub> Samaria huililaj<sub>z</sub> xtidx Jesús xcuent redi<sub>id</sub>x ni räj<sub>p</sub> gunaaga lojreni che räj<sub>pni</sub>: “Guniini loä guiralii nani abenä.”

<sup>40</sup> Ni'cni, che biädä reben<sub>u</sub> gued<sub>x</sub> Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej.

<sup>41</sup> Dxejc xhidajlrureni huililaj<sub>z</sub> xtiid<sub>xni</sub> ni guniini lojpacreni.

<sup>42</sup> Dxejcti räj<sub>preni</sub> loj gunaaga:

—Dirunu chalilaj<sub>z</sub> ganaxtis xcuent diid<sub>x</sub> ni guniilu loonu, sa'csi lagajc nuure abiejn diajgnu xtiid<sub>xni</sub>, ni'c nancheenu dee najcpac ni rus<sub>laa</sub> rebejn guedxliuj loj dojl. Laani najc Crist ni cabäaznu jiädä.

*Basiajc Jesús xi'n te bejn ni rujn xtzuun gubier*

<sup>43</sup> Che gudejd tio'p dxej, biriini gued<sub>x</sub> Samaria, huinuuni xnezyujni nez Galilee.

<sup>44</sup> Sa'csi lagajc Jesús gunii, räj<sub>pni</sub>: Te bejn nani rni<sub>i</sub> xtidx Dios di reben lajdxpacni chanälaj<sub>z</sub> xtiid<sub>xni</sub>.

<sup>45</sup> Che bidzujn<sub>ni</sub> rexyuj Galilee, reben Galilee huichaglojrenini sa'csi näj laareni huijreni lanij pascw gued<sub>x</sub> Jerusalén, ro'c bahuiireni guiraa redzuun nani bejn<sub>ni</sub>.

<sup>46</sup> Gubisacni, bidzujn<sub>ni</sub> gued<sub>x</sub> Canä xten Galilee cadre bejn<sub>ni</sub> bidxaa nis guj<sub>cni</sub> bin. Dxejcti guyu' te dade' nani rujn xtzuun reii. Gued<sub>x</sub> Capernaum naga' te xi'nni cayacxhuu.

<sup>47</sup> Che biejn diajg dade'ga abirii Jesús Judea, abidzujn<sub>ni</sub> nez Galilee, huij<sub>ni</sub> lo Jesús, gunabduxhni lojni chääni te gusiaj<sub>cni</sub> xi'nni nani naga' cuentro, ameerli guet<sub>ni</sub>.

<sup>48</sup> Dxejcti räj<sub>p</sub> Jesús lojni:

—Paru ditu fi<sub>i</sub> reseen, remilagw<sub>r</sub>, ditu chalilaj<sub>z</sub> chuni'c nacä narä.

<sup>49</sup> Dade' ni rujn xtzuun reii, gunii lojni, räj<sub>pni</sub>:

—Do'o Dad, te di guet xi'nä.

<sup>50</sup> Räj<sub>p</sub> Jesús lojni:

—Huij. Di xi'nlu guet.

Huililaj<sub>z</sub> dade'ga, sä'tini.

<sup>51</sup> Che gubi'ni rolizni, birii rexmosni, huichaglojni, badeedreni diid<sub>x</sub> nabajn xi'nni.

<sup>52</sup> Dxejcti gunabdiid<sub>xni</sub>:

—¿Corti gusloj cayaj<sub>cni</sub>?

Räj<sub>preni</sub> lojni:

—Naii si'cti rcatej gudxej biriini xliaa.

<sup>53</sup> Dxejcti gucbee dade'ga lagajc orga ni räjþ Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijzni huililajzreni Jesús najc ni cabäjzreni jääd.

<sup>54</sup> Dee barojp seen ni bejn Jesús cheni biriini Judea, biu'ni Galilee.

## 5

### *Bejn Betesda nani naxu'n*

<sup>1</sup> Che gujcti recosre, guyu' te lanij xten rexpejn Israel, dxejc huij Jesús guedx Jerusalén.

<sup>2</sup> Guedx Jerusalén, gajxh ro' puert ni laa xten rexiiil, yu' te guipilro nis; xtidx hebreo laani Betesda. Cuä' guipilroga caj gaii cordoor.

<sup>3</sup> Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga

<sup>4</sup> sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, rijajcni lo xhitis yälgujdx ni rajcni.

<sup>5</sup> Ro'c guyu' te beñ racxhuu nani agujc galbitzubixhujñ ijz cayacxhuuni.

<sup>6</sup> Cheni bahuii Jesús naga'ni, badeedzani cuent lacti xchero raxchuuni, räjþni lojni:

—¿La rlanjlu jiajclu?

<sup>7</sup> —Dad —räjþ beñ racxhuuga lojni—, dina gapä chu gusäl narä neñ nis cheni rniib nisre. Cheni rlazä chachu'ä lo nis, stee bejn rujñ gaan narä, ganidni richu'ni lo nisga.

<sup>8</sup> Räjþ Jesús lojni:

—Huistie, guläs xta'lu, guzaj, huij.

<sup>9</sup> Lagajc dxejc bjaic bejnğa, guläsni xta'ni, gusloj gusajni. Niluxh dxejga najc dxej nani rusilajz rexpejn Israel,

<sup>10</sup> ni'c räjþ rexpejn Israel lo bejn ni bjaicğa:

—Nadxej najc dxej ni rusilajz bejn. Di gacdi guulu xta'lu.

<sup>11</sup> Laani räjþni:

—Nani basiajc narä, laani naj loä: “Guläs xta'lu, gusaj.”

<sup>12</sup> Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

<sup>13</sup> Dxejcti beñ racxhuu ni bjaicğa dini gaan, sa'csi gunitloj Jesús, biriini ro'c laļ ni tre' xhidajl bejn lajtga.

<sup>14</sup> Che bidxaagni Jesús stehuält neñ guidoro, räjþ Jesús lojni:

—Ahuui, naj ni abiajclu, na'c gunlu dojl stehuält, didi sajclu xhi stee ni najc cuentroru.

<sup>15</sup> Sä'ti bejnğa, huiye'tzni loj rexpejn Israel laa Jesús ni basiajcn.

<sup>16</sup> Ni'cni gusloj rexpejn Israel carinajlreni Jesús, rlanjzreni guiga'ni te ju'trenini, sa'csi rujñni redzuunga dxej ni rusilajzreni.

<sup>17</sup> Luxh räjþ Jesús lojreni:

—Xtadä Dios najli cayujñni dzuun, ni'cni näjza narä cayunä dzuun.

<sup>18</sup> Ni'cni rlanjzru rexpejn Israel ju'tni, xhet ganaxdi sa'csi rujñni dzuun dxej ni rusilajzreni, per näjza sa'csi räjþni Dios najc Xtadni, rniizani tbeļoj najcni con Dios.

### *Yälmbree xten Xi'n Dios*

<sup>19</sup> Badzu' Jesús diidxre räjþni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixгаа rujñ Xtadni dzuunga, sa'csi guira'tis dzuun ni rujñ Xtadni, dzuunga rujñza Xi'nni sigajc rujñ Xtadni.

<sup>20</sup> Sa'csi rinälajz Dad xi'nni, ruluiini lo xi'nni guiraa redzuun nani rujñni, luxh dzunroruza suluiini lojni gunni, te guidxelojtu.

<sup>21</sup> Sigajc ni rliäs Dios rebengut, rudeedni yälñabajñ lojreni, sigajcza sudeed xi'nni yälñabajñ lo renani rlanjztsini.

<sup>22</sup> Nicla Dad di gun yälguxhtis, alga badeedni guiralii yälguxhtis gun Xi'nni,

<sup>23</sup> te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxħalñ biäädni.

<sup>24</sup> Rniliä, rniliäpac lojtu, nani rucudiajg xtidxä, ni chalilajzani nani baxħalñ narä, ni'c rajpni yälñabajñ par tejpas; niluxh dini ted lo yälguxhtis, alga abiriini lo yälgujñ, agudejñni lo yälñabajñ.

<sup>25</sup> Rniliä, rniliäpac, sidzujñ or, luxh alabidzujñni, cheni siejn diajg rebengut xse' Xi'n Dios, luxh reni riejñ diajgni diidxga sibañsacreni lo rebengut.

<sup>26</sup> Si'cni rajp Dad Dios yälñabajñ lagajcsi laani, sigajcza badeedni lo Xi'nni ga'pni yälñabajñ lagajcsi laazani.

<sup>27</sup> Badeedzani lojni yälmbree te gunni yälguxhtis, sa'csi najcni Xi'n Dios ni gujc Niguui.

<sup>28</sup> Na'c rdxelojtu rediidxre, sa'csi sidzujñ or' cheni guiraa reni yu' neñ baa siejn diajgreni xse'ni

<sup>29</sup> siriizareni neñ baa. Reni bejn dzunsa'c siriireni te guibañsacreni loj yälñabañsa'c, niluxh reni bejn dzunguijdx, siriireni te guibañsacreni te tedreni lo xcälguختis Dios.

*Nani ruluiloj yälñmibee ni räjp Jesús*

<sup>30</sup> Xhet rajcdi runä lagajcsi narä. Sigajc ni riejn diagä, sigajcza runä yälguختis. Luxh yälguختis ni runä laaca najcni sa'csi dina quilä gunä nani rlazätis, rguilätis gunä si'c ni rlazj Dad nani baxhaļ narä.

<sup>31</sup> Palga narätis rniä diidx lagajc xcuentä, xhet sajcdi diidxga.

<sup>32</sup> Yu' stee nani rnilii diidx xcuentä, luxh nancheä diidx ni rniini xcuentä sacduxhni, guliipacni.

<sup>33</sup> La'tu abaxhaļtu chu huij loj Juan, huinabdiidxreni lojni "chu najc bejñga", niluxh badzu'ni diidx lojreni guniini diidx guliipac xcuent chu nacä.

<sup>34</sup> Narä dina jiuä diidx nani rnii rebejn xcuentä luxh canisacä rediidxre te laatu lo xtojltu.

<sup>35</sup> Juan gujc si'c te bajl ni ralguij, basanijzani. Luxh la'tu huihuituni bibalajztu lo xpianijni balsi dxej.

<sup>36</sup> Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtaädä gunä, lagajc redzuun ni runä, huenliisi ruluilojreni Xtaädä Dios baxhaļ narä.

<sup>37</sup> Xtaädä ni baxhaļ narä lojtu agunilii chu nacä. Gajdpactu jiejn diajg xse'ni, gajdzatu fii lojni.

<sup>38</sup> Dizatu ga'p xtiidxni neñ lastootu, sa'csi di lajztu chalii xtiidx nani baxhaļ narä.

<sup>39</sup> La'tu rolduxhtu reguijtz xten Dios sa'csi rchalotu si'c sidxäلتu yälñabajñ par tejpas, luxh lagajc reguijtzga rusule' chu narä.

<sup>40</sup> Naadditu jiäädту loä te ga'ptu yälñabajñ par tejpas.

<sup>41</sup> Narä dina quilä chu bejn guiliä'p xpala'nä nez loä.

<sup>42</sup> Luxh narä anumbeätu, ananä ditu chanälajz Dios neñ lastootu.

<sup>43</sup> Narä biälä xcuent Xtaädä, luxh ditu gucuadiajg xtidxä; paru jiääd chu stee bejn xcuentcani, ni'c sii sucuadiajgtu xtiidxni.

<sup>44</sup> Xho gac chalilajztu, ni rliä'ptu xpala'n lagajc sa'tu. Ditu quuil xho gac guiliä'p Gueb Dios xpala'ntu.

<sup>45</sup> Di naatu pet narä ni chale'cä xquejtu lo Xtaädä. ToMoisés ni chale'c xquejtu, luxh rujntu xhigab lagajc xleini gacnäj la'tu.

<sup>46</sup> Paru la'tu nililajzpacktu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz.

<sup>47</sup> Palga ditu chalilajz nani bacuaani lo reguijtz, xho chalilajztu rediidx nani caniä lojtu, ä?

## 6

*Bayaan Jesús gaii miļ niguii*

*(Mt. 14:13-21; Mr. 6:30-44; Lc. 9:10-17)*

<sup>1</sup> Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias.

<sup>2</sup> Sanajl xhidajl bejñni sa'csi rhuiireni remilagwr ni rujñni lo rebejnracxhuu.

<sup>3</sup> Dxejcti huä'p Jesús yejc te dajn, ro'c gurenäjni rexpejnpacni.

<sup>4</sup> Niluxh ameer gac lanij pascw xten rexpejn Israel, cheni rudeedreni xquixhtios lo Dios xcuent dxej ni biriireni Egipto.

<sup>5</sup> Cheni guläs Jesús lojni, bahuiini siääd xhidalduxh bejn, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

<sup>6</sup> Dxejc räjpzani si'c te don xhi xhigab gun Felipe, luxh laani anajñni xho gunni.

<sup>7</sup> Räjp Felipe lojni:

—Di tio'p gayuu beex yätxtiil gaļ te gaureni tlagaj.

<sup>8</sup> Tej rexpejnpacni ni laa Andrés, bejtz Simón Pedr, räjp lojni:

<sup>9</sup> —Ree suga' te biuux ca' gaii yätxtiil con tio'p bäjl, xhxix sajł ni'c gau rebeñ xhidajlre?

<sup>10</sup> Dxejcti räjp Jesús:

—Colyejtz loj rebejnre cuereni.

Yuduxh guixa' ro'c. Dxejcti gurej reniguii. Si'cti gaii miļ najc reniguii.

<sup>11</sup> Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rebejnpacni. Dxejcti rexpejnpacni gudisrenini loj rebejn nani sobga'. Sigajcza gudisreni rebäjł si'ctisni rlazjreni gaureni.

<sup>12</sup> Che gulujx gudajwreni, gudxaj xque'reni, dxejcti räjp Jesús loj rexpejnpacni:

—Colgutie' guiraa reyätxtilbiujy nani bia'n te xhet nitdi.

<sup>13</sup> Batie'tireni reyätxtilbiujy, guläsreni tzubitio'p dxijm yätxtilbiujy nani bia'n lo gaii yätxtiilga nani gula' gudajwreni.

<sup>14</sup> Che bahuii rebejnğa reseen, remilagwr nani bejn Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabääznu jiääd lo guedxliuj.

<sup>15</sup> Sas che gucbee Jesús cayujnreni xhigab jiädnaazrenini te niujnreni gacni reii te guinibeen lojreni, biriini ro'c, xtebni gubisacni neñ dajñ.

*Gusaj Jesús lo nisdoo*

(Mt. 14:22-27; Mr. 6:45-52)

<sup>16</sup> Che gojl guxhijn, bidzujñ rexpejn pacni lo nisdoo.

<sup>17</sup> Biu'reni neñ te barcw te tedreni lo nisdoo nez guedx Capernaum. Abicäy lo yuj niluxh gajd Jesús guibi' lojreni te chääni.

<sup>18</sup> Gusloj cayäjs nisdoo xcuent te beduxh nani cabi'.

<sup>19</sup> Ni'cni che gusajreni si'cti gaii o xho'p kilómetro, bahuiireni siädzungajxh Jesús lo barcw, lo nisdoo siädsajni. Bidxebduxhreni.

<sup>20</sup> Luxh laani räjpni lojreni:

—Naräni. Na'c guidxejbtu.

<sup>21</sup> Dxejcru cuäjbreni biu'ni neñ barcw. Dxejcti bidzungajczeni stelaad lo yuj cadro sääreni.

*Caguuil rebejn Jesús*

<sup>22</sup> Che bara yääl, rebejn nani bia'n stelaad ro' nisdoo, bahuiireni asanä rexpejn pacni barcw bääz nani suga' ro'c, niluxh di Jesús nij, xtebsireni sääreni.

<sup>23</sup> Luxh bidzungajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixtios lo Dad.

<sup>24</sup> Che bahuii rebejn ruti Jesús ro'c, niclaza rexpejn ni, biu'reni neñ rebarcw, sääreni guedx Capernaum satiilreni Jesús.

*Jesús najc yätxtiil xten yälñabajn*

<sup>25</sup> Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujñ lu ree?

<sup>26</sup> Badzu' Jesús diidxre, räjpni lojreni:

—Rniliä, rniliäpac lojtu, caguuiltu narä sa'csi gudajwtu, gudxaj xque'tu, et sa'csi bahuiid-itu remilagwr nani benä.

<sup>27</sup> Na'c guntu dzuun ganax par yälñajw nani rnitloj. Coljejn dzuun par yälñajw nani di nitloj, ni runiidx yälñabajn par tejpas. Yälñajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

<sup>28</sup> Dxejcti räjpreni:

—¿Xhini'c jiennu te gac jienpacnu dzuun ni rlanj Dios?

<sup>29</sup> Räjp Jesús lojreni:

—Dee najc ni rlanj Dios guntu: chalilajztu xtidx narä, nani baxhañ.

<sup>30</sup> Räjpreni lojni:

—¿Xhi seen gunlu te guihuiinu xcälñibeelu te cholilajznu xtiidxlu? ¿Xhi dzuun rujñlu?

<sup>31</sup> Retoxtadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

<sup>32</sup> Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtädi ni suniidx yätxtiil nani siädapac xhaguibaa.

<sup>33</sup> Sa'csi yätxtiil xten Dios najc bejn ni siäd xhaguibaa, niluxh laani rudeedni yälñabajn par tejpas loj rebeñ guedxliuj.

<sup>34</sup> Räjpreni:

—Dad, baniidx yätxtiilga loonu.

<sup>35</sup> Dxejcti räjp Jesús lojreni:

—Narä nacä yätxtiil xten yälñabajn nani riäjñ jiäd; chutis ni jiäd loä diruni guiliaan, niluxh chutis ni rililajz xtidxä diruni jiojñ par tejpas.

<sup>36</sup> Aguniä lojtu, la'tu ditu chalilajz, luxh abahuiitu loä.

<sup>37</sup> Guiraa renani abaniidx Xtädi loä, siädni loä, niluxh chutis ni jiäd loä dina cuälazäni.

<sup>38</sup> Sa'csi narä siälä xhaguibaali te gunä si'c ni rlanj Xtädi, xhet si'cdi ni rlazädi.

<sup>39</sup> Dee najc ni rlanj Xtädi nani baxhañ narä: na'c nit nicla tej renani baniidxni loä, te guspansacä guiragajczeni che gal dxej lult ni riäjñ jiäd.

<sup>40</sup> Scree rlanj nani baxhañ narä: guiraa renani fii lo Xi'n Dios, näj chalilajzreni xtiidxni, xca'reni yälñabajn par tejpas niluxh narä suspansacäreni che gal dxej lult ni riäjñ jiäd.

<sup>41</sup> Rediidxre bejn gusloj casiey rexpejn Israel xcuent Jesús sa'csi räjpni: “Narä nacä yätxtiil ni biäjt xhaguibaa.”

<sup>42</sup> Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtñi?

<sup>43</sup> Dxejc räjp Jesús lojreni:

—Na'c rusieinäj sa'tu.

<sup>44</sup> Rut rajcdi riääd loä palga di Xtadä ni baxhaļ narä jäädñäni loä, te guspañsacäni che gaļ dxej lult ni riäļl jääd.

<sup>45</sup> Loj reguijtz ni bacuaa redade' ni gunii xtidx Dios caj scree: “Sului Dios guiraareni.” Ni'cni guiraa reni rucudajg xtidx Xtadä, reni rsiheed lojni, reni'c ni jääd loä.

<sup>46</sup> 'Dinä guiniä yu' chu abahuii lo Dios; tejtis ni abahuii lojni: nani baxhaļ Dios, ni'ctis abahuii lojni.

<sup>47</sup> Rniliä lojtu che rniä: nani chalilajz xtidxä, ni'c rajp yälnabajñ par tejpas.

<sup>48</sup> Narä nacä yätxtiil nani rudeed yälnabajñ.

<sup>49</sup> Retoxtadtu gudajw mana ni bastejb Dios lo reyubijdz, dxejcti gujtzareni.

<sup>50</sup> Dee najc yätxtiil ni siääd xhaguibaa, te chutis ni gau yätxtiilga dini guet.

<sup>51</sup> Narä nacä yätxtilbajñ ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' reben guedxliuj yälnabajñ najc lagajc bältiexhä.

<sup>52</sup> Dxejcti gusloj casiey rexpejn Israel räjpreni:

—¿Xho gac guniidx dee bältiejxhni guidaunu, ä?

<sup>53</sup> Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejñni, digacdi ga'ptu yälnabajñ.

<sup>54</sup> Nani gau bältiexhä, nani yäza xtienä, ni'c rajp yälnabajñ par tejpas, niluxh suspañsacäni che gaļ redxej lult.

<sup>55</sup> Sa'csi bältiexhä najc te yälrausa'cpac, xtienä najcza te yälräsa'cpac.

<sup>56</sup> Nani gau bältiexhä, nani yäza xtienä, ni'c yu'pac con narä, luxh narä yu'äza con laani.

<sup>57</sup> Xtadä ni baxhaļ narä rajp yälnabajñ par tejpas. Narä nabañä xcuent laani. Sigajcza nani rajw narä, sibajñzani xcuent narä.

<sup>58</sup> Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajñni par tejpas.

<sup>59</sup> Recosre baluii Jesús neñ te guidobäz laļ ni guyu'ni guedx Capernaum.

### *Diidx xten yälnabajñ par tejpas*

<sup>60</sup> Che biejn diajgreni si'c, xhidajļ rexpejñpacni räjp:

—Naganduxh najc rextiidxni. ¿Chu laa nani gac cuadiajgñi?

<sup>61</sup> Dxejcti guchee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä?

<sup>62</sup> ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo?

<sup>63</sup> Sprit xten Dios najc ni rudeed yälnabajñ; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälnabajñ par tejpas.

<sup>64</sup> Luxh laļtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladzña reben doļl.

<sup>65</sup> Dxejcti räjpni:

—Ni'cni rniä lojtu, nicla tej rut sajcdi jääd loä palga di Xtadä jäädñäni loä.

<sup>66</sup> Lagajc dxejc gusloj cabicaj xhidajļ rebejn ni agujc xchej gusanäj Jesús, dirureni nisanäj Jesús.

<sup>67</sup> Dxejcti räjp Jesús loj guidzubitio'p rexpejñpacni:

—¿La nāgajcza la'tu rļajztu jiitu, ä?

<sup>68</sup> Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yälnabajñ par tejpas.

<sup>69</sup> Nuure abiolilaaazu, anajñnu najclu Crist Xi'n Dios nani nabajñ.

<sup>70</sup> Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtu najc bendxab.

<sup>71</sup> Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejñpac Jesús.

<sup>1</sup> Che gujcti recosre, cansaj Jesús nez reyuj xten Galilee, di rlanjni jia'nni nez reguedx Judea sa'csi rlanjn reben ro'c ju'tni.

<sup>2</sup> Luxh ameer gal lanij xten cose'ch xten guidoguijd, te relanj xten rexpejn Israel.

<sup>3</sup> Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejnpaclu fii redzunro nani rujnlu.

<sup>4</sup> Sa'csi rut rujndi xtzuumni xhiga'tz palga rlanjni gacbee bejn xhi dzuun rujnni, te gumbee bejn. Palga rujnpuclu redzuunre, baluini lo guiraa reben guedxliuj.

<sup>5</sup> Guniireni si'c lojni sa'csi nicla rebejtzni di chalilajz xtiidxni.

<sup>6</sup> Dxejcti räjp Jesús lojreni:

—Gajd xhorä guidzujn, niluxh par la'tu xhitis oꝝ najc hueen.

<sup>7</sup> Di gacdi guidxe'ch reben guedxliuj lojtu, luxh rdxe'chreni loä sa'csi narä rniliä xcuentreni: dzunguidx najc xtzuumreni.

<sup>8</sup> La'tu colchäj lanij; narä dina cha'a lanijga sa'csi gajd xhorä gal.

<sup>9</sup> Che gulujx guniini si'c lojreni bia'ntini nez Galilee.

### *Huij Jesús lanij xten retabernaculos*

<sup>10</sup> Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni.

<sup>11</sup> Dxejcti caguuil rexpejn Israelni lo lanijga, räjpreni:

—¿Concha niguiiga?

<sup>12</sup> Lo rebejn xhidaalga yu' xhidajl bejn ni cagusieyreni xcuentni. Yu'reni räjp: “Hueen najcni”, per sgaaiireni räjp: “Dini gac hueen. Cagusgueeni rebejguejdx.”

<sup>13</sup> Nicla tejreni xhet casäbdiidxireni xhini'c caniireni. Direni guinii dip sa'csi rdxejbrejni rexpejn Israel nani rnibee.

<sup>14</sup> Agurojl lanij, che biu' Jesús nen guidoro. Dxejcti gusloj caguluiini.

<sup>15</sup> Dxejcti rdxeloy rexpejn Israel nani rnibee, räjpreni:

—¿Xho najn dee guiraloy, niluxh dini nisieed xleii toMoisés?

<sup>16</sup> Badzu' Jesús diidxre, räjpni:

—Yälrluii nani caluiyā et xtenādini, xten nani baxhal naräni.

<sup>17</sup> Palga yu' chu rlanj gun nani rlanj Dios, sacbeeni la xten Dios najc reyälrluii xtenä, o la lagajcsi narä rbää diidx ni caguluiä.

<sup>18</sup> Nani rusule'ni diidx nani lagajc laani rbääni, ni'c rniini diidxga te guiliä'p rebejn xpala'nni, luxh nani rguuil chā'p xpala'n nani baxhalni, ni'c ni rni diidxlii, xheti yälrusguee nen lastooni.

<sup>19</sup> ¿La di toMoises nuniidx leii lojtu, ä? Niluxh nicla tejtü di gusoob xtidx leiiga. ¿Xhicuent rlanjtu ju'ttu narä, pes?

<sup>20</sup> Badzu' reben xhidajlga diidxre, räjpreni:

—¿Xpriet bendxab yu' lastoolu! ¿Chuni'c rlanj ju'tlu?

<sup>21</sup> Badzu' Jesús diidxre lojreni, räjpni:

—Tejtis dzuun benä con xcälrnibeä, dxejc guiraatu cadxelojtu sa'csi benäni dxej ni rusilajtu.

<sup>22</sup> Ni'cni baniidx toMoisés lojtu yälru'tu bee, luxh etlaadini guläxtejnini, agac guläxtej retoxtaggoldootuni. La'tu rusälü bee rebiuux mase najcni dxej nani rusilajtu.

<sup>23</sup> Mbaj pes, palga rajc rusälü bee bejn te dxej nani rusilajtu didi nit xleii Moisés, ¿xhicuent rdxe'chtu loä sa'csi basiacäpac te bejn te dxej nani rusilajtu, ä?

<sup>24</sup> Na'c rujntu yälguhtis si'ctis ni rlanjtu. Colejyn yälguhtis con yälguhtis xten Dios.

### *Rusule' Jesús casiädäni*

<sup>25</sup> Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguuilreni te ju'trenini, ä?

<sup>26</sup> Ani asuga', caniini nez loj guiraa rebejguejdx, niluxh rut rudxojdini. ¿Xhaa ahuililajz reguhtis, regubier laani najcpacni Crist, ä?

<sup>27</sup> Niluxh nuure nadoncheenu caro siädä niguiire, niluxh che jiaäd Crist, rut gacbeedi caro siädäni.

<sup>28</sup> Caguluii Jesús nen guidoo che biejn diajgni rediidxre, dxejc dipdux guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajnni, luxh la'tu ditu gumbeeni.

<sup>29</sup> Luxh narä numbeäni, sa'csi lojni biriä, laani baxhalzani narä.

<sup>30</sup> Dxejc rlanjreni niniaazrenini, niluxh rut gunaazdini, sa'csi gajd xhoräni gal.

<sup>31</sup> Xhidajl bejn lo reben xhidajlga huililajz xtiidxni, dxejcti räjpreni:

—Cheni jiaäd Crist, ¿xhixh sujnrni milagwr loj nani rujn dee, ä?

### *Ruxhal refarisee guixhajz guiniaaz Jesús te jiaäni*



<sup>32</sup> Che biejn diaj referisee xhi canii rebejn xcuent Jesús, laareni nájza rebixhojz nani rnibee lo rebixhojz baxhaḷreni guixhajg te guiniaazreni Jesús te jiáuuni.

<sup>33</sup> Sas rájþ Jesús lojreni:

—Bale'si dxej su'á lojtu, dxejcti guibi'á loj nani baxhaḷ nará.

<sup>34</sup> Siguiiltu nará, niluxh ditu guidxäl nará, sa'csi cadro cha'á digacdi jiáädtu.

<sup>35</sup> Ni'c gunii rexpejn Israel lo sa'reni; rájþreni:

—¿Cacharo chááni ni'c di gacdi guidxälnumi? ¿Xhaa sijni loj rexpejn Israel nani nare'ch nez lajdx regriegos te guluiini regriegos?

<sup>36</sup> ¿Xhi säloj diidxre nani guniini loonu: “Siguiiltu nará, niluxh ditu guidxäl nará, sa'csi cadro cha'á di gacdi jiáädtu?”

#### *Regueu nisnabajn*

<sup>37</sup> Lult dxe lanij, ni najc dxero, gusulii Jesús dipduxh guniini, rájþni:

—Palga yu' chu cayojḷ, sujiáädni loá te yáni.

<sup>38</sup> Nani chalilajz xtidxá si'cni caj lo rexquijtz Dios neñ lastoolini siliejn nisnabajn.

<sup>39</sup> Rediidxre guniini xcuent Sprit Dxaan nani churu jiáädlájz neñ lastoo reni rililajz xtiidxni, sa'csi gajd Sprit Dxaan jiáäd, sa'csi gajd Jesús guibansac lo rebengut.

#### *Gucgala' rebejn*

<sup>40</sup> Lo rebeñ xhidajlga yu' reni biejn diajgreni rediidxga, dxejc rájþreni:

—Gulii pacni, dade're najc laapac ni siáäd, si'c ni rnii xtidx Dios.

<sup>41</sup> Yu'zarení rájþ:

—Dade're najc Crist ni cabááznu.

Yu'za sgaii ni rájþ:

—Gurniálojtu jiáäd Crist nez Galilee.

<sup>42</sup> Ni loj rexquijtz Dios caj riájḷpac gac Crist te rexagdoó to'reii David, jiáädzani guedx Belén, lagajc guejdx cadro siáäd to'reii David.

<sup>43</sup> Dxejcti gucgala' rebejn xcuent Jesús.

<sup>44</sup> Yu'reni rlajz chááni pres luxh rut biajxdi gunaazni.

#### *Di reguxhtis chalilajz biáäd Crist*

<sup>45</sup> Gubi' reguixhajg xten guidoo loj rebixhojzro nájza referisee. Dxejcti gunabdiidxreni loj reguixhajg, rájþreni:

—¿Xhicuent ditu niáädnáni?

<sup>46</sup> Badzu' reguixhajg diidxre, rájþreni:

—¡Gajdpac te bejn guinii si'cni rnii bejnḡga!

<sup>47</sup> Dxejc rájþ referisee:

—¿La náj la'tu abasgueeni, á?

<sup>48</sup> ¿Xhixh loj regubier o loj referisee yu' chu tej ni ahuililajz xtiidxni, á?

<sup>49</sup> Reben xhidajlre ni di gan xleii toMoisés, reni'c agunijtpac.

<sup>50</sup> Nicodem, nani huij lojni te guxhijn, najc te referisee. Laani rájþni lojreni:

<sup>51</sup> —Lo xleinu caj: digacdi guntu yálguxhtis te bejn palga gajdtu gucuadiagxgaa xtiidxni, te don xhi bejnii.

<sup>52</sup> Badzu'reni diidxre rájþreni lojni:

—¿La nájza luj siáädlu Galilee, á? Biḷsa'c xhi caj lo xquijtz Dios, suhuiilu nicla tej niguii nani rnii xtidx Dios di jiáäd nez Galilee.

#### *Gunaa nani biga' carälguixh con te niguii*

<sup>53</sup> Dxejc cade tejreni sii rolizjreni.

## 8

<sup>1</sup> Dxejcti huij Jesús nez dan Oliib.

<sup>2</sup> Rsilru gubi'ni, bui'ni neñ guidoo. Luxh sanuutis siáäd guiraa rebenguejdx lojni. Dxejc ro'c gurejni, gusloj caguluiinireni.

<sup>3</sup> Dxejcti biáäd referisee nájza rebeñ najn, biáädnáreni te gunaa nani biga' carälguixh con te niguii. Basujrenini galáii reni suga' ro'c.

<sup>4</sup> Rájþreni loj Jesús:

—Mastr, gunaaare biganáj te niguii carälguixh'reni, niluxh yu' cháälmi.

<sup>5</sup> Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

<sup>6</sup> Si'c rájþreni lojni te gaxájsi gunijtni te diidx te gac cue'reneni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani.

<sup>7</sup> Dxejc sanuutis'reni canabdiidx'reni, huisutini, rájþni:

—Nani yu' lojtu ni xhettipac xtojḷni, ni'c ganiddoo sugucuaani guij yejc gunaaare.

<sup>8</sup> Basabsac lojni lo yuj sanuutis cagucuaani con bicueñaani lo yuj.

<sup>9</sup> Luxh laareni che biejn diajgrenti diidxga, sa'csi yu' xtojłreni, gusloj biriireni tebgajreni, ganid ni najc beŋgolru, dxejcti ni najc huinru. Dxejcti bianxteb Jesús nájza gunaa ni suga' galáiiireni.

<sup>10</sup> Dxejc gusulii Jesús, luxh sa'csi rutru lojdi bahuiini, xtebtis gunaaga, rájpmi lojni:

—Guna, ¿con reni cabe'c xquejlu? ¿La rut bacuaquiđiru luj, ä?

<sup>11</sup> Rájpmi Gunaaga:

—Nicla tejreni, Dad.

Dxejcti rájpmi Jesús lojni:

—Niclaza narä dina gucuaquiäru luj. Huij, na'cru gunlu dojl.

*Jesús najc bianij xten guedxliuj*

<sup>12</sup> Gunii Jesús lo rebejn stehuält, rájpmi lojreni:

—Narä nacä bianij xten guedxliuj; nani jiädnajl narä dini sa lo yälnacäy, sica'ni bianij ni rudeedpac yäl nabajñ.

<sup>13</sup> Dxejcti rájpmi refarisee lojni:

—Luj canilu diidx lagajcsi xcuentlu. Xhet sajcdi sa' diidxga.

<sup>14</sup> Badzu' Jesús diidxre, rájpmi lojreni:

—Masque lagajc narä rniä diidx xcuentä, sajcdi xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä.

<sup>15</sup> La'tu rutnjntu yälguختis si'c najctis rexhigab xten beŋ guedxliuj. Narä rut lojdi runä yälguختis.

<sup>16</sup> Palga gunä yälguختis, yälguختis xtenä laaca najcni, sa'csi et xtebädi runä yälguختis, sa'csi narä náj Xtadä ni baxhał narä riennuni.

<sup>17</sup> Luxh lo xleiitu caj diidxre: “Che rniü tio'p bejn tejsi diidx, didxliini, cołchalilajzni.”

<sup>18</sup> Narä rniiliäpac diidx lagajc xcuentä, dxejcti Xtadä nani baxhał narä rniiliizani diidx xcuentä.

<sup>19</sup> Rájpmi loj Jesús:

—¿Caro yu' xtadlu?

Rájpmi Jesús lojreni:

—Ditu gumbee nicla narä, niclaza Xtadä; paru niembeetu narä, niembeeatu Xtadä.

<sup>20</sup> Rediidxre gunii Jesús cadro re' gojn, lał ni caguluini neŋ guidoro niluxh rut gunaađdini sa'csi gajd xhořni guidujñ.

*Cadro cha'ä, la'tu digacđi jiäđtu*

<sup>21</sup> Gunisac Jesús lojreni, rájpmi:

—Narä sia'ä, luxh la'tu siguiiltu narä, niluxh loj xtojłtu sejtto. Cadro cha'ä di gacđi jiäđtu.

<sup>22</sup> Rájpmi rexpejn Israel loj resa'reni:

—¿Xhaa sugu'tni lagajc laani, ni'cni najni di gacđi chonnu cadro chääni?

<sup>23</sup> Rájpmi Jesús lojreni:

—La'tu najctu beŋ lo yuj. Narä nacä beŋ ni siääd jiaa. La'tu najctu beŋ guedxliujre. Luxh narä dina gacätis beŋ guedxliujre.

<sup>24</sup> Ni'cni guniä lojtu, sejtto lo xtojłtu sa'csi palga ditu chalilajz nacä chu nacä, sejtpectu lo xtojłtu.

<sup>25</sup> Dxejcti rájpmi lojni:

—¿Chuxh najclu?

Dxejcti badzu' Jesús diidxre lojreni, rájpmi:

—¿Xhini'c guniä lojtu galooli?

<sup>26</sup> Xhidajł diidx rlazä guiniä, xhidajłza yälguختis rlazä gunä xcuenttu sa'csi ditu chalilajz, per nani baxhał narä najc beŋ guliipac; nani biejn diagä guniini, rediidxga rniä loj reben guedxliuj.

<sup>27</sup> Luxh laareni direni niacbee la xcuent Dad Dios ni caniini.

<sup>28</sup> Ni'cni rájpmi Jesús lojreni:

—Cheni guiliästu Xi'n Niguii jiaa, dxejc sacbeetu laa narä ni baxhałni, luxh xhetliidi runä lagajcsi xcuentä. Si'cni baluii Dad narä, si'ctis rniä.

<sup>29</sup> Nani baxhał narä saganäjmi narä. Gajd Dad gusanxteb narä, sa'csi runätis ganax redzuun nani rchaglazni.

<sup>30</sup> Lał ni caniini si'c, xhidajłreni huililajz xtiidxni.

*Rexi'n Dios con remos xten dojl*

<sup>31</sup> Dxejcti rájpmi Jesús lo rexpejn Israel nani huililajzga:

—Palga la'tu sutijptu, guzooobtu xtidxä, dxejc guliipac najctu xpeñä.

<sup>32</sup> Sumbeeatu nani najc didxgulii, niluxh didx guliiga suslaa la'tu lo xtojłtu.

<sup>33</sup> Rájpmi lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?

<sup>34</sup> Räjƿ Jesús:

—Riniliä, rniliäƿac lojtu, chutis ni rujn dojl najc mos xten dojl.

<sup>35</sup> Nani najc mos, dini jia'n rolijz xlamni guideb guibajñni, niluxh nani najc xi'n lamga, ni'c sii sia'n rolijz xtadni guideb guibajñni.

<sup>36</sup> Ni'cni, palga ruslaa xi'nni la'tu lo dojl, dxejcsii apac guľaatu.

<sup>37</sup> Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu.

<sup>38</sup> Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.

<sup>39</sup> Badzu'reni diidxre, räjpreni lojni:

—Xtadnu najc toAbraham.

Dxejc räjƿ Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham.

<sup>40</sup> Luxh naj rlanjtu ju'ttu narä, sa'csi rniliä rediidx nani baluii Dios loä. ¡Di toAbraham niujn si'c!

<sup>41</sup> La'tu rujntu xtzuum xtadtu.

Dxejc räjpreni lojni:

—Nuure dinu gac xi'n chälbejñdi; nuure tejtis xtadnu yu', laani najc Dios.

<sup>42</sup> Dxejcti räjƿ Jesús:

—Paru guiliini najc xtadtu Dios, ninälajtu narä sa'csi loj Dios biriä siälä ree. Xhet lagajcsi xcuentä siälädi; Dios baxhal narä.

<sup>43</sup> ¿Xhicuent ditu gachee rediidx ni rniä lojtu? Sa'csi di rlanjtu gucuadijgtu rextidxä.

<sup>44</sup> Xtadtu najc beñdxab. La'tu najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii nen lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtad didx-xhii.

<sup>45</sup> Niluxh narä rniä didxlii, ni'c ditu chalilajz xtidxä.

<sup>46</sup> ¿Chu tejtı sajc guluii te dojl ni benä? Narä rniä didxlii. ¿Xhicuent ditu chalilajz xtidxä, ä?

<sup>47</sup> Nani najc xpejñ Dios, ni'c rucuaadijg xtidx Dios. Sa'csi la'tu ditu gac xpejñ Dios, ni'cni ditu gucuadijg xtidxä.

*Ansde toAbraham, agac nabajñ Crist*

<sup>48</sup> Dxejcti badzu' rexpejñ Israel diidxre, räjpreni lojni:

—Laaca rniinu luj najclu te bejn ni siädä Samaria, beñdxab yu' lastoolu.

<sup>49</sup> Räjƿ Jesús lojreni:

—Xhet beñdxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä.

<sup>50</sup> Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani rujñni yalguxhtis.

<sup>51</sup> Rniliäƿac lojtu, nani riu, nani rusoob xtidxä, dipacni guet.

<sup>52</sup> Dxejcti räjƿ rexpejñ Israel lojni:

—Naj agucbeepacnu yu' beñdxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.”

<sup>53</sup> ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

<sup>54</sup> Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtıostu.

<sup>55</sup> Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni.

<sup>56</sup> ToAbraham toxtadgoldootu, bibalajzni sa'csi nuhuiini dxej nani jiälä, niluxh bahui-inini dxejc bibalazduxhni.

<sup>57</sup> Dxejcti räjƿ rexpejñ Israel lojni:

—Nicla gajdlu chu tiubitzuu ijz, ¿xho naalu abahuiilu lo toAbraham?

<sup>58</sup> Räjƿ Jesús lojreni:

—Rniliäƿac lojtu, che gajdli guibajñ toAbraham, agac nabanä narä.

<sup>59</sup> Dxejcti cua'reni guij te nucuaareni yejc Jesús, per di Jesús niga', biriini nen guidoro, gudejdni galäiireni. Sä'tini.

## 9

*Basiajc Jesús te bejn ni natiä'p balojni che gojllini*

- 1 Che cadejd Jesús te lajt, bahuiini sobga' te bejn ni che gojlli bejnğa agajc natiä'p balojni.  
 2 Dxejc gunabdiidx rexpejn pacni lojni, räjpreni:  
 —Mastr, ¿chuni'c bejn dojl, la bejnre o la xczuzajnni, ni'c natiä'p balojni che gojlni, ä?  
 3 Räjp Jesús:  
 —Niçla laani, niçlaza xczuzajnni di niujn dojl. Si'c gojlni te xcuent ni sajç bejnre suhuii bejn xho najç xtzuum Dios.  
 4 Nanab gunä xtzuum nani baxhaļ narä naj ni najç rdxee, sa'csi çeni guidzujn guxhijn rut gacdi gun dzuun.  
 5 Laļni yu'ä lo rebejn guedxliuj, nacä xpianij guedxliuj.  
 6 Che gulujx guniini si'c, batiobxhejnni lo yuj, bejnni bajn con xhejnni, gudääbnini con bicuenaani lo rebaloj lotiä'pga.  
 7 Dxejcti räjpni:  
 —Huij, huitiib lojlu nen nis ni laa Siloé. Laj nisga sälojza “baxhaļni”.  
 Dxejcti huijni. Huitiibni lojni. Che gubi'ni, aruhuiini.  
 8 Dxejcti rexpişin lotiä'pga, näj renani galoo bahuiireni natiä'p lojni, räjpreni:  
 —¿La et laadi dee ni rbej te rutie'ni gojn, ä?  
 9 Yu'reni räjp:  
 —Laanini.  
 Yu'zareni räjp:  
 —Et laadini, rujnsi lojni si'c.  
 Laani räjpni:  
 —Laa naräni.  
 10 Räjpreni lojni:  
 —¿Xho mood arien balojlu?  
 11 Dxejcti räjp dade'ga nani gujç lotiä'p:  
 —Dade' ni laa Jesús bejn bajn, gudääbnini baloä, dxejcti najni: “Huitiib lojlu nen te nis ni laa Siloé”, dxejcti che huitiibä loä, lagajc dxejc bien loä.  
 12 Dxejcti räjpreni lojni:  
 —¿Con dade'ga najç?  
 Räjpti bejnğa:  
 —Dina ganä.

*Reben farisee bejn yälgunabdiidx lo dad lotiä'p nani biajç lojni*

- 13 Huinäreni nani gujç lotiä'pga nez loj refarisee.  
 14 Luxh sa'csi najçni dxej ni rusilajzreni che bejn Jesús bajn ni gudääbni loj lotiä'pga te biajç balojni,  
 15 gunabdiidxsac refarisee loj dade' nani biajç balojni, xho mood arien balojni naj.  
 Laani räjpni lojreni:  
 —Bajn gudääbni loä, dxejc gudibä loä, naj aruhuiä.  
 16 Dxejc yu' refarisee ni räjp:  
 —Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.  
 Yu'zareni räjp:  
 —¿Xho gac gunni sa' remilagwrga paru najçni bejn dojl?  
 Ni'cni gula' sa'reni, gujçreni tio'p gala'.  
 17 Dxejcti gunabdiidxsacreni lo ni gujç lotiä'p:  
 —Luj a', ¿xhi rniilu xcuent nani basiajç balojlu?  
 Dxejc räjp dade'ga:  
 —Narä rniä najçni te bejn nani rniitidx Dios.  
 18 Luxh rexpejn Israel naaddireni çhalii lajzreni gujçpacni te lotiä'p ni abien balojni, dxejcti gurejdxreni xczuzajn dade' ni gujç lotiä'pga.  
 19 Dxejcti gunabdiidxreni lojreni, räjpreni:  
 —¿Laa xi'ntu dee nani najtu çeni gojllini natiä'p lojni? ¿Xhoxh arien lojni najç?  
 20 Badzu' rexçuzajnni diidxre, räjpreni:  
 —Nadonnu laa xi'nnuni, luxh che gojlni natiä'p lojni.  
 21 Niluxh dinu guidon naj xho mood arien lojni, dizanu guidon çu basiajç balojni. Colguiniabdiidx lojni, anajçni beņgool, lagajç laani sajç guiniini xhi gusajçni.  
 22 Si'c gunii xczuzajnni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' nen guidoo çutis te bejn ni naa Jesús najç Crist nani abiää.  
 23 Ni'cni räjp rexçuzajnni:  
 —Anajçni bi'n ni ayu' xçäriejnni. Lojni colguiniabdiidx.  
 24 Dxejcti guredxsacreni nani gujç lotiä'pga, räjpreni lojni:  
 —Gulä'p xpala'n Gueb Dios. Nuure nadonnu bejn dojl najç dade'ga.

- <sup>25</sup> Dxejcti badzu' dade'ga diidxre, räjpni:  
—Dina ganä la najcni beṇ dojl o la dini gac. Tejtis nanä: gucä lotiä'p, luxh naj arienṇ baloä.
- <sup>26</sup> Stehuält gunabdiidxreni, räjpreni lojni:  
—¿Xho bennäjni luj? ¿Xho bejnini basiajcnj baloju?
- <sup>27</sup> Badzu' dade'ga diidxre, räjpni:  
—Ni aguniä guira'ti lojtu, luxh la'tu ditu jiu xtidxä. ¿Xhicient rlanjtu guinisacäni? ¿Xhixh naj la'tu rlanjtu gactu xpejnṇpacni, ä?
- <sup>28</sup> Dxejc gudilnäjrenini, räjpreni:  
—Luj najclu xpejnṇni, per nuure najcnu xpejn toMoisés.
- <sup>29</sup> Anadonnu guninäj Dios toMoisés, niluxh dade're dinu guidon casiäädni.
- <sup>30</sup> Dxejcti räjp dade' lojreni:  
—Dee najc te cos ni guidxeloj bejn: la'tu ditu gan casiäädni, ṇiluxh laani basiajcnj baloä!
- <sup>31</sup> Nadoncheenu di Dios cuadiajg xtidx rebenṇ dojl; palga yu' chu rajṇ Dios, ni rusooobza xtiidxnj, rucuardiajg Dios xtidx sa' bejnṇa.
- <sup>32</sup> Che guslojli guedxliuj gajd diajgnu jiejn xcuent te bejn nani rusiajcnj baloṇ te beṇ lotiä'p nani natiä'p lojni cheni gojllini.
- <sup>33</sup> Palga xhet lo Diosdi siääd dade're, xhet sajcdi gunni.
- <sup>34</sup> Badzu'reni diidxre räjpreni lojni:  
—Luj, lo dojlṇpac gojllu, ¿xho jädluilu nuure?  
Dxejcti guläärenini neṇ guidoro, barilaagwrenini.
- <sup>35</sup> Biejn diajg Jesús guläärenini neṇ guidoro, che bidxälṇnini, räjpni lojni:  
—¿La rililajzlu xtidx ni najc Xi'n Dios ni gujc Niguii, ä?
- <sup>36</sup> Badzu'ni diidxre, räjpni:  
—¿Chuni'c najcni, Dad, te chalilazä xtiidxnj?
- <sup>37</sup> Räjp Jesús:  
—Abahuilu lojni, lagajcza laani caninäjlu naj.
- <sup>38</sup> Dxejcti räjpni:  
—Rililazä Dad.  
Dxejcti bazuxhijbni te gojnṇnini.
- <sup>39</sup> Räjp Jesús:  
—Par yälguختis biälä lo guedxliujre, te fii renani di lojni jienṇ, niluxh reni rienṇ lojni sajcreni lotiä'p.
- <sup>40</sup> Refarisee nani suganäjreni, che biejn diajgreni diidxre, räjpreni:  
—¿Xhixh najczanu beṇ lotiä'p, ä?
- <sup>41</sup> Räjp Jesús:  
—Paru najctu lotiä'p, rut gucuaquijditu xtojltu, naj sa'csi rniitu rienṇ lojtu, sicaquijtu rextojltu.

## 10

### *Jesús najc te baxtorsa'c*

- <sup>1</sup> Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan.
- <sup>2</sup> Nani riu' nez ro' gurajl xten rexiil, laani najc xpaxtoorreni.
- <sup>3</sup> Che guidzujṇ baxtoor, ruxhal nani rcanäj ro lä', te jiu'ni. Rexiilga numbeerene xse' baxtoor, dxejctiru laani rbejdxni rexiilga, tebgaj xilga yu' lajni, rinäzanireni cadro naga' guixasa'c.
- <sup>4</sup> Che rii rexiilga neṇ gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga.
- <sup>5</sup> Luxh dipacreni chanä te baxtoor nani direni gumbee, ruxuṇreni lojni sa'csi direni gumbee xse' garenca bejnṇ.
- <sup>6</sup> Bij Jesús rediidxga lojreni, niluxh direni niacbee xhi säloj ni guniini.
- <sup>7</sup> Dxejcti gunisac Jesús diidx lojreni; räjpni:  
—Rniliä, rniliäpac lojtu, narä nacä si'c roxlä' xcurajl rexiil.
- <sup>8</sup> Guiraa reni abiääd galoo, najcreni ganax gubaan luxh di rexiil nucuardiajg xse'ni.
- <sup>9</sup> Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälṇni guixasa'c gauni.
- <sup>10</sup> Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yälṇnabaṇsa'c, yälṇnabajṇ par tejpas.
- <sup>11</sup> Narä nacä baxtorsa'c; luxh baxtorsa'c sudeed lagajc xcälṇnabajṇni xcuent rexiilni.
- <sup>12</sup> Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxuṇni, li rbälazni rexiil. Dxejc rniaaz cuyo't rexiil, rutie'chzani rexiil.

<sup>13</sup> Mosga ruxuñ sa'csi najcni mostis, luxh dini jiu xhi rsiajc rexiil.

<sup>14</sup> 'Narä nacä baxtorsa'c; numbeä reni najcpac rexilä; rexilä numbeezareni narä

<sup>15</sup> sigajc numbee Xtadä narä, sigajc numbeäza Xtadä; luxh sudedä xcäl'nabanaä xcuent rexiilga.

<sup>16</sup> Rapäza ste cuaa xiil, ni di gac xten gurajlre; näjza laareni nanab chaxiä, te gusbodij-greni xtidä, te guidxagsa' guiro'p cuaareni, gacreni tejtis gurajl, tejtisza baxtoor.

<sup>17</sup> 'Narä siguixäza xcäl'nabanaä, guetä, te dxejcru siliässacä xcäl'nabanaä, guibañsacä, ni'cni sanälajz Xtadä narä.

<sup>18</sup> Rut sajcdi ju't narä, lagajc narä gudedä xcäl'nabanaä, guetä. Rapä yäl'rnibee te gudedä xcäl'nabanaä, guetä, rapäza yäl'rnibee te xcasacä xcäl'nabanaä te guibañsacä, sa'csi dee najc yäl'rnibee ni baniidz Xtadä loä.

<sup>19</sup> Xcuent rediidxre gula' sa' rexpejn Israel, gujcreni tio'p gala'.

<sup>20</sup> Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcni rajc. Xhigac rcuadiajgtu xtiidxni.

<sup>21</sup> Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotiä'p, ä?

### *Rdxe'ch rebejn loj Jesucrist*

<sup>22</sup> Lagajc neñ redxejga gujc lanij xten xquidoo rexpejn Israel guedx Jerusalén.

<sup>23</sup> Najcni bäi najl. Biu' Jesús guidoro, sasajni nez neñ cordoor ni laa xten Salomón.

<sup>24</sup> Gubig rexpejn Israel guideb gabi Jesús, räjpreni lojni:

—¿Gucü gucua'tzlu loonu chu najclu? Palga luj najclu Crist ni cabääznu jiaäd, guiniliini loonu tejpas.

<sup>25</sup> Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl'rnibee Xtadä, huenliisi ruluilojreni chuni'c nacä.

<sup>26</sup> La'tu ditu chalilajz sa'csi ditu gac rexilä.

<sup>27</sup> Rexilä numbee xse'ä, luxh narä numbeäzareni, riädnajlzareni narä.

<sup>28</sup> Narä rudedä yäl'nabajn par tejpas loj rexilä, luxh direni nitloj par tejpas. Rutza laadi nani sajc gudzucajreni ladzñaä.

<sup>29</sup> Xtadä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzñaä Xtadä.

<sup>30</sup> Narä näjza Xtadä najcnu tejsi.

<sup>31</sup> Dxejc gulässac rexpejn Israel guij, te nucuaareni yejc Jesús.

<sup>32</sup> Dxejcti räjp Jesús lojreni:

—Xhidajl dzuun xten Xtadä abaluiä lojtu, ¿lo redzuunga, xhi tej dzuun rujn gucuaatu guij yecä?

<sup>33</sup> Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

<sup>34</sup> Badzu' Jesús diidxre, räjpni lojreni:

—¿La et loj xleiiditu caj rediidxre: "Narä rniä, la'tu najc redios"?

<sup>35</sup> Nancheenu digacdi guidxaa xquijtz Dios. Palga gulalajni redios rebejn nani bejn yäl'guxhtis loj rexpejn Israel, dxejc

<sup>36</sup> naj ¿xhicuent guniitu loä: "Caniyajlu Dios", sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre.

<sup>37</sup> Palga dina gunä redzuun xten Xtadä, na'c chalilajztu rextidä.

<sup>38</sup> Luxh palga runnäni, mascä ditu chalilajz xtidä, colchalilajz ni ruluii reyäl'milagwr nani runä, te gacbeetu par tejpas, Xtadä yunäj narä, narä yunääza laani.

<sup>39</sup> Che rlaizreni niniaazrenini stehuält, laani biriini ladzñaareni.

<sup>40</sup> Dxejcti sääni, gubisacni nez stelaad gueu Jordán, nejzga huijia'nni, cadro gusloj batiobnis Juan.

<sup>41</sup> Xhidajl bejn bidzujn lojni ro'c, räjpreni:

—Di Juan niujn nicla tej yäl'milagwr luxh guiraa rediidx ni gunii Juan xcuent dade're najc didxliipac.

<sup>42</sup> Xhidalduxhrene huililajz xtiidxni ro'c.

<sup>1</sup> Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart.

<sup>2</sup> Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcní.

<sup>3</sup> Ni'cni baxhal guiro'p bäjlré diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

<sup>4</sup> Che biejn diajg Jesús rediidxga, räjpní:

—Di yälracxhuure ju'tni, sa'csi yälracxhuure najc te guluilojni xcälrmibee Dios. Te guluilojza yälracxhuure xcälrmibee Xi'n Dios.

<sup>5</sup> Sanälajz Jesús Mart, bäjlni, näjza Larz,

<sup>6</sup> che räjpreni lojni cayacxhuu Larz, bia'nni stio'p dxej cadro yu'ni.

<sup>7</sup> Dxejcti räjpní loj rexpejn'pacni:

—Colcho', chonnu stehuält región Judea.

<sup>8</sup> Räjprej räjprej'ni lojni:

—Mastr, gajd gac xchej rlaiz rexpejn Israel ni rnibee nucuaa guij yejclu te nugu'treni luj, luxh naj rlaizlu chäsaclu ro'c.

<sup>9</sup> Dxejcti räjpre Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre.

<sup>10</sup> Palga chasajni guxhijñ, siliaro'ni, sa'csi xheti bianijga.

<sup>11</sup> Dxejcti räjpre Jesús lojreni:

—Nagayejs xamiigwä Larz. Cha'a te chacuänäni.

<sup>12</sup> Dxejpre räjprej'pacni lojni:

—Dad, palga agudiesni, pet siajcní.

<sup>13</sup> Jesús canii lojreni agujt Larz, niluxh rexpejn'pacni bejn xhigab caniiini xcuent yälrejs xten bacaltis.

<sup>14</sup> Ni'cni guniliipac Jesús räjpní lojreni:

—Agujt Larz.

<sup>15</sup> Rbalazä sa'csi rutinu ro'c, te chalilajztu xtidxä. Colcho' te chohuiinuni.

<sup>16</sup> Dxejcti Tomás ni rniizareni "cua'ch", räjpní loj resa'ni:

—Colcho' te guetnāzanuni.

*Jesús najc yälrbansac lo yälgujt*

<sup>17</sup> Che bidzujñ Jesús lo guejdxga, agujc tajp dxej biga'tz Larz.

<sup>18</sup> Guedx Betania tre' gajxh lo guedx Jerusalén, si'cti tio'p garol kilómetro.

<sup>19</sup> Xhidajl rexpejn Israel abidzujñ, siädhuiireni Mart, näjza Marii, te di gac-huin lajzreni sa'csi gujt bisiajnreni.

<sup>20</sup> Che guchee Mart abidzujñ Jesús, biriini huichaglojnini; niluxh Marii bia'n rolizreni.

<sup>21</sup> Dxejcti räjpre Mart lo Jesús:

—Dad, paru suga'lu ree, di bisianä niejt.

<sup>22</sup> Narä nanä suniidx Dios guiraa nani guiniablu lojni.

<sup>23</sup> Jesús räjpní lojni:

—Sibansac bisiajnlu.

<sup>24</sup> Räjpre Mart lojni:

—Acananä sibansacni che guidzujñ dxej ni guibansac bejn loj rebengut dxej lult che gun Dios yälguixhtis.

<sup>25</sup> Dxejpre räjpre Jesús lojni:

—Narä nacä yälruspansac bejn loj rebengut, näjza yäl'nabajn par tejpas. Nani rililajz rextidxä, masä agujtní, sibansacni.

<sup>26</sup> Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

<sup>27</sup> Dxejcti räjpre Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhal Dios lo guedxliujre.

*Biin Jesús cuä' xpaä Larz*

<sup>28</sup> Che guluux gunii Mart, huitejdxni bäjlni Marii, xhiga'tz räjpní lojni:

—Abidzujñ Mastr: Cabejdxzani luj.

<sup>29</sup> Che biejn diajg Marii rediidxga, huisugajcni, sahuuiini Jesús.

<sup>30</sup> Gajd Jesús jiu' guejdxga, laltis suga'ni cadro bidxaagni Mart.

<sup>31</sup> Rexpejn Israel nani biädcuenañ Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoönni.

<sup>32</sup> Ni'cni che bidzujñ Marii cadro suga' Jesús, bazuxhijbni lojni, räjpní:

—Dad, paru suga'lu ree, di bisianä niejt.

<sup>33</sup> Che bahuii Jesús cayoon Marii, nájza rexpejn Israel ni siädnajl Marii, guc-huin lastooni, biäd te rsliajz lastooni.

<sup>34</sup> Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

<sup>35</sup> Dxejcti biin Jesús.

<sup>36</sup> Ni'cni cayäjp rexpejn Israel:

—Colhuii, lacti sanälajznini.

<sup>37</sup> Yu'zareni räjp:

—Dade're basiajc ben lotiä'p. ¿Xha di niajcdi nusiajcní bejnre te di niejtni, ä?

*Gubansac Larz*

<sup>38</sup> Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni.

<sup>39</sup> Dxejcti räjp Jesús lojreni:

—Colgudzucay guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

<sup>40</sup> Dxejc räjp Jesús lojni:

—¿Et rniä lojlu, palga rililajztu, suhuiilu xcälrníbee Dios, ä?

<sup>41</sup> Dxejcti badzucajreni guijga. Guläs Jesús lojni xhaguibaa, räjpni loj Xtdadni:

—Xtadä, runidxä xquixtios lojlu sa'csi abiejn diajglu xtidxä.

<sup>42</sup> Narä nanä gullica rucua diajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

<sup>43</sup> Che gulujx guniini rediidxga, guredxa'ni räjpni:

—¡Larz! ¡Gudaa ree!

<sup>44</sup> Dxejc birii bengutga nen biliää. Naliib renaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

*Bachaagreni diidx xho guiniaazreni Jesús*

(Mt. 26:1-5; Mr. 14:1-2; Lc. 22:1-2)

<sup>45</sup> Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús.

<sup>46</sup> Yu' reni huihuii loj rexpejn Israel ni laa farisee, bijreni diidx xhi bejn Jesús.

<sup>47</sup> Dxejcti refariseega, nájza rebixhojz ni rníbee, bire'reni bidxagsa'reni lo Junt Suprem, räjpzreni:

—¿Xho jiennu? Niguiire cayujn xhidajl milagwr.

<sup>48</sup> Palga guisaannuni si'c, guiralii bejn sililajz xtiidxni, sinajlrenini. Dxejcti jiäd reben roman ni rníbee, gudzucajreni xcälrníbeenu, sudzujlarení lajdxnu.

<sup>49</sup> Dxejc Caifás, bixhojzro ni riäjil guníbeeni lo rebixhojz ijzga, räjpni lojreni:

—La'tu xhetliidi najnditu.

<sup>50</sup> Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

<sup>51</sup> Niluxh Caifás dini ninii diidxre xcuentcáni. Sa'csi ijzga rníbeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent naciön xten rexpejn Israel.

<sup>52</sup> Luxh xhet ganaxtis xcuent naciönga, nájza te guire' guiraa rexpejn Dios nani nare'ch loj guideb guedxliujre.

<sup>53</sup> Ni'cni dxejliga bachaag rebejnnga diidx te don xho gunreni gugu'treni Jesús.

<sup>54</sup> Ni'cni diru Jesús nisiasj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejn pacni.

<sup>55</sup> Guxii dxej cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw.

<sup>56</sup> Benagajreni caguilreni Jesús; che yu'zareni nen guidoro, canabdiidx lo sa'reni, räjpreni:

—¿Xhi najtu? ¿La siädni lanijre o laa dini jiäd, ä?

<sup>57</sup> Refarisee nájza rebixhojz ni rníbee loj rebixhojz, aguníbeereni palga yu' chu najn caro yu' Jesús, chaye'tzni lojreni te guiniaazrenini.

## 12

*Gudäab te gunaa se't ni' Jesús*

(Mt. 26:6-13; Mr. 14:3-9)

<sup>1</sup> Che riädax xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebengut.



<sup>2</sup> Ro'c bejnreni te xchej te gau Jesús. Mart bateed xchejga, nájza Larz sobganáj Jesús nájza rexpejn'pacni lo mex.

<sup>3</sup> Dxejcti bidzunnáj Marii si'cti garol litr se't ni rlianexhduxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxejcti. Guideb neñ yu'ga gulanejxh se'tga.

<sup>4</sup> Dxejcti rájp Judas Iscariot, xi'n Simón, ni najc te rexpejn'pac Jesús, lagajc ni abejn xhigab guto'ni Jesús, rájpní:

<sup>5</sup> —¿Xhicuent di se'tre nido' choñ gayuu denar te nidis meelga loj reben'proob? (Chon gayuuga najc si'cti ni xca' te niguii paru gunni dzuun tzubiteb háii.)

<sup>6</sup> Guniini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadro rucbee meel, luxh rbääni meel lojga te rca'nini.

<sup>7</sup> Ni'cni rájp Jesús lojni:

—Na'c gudxojn'luni; subasäl'xgaanini, che gajd guidzujñ dxej nani guiga'tzá.

<sup>8</sup> Dxej-yáäl yu' reben'proob lojtu, luxh narä dina chuä lojtu xchej.

*Laareni rlanjreni nugu'tzarení Larz*

<sup>9</sup> Dxejc che gucbee xhidajl xpejn' Israel yu' Jesús rolizj Larz ni gubañsac lo reben'gut, bidzujñreni, xhet xcuentis Jesús. Biäädreni te fiizarení loj Larz nani baspañsacni lo reben'gut.

<sup>10</sup> Dxejcti rebixhojz ni rnibee bachaagzarení diidx te ju'tzarení Larz,

<sup>11</sup> sa'csi xhidajl rexpejn' Israel salilajzreni xtidx Jesús sa'csi bahuiireni gubañsac Larz.

*Biu' Jesús guedx Jerusalén*

*(Mt. 21:1-11; Mr. 11:1-11; Lc. 19:28-40)*

<sup>12</sup> Che bara yáäl, rebejn' xhidajl ni bidzujñ lanij biejn diajgreni asiáddzujñ Jesús guedx Jerusalén,

<sup>13</sup> dxejcti batiu'reni ñaa reyagzijñ, biriireni neñ guejdx, sachaglojrenini. Guredxa'reni, rájpní lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc rei lo rexpejn' Israel!

<sup>14</sup> Bidxäl Jesús te burbáz, gubijbnini, si'cni caj lo reguijtz:

<sup>15</sup> Na'c guidxebtu, bejn' ni rbájz neñ guedx Sión.

¡Colhuhii! Reii xtentu asiääd, bijbni dejtz te burbáz.

<sup>16</sup> Di rexpejn'pacni niacbee recosga che gujcreni, niluxh che gubañsacni loj reben'gut, dxejc banaj lajzreni recos nani caj lo guijtz xcuentni, nájza guiraa recos ni bejn rebejn' lo Jesús te guzojb reidiidxga.

<sup>17</sup> Reben' xhidajl ni suganájni che gurejdxni Larz te biriini neñ baa che baspañsacnini lo reben'gut, bijzarení diidx xcuent guiraa ni bahuiireni.

<sup>18</sup> Ni'cni biädchagloj reben' xhidajlgani, sa'csi abiejn diajgreni laani bejn'ni milagwrre.

<sup>19</sup> Ni'cni rájp refarisee lo sa'reni:

—Aruhuiitu xhet sajcdi jien'nu. ¡Colhuhii! Empac sanajl guideb guedxliujni.

*Riädtiil regriegw Jesús*

<sup>20</sup> Yu' gaii beñgriegw nadxaag lo rebejn' ni biädted lanij guedx Jerusalén.

<sup>21</sup> Rebejn're bidzujñ loj Felipe nani siääd guedx Betsaida xten Galilee, gosloj gunabreni lojni, rájpní:

—Dad, rlaaznu guihuiinu lo Jesús.

<sup>22</sup> Biääd Felipe, rájpní loj Andrés, dxejcti guiro'preni huiye'tzreni lo Jesús.

<sup>23</sup> Dxejcti rájp Jesús lojreni:

—Abidzujñ or ni chä'p xpala'n Xi'n Dios ni gujc Niguii.

<sup>24</sup> Rniliápac lojtu, palga di te xob binij jiajb lo yuj, neñ xhurch cadro cueni, te rianxtebni, guetni, dini guiliejn'. Luxh palga guetni, siliejñni, rajcza te nisro lojni, rajc xhidajl xob binij.

<sup>25</sup> Nani sanälajz xcäl'nabajñni, sunijtnini, luxh nani rbälaz xcäl'nabajñni lo guedxliujre, sica'ni yäl'nabajñ par tejpas.

<sup>26</sup> Palga yu' chu tej ni rlanj chu loä, sujiädnajl'ni xnezyuä, te cadro yu'ä, ro'cza cuääz ni ru' loä. Palga yu' chu gun xtzunä, siliä'pza Xtadä xpala'n'ni.

*Rnixgaa Jesús guetni*

<sup>27</sup> Rájpní:

—Naj cayac-huin lastoä. ¿Xhichani'cza gápä lo Xtadä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre.

<sup>28</sup> Xtadä, bejn' si'cni riäj' gac te guiliä'p bejn' xpala'nlu.

Dxejcti xhaguibaali biejn' te xse' te ni rájp:

—Agulä'pä xpala'nä, siliä'pä xpala'nä stehuält.

<sup>29</sup> Ni'cni lo rebejn' ni tre' ro'c, ni biejn' diajgreni se'ga, yu' reni rájp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

<sup>30</sup> Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini.

<sup>31</sup> Naj abiääd xcälguختis Dios lo guedxliuj. Naj sibicaj xcälrnibee nani rnibee lo guedxliujre.

<sup>32</sup> Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

<sup>33</sup> Rediidxre gunii Jesús te canixgaani xho guetni.

<sup>34</sup> Räjp rebejn lojni:

—Nuure biejn diajnu bilreni lo leii, Crist ni jiääd sibajn par tejpas. ¿Xho mood rniilu, nanab chäs Xi'n Dios ni gujc Niguui jiaa lo guedxliuj? ¿Chuxhni'c najc Xi'n Dios ni gujc Niguui ni ruzä'tlu?

<sup>35</sup> Dxejcti räjp Jesús lojreni:

—Stera'tsi yu' bianij lojtu. Col'saj lał ni rajptu bianijga, te di guiniaaz yälxcäyja la'tu, sa'csi ni rsiaj loj nacäy, dini gan caro chääni.

<sup>36</sup> Lał ni rajptu bianij, col'chalilajz bianijga te gactu rexi'n bianij.

Gunii Jesús rediidxga lojreni, dxejcti biunejz ni ro'c, bicuatzlojni.

*Xhicuent di rexpejn Israel nililajz xtidx Jesús*

<sup>37</sup> Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhał Dios lojreni.

<sup>38</sup> Ni'cni guzojb diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluüilu xcälrnibeduxhlu, ä?

<sup>39</sup> Ni'cni di niajcdi nililajzreni, sa'csi guniiza Isaías, räjpni:

<sup>40</sup> Abascäjyni lojreni,

abennajdni lastooreni,

te di rebalojreni fi,

te di lastooreni gacbee,

te di gusieych lajzreni,

te di gusiäcäreni.

<sup>41</sup> Rediidxre gunii Isaías, sa'csi bahuiini xcälrdimbicha' Jesús xhaguibaa, dxejc guniini xcuentni.

<sup>42</sup> Dxejcti gaii rebejn ni rnibee huililajz xtiidxni che räjpni abaxhał Diosni, niluxh bidxebreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni neñ guidoo.

<sup>43</sup> Sa'csi rdxaglaizrureni guiliä'p rebejn xpala'nreni luxh guxiiru rlaizreni guiliä'p Dios xpala'nreni.

*Xtidx Jesús sigubee rebejn*

<sup>44</sup> Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtaä nani baxhał narä rililajzni.

<sup>45</sup> Nani ruhuui loä, ruhuizani loj ni baxhał narä.

<sup>46</sup> Narä biälä si'c bajl lo guedxliujre, te guiraa renani chalilajz xtidxä, dirureni chu lo yälcäy.

<sup>47</sup> Nani riendiajg xtidxä, luxh dini gusoob rediidxga, dina gunä yälguختis lojni, sa'csi dina niälä te gunä yälguختis rebenguedxliuj, biälä te guslää reben guedxliuj lo dojl.

<sup>48</sup> Nani rbälaz narä, ni di gusoob xtidxä, yu' chu gun yälguختis xtojni; lagajc rediidx nani guniä gun yälguختis xtojni che gal lult dxej.

<sup>49</sup> Sa'csi narä dina niädniä lagajc xcuentä, lagajc Dad ni baxhał narä, lagajc laani gunibeeni xhini'c guiniä, xhini'c guluiä.

<sup>50</sup> Luxh nancheä gunibeeni chu yäl'nabajn par tejpas. Ni'cni rediidx nani rniä, rniäreni si'cpacni gunii Xtaäni loä.

## 13

*Jesús gudiibni ni' rexpejn pacni*

<sup>1</sup> Che gajd gal dxe lanij ni laa pascw, najn Jesús asiäddzungajx xo'ni, or ni jiunejzni lo guedxliujre te chääni lo Xtaäni. Luxh sa'csi agajc sanälajzni rexpejn pacni nani yu' lo guedxliujre, sinälajznanireni par tejpas.

<sup>2</sup> Ni'cni lał ni cayauxchejreni biu' ben dxab neñ lastoo Judas Iscariote, xi'n Simón, te guto'ni Jesús.

<sup>3</sup> Sa'csi agucbee Jesús abateed Xtadni guira'ti ladzñaani, gucbeezani loj Dios biriini, lo Dios guibi'zani,

<sup>4</sup> ni'c huisu Jesús lo xchejga, gulääni xhablojiaani, gudojbni te tuäi, batejbni xque'ni.

<sup>5</sup> Dxejcti cua'ni nis nen te chaa, guslojni gudiibni ni' rexpejnacni, baspijdzni ni'reni con tuäiiga.

<sup>6</sup> Che bidzujñni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

<sup>7</sup> Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

<sup>8</sup> Räjp Pedr lojni:

—¿Dipaclu quuib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

<sup>9</sup> Räjp Pedr lojni:

—Dad, na'c quuiblu ni'ätis näjza nää näjza yecä gudiib.

<sup>10</sup> Räjp Jesús lojni:

—Nani agojz di guiquiin gagsacni; ni'tisni guidiib, sa'csi naya guidebni; nayazatu, per xhet guiraaditu naya.

<sup>11</sup> Sa'csi anajñni chu guto'ni, ni'cni guniini: “Xhet guiraaditu naya.”

<sup>12</sup> Ni'cni che gulujx gudiibni ni' rexpejñni, gotsacni xhajbni, guresacni lo mex, räjpni:

—¿La najntu xhini'c benä lojtu, ä?

<sup>13</sup> La'tu rniitu narä, Mastr näjza Dad. Luxh laaca rniitu sa'csi nacäni.

<sup>14</sup> Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjł quuibtu ni' resatu.

<sup>15</sup> Sa'csi abaluiä lojtu xho gacni, te chanuu guntu sigajc ni benä lojtu.

<sup>16</sup> Rniliä, rniliäpac lojtu, di te mos gac beñroru lo xlamñi; diza te ni rij xmandaad bejn gac beñroru loj nani baxhalñi.

<sup>17</sup> Palga najntu recosre, chicbaazatu palga si'c guntu.

<sup>18</sup> Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijztni. Scree najc rediidxga: “Nani rajw xcuxtilä, ni'c agubirëni, agulälazni narä.”

<sup>19</sup> Ni'cni agunixgaäni, che gajdni gac, te che gacni chalilajztu nacä chu rniä nacä.

<sup>20</sup> Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhalñi.

*Räjp Jesús chuni'c guto'ni*

(Mt. 26:20-25; Mr. 14:17-21; Lc. 22:21-23)

<sup>21</sup> Che gulujx gunii Jesús rediidxre, guc-huinduxh lastooni, dxejc guniliini:

—Rniliä, rniliäpac lojtu, tejtuto' narä.

<sup>22</sup> Dxejc gusloj cadxeloj rexpejñni lo sa'reni, di jien chuchani'c cagusa'tni.

<sup>23</sup> Tej rexpejñni nani sanälajzruni sobga' cuä'ni.

<sup>24</sup> Dxejcti bejn Simón Pedr seen lojni te guiniabdiidxni loj Jesús chu xcuent caniini.

<sup>25</sup> Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

<sup>26</sup> Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

<sup>27</sup> Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rıajzlu gunlu, bejngani.

<sup>28</sup> Nicla tej reni sobga' lo mex direni niacbee xhicuent räjpni lojni si'c.

<sup>29</sup> Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben xhet räjpdi.

<sup>30</sup> Che gudajw Judas yätxtiilga, birigajcni, luxh abiu' guxhijñ.

*Didxcoob ni gunibee Jesús*

<sup>31</sup> Dxejcti che abirii Judas lojreni, räjp Jesús lojreni:

—Naj sienloj xcälrnibee Xi'n Dios ni gujc Niguii, luxh lojni sienloj xcälrnibee Dios.

<sup>32</sup> Palga suluiloj Xi'n Dios ni gujc Niguii xcälrnibee Dios, dxejc suluilojza Dios xcälrnibee Xi'n Dios ni gujc Niguii, luxh siojb gunnini.

<sup>33</sup> Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jäädutu cadro cha'a.

<sup>34</sup> Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu.

<sup>35</sup> Palga rinälajz sa'tu, si'c sacbee guiraa benguedxliuj najcpectu rexpenä.

*Xhini'c gun Pedr loj Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Dxejcti räjp Simón Pedr loj Jesús:

—Dad, ¿caro cháälu?

Räjp Jesús lojni:

—Cadro cha'ä digacdi jäädnajllu narä naj; niluxh sidzujñ dxej jäädlu ro'c.

<sup>37</sup> Räjp Pedr lojni:

—Dad, ¿xhicuent digacdi jäälä naj? Palga rquiin guetä xcuentlu, suguetä.

<sup>38</sup> Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgaii cuedxa' chon huält, säjblu dilu gumbee najrä.

## 14

*Jesús najc nezyuj lo Dad*

<sup>1</sup> Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajza xtidxä.

<sup>2</sup> Yu' xhidalduxh yu' cadro rbäjz Xtaä. Palga xhet si'cdi najcni, dizana niniä lojtu si'c. Sia'ä chasucheä reyu' par la'tu.

<sup>3</sup> Luxh palga chasucheä cadro cuääztu, che guluxäni, sibisacä, te chanäätu ro'c, te cadro yu'ä, ro'cza chutu.

<sup>4</sup> La'tu anajntu caro cha'ä, anajnzatu nezyuj ni cháätu.

<sup>5</sup> Dxejcti räjp Tomás loj Jesús:

—Dad, dinu guidon caro cháälu, ¿xho guidonnu nezyujga, ä?

<sup>6</sup> Räjp Jesús lojni:

—Narä nacä nezyuj. Narä nacä didxliipac, nacäza yälnabajñ. Por narätis sajc cháä bejn cadro rbäjz Xtaä.

<sup>7</sup> Palga la'tu niembeetu chuni'c nacä, niembeezatu Xtaä. Luxh najli abiembeepactuni sa'csi acahuiitu lojni.

<sup>8</sup> Räjp Felipe loj Jesús:

—Dad, basaan guihuiinu loj Xtaälu; ni'ctis rlaaznu.

<sup>9</sup> Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtaä. ¿Xhicuent rniablu fiilu lo Xtaä, ä?

<sup>10</sup> ¿La dilu chalilajz najrä yunää Xtaä, luxh Xtaä yunäjzani narä, ä? Rediidx nani rniä dina guiniäni lagajc xcuentä, sa'csi Xtaä ni yunäj narä laani rujñ lagajc rextzuuni.

<sup>11</sup> Colchalilajz xtidxä, che rniä narä yunää Xtaä, luxh Xtaä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä.

<sup>12</sup> Rniliäpac lojtu, nani chalilajz xtidxä, sajc gunni redzuun nani runä, luxh sujñni dzunroru sa'csi sia'a cadro yu' Xtaä.

<sup>13</sup> Luxh guiraa ni guiniablu lo Xtaä xcuentä, narä sunäni, te guluiloä xcälrnibee Xtaä.

<sup>14</sup> Narä sunä xhitis ni guiniabtu por laä.

*Ria'n diidx guxhal Jesús Sprit Dxañ*

<sup>15</sup> Räjpzani:

—Palga sanälajztu narä, susoobtu xtidxä.

<sup>16</sup> Dxejc siniabä lo Xtaä, te guniidxni stee nani gacnäjtu te chunäjni la'tu par tejpas.

<sup>17</sup> Najnznu, Xpirt Dxañ xten Dios, ni rnili. Di gacdi xca' reben guedxliujni, sa'csi direni fii lojni, niclaza gumbeereni. Niluxh la'tu numbeetuni sa'csi yunäjni la'tu, yu'ni nen lastootu.

<sup>18</sup> Dina gusanbisiäbä la'tu; sibisacä jädhuiä la'tu.

<sup>19</sup> Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu.

<sup>20</sup> Nen redxejga, dxejc sacbeetu yunää Xtaä, la'tu yunäjtu narä, luxh narä yunääza la'tu.

<sup>21</sup> Nani numbee Xtaä, nani rusoozba xtidxä, ni'c ruluiini sanälajzpacni narä. Luxh Xtaä sinälajza nani sanälajz narä, näjza narä chanälazä bejnğa, luxh suluiloä lagajc narä lojreni.

<sup>22</sup> Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxliujdi, ä?

<sup>23</sup> Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtaä, dxejc jiplänznäänuni guiro'pnu Xtaä.

<sup>24</sup> Nani di chanälajz narä, dini jiu xtidxä. Luxh rediidx nani biejn diajgtu, et xtidxadini; xtidx Xtradäni ni baxhal narä.

<sup>25</sup> 'Caniä guiraa rediidxre lojtu lajni yu'ä lojtu,

<sup>26</sup> per Sprit Dxan xten Dios nani jiädycnäjtu, nani guxhal Xtradä xcentä, laani suluini lojtu guira'ti, näjza susnajni lajztu guiraa rediidx nani aguniä lojtu.

<sup>27</sup> Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu.

<sup>28</sup> Abiejn diajgtu ni guniä lojtu: Sia'ä luxh siälsacä lojtu. Paru ninälajzpacktu narä, sibalajztu xcentä che guniä sia'ä lo Xtradä, sa'csi Xtradä najc beñroru loä.

<sup>29</sup> Scree agunixgaäni lojtu, te che soobni, dxejcru chalilajztu xtidxä.

<sup>30</sup> 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä;

<sup>31</sup> riäjl gac recosre te gacbee reben guedxliuj sanälazä Xtradä, rusobäza xtidx Xtradä, runä nani guinibeeni. Colchastie, colcho' jiunejznu ree.

## 15

### *Jesús najc si'c te yaguub*

<sup>1</sup> Rāpzani:

—Narä nacä si'c te yaguub. Xtradä najc si'c nani rusuj yajgga.

<sup>2</sup> Rebejn najc si'c reṇaa yajgga. Guiraa reṇaa yajgga nani xhet cajdi lojni rutiuugnini. Luxh guiraa reṇaa yajgga ni caj ninejxh lojni, rusianini te xcajru ninejxh lojreni.

<sup>3</sup> La'tu anajctu beṇnaya xcuent rediidx nani aguniä lojtu.

<sup>4</sup> Colguibannāj narä, sigajc ni nabannäā la'tu. Digacdi xcay ninejxh lo te ṇaa yajg palga agurujni lo yaguub. Sigajcza la'tu, palga guibicajtu loä, di gacdi guntu xtzunä.

<sup>5</sup> 'Narä nacä si'c yaguub. La'tu najctu si'c reṇaa yajgga. Nani riannāj narä, naräza riannäāni, ni'c sajc runduxhni xtzunä, sa'csi che guibicajni loä, xhet sajcdi gunni.

<sup>6</sup> Nani di chupac loä, sibicajni si'c reṇaa yajg nani rdin sa'csi xhetru rcajdi lojni, dxejcti rbijdzni, rusäl beṇnreni lo dāj te checni.

<sup>7</sup> 'Palga chupactu loä, palgaza chupac xtidxä lastootu, colṇab nani rlanjztistu, luxh narä sunidxāpacni.

<sup>8</sup> Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtradä, Dios.

<sup>9</sup> Si'cpacni sanälajz Xtradä narä, sigajcza sanälazä la'tu. Colchanuu lo xcälrinälazä.

<sup>10</sup> Palga juntu rextidxä, sinuutu lo xcälrinälazä, sigajc ni abasobä xtidx Xtradä, luxh rinuä lo xcälrinälajz Xtradä.

<sup>11</sup> 'Rniä rediidxre lojtu te guibalaznäjtu narä, te si'c guibalazduxhpactu.

<sup>12</sup> Dee najc diidx ni rnibeä guntu: colchanälajz sa'tu si'cni sanälazätu.

<sup>13</sup> Xheti te yäl'sanälajz ni guroobru lo yäl'sanälajzre, gudeed te bejn xcäl'nabajnni, guetni lacuaa resa'ni.

<sup>14</sup> La'tu najctu resa'ä palga gusoobtu diidx nani guinibeä guntu.

<sup>15</sup> Diruna cuäläā "mos" la'tu, sa'csi di remos gan xhi rujn xlamreni. Luxh narä aguläläā la'tu "rexamigwä", sa'csi guira'ti rediidx ni biejn diagä lo Xtradä aguniäza rediidxga lojtu.

<sup>16</sup> Et la'ditu guntu narä, narä guleä la'tu. Guleä la'tu te guntu xtzun Xtradä, te na'cza nitloj dzuunga. Te guira'tiza nani guiniabtu lo Xtradä por laä, ni'cza guniidxni lojtu.

<sup>17</sup> Dee rnibeä guntu: colchanälajz sa'tu.

### *Rbälaz rebejn guedxliuj Jesús näjza rexpejnni*

<sup>18</sup> 'Palga cuälaz reben guedxliuj la'tu, anajntu agulälazxgaareni narä.

<sup>19</sup> Paru najctu beṇ guedxliujre, sinälajzreni la'tu. Per ditu gac beṇ guedxliuj, sa'csi narä guleä la'tu te juntu xtidx Xtradä, ni'cni rbälaz reben guedxliuj la'tu.

<sup>20</sup> Col'snaj lajztu diidx nani guniä lojtu, 'di te mos gac beñroru lo xlamni'. Palga basacsireni narä, susacsizareni la'tu. Palga rusoobreni xtidxä, susoobzareni xtidxdtu.

<sup>21</sup> Guiraa recosre sunnājreni la'tu xcentä sa'csi direni gumbee nani baxhal narä.

<sup>22</sup> 'Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojreni.

<sup>23</sup> Nani rbälaz narä, rbälazzani Xtradä.

<sup>24</sup> Palga dina niunä nez lojreni remilagwrro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtradä.

<sup>25</sup> Bejnreni si'c te guzojb diidx nani cuaj lo guijtz agujc xchero: "Gulälazreni narä, luxh xhetlidi benä."

<sup>26</sup> 'Che jiaäd nani gacnä j la'tu, laani siniu xcentä, chu nacä. Laani najc Sprit ni yu' lo Xtradä, siniini didxlii. Narä suxhaläni lojtu; lo Xtradä guiriini jiaädni lojtu.

27 Nájza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

## 16

1 Rediidxre rnixgää lojtu, te didi yu' xhi gun jiajbtu te gunijttu lo xtidxä.

2 Sidzujñ dxej sibääreni la'tu dirureni gusaan jiu'tu neñ guidoro. Sidzujñ or chutis ju't tejtju, suchaloni cayacnäjni Dios.

3 Guiraa recosre sujñreni sa'csi direni gumbeepac Xtaä, niclaza narä.

4 Agunixgää rediidxre lojtu, te che guidzujñ orga sinaj lajztu xcuent rediidx ni guniä lojtu.

### *Redzuun ni rujñ Sprit Dxaan xten Dios*

'Dina niniä rediidxre lojtu che gusloä cagusule'ä diidx, sa'csi suganää la'tu.

5 Naj agojñ guibi'ä loj nani baxhal narä, luxh nicla tejtju di guiniabdiidx: "¿Caro cháälu?"

6 Dxejc sa'csi aguniä recosre lojtu, ni'c cayac-huin lastootu.

7 Luxh rniliäpac lojtu, hueenru par la'tu cha'ä. Palga dina cha'ä, di gacdi jiaäd lojtu nani racnäj. Niluxh palga cha'ä, suxhaläni lojtu.

8 Luxh laani, che jiaädni lo guedxliujre, susanijni xcäriejn rebejn te gacbeereni xcuent dojl, nájza xcuent xcälñabannaya Dios, nájza xcuent yälguxhtis xten Dios.

9 Guluiizani xcuent dojl lojreni sa'csi direni chalilajz xtidxä.

10 Guluiini xcälñabannaya Dios lojreni sa'csi sibusacä lo Xtaä, luxh dirutu fii loä.

11 Guluiini xcuent yälguxhtis xten Dios lojreni sa'csi abejñ Dios yälguxhtis loj beñdxab nani rnibebe lo guedxliujre.

12 Yu' xhidajlru diidx rlazä guiniä lojtu, niluxh digacdi gacbeetureni naj.

13 Che jiaäd Sprit xten didxlii xten Dios, laani susanijni xcäriejntu te gacbeetu guiraa redidxguli, sa'csi dini guiniä diidx xcuentcani, siniitisi ganax rediidx nani gudeed Dios lojni te guiniini. Siniizani xcuent recos nani churu gac.

14 Laani siliä'pni xpala'nä sa'csi sica'ni xhixtenä, suluiinini lojtu.

15 Guiraa ni rajp Xtaä najc xtenä, ni'cni rniä suluiini xhixtenä lojtu.

### *Xcälrac-huin lajztu sibixloj ni yälrbalajz*

16 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaä.

17 Dxejcti räjp rexejñpacni lo sa'reni:

—¿Xhini'c caniiñ loonu? Sbale'si dxej, dxejc dirutu fii loä, dxejctiru sgaii dxej suhuisactu loä, nájza: sa'csi sia'a lo Xtaä.

18 Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniini.

19 Guchee Jesús xhini'c rlanjreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä.

20 Rniliäpac lojtu, la'tu soontu, niluxh reben guedxliujre sibalazduxhrene. Sac-huinduxh lastootu niluxh yälrac-huinre sibixhlojni yälrbalajz.

21 Te gunaa che gaal xi'nni, rdejñni trabajw, dxejcti che aguyu' xi'nni, riäl lajzñi gudejñni trabajw, dxejc arbaa lajzñi gojl xi'nni te nigui lo guedxliujre.

22 Ni'cni, sigajcza rac-huin lastootu naj, dxejcti che jiaädhuisacä, dxejc sii sibalajztu neñ lastootu, luxh rut gacdi gudzucajdi yälrbalajzga.

23 Neñ redxejga xhetiru xhi yälguiniabdiidxdi guntu loä. Rniliäpac lojtu, nani guiniabtu lo xtaä xcuentä, laani suniidxnini lojtu.

24 Naj xhet canabditu xcuentä. Colñabni, te xca'tuni, te guibalajztu.

### *Jesús, nani abejñ gaan lo guedxliujre*

25 'Aguniä guiraloj lojtu con cuent ni ruluii, niluxh sidzujñ dxej che diruna guiniä cuent ni ruluii lojtu. Siniä didxguyasi lojtu xcuent Xtaä.

26 Neñ redxejga guiniabtu por laä. Luxh dizana guiniä siniabä narä loj Xtaä par la'tu,

27 sa'csi lagajcza Xtaä sanälajzni la'tu, sa'csi la'tu sanälajztu narä, luxh ahuililajzzatu loj Dios biria biälä lo guedxliuj.

28 Biriä lo Xtaä xhaguibaa, biälä lo guedxliujre, siunezäza lo guedxliujre, sibusacä lo Xtaä xhaguibaa.

29 Räjp rexejñpacni lojni:

—Naj sii caniiñ guyasi, dini gac si'c redidx-xhiga'tz xten cuent ni ruluii.

30 Naj sii gucheenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

31 Räjp Jesús lojreni:

—¿La rililajzfactu naj, ä?

<sup>32</sup> Asiäddzungajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtadä saganäj narä.

<sup>33</sup> Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

## 17

### *Gunab Jesús lo Dios xcuent rexpejnpacni*

<sup>1</sup> Che gulujx guniini loj rexpejnpacni rediidxga, guläsni lojni xhaguibaa, räjpni lo Dios: —Xtadä, abidzujn or; gulä'p xpala'n xi'nlu te guiliä'pza xi'nlu xpala'nlu,

<sup>2</sup> sigajc ni badeedlu lojni yälrnibee loj guiraa reben guedxliuj, te gac gudeedni yälnabajn par tejpas lo guiraa renani badeedlu lojni.

<sup>3</sup> Redee rajp yälnabajn par tejpas; numbeereni luj ni najc tejtis GuebDios, näjza narä Jesucrist nani baxhallu lo guedxliujre.

<sup>4</sup> 'Narä gulä'pä xpala'nlu lo guedxliujre, abaluxä dzuun nani baniidxlu gunä ree.

<sup>5</sup> Naj Xtadä, gulä'p xpala'nä con luj, con bala'n, con yälrndimbicha' ni gopä galooli che gajdli guirixtiej guedxliuj.

<sup>6</sup> 'Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu.

<sup>7</sup> Naj agucbeereni guiraa rediidx ni guniä lojreni lojpaclu siäädni.

<sup>8</sup> Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

<sup>9</sup> 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu.

<sup>10</sup> Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

<sup>11</sup> 'Narä diruna jia'nä lo guedxliujre, laareni sia'nruuni lo guedxliujre. Luxh narä siälä lojlu. Xtadä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab.

<sup>12</sup> Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

<sup>13</sup> 'Luxh naj sibusacä lojlu. Caniä rediidxre laḷ ni yu'ä lo guedxliujre, sa'csi rlazä guibaa lajzreni si'c ni rbaa lazä.

<sup>14</sup> Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre.

<sup>15</sup> Dina guiniabä cuäälureni lo guedxliujre, rniabä gudzucajlureni loj bendxab.

<sup>16</sup> Direni gac bejn guedxliuj, sigajc ni dizana gacä narä bejn guedxliuj.

<sup>17</sup> Basyareni con xtiidxlu, sa'csi xtiidxlu najc didxguliipac.

<sup>18</sup> Sigajc ni baxhallu narä lo guedxliujre, sigajcza xthäläreni te chääreni guideb guedxliuj.

<sup>19</sup> Xcuentreni rudedä lagajc narä, te näj laareni gacnayareni con xtidxguliipacu.

<sup>20</sup> Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni.

<sup>21</sup> Rlazä gun guiraareni tejsi xhigab, sigajc ni rujnlu, Xtadä, si'c runäza; te sigajc ni yu'äza con luj, sigajcza chureni con nuurnu, te gacbee reben guedxliuj luj baxhallu narä.

<sup>22</sup> Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab.

<sup>23</sup> Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajzlureni si'cni sanälajzalu narä.

<sup>24</sup> 'Xtadä, guiraa renani baniidxlu loä, rlazäza chureni cadro chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajdli guirixtiej guedxliujre.

<sup>25</sup> Xtadä ni rujn cossa'tctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä.

<sup>26</sup> Aräpä lojreni chu najclu; säpäzaru lojreni te chu yälsanälajz sa' ni rajplu par narä nen lastooreni, te cuäzäza neḷ lastooreni.

## 18

### *Xho gunaazreni Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Che gulujx gunii Jesús rediidxga, huinäni rexpejnpacni dejtz gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejnpacni.

<sup>2</sup> Anajn Judas, nani guto' Jesús, caro rij Jesús con rexpejn pacni sa'csi si'csi-si'c rdxaag sa'reni ro'c.

<sup>3</sup> Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balgued näjza lintern, näjza spaad näjza lans.

<sup>4</sup> Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguuiltu?

<sup>5</sup> Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni.

<sup>6</sup> Che gunii Jesús lojreni: “Laa naräni”, biäxhanreni, biajbreni lo yuj.

<sup>7</sup> Dxejcti gunabdidxsac Jesús lojreni:

—¿Chu rguuiltu?

Dxejc räjpzaren stehuält:

—Jesús nani siääd guedx Nazare't.

<sup>8</sup> Räjp Jesús lojreni:

—Aguniä lojtu, laa naräni. Palga narä rguuiltu, colgusaan jii redee.

<sup>9</sup> Gunii rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.”

<sup>10</sup> Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco.

<sup>11</sup> Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtadä tedä, ä?

*Jesús nez loj bixhojzro*

(Mt. 26:57-58; Mr. 14:53-54; Lc. 22:54)

<sup>12</sup> Dxejcti resoldaadga näjza comandant, näjza reguxhtis ni rnibee rexpejn Israel, gunaazreni Jesús baliibrenini.

<sup>13</sup> Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz.

<sup>14</sup> Caifás najc nani baliidx rexpejn Israel nanab guet te niguui xcuent rebeñguedxga.

*Cadro gunii Pedr dini gumbee Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedr näjza stee xpejn pacni huinajl dejtž Jesús. Luxh numbee bixhojzro bejnğa, biunäjzani Jesús lo xle' bixhojzro.

<sup>16</sup> Bia'nti Pedr rolä'ga. Dxejc birii xpejn pac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga.

<sup>17</sup> Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn pac Jesús, ä?

Räjp Pedr loj gunaaga:

—¡Xho gacäni!

<sup>18</sup> Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

*Bixhojzro cayujn yälgunabdiidx lo Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Dxejcti gosloj cayujn bixhojzro yälgunabdiidx loj Jesús xcuent chuni'c najc rexpejn pacni näjza xcuent xhini'c ruluini.

<sup>20</sup> Dxejcti räjp Jesús lojni:

—Narä xhet xhiga'tzdi guniä rextidkä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadre re' guiraa rexpejn Israel, nicla tej diidx dina ninixhiga'tzädi.

<sup>21</sup> ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

<sup>22</sup> Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

<sup>23</sup> Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

<sup>24</sup> Dxejcti guideb naliibni baxhał Anásni lo bixhojzro lo ni laa Caifás.



*Gunisac Pedr dini gumbee Jesús**(Mt. 26:71-75; Mr. 14:69-72; Lc. 22:58-62)*<sup>25</sup> Sugasijc Pedr ro' guiboo, cagucha'lajzni, che räjpreni lojni:—¿La et näjdi luj najclu te xpejn<sup>1</sup>pac niguiiga, ä?

Badzu'ni diidxga räjpni:

—¡Xho gacäni!

<sup>26</sup> Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

<sup>27</sup> Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

*Jesús nez loj Pila't**(Mt. 27:1-2, 11-14; Mr. 15:1-5; Lc. 23:1-5)*<sup>28</sup> Dxejc birinäjreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw.<sup>29</sup> Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

<sup>30</sup> Dxejcti räjpreni lojni:

—Paru di niguiire nijac te beñ latsiaj, dinu niopnäni ladznaa guejblu.

<sup>31</sup> Räjp Pila't lojreni:

—Colchanäni, colhuii xho gunnäjtuni yälguxhtis con lagajc xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

<sup>32</sup> Guniireni si'c te guzojb diidx nani gunii Jesús xcuenti xho guetni.<sup>33</sup> Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn Israel, ä?

<sup>34</sup> Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

<sup>35</sup> Dxejcti räjp Pila't lojni:

—¿Xhixh näj narä nacä te xpejn Israel? Lagajc reben lajdxlu näjza rebixhojz bateedlu ladznaa. ¿Xhi bejnlü?

<sup>36</sup> Dxejcti räjp Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpenä te di tedä ladznaa rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

<sup>37</sup> Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuardiajgrenti xtidxä.

<sup>38</sup> Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtojñ bejnre.

<sup>39</sup> Niluxh la'tu rajptu te costumbr, casob lani pascw, ruslaanu te bejn ni yu' neñ latzguiib. ¿Xhi najtu? ¿La rlanjtu guslää ni najc reii xten rexpejn Israel, ä?<sup>40</sup> Dxejcti guiragajcreni guredxa', räjpreni:

—¡Na'c guslaalu niguiiga! ¡Basläa Barrabás!

Niluxh Barrabás najc te gubaan.

**19**<sup>1</sup> Ni'cni gunibee Pila't gudijnreni Jesús con duu ni yu' guechguiib lojni.<sup>2</sup> Bejn resoldaad te coronguejch, bazañrenini yejc Jesús. Dxejcti bahaujcwrenini te lad-moraad.<sup>3</sup> Dxejcti gusloj gubigrenti lojni, te räjpreni lojni:

—¡Gubajn par tejpas Reii xten rexpejn Israel!

Dxejc huääzreni lojni.

<sup>4</sup> Dxejcti birisac Pila't, räjpni lojreni:

—¡Colhuii! Acabääni nez lojtu, te gacheetu dina guidxäl nicla tej xtojñni.

<sup>5</sup> Dxejcti birii Jesús nez lojreni, yu' coronguejch yejcní, najcwzani ladmoraadga. Dxejcti rájpp Pila't lojreni:

—¡Colhuii! ¡Aree niguiire!

<sup>6</sup> Ni'cni, che bahuíi rebixhojzro nájza rexquixhajgreni lojni, guredxa'reni, rájppreni:

—¡Colgucuaani lo cruzj! ¡Colgucuaani lo cruzj!

Rájpp Pila't lojreni:

—Lagajc la'tu colchanáni te gucuaatuni lo cruzj. Per narä dina guidxälä nicla tej xtojlni.

<sup>7</sup> Dxejcti rájpp rexpejn Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

<sup>8</sup> Che biejn diajg Pila't rediidxga, bidxejbruni,

<sup>9</sup> biusacni nen Pretorio, rájppni loj Jesús:

—¿Caro siäädlu?

Per xhet rájppi Jesús lojni.

<sup>10</sup> Dxejcti rájpp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te gusläälu, ä?

<sup>11</sup> Rájpp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

<sup>12</sup> Ni'cni gudiil Pila't xho nusläani Jesús, niluxh rexpejn Israel rbedxaduxhrureni, rájppreni:

—Palga luj gusläaluni, dilu gac xamiigw reii César, sa'csi chutis ni rnii najcni reii, najcni xcontraar César.

<sup>13</sup> Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujjni yälguxhtis, cadro laa Litóstroros con didx-griegw sälojni naga' guisa'c, con didx-hebreo laani Gabata.

<sup>14</sup> Najcni dxej vispr lani pascw, si'cti läidxej, dxejcti rájppni loj rexpejn Israel:

—Colhuii, aree xreitu.

<sup>15</sup> Ni'cni guredxa'reni rájppreni:

—¡Suguetni! ¡Suguetni! ¡Bacuaani lo cruzj!

Dxejcti rájpp Pila't lojreni:

—¿La sucuaä xreitu lo cruzj, ä?

Dxejcti rájpp rebixhojz ni rnibee lojni:

—Rutru reidi rajpnu, Césartis najc xreinu.

<sup>16</sup> Ni'cni bateed Pila't Jesús lojreni te chacuaarenini lo cruzj.

*Che bacuaarenini lo cruzj*

(Mt. 27:32-44; Mr. 15:21-32; Lc. 23:26-43)

<sup>17</sup> Dxejcti cua'reni Jesús, biriini ro'c guideb nuuni xcruzjni, cheni bidzujnlireni te lajt ni laa lajt xten Calabeer, con didx hebreo laani Gólgota.

<sup>18</sup> Ro'c bacuaarenini lo cruzj. Bacuaazareni tio'p niguii lo stio'p cruzj, tejjani te laad cuä' Jesús.

<sup>19</sup> Dxejc bacuaa Pila't diidx ni cháä yejc xcruzjni; rediidxga najc scree: “Jesús, ben Nazare't, Reii xten rexpejn Israel.”

<sup>20</sup> Xhidajl bejn bil diidx ni caj yejc xcruzjni, sa'csi lajt cadro bacuaarenini lo cruzj najc gajxh ro' guejdxga, luxh didx hebreo, diidx griegw, nájza didx latin bacuaareni rediidxga.

<sup>21</sup> Dxejcti rájpp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

<sup>22</sup> Dxejcti rájpp Pila't lojreni:

—Nani abacuaä, abacuaä. Si'c jia'nni.

<sup>23</sup> Dxejcti resoldaad, che gulujx bacuaareni Jesús lo cruzj, cua'reni rexhablojiaani bejnrenini tajp la', te cade tejjeni cua'reni te la'ni. Luxh yu' stee xhajbni ni laa tunica, nadijbni, guejnni hasta lo yuj guc-cheeni.

<sup>24</sup> Ni'cni rájppreni lo sa'reni:

—Na'c guitiájznuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadro caj scree: “Batiäjsreni xhablojiaä; yejca xhabä ni bia'n gudzujtreni daad.”

Ni'cni bejn resoldaad recosre.

<sup>25</sup> Niluxh cuä' xcruzj Jesús suga' xnanni, con bäjl xnanni, ni laa Marii cháäl Cleofas, nájza Marii Magdaleñ.

<sup>26</sup> Che bahuíi Jesús loj xnanni, dxejc bahuiizani loj xpejppacni nani sanälazduxhni, rájpp Jesús loj xnanni:

—Nan, ¡bahuii, aro'c xi'nlu!

<sup>27</sup> Dxejcti räjp Jesús loj xpejn̄pacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejn̄pacni xnan Jesús rolijzpacni.

*Xho gujt Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

<sup>29</sup> Ro'c suga' te guejs vinagr, nenga bahuajdxreni te esponj dxejc bacuaarenini lo te yaaj ni laa hisopo, guläsreni esponjga batzugrenini ro'ni.

<sup>30</sup> Che gulujx gu' Jesús vinagrga, räjpni:

—Agulujxni.

Dxejcti basajb yejcn̄i, baslaani xaimni.

*Xhi bejn te soldaad lo Jesús*

<sup>31</sup> Dxejga najc dxe vispr xte lani pascw, che ru' mandaad par lanijga. Rexejn̄ Israel di rälazreni nia'n rebejn̄ga lo recrutz, sa'csi dxe sabdga najc dxej ni rusilajzreni. Ni'cni gunabreni lo Pila't guxhalmi chu qui'ch ni'reni te guetreni, te jiäjtreni loj recrutz.

<sup>32</sup> Dxejcti bidzujñ resoldaad, gudi'chreni guiro'p ni' nani caj te laad, sigajcza bennäjreni stee ni caj ste laadga.

<sup>33</sup> Che gubigreni lo Jesús, bahuiireni alagujtni, direni nigui'ch ni'ni.

<sup>34</sup> Tej soldaadga baqui'tzni te lans ro' xcustiini, dxejc bixe' rejñ näjza nis.

<sup>35</sup> Lagajc narä Juan bahuiä recosga, ni'cni cania' rediidxre, luxh diidxga guliipacni. Lagajc narä nanä didxguliipac cania', te chaliiza lajztu xcuentni.

<sup>36</sup> Sa'csi si'c gujc guira'ti, te guzojb xtidx Dios cadro caj: “Ni'cla tej xtzujtni di guech.”

<sup>37</sup> Sigajcza lo stee gujtz caj diidxre: “Sidxelojreni loj nani bigujtz te lans.”

*Huicua'tzreni Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Che gulujx recosga, dxejcti huij José, te beñ Arimatea, nacxhiga'tzni te xpejn̄ Jesús, sa'csi rdxejbn̄i rexejn̄ Israel, ni'c huijni loj Pila't, gunabni loj Pila't te laani guiliätni Jesús lo cruzj. Cuäjzba Pila't, dxejc biääd José gulätni Jesús, sanätini togoolga.

<sup>39</sup> Näjza Nicodem̄ biääd dxejc, nani galoo huininäj Jesús te guxhijñ. Biädñani si'cti tiuu kil te dänejxh ni najc si'c yaal ni laa mirra näjza áloes.

<sup>40</sup> Dxejcti cua'reni Jesús batejbrenini te la' lad lino, basälzarenini däjga ni laa mirra con áloes, sa'csi si'c najc xcostumbr rexejn̄ Israel che rucua'tzreni te togool.

<sup>41</sup> Gajxh cadro cuaj Jesús lo cruzj, yu' te huert, neñ huertga yu' te bacoob si'c te biliää, cadro ni'cla tej bejn̄ gajd guiga'tz.

<sup>42</sup> Sa'csi abidzujñ dxej vispr lani pascw xten rexejn̄ Israel, luxh gajxh suga' biliääga, nenga gudixhreni Jesús; si'c biga'tztini.

## 20

*Gubansac Jesús loj rebengut*

(Mt. 28:1-10; Mr. 16:1-8; Lc. 24:1-12)

<sup>1</sup> Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga.

<sup>2</sup> Dxejcti ruxuñni gubi'ni te huiye'tzni lo Simón Pedr näjza lo stee xpejn̄pac Jesús ni sanälazduxhni, räjpni lojreni:

—Ahuilääreni Dad neñ baa, luxh dinu guidon caro sanärenini.

<sup>3</sup> Dxejc biriguxuñ Pedr näjza stee bejn̄ga, huijreni nez lo baa.

<sup>4</sup> Ruxuñ guiro'preni. Niluxh stee bejn̄ga ruxuñduxhruni loj Pedr. Laani ganid bidzujñni lo baaga.

<sup>5</sup> Dxejcti guretäñni te bahuiini neñ ba-biliääga. Bahuiini te laad naga' relajdts nani bidejb Jesús, luxh dini niu' neñ baaga.

<sup>6</sup> Dxejc bidzujñgajc Pedr, biugajcni neñ baaga, bahuiini naga' relajdga te laad.

<sup>7</sup> Bahuiizani lajd ni guyu' yejcn̄i, ni'c nie'tni saru, naga'ni te laad.

<sup>8</sup> Dxejcti biu' stee bejn̄ga nani bidzujñ ganid. Che bahuiini neñ baaga, huililajzni gubansac Jesús.

<sup>9</sup> Sa'csi gajdreni gachee ni caj lo reguijtz, cadro caj nanab guibansacni loj rebengut.

<sup>10</sup> Dxejc gubisac guiro'p rexejn̄pacni rolijzreni.

*Balui loj Jesús loj Marii Magdalen*

(Mr. 16:9-11)

<sup>11</sup> Laltis suga' Marii cuä' baaga, cayoonni. Ni'cni laj ni cayoonni, basajb lojni te bahuiini neñ baaga.

<sup>12</sup> Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni.

<sup>13</sup> Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

<sup>14</sup> Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús.

<sup>15</sup> Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanälumi, gunii caro gudixhluni te guiliäsáni te chanääni.

<sup>16</sup> Dxejcti räjp Jesús lojni:

—¡Marii!

Dxejc gubiré Marii, räjpni neñ xtidx hebreo:

—¡Raboni!

(Sälöj diidxga “Mastr”.)

<sup>17</sup> Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

<sup>18</sup> Dxejcti huij Marii Magdalen, bidzujñni loj rexpejn̄pacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

*Baluiloj Jesús loj rexpejn̄pacni*

(Mt. 28:16-20; Mr. 16:14-18; Lc. 24:36-49)

<sup>19</sup> Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn̄pacni, sa'csi rdxejbreñi rexpejn̄ Israel. Chela bidzujñ Jesús, guzujni nez galäiireni, räjpni lojreni:

—Suchu yäl̄rbedxi lastootu.

<sup>20</sup> Che guniini si'c, baluigajcni reñani lojreni näjza cuä' xcustiini. Ni'cni bibaduxhlajz rexpejn̄pacni che bahuiireni lo Dad Jesús.

<sup>21</sup> Dxejc räjp Jesús lojreni stehuält:

—Suchu yäl̄rbedxi lastootu. Si'c ni baxhəl Xtadä narä, si'cza ruxhālā la'tu.

<sup>22</sup> Che gulujx guniini rediidxga, balejbni yejcreni, räjpni, lojreni:

—Suguibajñ Sprit Dxan xten Dios neñ lastootu.

<sup>23</sup> Rextojl rebejn̄ nani siäl̄lajztu, sibicajreni. Rextojl rebejn̄ nani ditu jiäl̄lajz, siannäjreni redojlga.

*Tomás bahuii lo Jesús ni gubansac*

<sup>24</sup> Tomás, ni laaza Didimo, najcni te retzubitio'p xpejn̄pac Jesús. Rutini che biääd Jesús loj rexpejn̄pacni.

<sup>25</sup> Dxejcti räjp rexpejn̄pacni lojni:

—Abihuiinu loj Jesús, agubansacni loj rebengut.

Dxejcti laani räjpni lojreni:

—Palga dina fiä loj reñani cadro caj seen xten reclaab, palga dina guqui'tzä bicuenaä cadro guyu' claabga, guqui'tzäza ñaa cadro bixal cuä'ni, di lazä chaliñ gubansacni loj rebengut.

<sup>26</sup> Che gudejd xhujñ dxej, tresac rexpejn̄pacni neñ yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yäl̄rbedxi lastootu.

<sup>27</sup> Dxejcti räjpni loj Tomás:

—Baqui'tz bicuenaalu ree loj patñaä, basäl̄za ñaalu cuä'äre, na'c ractio'p lajzlu, huililajzpac gubansacä loj rebengut.

<sup>28</sup> Dxejcti räjp Tomás lojni:

—¡Xtadä, Xtioozä!

<sup>29</sup> Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

*Xhicuent bacuaani regujtzre*

<sup>30</sup> Xhidaldroduxhru dzuun bejn Jesús nez loj rexpejn<sup>pacni</sup>, nani di nicaj lo guijtz.  
<sup>31</sup> Redzuunre nani bejn Jesús nani cuaj lo guijtzre cuajni te chalilajztu diidzre: Jesús najc Crist, nani cabäjz rebejn jääd, Xi'n Dios. Luxh che chalilajz te bejn xtiidxni, sajpn<sup>i</sup> yäl<sup>nabajn</sup> par tejpas.

## 21

*Jesús baluiloj<sup>ni</sup> lo gajdz xpejn<sup>pacni</sup>*

<sup>1</sup> Dxejcti baluiloj Jesús loj rexpejn<sup>i</sup> ro' nisdoo ni laa Tiberias. Scree baluiloj<sup>ni</sup> lojreni.  
<sup>2</sup> Nadxaag sa' rebejn<sup>re</sup>: Simón Pedr, Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejn<sup>pacni</sup>.

<sup>3</sup> Dxejcti räjp Simón Pedr loj resa'ni:  
 —Chanazä bäj.

Räjpreni loj<sup>ni</sup>:

—Näjza nuure chonnu.

Dxejcti sääreni, huä'preni neñ te barcw. Guideb guxhijnga xhet bäjldi gunaazreni.

<sup>4</sup> Che acayanij loj guedxliuj, suga' Jesús ro' nisdoo, di rexpejn<sup>i</sup> niembeeni.

<sup>5</sup> Ni'cni räjp Jesús lojreni:

—Rexi'nä, ¿la xhet bäjldi rajptu, ä?

Räjpreni loj<sup>ni</sup>:

—Xhet rajpdinu.

<sup>6</sup> Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäj.

<sup>7</sup> Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäj, dxejcti gutiäjsni lo nisdoo.

<sup>8</sup> Sgañ rexpejn<sup>pacni</sup> biädnäreni rebarcwga sa'csi ameer guidzujn<sup>reni</sup> ro' nisdoo, si'cti tegayuu metrtis cayääd. Siändäzaren<sup>i</sup> guijxh guidxa rebäj.

<sup>9</sup> Che bidzujn<sup>reni</sup> ro' nisdoo, bahuiireni re' guüboo, ro'c dzuub te bäj näjza yätxtiil cague'.

<sup>10</sup> Dxejcti räjp Jesús lojreni:

—Coltanä gañ bäj nani entis gunaaztu.

<sup>11</sup> Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choñ bäj neñ guijxhga, niluxh dini niräsa' mase guyu' xhidalduxh bäj neñ.

<sup>12</sup> Dxejcti räjp Jesús lojreni:

—Coltaa te gauharejntu.

Nicla tej rexpejn<sup>pacni</sup> dini niabdiidx loj<sup>ni</sup>: “¿Chu luj?” sa'csi anajnreni laa Jesúsni.

<sup>13</sup> Dxejcti cua' Jesús yätxtiil, badeedni lojreni, sigajcza rebäj.

<sup>14</sup> Dee najc ni riojn huält baluiloj<sup>ni</sup> loj rexpejn<sup>pacni</sup>, che gubansacni loj rebengut.

*Jesús rñinäj Simón Pedr*

<sup>15</sup> Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni loj<sup>ni</sup>:

—O'n, Dad, luj najnlu sanälazä luj.

Räjp Jesús loj<sup>ni</sup>:

—Gojp rexilä'ä.

<sup>16</sup> Räpsacni loj<sup>ni</sup> ni rojp huält:

—Simón, xi'n Jonás, ¿la sanälajzlu narä, ä?

Räjpni loj<sup>ni</sup>:

—O'n, Dad. Luj najnlu sanälazä luj.

Räjpni loj<sup>ni</sup>:

—Gojp rexilä.

<sup>17</sup> Räpsacni loj<sup>ni</sup> ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús loj<sup>ni</sup> choñ huält: “¿La sanälajzlu narä?” Dxejcti räjp Simón loj<sup>ni</sup>:

—Dad, luj najnlu guira'ti. Luj najnlu sanälazä luj.

Räjp Jesús loj<sup>ni</sup>:

—Gojp rexilä.

<sup>18</sup> Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu bengool, susgaatislu ñaalu te gushuajcw ste'ca bejn xhajblu, te chanäreni luj cadro di rlajzlu.

<sup>19</sup> Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

<sup>20</sup> Che gubiré Pedr, bahuiini loj stee xpejnni, nani sanälajzru Jesús, siädnajlni dejtreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?”

<sup>21</sup> Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

<sup>22</sup> Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

<sup>23</sup> Ni'cni bire'ch diidx lagajc loj resa'ni, di bejnğa guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

<sup>24</sup> Luxh bejnğa najc narä, xpejn Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

<sup>25</sup> Yu'ru xhidalduxh dzuun ni bejn Jesús. Palga gucuauanu guiralii redzuun ni bejn Jesús, nicla lo guedxliujre di gal chu regujtz cadro xcajni.

## Redzuun Rexpejn Dios

*Siääd Sprit Dxan xten Dios te cuääzni neḡ lastootu*

<sup>1</sup> Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini,

<sup>2</sup> hasta dxejli ni huäjsni xhaguibaa. Gunibexgaani xhini'c gun renani guleni gac xpejnḡpacni. Sprit Dxan xten Dios baluui Jesucrist xhi guiniini lojreni.

<sup>3</sup> Gudejd Jesucrist trabajwduxh, dxejcti gujtni. Dxejc gubansacni lo rebengut, baluulojni lo rexpejnḡpacni. Tiuu dxej baluulojni loj rexpejnḡpacni balti huält te gacbeereni agubansacni. Guniizani lojreni xcuent xcälḡrniḡbee Dios.

<sup>4</sup> Che gudejd tiuu dxejga, batojp Jesucrist rexpejnḡpacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjḡpni:

—Dee abiejn diajgtu guniä lojtu.

<sup>5</sup> Juan batiobnis con nis, luxh naj guxii dxej cayäädx dxejcru siääd Sprit Dxan xten Dios te cuääzni neḡ lastootu. Si'c guirobnistu —räjḡpni.

*Huäjs Jesucrist siini xhaguibaa*

<sup>6</sup> Lagajc dxejc che abidojḡpreni loj Jesucrist, gunabdiidxreni lojni:

—¿La naj gudedsaclu yälḡrniḡbee lo rexpejn Israel, ä?

<sup>7</sup> Dxejcti räjḡp Jesucrist loj rexpejnḡpacni:

—Di riäjḡl gacbeetu xcuent redxej näjza retiemp nani abasobxgaa Dios con xcälḡrniḡbeeni.

<sup>8</sup> La'tu sica'tu yälḡrniḡbee che abiääd Sprit Dxan xten Dios neḡ lastootu. Dxejc chatie'chtu xtidx näjza rextzunä neḡ guedx Jerusalén, neḡ guiraa reguedx Judea, neḡ guiraa reguedx Samaria, näjza neḡ guideb guedxliuj —räjḡpni.

<sup>9</sup> Gulujxtis gunii Jesucrist rediidxga, luxh laḡni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni neḡ zaga. Ro'cti diru rebejn nuhuui lojni.

<sup>10</sup> Laḡni cadxelodxi rebejn xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni.

<sup>11</sup> Dxejc räjḡp reangl loj rebejn:

—¿Xhi rajctu beḡ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjḡpreni.

*Gulereni Matias ni najc apostcoob*

<sup>12</sup> Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni nrii leii sajc sareni dxej ni rusilajzreni.

<sup>13</sup> Che biu'reni Jerusalén, bidzujḡpreni ro' yu' cadro rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, näjza Judas bejtz Jacoob.

<sup>14</sup> Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

<sup>15</sup> Nadxagsa' te gayuu gajl bejn. Dxejcti huisulii Pedr galäiireni, räjḡpni loj rebejn:

<sup>16</sup> —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni.

<sup>17</sup> Gujc Judas sa'nu, bejnzani lagajc dzuun ni biennu.

<sup>18</sup> Cua' Judas meel ni badeedreni lojni che bato'ni Jesucrist. Che gulujx bejnḡni dzunguijdx ni bejnḡni, badedsacni meel lojreni. Gusiireni te la' yuj. Dxejcti lagajc Judas basäl duu guejnḡni, guzäbnajḡni lo bej, gujtni. Gusaguijnḡni, dxejcti biräjs xque'ni birii guiraa reziini.

<sup>19</sup> Che biejn diajg rebejn Jerusalén si'c, gulälajreni yujre Acældama, ni säloj yurejn.

<sup>20</sup> Neḡ guijtz ni laa Salmos abacuaa toDavid rediidxre:

Sujianxteb rolizni;

na'c cuääzru bejn rolizni;

näjza:

Suxca'za ste'ca niguii xtzuumni.

<sup>21</sup> Naj nanab cuenu stee niguii —räjḡp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu,

<sup>22</sup> dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäḡ niguiire nuunu gusule'nu diidx gubansacpac Jesucrist lo rebengut.

<sup>23</sup> Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matias.

<sup>24</sup> Gurejdx, gunabreni lo Dios, räjḡpreni:

—Dad, Dios, ni racbee lastoo guiraa rebejn, baluui loonu con ni najc niguii ni agulelu loj guiro'p niguiire,

<sup>25</sup> te jiu'ni lo dzuun nájza lo yálapost ni basa'n Judas cheni sääni garenca nejz —räjpreni.

<sup>26</sup> Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapost te gujcreni tzubitio'p apost.

## 2

### *Biääd Sprit Dxan xten Dios*

<sup>1</sup> Che bidzujñ dxej ni rajc lanij xten Pentecostés, tre' guiraareni tejsi lajt neñ te yu',

<sup>2</sup> chela gusloj cayubej xhaguibaa si'c te beroduxh, bachajni guideb neñ yu' cadro suga'reni.

<sup>3</sup> Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c.

<sup>4</sup> Biu'ti Sprit Dxan xten Dios neñ lastoo guiragajcreni. Dxejc gusloj caniireni garen-garen didxsaj si'ctisni badeed Sprit Dxan xten Dios guiniireni.

<sup>5</sup> Neñ redxejga, xhidajl rexpejn Israel ni sasanäjpac xtidx Dios bidzujñ guedx Jerusalén. Xhidajl lajt biriireni siäädreni.

<sup>6</sup> Che biejn diajgreni guyubej beduxhga, bidojp rebeñ xhidaalga, bachaag sa'reni. Rdxeloduxh rebeñ xhidaalga sa'csi cayejñ diajgreni canii reapost xtidxsajpac cade tejreni.

<sup>7</sup> Cadxelojreni räjpreni:

—¡Bahuilaaare! ¿La et beñ Galileedi renani canii, ä?

<sup>8</sup> ¿Xhoxh riejn diajgnu caniireni xtiidxpacnu si'ctis ni rniinu laadxnu, ä?

<sup>9</sup> Najcnu beñ nacióñ Partia, beñ nacióñ Media, beñ región Elam, beñ Mesopotamia, beñ Judea, beñ estad Capadocia, beñ región Ponto, nájza beñ Asia.

<sup>10</sup> Najczanu beñ distrit Frigia, beñ estad Panfilia, beñ nacióñ Egipto, nájza beñ ni siääd stelaad Cirene, te estad neñ Africa. Loj rebejn ni siääd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel.

<sup>11</sup> Yu'za beñ Creta. Yu'za beñ nacióñ Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujñ Dios.

<sup>12</sup> Bidxeloduxh rebeñ xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

<sup>13</sup> Dxejcti guyu' rebejn ni baxhiznäjreni, räjpreni:

—Agusojz redee.

### *Gunii Pedr loj rebejn*

<sup>14</sup> Dxejcti gusulii Pedr nájza tzubiteeb sa'ni, guredxa'ni guniini lo rebeñ xhidaalga:

—Guejbtu, rexpejn Israel, nani rbäjz distrit Judea nájza guedx Jerusalén. Colcuadiajg diidx nani guiniä.

<sup>15</sup> Xhet sojzdinu si'cni cayujntu xhigab. Rsilru naj, entis gojl rcagaa.

<sup>16</sup> Dxejc scree gunii Joel che guniini xtidx Dios agujc xchero.

<sup>17</sup> Räjp Dios:

Sidzujñ dxej che guxhalä Xsprit Dxanä cuääzni neñ lastoo guiraa rebejn.

Rexingaantu nájza rexindxa'ptu siniu xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

<sup>18</sup> Guxhalä Xsprit Dxanä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

<sup>19</sup> Suluiä lojtu balti senro xhaguibaa nájza lo guedxliuj.

Resenro ni gac najc rejn con guiboo, luxh guxh sire' si'c te za.

<sup>20</sup> Sicäjy loj gubijdx, sajc bäii si'c rejn.

Sajc guiraa recosre,

dxejcru sidzujñ dxeduxh che jäälsacä narä, Dios.

<sup>21</sup> Dxejc guiraa rebejn nani cuedx guiniab gacnäj Diosreni, reni'c siliaa lo dojl.

<sup>22</sup> Räjp Pedr lojreni:

—Rexpejn Israel, colcuadiajg xtidxä. Dios baluui Jesucrist, beñ Nazare't, lojtu por recosro, remilagwr, reseen nani bejnii nez lojtu. Lagajc Dios badeed yälrnibee loj Jesucrist te bejnii redzunroga. La'tu nancheetu dee.

<sup>23</sup> Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznäa rebeñgijdx te bacuaareni Jesucrist lo cruzj te bagu'trenini.

<sup>24</sup> Baspañsac Dios Jesucrist, baslaa Diosni ladznäa yälgujt, sa'csi di najcdi nica' yälgujtni par tejpas, sa'csi laani rnibee lo yälgujt.

<sup>25</sup> Che gubañsac Jesucrist, guzojb diidx ni bacuaa David lo guijtzc xcuent Jesucrist. Räjp David lo Dios:



Guira dxej ruhuiä lojlu, Dios.

Suga'lu xladbeä cayacnäjlü narä te di guidxejb lastoä.

<sup>26</sup> Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

<sup>27</sup> Dizalu gusaan jia'n xaimä neñ baa.

Dizalu gusaan gudx tiejxh xi'nlü nani sanälajzlu.

<sup>28</sup> Abalüiilu löä xho guibanä par tejpas.

Sibalazduxhä sa'csi guibannä luj,

si'c räjp David xcuent Jesucrist.

<sup>29</sup> Räjp Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuiinu baa cadro biga'tz David.

<sup>30</sup> Gunii David xtidx Dios. Che nabajnlü David bia'n diidx gudeed Dios te xajgni ni guirilaj Crist, luxh laani gacni reii si'cni guj David.

<sup>31</sup> Sa'csi baluixgaa Dios recosre lo David, ni'c räjp David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni.

<sup>32</sup> Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut.

<sup>33</sup> Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujñ guira'ti nani cahuiitu, nani cayejñ diajgtu nadxej.

<sup>34</sup> Di David nij xhaguibaa, sa'csi lagajc David räjp:

Gunii Dios lo Dad nani rnibee löä: “Gurej xladbeä

<sup>35</sup> che guidzujñli dxej gudzugä guiraa reni rdxe'ch lojlu te gacheereni luj rnibeelu guira'ti.”

<sup>36</sup> Rñiliäpac lojtu —räjp Pedr—. La'tu bacuaatu Jesús lo cruzj. Ni'cni, colgacbee, guiraatu xpeñ Israel, abejñ Dios gac Jesúre Dad nani rnibee loonu.

<sup>37</sup> Che bieñ diajgrenti laareni bacuaareni Jesús lo cruzj, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, çxhini'c jiennu naj?

<sup>38</sup> Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu.

<sup>39</sup> Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

<sup>40</sup> Dxejrcru gunii Pedr xhidajrlu diidx, balijdxni rebejn:

—Colguirii loj rebeñ latsiaj ni re' lo guedxliuj naj, te laatu lo dojl.

<sup>41</sup> Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ miñ bejn.

<sup>42</sup> Sanuutis rusoobreni diidx ni baluui reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

*Xho gubajñ rexpejn Jesucrist galoo*

<sup>43</sup> Bidxeloduxh guiraa rebejn luxh bejn reapost redzunro, remilagwr.

<sup>44</sup> Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni.

<sup>45</sup> Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni.

<sup>46</sup> Guixe-guixee bidojpreni neñ guidoro xten Israel. Tejsi najc rexhigabreni. Gudaunäj sa'reni roliz cadetejreni, guiraareni bibalazduxh sa'reni.

<sup>47</sup> Gulä'preni xpala'n Dios. Guiraa rebejn gunii rexpejn Jesucrist najc beñsa'c. Guixe-guixee batie' Dios xhidajrlu bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

### 3

*Biajc niguii nani racxhuu ni'ni*

<sup>1</sup> Guyu' te dxej sää Pedr näjza Juan nez loj guidoro si'cti rcachon gudxej.

<sup>2</sup> Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacru. Ro'c rbejni rniabni gojn lojreni riu' guidoo.

<sup>3</sup> Che bahuiini agojl jiu' Pedr näjza Juan neñ guidoroga, gunabni te gojn lojreni.

<sup>4</sup> Dxejcti bahuii Pedr näjza Juan lojni. Räjp Pedr lojni:

—¡Bahuii loonu!

<sup>5</sup> Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

<sup>6</sup> Räj̄p Pedr lojni:

—Xhetliidi meeldi rapä, nani rapätis sunidxä lojlu. Xcuent xcäl̄rnibee Jesucrist, ben Nazare't, rniä lojlu: ¡Gusulii! ¡Gusaj! —räj̄pni.

<sup>7</sup> Dxejcti gunaaz Pedr naani, guläsnini. Biligajc ni'ni, gusutijp ni'ni.

<sup>8</sup> Huisuyäjni, gusajni. Biunäj̄ni Pedr näjza Juan neñ guidoro. Rsiaj̄ni, rtiäsni, calä'pni xpala'n Dios.

<sup>9</sup> Bahuii xhidajl bejn lojni neñ guidoro, rsiaj̄ni, calä'pzani xpala'n Dios.

<sup>10</sup> Bimbeereni laa niguii ni rbej ro' puetro xten guidoro, rniabni gojn. Guiraareni bidxeloduxhrene bahuiireni xhi gusajc niguii ni gucxhuu ni'ni.

*Baluii Pedr xtidx Dios nen cordoor xten guidoro*

<sup>11</sup> Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, natzu'tz niguiiga naareni. Ruxuñ guiraa rebejn bidzuj̄n neñ cordoorga. Bidxelojreni sa'csi arsiaj niguii ni gucxhuu ni'ni.

<sup>12</sup> Che bahuii Pedr lo rebejn räj̄pni lojreni:

—¿Xhicuent rdxejoj guejbtu, rexpejn̄ Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcäl̄rnibee Jesucrist biaj̄c ni' niguiire.

<sup>13</sup> Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yäl̄rnibee loj Xi'nni Jesús. Niluxh la'tu bateedtuni ladz̄naa reguxhtis. Che rlajz Pila't ni rnibee nuslaa Jesucrist, ditu nicäjb niriini, alga guniyajtuni nez loj Pila't.

<sup>14</sup> Niluxh la'tu baro'ntu Xi'n Dxaan xten Dios nani rujn ganax dzunsa'c. Alga gunabtu birii te niguii nani bagu't bejn.

<sup>15</sup> Jesucrist rudeed yäl̄nabaj̄n, luxh la'tu gunabtu bacuaareni Jesucrist lo crujz. Gulässac Dios Jesucrist lo rebengut. Bahuiloonu nabaj̄n Jesucrist, najcnu testiğw gubansac Jesucrist lo rebengut.

<sup>16</sup> Cahuiitu loj niguiire nani gucxhuu ni'ni, luxh rumbeetuni. Xcäl̄rnibee Jesucrist abasiaj̄c niguiire, sa'csi huililajz̄ni. Sa'csi huililajz̄nu xtidx Jesucrist, ni'c biaj̄cni te najcni si'cni rhuiituni naj.

<sup>17</sup> Rrexpejn̄ Israel, narä nanä di'tu niacbee, diza rexcuxhtistu niacbee laa Xindxaan xten Dios ni bacuaatu lo crujz.

<sup>18</sup> Scree guj̄c te guzobj̄ xtidx Dios ni cuaj lo guijt̄z aguj̄c xchero. Diidxre bacuaa reniguii ni gunii xtidx Dios, Crist xten Dios sidejd̄ trabaj̄wduxh.

<sup>19</sup> Ni'cni col̄siechajz̄tu, colguibi' loj Dios te guibicaj̄ xtoj̄ltu. Dxejc susiälyuj̄ Dios lastootu, suj̄nni gac nacoob guira'ti, si'cni bia'n diidx gacni.

<sup>20</sup> Lojtu suxhal̄za Dios Jesucrist nani rnibee, nani aguleni galooli.

<sup>21</sup> Naj nungäjl̄ jia'n Jesucrist xhaguibaa dxejli gusoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu aguj̄c xchero.

<sup>22</sup> Scree gunii toMoisés lo retoxtadgoldoonu, räj̄pni: “Xtadnu Dios suxhal̄ te niguii sa' narä nani cueni lo resa'tu. Siniini xtidx Dios. Col̄gusobdiaj̄ guiralii diidx nani guiniini lojtu.

<sup>23</sup> Renani di gusoob rextiidxni, sinitlojreni, direni gac rexpejn̄ Dios.”

<sup>24</sup> Räj̄pza Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siäd̄naj̄lni, xcuent recos ni cayajc neñ redxetje.

<sup>25</sup> La'tu najc xaj̄g reniguii ni gunii xtidx Dios. La'tu biannäj̄tu diidx nani gunii Dios loj retoxtadgoldoonu. Bia'n diidx, räj̄p Dios loj toxtadgoldoonu Abram: “Jiäd̄j̄aj̄l te xaj̄glu ni guspalazduxh reben guedxliuj̄, sa'csi suslaanireni lo dojl̄.”

<sup>26</sup> Dxejcti ganiddoo lojtu baxhal̄ Dios Jesucrist te guibaa lajz̄tu che gusiejch lajz̄tu, te na'cru guntu dojl̄ —räj̄p Pedr.

## 4

*Baluii Pedr näj Juan xtidx Dios loj reguxhtis*

<sup>1</sup> Lał̄ ni caniireni lo rebejn, ro'c bidzuj̄n rebixhojz xten Israel näjza nani rnibee lo resoldaad xten guidoro näjza resaduceso.

<sup>2</sup> Bidxe'chduxhrene sa'csi caculij̄dxrene rebejn, cayäj̄preni:

—Sibansac rebejn lo rebengut sa'csi gubansac Jesucrist lo rebengut.

<sup>3</sup> Gunaaz reguxhtisrene, biäureni sa'csi agudx̄ej luxh abiäu jusgaad. Neñ latz̄guiib barareni yääl.

<sup>4</sup> Xhidajl̄ reni biejn diaj̄g xtiidxrene huililajz̄ xtidx Dios. Si'cti gaii mil niguii huililajz̄ xtidx Dios.

<sup>5</sup> Che bara yääl, bachaag sa' guiraa rebengool, renani rnibee guedx Jerusalén, nájza rebejn ni ruluu leii,

<sup>6</sup> nájza Anás ni rnibee guiraa rebixhojz, nájza xpagojzni ni laa Caifás, nájza Juan, nájza Alejandro, nájza guiraa reniguii ni najc sa' rebixhozro ni rnibee.

<sup>7</sup> Gunibeereni biääd Pedr nájza Juan gusuj galäiireni te gunabdiidxreni lojreni:

—¿Chu xcälrnibee rajptu? ¿Chu laj basä'ttu te basiajctu niguiire?

<sup>8</sup> Dxejcti sa'csi cayu Pedr diidx ni canii Sprit Dxaan xten Dios neñ lastooni, räjjni lojreni:

—Caniä lo guejbtu, reguxhtis nájza rebengool xten rexpejn Israel,

<sup>9</sup> palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basiajctnu niguiiga,

<sup>10</sup> gusule'nu xcuent dee te gacheetu te gacheeza guiraa rexpejn Israel. Xtidx Jesucrist najc yälrnibeduxh. Diidxga abasiajct ni' niguiire, xhet rajcdini suga'ni nez lojtu. La'tu abacuaatu Jesucrist lo crujz, niluxh Dios guläsni lo rebengut.

<sup>11</sup> Di'tu ninälajz xtidx Jesucrist. Laani najc si'c te guij nani rbäcajtü che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'.

<sup>12</sup> Xtebtis Jesucrist ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c räjpn Pedr:

<sup>13</sup> Che biejn diajgreni xtidx Pedr, bidxelojreni sa'csi di Pedr nájza Juan guidxejb, dizareni guituju. Dxejcti räjpn rebixhojz ni sajrcu lo sa'reni:

—Direni ganduxh guijtz, bejntisireni.

Dxejcti gucbeereni gusanäj redee Jesucrist, lojni bisieedreni.

<sup>14</sup> Bahuiiza rebixhojz lo niguii ni abiajct ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni.

<sup>15</sup> Dxejcti gunibee rebixhojz birii guidxojnreni telaad te bij rebixhojz diidx ensilaareni.

<sup>16</sup> Räjpreni lo sa'reni:

—¿Xhi jiennäanu reniguiire? Guiraa rebejn Jerusalén anajn xcuent dzunroduxhre ni cayujnreni. Digacdi gucuatzlaaznuni.

<sup>17</sup> Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

<sup>18</sup> Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

<sup>19</sup> Dxejcti gunii Pedr nájza Juan, räjpreni lojreni:

—¿Colguini loonu chu xtiidx sajrcu guicuadiaagnu? ¿Xtiidx la'tu, o xtiidx Dios?

<sup>20</sup> Digacdi gusäunu ro'nu. Nanabpac gusule'nu diidx xcuent recos nani abahuiinu nájza rediidx ni abiejn diajgnu.

<sup>21</sup> Balidxsac rebixhojzreni te na'cru guiniireni xtidx Jesucrist. Dxejcti baslaa rebixhojz guiro'preni, sa'csi xhetru niajcdi niujnreni lo Pedr nájza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c.

<sup>22</sup> Sa'csi niguii ni basiajcreni xcuent yälmilagwr agudejndi tiuu ijjz.

### *Guredx-gunab rexpejn Jesucrist lo Dios*

<sup>23</sup> Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nájza rebengool lojreni.

<sup>24</sup> Che biejn diaj rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa nájza guedxliuj nájza nisdoo nájza guira'ti ni yu' lojreni, neñreni,

<sup>25</sup> nani bejn basoob toDavid xtidx Sprit Dxaan te bacuaani xtiidxlu, räjjni:

¿Xhicuent guyuduxh rebejn guedxliuj yärsia'?

¿Xhicuent bejn rexpejn Israel xhigab ni xhet sajcdi?

<sup>26</sup> Bidxagsa' reñeii lo guedxliuj nájza reguxhtis xten reguejdx te gudxojnreni xtzun Dios nájza xten Dad Crist nani baxhal Dios,

si'c gunii toDavid.

<sup>27</sup> 'Aguzojb diidxre, sa'csi lo guejdxre bidxagsa' Herodes nájza Poncio Pila't nájza rexpejn Israel nájza rebenzajt nani di gac xpejn Israel. Bidxechnäjreni Xi'nlu nani najc Crist ni baxhallu.

<sup>28</sup> Naj abejnreni dzunguijdx si'cni galooli guniilu gac.

<sup>29</sup> Naj Guejblu Xtiosnu, bahuii xho cagusacsireni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu.

<sup>30</sup> Baniidx xcälrnibee luonu te gusiajctnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

<sup>31</sup> Che gulujx gurejdxreni lo Dios, gusloj canibsejz yu' cadre tre'reni, cayac si'c te xu. Dxejcti biääd Sprit Dxiän xten Dios basutijpruni lastooreni. Dxejc dirureni nidxejz guniireni xtidx Dios.

*Rudeedreni xhixtenreni lo sa'reni*

<sup>32</sup> Guiraa renani huililajz xtidx Dios, tejsi xhigab bejnreni. Rut chu tejdireni bejn guinibxeteb xhixtenni: bachaagreni sa' rexhixtenreni te xca' guiraa renani nani rquiinreni.

<sup>33</sup> Gucnäj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni.

<sup>34</sup> Ni'cla tejreni di niäädx xhixtenni sa'csi renani gojp xyujni, rolizni, bato'renini, dxejcti biändnäreni xcuentni,

<sup>35</sup> badeedreni meelga lo reapost. Dxejcti gudis reapost meelga lo guiraa renani rquiinni.

<sup>36</sup> Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni).

<sup>37</sup> Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

## 5

*Ananías näj chäälni rujn dojl*

<sup>1</sup> Guyu' stee niguii ni laa Ananías. Chäälni laa Safira. Bato'reni te la' yuj.

<sup>2</sup> Niguiire biännäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujni.

<sup>3</sup> Dxejcti räjp Pedr lojni:

—Ananías, ¿xhicient ruseoblu xtidx Satanás ni nrabee lo rebendxab, ä? ¿Xhicient rlanjzlu gusgueelu Sprit Dxiän xten Dios? Biännäjlu gaa meel ni cua'lu che bato'lu te la' yuj.

<sup>4</sup> Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicient bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

<sup>5</sup> Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni.

<sup>6</sup> Sas gubig gaa bi'n batejbreni Ananías neñ lajd. Dxejcti sanärenini huicua'tzrenini nen baa.

<sup>7</sup> Pet agujc choñ or gujtni chela bidzujñ chäälni Ananías. Dini gan agujt chäälni.

<sup>8</sup> Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

<sup>9</sup> Dxejcti räjp Pedr lojni:

—¿Xhicient bejnlu tejsi xhigabgujdx con chäällu? ¿Xhicient rlanjzlu gusgueetu Sprit Dxiän xten Dios? Ro lä' siääd renani huicua'tz chäällu. Naj näjza luj chacua'tzreni neñ baa.

<sup>10</sup> Si'tcis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatgajczrenini cuä' baa cadre biga'tz chäälni.

<sup>11</sup> Bidxebduxh guiraa rexpejn Jesucrist, näjza guiraa rebejn nani biejn diajgni recosre.

*Bejn reapost xhidajl redzunro, remilagwr*

<sup>12</sup> Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón.

<sup>13</sup> Guyu' xhidajl bejn ni di nuchaag lo rexpejn Jesucrist sa'csi bidxebreni guchaagreni lojreni. Rebenguejdxga guläpduxhrene xpala'n rexpejn Jesucrist.

<sup>14</sup> Neñ redxejga xhidalduxh rebejn huililajz xtidx Jesucrist, niguii sigajc gunaa.

<sup>15</sup> Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpalaä Pedr yejceni che ted Pedr ro'c, te si'c jiajcreni.

<sup>16</sup> Guedx Jerusalén bidzujñ xhidajl rebejn ni siääd ste'ca guejdx. Biändnäreni rebejn ni cayacxhuu näjza balti bejn ni yu' bendxab neñ lastooreni. Con xcälrnabee Jesucrist basiajc reapost reben racxhuu, gulääzarenini rebendxab neñ lastoo balti bejn.

*Gudejd reapost trabajw*

<sup>17</sup> Dxejcti bidxehclajz bixhojz ni nrabee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu.

<sup>18</sup> Gunaazreni reapost. Basäurenini neñ latzguiib.

<sup>19</sup> Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost neñ latzguiib. Räjpni lojreni:

<sup>20</sup> —Colchäj guidoro. Ro'c colguini lo rebejn xho gac guibañnäreni Dios par tejpas.

<sup>21</sup> Che biejn diajgreni si'c, rsildooru biu'reni neņ guidoro, ro'c baluiireni xtidx Dios lo rebejn.

Dxejc bixhojz nani rnibee, nājza rebengool, bachagsa'reni gurejdxreni guiraa reguxhtis xten guidoo, nājza guiraa reguxhtis xten rexpejn Israel. Dxejcti gunibeereni jiādnā reguixhajg reapost nani biāu neņ ladtguiib.

<sup>22</sup> Che bidzujn reguixhajg latzguiib, bahuii reguixhajg neņ latzguiibga, niluxh rut yu'di neņ latzguiib. Che gubi'reni biādnāreni diidx, rājpreni loj reguxhtis:

<sup>23</sup> —Che bidzujn latzguiib, niāudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neņ latzguiib.

<sup>24</sup> Che biejn diajg bixhojz ni rnibee, nājza capitān nani rnibee resoldaad xten guidoro, nājza rebixhojz, ben tio'p lajzreni, rāj p lo sa'reni:

—Ķhini'c gujc? Ķhoni gac ņaj? —rājpreni.

<sup>25</sup> Dxejcti bidzujn te niguii, rāj pni lojreni:

—Reniguii ni basāutu neņ latzguiib, areni suga' neņ guidoro, luxh caguluiireni rebejn —rāj pni.

<sup>26</sup> Dxejcti sanā capitān xten resoldaad rexcuxhtis guidoro te biādnāreni reapost, luxh direni nusacsī reapost sa'csi rdxejbreni nucuaarenī guij yejceni.

<sup>27</sup> Che bidzujnājreni reapost, rājpreni suurenī nez loj reguxhtis xten Israel, sas gunii bixhojz ni rnibee,

<sup>28</sup> rāj pni loj reapost:

—ĶEt agunibeenu lojtu na'cru guiniitu xtidx Jesucrist? Xhoxh ņaj cagutie'chtu rediidxga lo guiraa rebejn neņ guedx Jerusalēn. La'tu rlaiztu cuaquijtu nuure bagu'tnu Jesucrist.

<sup>29</sup> Dxejc rāj p Pedr nājza reapost lojreni:

—Nanabpac gusoobnu xtidx Dios, lacuaa gusoobnu xtidx bejn.

<sup>30</sup> Bagu'ttu Jesucrist che bacuaatuni lo cruzj. Niluxh Xtios xtagdooloonu gulāsni lo rebengut.

<sup>31</sup> ņaj agule'c Diosni xladbeeni cadro rnibeeni, abadeedza Dios yālrnibee loj Jesucrist te guslaani nuure, te si'c rlaizni guibicaj xtojĵ guiraa rexpejn Israel nani gusiechlajzreni.

<sup>32</sup> Bahuiloonu xhi bejn Dios. Ni'c cagusule'nu. Nadoncheenu Sprit Dxaan xten Dios cayacnāj nuure te gusule'nu rediidxre. Badeed Dios Sprit Dxaan xtenni lo guiraa renani susoob xtiidxni.

<sup>33</sup> Che biejn diajg reguxhtis rediidxga, bidxechduxhreni, rlaizreni nugu'treni reapost.

<sup>34</sup> Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost neņ yu'ga.

<sup>35</sup> Dxejcti rāj p Gamaliel lo rebixhojz:

—Guejbtu rexpejn Israel, colyensa'c xhigab xhini'c rlaiztu gunnājtu reniguiire.

<sup>36</sup> Colzaa laiztu gajd gac xchej guyu' tej ni laa Teudas, rāj pni rnibeduxhni. Dxejc huinajl tajp gayuu bejn. Che bagu'treni, bire'ch guiraa rexpejñi, xhetru bejndireni.

<sup>37</sup> Nen iž ni guyu' cens, biriiza Judas ni siāād Galilee. Dxejc gurejdxni xhidajl bejn ni huinajl. Bagu'tza bejn, dxejcti bire'chza guiraa reni huinajl.

<sup>38</sup> ņaj rniā, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojñi.

<sup>39</sup> Palga xtzuum Dios ni cayujnreni, digacdi guscuaāznu dzuunga, sa'csi guidiĵnu guidxe'ch Gueb Dios loonu.

<sup>40</sup> Bichaglaiz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini.

<sup>41</sup> Biriitireni nez loj rebixhojz. Cabaduxh lajzreni sa'csi gujc gudejreni trabajw xcuent Jesucrist.

<sup>42</sup> Guixe-guixee laĵtis baluiireni xtidx Jesucrist neņ guidoro nājza rolizj bejn. Cagusule'reni diidx lo rexpeñ Israel:

—Jesús najc Crist nani cabāāztu jiāād.

## 6

### *Gulereni reniguii ni gudeed yāxtiil lo rexpejn Jesucrist*

<sup>1</sup> Neņ redxejga, xhidarlo gujc rexpejn Jesucrist. Niluxh gusloj camojñ rexpejn Jesucrist nani rnii didx griegw. Rājpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaurenī che rguisreni xhi gau rebiuud guixe-guixee.

<sup>2</sup> Dxejcti batie' guitzubitio'p reapost guiraa rexpejn Jesucrist, rājpreni lo guiraarenī:

—Et laadi guisaannu guluĵinu xtidx Dios te quisnu xhi gau rebiuud.

<sup>3</sup> Ni'c nanab cuetu lo resa'tu gajtz niguii nani najntu najc beŋsa'c, nani rbájz Sprit Dxan xten Dios neŋ lastooreni, nani yu' xcáriejreni. Reniguiire quis xhi gaureni.

<sup>4</sup> Te si'c sajc chanuutis guiniabnu lo Dios, guiluiizanu xtidx Dios lo rebejn.

<sup>5</sup> Guiralli rebejnğa bidxagljazreni diidxga. Dxejcti gulereni Esteban, te niguii ni rlilajzpac xtidx Dios, rbájzza Sprit Dxan xten Dios neŋ lastooni. Gulezaren Felipe, Prócoro, Nicanor, Timón, Parmenas; gulezaren Nicolás nani siáád guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist.

<sup>6</sup> Sas biádná rexepejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzuunreni.

<sup>7</sup> Birechduxh xtidx Dios. Xhidajl beŋ Jerusalén huililajz xtidx Dios, nájza xhidajl bixhojz.

*Gunaazreni Esteban sanärenini lo rebixhojz nani rnibee*

<sup>8</sup> Gucnáduxh Dios Esteban, bejnni redzunro, remilagwr nez lo rebejn.

<sup>9</sup> Dxejc rebejn guidoo ni laa Libertados gusloj cadilñáj Esteban. Lojreni nadxaag beŋ Cirene, nájza beŋ Alejandría, nájza gaii beŋ Cilicia, nájza sgaii bejn ni siáád reguedx Asia.

<sup>10</sup> Reniguiire di niajcdi nuzejceni diidx lo Esteban, sa'csi nasinduxhni, luxh cayacnáj Sprit Dxan xten Diosni.

<sup>11</sup> Dxejcti baquil'reni sgaii niguii ni di gac xpejn Jesús, te rájpreni:

—Biejn diaagnu caniyaj Esteban toMoisés nájza Dios.

<sup>12</sup> Scree gujc bache'chreni rebejn nájza rebejn ni ruluii leii nájza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel.

<sup>13</sup> Dxejcti biádnäreni reniguii nani baquil'reni te guniireni didx-xhii. Rájpreni reniguiire:

—Entis rniyaj Esteban leii xten toMoisés nájza guidodxanre.

<sup>14</sup> Abiejza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

<sup>15</sup> Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

## 7

*Diidx ni basule' Esteban lo rebixhojz*

<sup>1</sup> Dxejcti rájpreni te bixhojz nani rnibee lo Esteban:

—¿La gulii si'c guniilu, á?

<sup>2</sup> Rájpreni Esteban lojreni:

—Colgucua diajg rextidxá, guejbtu dad, nájza resa'á. Xtioznu ni sacduxh, ni rnibee, baluiloj lo toxtadgoldoonu Abram che gulájzni Mesopotamia, che gajdni chalájz neŋ guedx Harán.

<sup>3</sup> Rájpreni Dios loj toAbram: “Birii lajdxtu, basa'n guiraa resa'lu. Huij cadrotis guluiá lojlu”

<sup>4</sup> —rájpreni Esteban—. Dxejcti birii toAbram lajdx reCaldeos. Huilájzni guedx Harán. Che gujt xtadni, biádná Dios toAbram nez ree, cadro rbááznu ñaj.

<sup>5</sup> Di Dios nuzalajz nicla tla' yuj cadro suu te ni' toAbram. Niluxh rájpreni Dios sudeedni yujga lo rexajz toAbram, jiannájreni yujga che guet toAbram. Niluxh nicla gajd xi'n toAbram chu dxejc.

<sup>6</sup> Stee huált rájpreni Dios lo toAbram: “Rexi'nlu, rexagdoolu, silájzreni si'c beŋzajt. Ladxbejn gacreni mos, ro'c susacsí bejnreni si'cti tajp gayuu ijz.”

<sup>7</sup> Rájpreni Dios: “Nará suná castiigw rebejn ni gusacsireni che najceni mos. Nará cuáá rexagdoolu ro'c, te ree guzuxhijbreni loá neŋ guejdxre”, si'c rájpreni Dios

<sup>8</sup> —rájpreni Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basálza toAbram beegani si'c te seenza. Sigajcza bennáj Isaac xi'nni Jacob. Sigajcza bennáj Jacob guitzubitio'p rexi'nni nani najc rexpengdoo xpen Israel.

<sup>9</sup> Rájpreni Esteban:

—Guitzubiteb rexi'n Jacob guyu' te yálrudxojn lo bejtzreni José. Dxejc bato'reni José lo te beŋ Egipto. Dxejc Dios goptzu'tz José.

<sup>10</sup> Che gudejd José trabajwduxh, gucnáj Diosni. Badeed Dios yálnasinduxh lojni. Bejn Dios bichagljaz reií Faraón José. Badeed reií Faraón gujcti gubernadoor xten Egipto. Gunibeeza José guira'ti xhixten reiiga.

<sup>11</sup> Rájpreni Esteban:

—Che bidzujn dxej gujc te gubijn, guiraa neŋ reguedx Egipto nájza guiraa neŋ reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu.

<sup>12</sup> Che biejn diajg xtagoldoonu Jacob yu' xhi gaureni neñ reguejdx xten Egipto, ro'c baxhalni rexi'nni, bica'reni xhi gaureni te huält.

<sup>13</sup> Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José.

<sup>14</sup> Dxejcti baxhal José diidx jiädä xtagdni Jacob, näjza guiraa resa'ni, cuääzreni Egipto. Najc rebejnga si'cti gayonbitzubigaii bejn.

<sup>15</sup> Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtadgoldoonu.

<sup>16</sup> Dxejcti huiinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

<sup>17</sup> Räjpp Esteban:

—Che bidzujgajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto.

<sup>18</sup> Dxejcti guyu' te xreii Egipto ni di gan guiraa redzunsac' nani bejn toxtadgoldoonu José.

<sup>19</sup> Reiiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiiga basälreni guiraa rebáz niguii te di laareni, te guetreni.

<sup>20</sup> Neñ redxejga, gojl Moisés. Che gujc Moisés báz, te báz daani, saru rujn lojni, huiñälajz Diosni. Gułaani choñ bäii rolizjni.

<sup>21</sup> Dxejc huisälrenini, te guzojb xtidx Faraón. Dxejc lagajc xindxa'p Faraón bidxälmi Moisés, cua'nini baslaanini si'c xi'nni.

<sup>22</sup> Bisieed Moisés guiraa ni najn reben Egipto. Gunisa'cni diidx, bensa'cni dzuun.

<sup>23</sup> Räjpp Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni.

<sup>24</sup> Dxejc bahuiini casacsí te beñ Egipto te beñ sa'ni. Sas bagu'tni beñ Egipto.

<sup>25</sup> Bejn Moisés xhigab pet sacbee resa'ni cayacnäj Diosni te guslaani rexpejnni. Luxh di resa'ni niacbee si'c.

<sup>26</sup> Che bara yääl, bahuii Moisés cadilñäj sa'reni tiop xpen Israel. Räjpp Moisés lojreni: “Colcuedxi, Dad. Lagajc sa'tu cadilñäjtu. ¿Xhicuent rdijl'tu?” si'c gunii Moisés, te na'cru tilñäj sa'reni.

<sup>27</sup> Dxejcti nani cayunniälajzga, balanaani Moisés, räjpni loj Moisés: “¿Chu baniidx yälrnibee lojlu te jiädnibeelu nuure?”

<sup>28</sup> ¿La rlaizlu ju'tlu narä si'c bagu'tlu beñ Egipto naii?” —räjppni—.

<sup>29</sup> Che biejn diajg Moisés rediidxga, baxunni, huijni zijt. Huiläzsjicni guedx Madián. Ro'c bachnaani, guyu' tiop xingaanni.

<sup>30</sup> Räjpp Esteban:

—Che gudejd tiuu ijz, bidzujn te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl neñ te yaguejch. Neñ bajlga baluiloj angl xten Dios lo Moisés.

<sup>31</sup> Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjpni lo Moisés:

<sup>32</sup> “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti guceez Moisés sa'csi bidxebduxhni, diruni nuhuisa'c yajgga.

<sup>33</sup> Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree.

<sup>34</sup> Abahuiä xho cagusacsí reben Egipto rexpeñä. Abiejn diagä xho roonreni. Naj abiälä te guslaä rexpeñä. Gudaa naj, suxhalälü chäälü Egipto.”

<sup>35</sup> Räjpp Esteban:

—Dios badeed yälrnibee lo Moisés nani baze' retoxtadgoldoonu che räjpreni: “¿Chu baniidx yälrnibee lojlu te jiädnibeelu nuure?” Baxhal Dios Moisés te guinibeeni xpejn Dios, gucnäjza Dios Moisés baslääni rexpejnni neñ naciön Egipto si'c gunii angl xten Dios che baluilojni lo Moisés neñ yaguejchga.

<sup>36</sup> Gulää Moisés rebejnga. Ganiddoo bejn Moisés redzunro, yälrdxeloj neñ naciön Egipto näjza ro' nisdoo ni laa nisdoo xniaa. Tiuu ijz cuansaj retoxtadgoldoonu neñ yubijdzroga, ro'c bejnza Moisés redzunro, remilagwr.

<sup>37</sup> Lagajc Moisésre gunii xtidx Dios che räjpni loj rexpejn Israel: “Sibe Dios lo rexajgtu te niguii ni najc sigac narä. Sinini xtidx Dios. Colgusoob xtiidxni.”

<sup>38</sup> Lagajc Moisés guyunäj rebejn neñ yubidzro. Xangl Dios guninäj Moisés neñ dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

<sup>39</sup> Räjpp Esteban:

—Niluxh di retoxtadgoldoonu nusoob rextidx Moisés. Di rlaizreni guinibee Moisésreni. Canaduxhlajzreni naciön Egipto.

<sup>40</sup> Che sää Moisés dajn Sinaí, rájpreni loj Aarón bejtz Moisés: “Benchee banäjb gac xtiioznu, te nidreni loonu, te chanajlnureni. Chu gan con Moisésre ni baluii nezuyj che gulääni nuure guejdx reEgipto.”

<sup>41</sup> Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhjbreni lojni. Bibalazduxhreni sa'csi abencheereni banäjbga.

<sup>42</sup> Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujčni si'cni caj lo guijtz ni bejn reniguii nani bacuaa rextidx Dios. Rájpre Dios:

La'tu bejn Israel, cheni cuansajtu tiuu ijz nez lo reyubijdz,

¿La par narä bagu'ttu guidxaa, ä?

¿La loä baniidxtu xtiejnreni, ä?

<sup>43</sup> Xho gacni si'c, rájpre Dios.

Cuansajtu te yu' najcw guiid cadro chu te banäjb.

Nenga guyu' banäjb ni laa Moloc, nani najtu najc xtiostu.

Gojnztatu balbäze' xten xtiostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhalä la'tu stelaad guedx Babilonia.

<sup>44</sup> Guniiru Esteban, rájpreni lojreni:

—Neñ reyubijdz gojp retoxtadgoldoonu te yu' najcwni guiid. Gujčni xquidooreni. Ro'c guninäjnreni Dios. Benchee retoxtadgoldoonu yu' najcw guiidga si'cni gunibee Dios che baluiini lo Moisés xhoni gacni.

<sup>45</sup> Che gujt Moisés, Josué gunibee lacuaa toMoisés, huinäni retoxtadgoldoonu nación Canaán. Batzujlreni yuro ni najcw guiid te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhjbreni lo Dios neñ yuguijdz ni najc xquidooreni che gojlli xtiemp reii David.

<sup>46</sup> Huinäljaz Dios David. Rájpre David lo Dios: “Rlazä gunä te guidoo par guejblu, Dios xten nuure, rexpejn Israel.”

<sup>47</sup> Dxejcti di Dios nusoob xtidx David. Alga Salomón, xi'n David, ni'c benchee xquidoro Dios.

<sup>48</sup> Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Rájpre Dios:

<sup>49</sup> Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, rájpre Dios.

<sup>50</sup> ¿La et näadi benchee guiraa nani ruhuiitu?, rájpre Dios.

<sup>51</sup> Rájpre Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuum Sprit Dxan xten Dios, dizani cuääz neñ lastootu. Si'c bejn retoxtadgoldootu, si'cza rujntu.

<sup>52</sup> Basacii retoxtadgoldootu gualalii reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinäntuni lo guxhtis te gunibeetu gujnti.

<sup>53</sup> La'tu biannäjtu leii nani gunii reangl xten Dios loj Moisés, luxh la'tu ditu nucuadiajg rediidxga.

#### *Bagu'treni Esteban*

<sup>54</sup> Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban.

<sup>55</sup> Rbäjz Sprit Dxan xten Dios neñ lastoo Esteban, ni'cni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios.

<sup>56</sup> Rájpre Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

<sup>57</sup> Guredxaduxhreni basäuzareni diajgreni. Dxejcti baxunreni bixa'treni yejc Esteban.

<sup>58</sup> Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejčni, gulälajreni xhajbreni; te niguii ni laa Saulo biannäj xhajbreni.

<sup>59</sup> Lał ni cagucuaareni guij yejčni, gunii Esteban loj Jesucrist rájpreni:

—Guejblu, Dad Jesucrist, cua' narä.

<sup>60</sup> Dxejcti biajb Esteban, bazuxhjbni, guredxa'ni rájpreni:



—Dad Jesucrist, na'c gudzuublu dojlre yejc rebejnre, na'c gucuaquijlureni.  
Gulujxsi guniini si'c, gujtni.

## 8

### *Saulo basacsi rexpejn Jesucrist*

<sup>1</sup> Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

<sup>2</sup> Reniguii nani sanälajz Dios huicua'tz Esteban. Cayonduxhrene sa'csi riareni gujt Esteban.

<sup>3</sup> Biäädza Saulo, guixe-guixee basacsi rebejn nani huililajz xtidx Dios. Biu'ni rolizjzreni, gunaazni reniguii näjza regunaa te basäunireni neñ latzguuib.

### *Basule' rexpejn Jesucrist xtidx Dios nez región Samaria*

<sup>4</sup> Che bire'ch rebejn nani huililajz xtidx Dios, basule'reni xtidx Dios nez cadrotis sääreni.

<sup>5</sup> Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjjni:

—Jesús najc Crist nani cabäjztu jääd.

<sup>6</sup> Ro'c bachagsa' rebejn bacuadijzreni rextidx Felipe, bahuiizareni redzunro, remilagwr nani bejn Felipe.

<sup>7</sup> Gaii bejn yu' bendxab neñ lastooreni. Che gunibee Felipe guirii rebendxab lastoo rebejnnga, guredxa' rebendxabga, dxejcti biriireni neñ lastoo rebejnnga. Yu'za xhidajl bejn nani digacdiru guiniib, yu'za reni rajc ni'reni, ñaareni. Con xcälrmibee Jesucrist basiajc Felipe guiraa rebejnnga.

<sup>8</sup> Sa'csi gujc si'c, bibalazduxh guiraa rebejn neñ guejdxga.

<sup>9</sup> Guyu' te niguii ni laa Simón neñ guejdxga. Bisieedni bejnni xhidajl redzuun yälbidxaa, basgueeni rebenguejdxga. Bidxeloduxh rebenguejdx lojni. Räjjni lo rebejn rutru chu stee bejn ni najc maazru benro lojni.

<sup>10</sup> Luxh guiraa rebejn, rebiiux, rebengool, rebenrajp, rebenproob bacuadijzreni xtidx bidxaaga, räjpreni:

—Laani rajpni yälrmibee xten Dios.

<sup>11</sup> Xchero basgueeni rebejn, bidxelojreni rextzunyaälbidxaani. Guiraa rebejn huililajz xtiidxni.

<sup>12</sup> Dxejcti baluii Felipe xcuent xcälrmibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnisreni, niguii näjza gunaa.

<sup>13</sup> Nägajza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

<sup>14</sup> Che biejn diajg reapost ni yu' guedx Jerusalén huililajz reben Samaria xtidx Dios, baxhal'reni Pedr näjza Juan ro'c.

<sup>15</sup> Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxan xtenni lojreni,

<sup>16</sup> sa'csi gajd Sprit Dxan xten Dios jäädäjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist.

<sup>17</sup> Dxejc batzuub Pedr näjza Juan ñaareni yejc tejsa renani ahuililajz xtidx Dios, dxejc badeed Dios Sprit Dxan xtenni biädäljzni neñ lastooreni.

<sup>18</sup> Che bahuii Simón biädäljz Sprit Dxan xten Dios lastoo rebejn ni batzuub reapost ñaani yejcreni, rläjz Simón nudeedni meel loj reapost,

<sup>19</sup> räjpreni lojreni:

—Colguniidx yälrmibee loä te si'cza gudzubä ñaä yejc rebejn, te jiu' Sprit Dxan xten Dios neñ lastooreni.

<sup>20</sup> Dxejcti räjpreni Pedr lojni:

—¡Sunitloj xmeellu con luj! Xho gunlu xhigab siilu Sprit Dxan xten Dios nani rudexlia' Dios.

<sup>21</sup> Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu.

<sup>22</sup> Basie'ch lajzlu, badzucaj rexhigab guijdx xtenlu. Guredx-gunab lo Dios, top susiälj lajz Dios xtojllu ni bejnlu neñ lastoolu.

<sup>23</sup> Naj narä nanä ruguilazduxhlu, luxh runduxhlu xhigabguijdx.

<sup>24</sup> Dxejcti räjpreni Simón lo guiro'preni:

—Colnab loj Dios xcuentä te na'c sacä si'cni caniitu.

<sup>25</sup> Che gulujxti bijreni diidx xcuent ni bahuiiojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

*Felipe nájza te dade' ni siáad nacióñ Etiopía*

<sup>26</sup> Dxejcti biáad te xangl Dios, rájpmi lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdej lo reymbijdz.

<sup>27</sup> Sà'ti Felipe. Che bidzujpmi lo nezyujga, bidxaagni te dade' ni siáad nacióñ Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biáad dade'ga guedx Jerusalén te sagajpmi Dios.

<sup>28</sup> Siádbisacni lajdxni. Sobga'ni neñ te gare't saruduxh, cayolmi xtidx Isaías, nani bacuaa xtidx Dios agujc xchero.

<sup>29</sup> Dxejcti rájp angl xten Dios lo Felipe:

—Gubig cuä' gare'tga, guninäj dade'ga.

<sup>30</sup> Che gubig Felipe cuä' gare'tga, biejn diajgni cayol dade'ga rextidx Isaías. Dxejcti rájp Felipe lojni:

—¿La racbeelu ni caj lo guijt nani cayollu, ä?

<sup>31</sup> Dxejcti rájp dade'ga lojni:

—¿Xho gacbeäni palga rut gusule'dini loä?

Sas rájp dade'ga lo Felipe chä'pni neñ gare'tga.

<sup>32</sup> Cadro cayol dade'ga neñ guijt ni caj xtidx Dios rnii scree:

Di xiil cuedxa' che rinä bejpmi cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

<sup>33</sup> Basacsíduxhrenini.

Reguxhtis ni niujn yálguxhtisni xhet laliidi bejnreni.

Xhet si'cti nunyájl gunreni.

¿Xho guiniinu yu' xpejpmi?

Ni abagu'trenini. Diruni guibajm lo guedxliuj.

<sup>34</sup> Dxejcti gunabdiidx beñ Etiopía, rájpmi lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

<sup>35</sup> Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist.

<sup>36</sup> Lañ ni sääreni lo nezyuj, bidzujpmi te lajt cadro yu' nis. Dxejc rájp dade'ga lo Felipe:

—¡Bahuii, ree yu' nis! ¿Xhi rudxojn tiobnisä?

<sup>37</sup> Dxejc rájp Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc rájp dade'ga lo Felipe:

—Rililazä Jesús najc Crist Xi'n Dios.

<sup>38</sup> Dxejc gunibee dade'ga gusudxi gare't, sas biäj guiro'preni, biu'reni neñ nis, ro'c batiobnis Felipe dade'ga.

<sup>39</sup> Che biriireni neñ nis, huinä Sprit Dxañ xten Dios Felipe ste'ca lajt. Dxejc diru dade'ga nuhuii lo Felipe. Sà'ti dade'ga lajdxni, cabalazduxhni.

<sup>40</sup> Dxejcti chela guchee Felipe abidzujpmi guedx Azoto. Baluiizani xtidx Dios neñ guiraa reguejdx che bidzujpmi guedx Cesarea.

## 9

*Huililajz Saulo rextidx Jesucrist*

(Hch. 22:6-16; 26:12-18)

<sup>1</sup> Laltis cagusacsí Saulo rexpem Jesucrist. Rlajzmi ju'tni guiraareni, ni'c huijmi lo bixhojz nani rnibee,

<sup>2</sup> gunabni gac te guijt chanäni lo reguidoo neñ guedx Damasco te palga guidxälmi reni najc xpejm Jesucrist neñ reguidooga, niguii sigac gunaa, guliibnirenini, jiädñanirenini guedx Jerusalén te jiäreni.

<sup>3</sup> Lañ sasajmi lo nezyuj, asiáddzúngajxhni guedx Damasco, basaniya' te bal xhaguibaa, basanijmi guideb gabi cadro siädsaj Saulo.

<sup>4</sup> Dxejc biajpmi lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, nájza rexpema?

<sup>5</sup> Rájp Saulo lojni:

—¿Chuluj Dad?

Rájpmi lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejc caru'ch.

<sup>6</sup> Bidxebduxh Saulo, racsejsni räjpnj:

—Dad, ¿xhini'c rłajzlu gunä?

Dxejc räjpn Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

<sup>7</sup> Rebejn ni siädnä Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni.

<sup>8</sup> Che huistie Saulo lo yuj, baxhalni lojni, niluxh di lojni jien. Dxejc gunaazreni ñaani, sanäreneni guedx Damasco.

<sup>9</sup> Ro'c guyu'ni choñ dxej, natiä'p balojni, dini niä', dizani niajw.

<sup>10</sup> Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjpn Jesucrist lojni:

—Ananías.

Dxejc räjpn Ananías lojni:

—Anaree Dad.

<sup>11</sup> Räjpn Jesucrist lojni:

—Huistie te chäälü lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, beñ Tarso. Cabejdx, canabni loä ñaj.

<sup>12</sup> Lo bacal abahuiini siäd te niguii ni laa Ananías te gutzuubni ñaani yejcnj te fiini stehuält.

<sup>13</sup> Dxejcti räjpn Ananías lojni:

—Dad, abiejn diagä xho basacsi niguiiga rexpejnlu neñ guedx Jerusalén.

<sup>14</sup> Luxh rebixhojz ni rnibee abadeed guijtzn lojni te guiniaazni ree guiraa rebejn nani rbedx-rniab lojlu, chanänireni jiäurenj.

<sup>15</sup> Dxejcti räjpn Jesucrist lojni:

—Huij, narä aguleäni te gunni xtzunä. Suluiini xtidxä loj rebenzjizt nani digac xpeñ Israel, näjza loj reni rnibee renacion, näjza loj rexpejn Israel.

<sup>16</sup> Narä suluiä lo Saulo trabajwduxh ni tedni te jiädnajni narä.

<sup>17</sup> Dxejcti säa Ananías, bidzujñni ro yu' cadro rbäzlaa Saulo. Batzuubni ñaani yejcn Saulo. Dxejcti räjpn Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädälu, lagajc laani baxhalni narä te fiilu stehuält, te jiädläjzta Sprit Dxañ xten Dios neñ lastoolo.

<sup>18</sup> Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajeni.

<sup>19</sup> Dxejc gudajwni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

*Gusloj basule' Saulo xtidx Dios neñ guedx Damasco*

<sup>20</sup> Dxejcti gusloj basule' Saulo xtidx Dios neñ reguidoo xten rexpejn Israel, räjpnj:

—Jesucrist najc Xi'n Dios nani gujc Niguii.

<sup>21</sup> Che biejn diajgreni xtiidxni, bidxelojreni, räjpn lo sa'reni:

—¿La xhet laadi niguiire ni rusä rexpejn Jesucrist neñ latzguiib guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

<sup>22</sup> Dxejcti gusutz'z Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rnibee.

*Baxun Saulo guedx Damasco*

<sup>23</sup> Che gudejd xhidajł dxej, bachagsa' rexpejn Israel te nugu'treni Saulo.

<sup>24</sup> Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujñ guejdxga te ju'trenini.

<sup>25</sup> Dxejcti che gojł te yääl basäl rexpejn Jesucrist Saulo neñ te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

*Bidzujñ Saulo guedx Jerusalén*

<sup>26</sup> Che bidzujñ Saulo guedx Jerusalén, rłajznj nucaagni loj reni rililajz xtidx Jesucrist, niluxh guiraarenj bidxebbrenini sa'csi direni gan ahuililajznj xtidx Dios.

<sup>27</sup> Dxejcti huiinä Bernabéni lo reapost, bijni diidx xcuent Saulo. Räjpn Bernabé lojreni:

—Baluiloj Jesucrist lo Saulo loj nezyuj. Guniñäj Xtioznu Saulo loj nezyuj, ni'cni gusutz'z Saulo basule'ni xtidx Jesucrist guedx Damasco.

<sup>28</sup> Dxejc bia'n Saulo guedx Jerusalén, bidxaagni lo rexpejn Jesucrist.

<sup>29</sup> Dxejcti gusutz'u'tz Saulo gusloj bijni xtidx Jesucrist lo rebejn. Dxejcti gudilnäj Saulo rexpejn Israel nani nrii didx griegw. Laareni rdxecheduxhrenei, rlaizreni nugu'treni Saulo sa'csi direni nichaglaiz xtidx Jesucrist.

<sup>30</sup> Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

<sup>31</sup> Dxejc guredxi laiz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxañ xten Diosreni.

#### *Biajc Eneas*

<sup>32</sup> Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida.

<sup>33</sup> Ro'c bidxälni te niguii ni laa Eneas. Agujc xhujñ ijz naga' niguiiga cayacxhuuni. Abixu'ñ tiejxhni, digacdiru guiliini.

<sup>34</sup> Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcn, huistietini.

<sup>35</sup> Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni neñ reguejdxga huililajz xtidx Dios.

#### *Gubañsac Dorcas*

<sup>36</sup> Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn.

<sup>37</sup> Gucxhuu gunaaga, dxejc gujtni. Che gulujx bahuajz rebejn togoolga, huitixhrenini neñ te yu' ni najc jiaa yejc sa'ni.

<sup>38</sup> Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

<sup>39</sup> Dxejc sanägajc Pedr redade'ga. Che bidzujñreni, huinäreni Pedr neñ yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rehxajbreni nani benchee Dorcas, ni badeed Dorcas lojreni che nabajñni.

<sup>40</sup> Dxejcti gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni.

<sup>41</sup> Dxejc gunaaz Pedr naani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojreni te bahuilojreni agubañsacni.

<sup>42</sup> Gucbegajc reben guedx Jope xhini'c gujc, dxejcti xhidajl rebejnğa huililajz xtidx Jesucrist.

<sup>43</sup> Xchejza guyu' Pedr ro'c, guläjzni roliz dade' ni laa Simón, nani ruscoodz guijsd.

## 10

#### *Pedr con Cornel*

<sup>1</sup> Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijit, dini gac beñ Israel.

<sup>2</sup> Beñsacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios.

<sup>3</sup> Te dxej, si'cti rcachon gudxer, si'c lo bacial bahuiini loj xangl Dios, räjpni loj Cornel:

—¿Conlu Cornel?

<sup>4</sup> Che bahuii Cornel xangl Dios, bidxerjbn, bidxelojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj.

<sup>5</sup> Naj baxhal tiop niguii chää guedx Jope te chaxiireni Simón Pedr.

<sup>6</sup> Rbäjzni roliz te dade' ni laa Simón nani ruscoodz guijsd. Roliz Simón sojb gajxh ro' nisdoo. Simón Pedr gusule' xhini'c nanab gunlu.

<sup>7</sup> Che sii angl xten Dios, gule Cornel tiop mos xtenni näjza te xsoldaadni nani sanälajz Dios.

<sup>8</sup> Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

<sup>9</sup> Che bara yää, sääreni lo nezyuj. Asiäddzngajxhreni guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios.

<sup>10</sup> Calanduxh Pedr, rĵajzni gauni. Laĵ ni cayujnreni xhi gauhxuejni, gusloj canixcaĵni.

<sup>11</sup> Bahuiini bixal xhaguibaa, bahuiizani biĵjt te bariadno nani naliib guidap xi'ni. Siĵdjiĵtĵĵiini gajxh nez loj Pedr.

<sup>12</sup> Neĵ bariaadga yu' guiraa reman ni yu' lo guedxliuj nani rsianĵj guidap ni'ni, nĵjza renani rxeeb si'c bĵĵ, nĵjza renani rutajt.

<sup>13</sup> Gunii Dios lo Pedr, rĵjpnĵ lojni:

—Pedr, huisu te ju'tlu man gaulu.

<sup>14</sup> Dxejc rĵjpn Pedr lojni:

—Na'c Dad. Nunc gauĵ sa' remandxuudxga, abia'a dina gauĵ reman nani rniĵ xleilul najc mandxuudx.

<sup>15</sup> Gunisac Dios loj Pedr, rĵjpnĵ:

—Na'cru guiniilu nacdXuudx reman nani abasia.

<sup>16</sup> Che gujc choĵ huĵlt gujc si'c, huĵ'psac bariaadga xhaguibaa.

<sup>17</sup> Laĵ ni cayujn Pedr xhigab xhichani'c sĵloj nani bahuiini, bidzujn reniguii ni baxhaĵ Cornel ro' yu'ga, sa'csi agunabdiidxreni caro rbĵjz Simĵn nani ruscoodz gujĵd.

<sup>18</sup> Che bidzujnreni rolĵ'ga canabdiidxreni la ro'c rbĵjz te dade' ni laa Simĵn Pedr.

<sup>19</sup> Laĵ ni cayujn Pedr xhigab xcuent ni bahuiini, gunii Sprit Dxian xten Dios lojni, rĵjpnĵ:

—Bahuii, choĵ dade' caguĵillu.

<sup>20</sup> Biĵjt yejc yu're te jinĵlurenĵ. Na'c gunlu xhi stee xhigab, sa'csi lagajc narĵ baxhaĵreni lojlu.

<sup>21</sup> Dxejcti biĵjt Pedr jiaaga, bidzujnĵni cadro suga' redade'ga, rĵjpnĵ lojreni:

—Narĵ nacĵ ni caguĵillu. ĴXhi siĵĵdtu?

<sup>22</sup> Rĵjpn reniguiiĵa lo Pedr:

—Cornel, nani rnĵbee te gayuu soldaad, te beĵsa'c, te bejn ni rajn Dios, te bejn ni sanĵlajz rexpejn Israel, laani baxhaĵ nuure lojlu, sa'csi rĵjpn angl xten Dios lojni, jiopxiĵnu luĵ te jiejn diajgnu xtiidxlu.

<sup>23</sup> Dxejcti gurejdx Pedr rebejnĵa, biu'reni neĵ yu'. Ro'c bia'nreni te guxhijĵ. Che bara yĵĵl, Pedr nĵjza sgaii beĵ Jope ni najc xpejn Jesucrist, sanĵ redade' ni baxhaĵ Cornel.

<sup>24</sup> Che bara yĵĵl, bidzujnreni guedx Cesarea. Abatojpn Cornel resa'ni nĵjza rexamigwni rolĵjzni. Cabĵjzreni guidzujn Pedr.

<sup>25</sup> Che bidzujn Pedr ro yu', huichagloj Cornelni, bazuxhijbni lo Pedr.

<sup>26</sup> Dxejc gunaaz Pedr naani, gulĵsnĵni, rĵjpnĵ lojni:

—Huisulii, sa'csi narĵ nacĵ te niguiitis sigajc najclu.

<sup>27</sup> Cayuiireni diidx, biu'reni neĵ yu'. Che biu'ni bahuii Pedr nadxagsa' rebejn neĵ yu'.

<sup>28</sup> Rĵjpn Pedr lojreni:

—Anajntu xhi caj lo leiĵ xten rexpejn Israel: digacdi guchaag te xpejn Israel loj beĵzĵjt nani digac xpejn Israel, digacdiza jiu'ni rolĵjzreni. Niluxh agunii Dios loĵ lo te bacaĵ, te gacbeĵ digacdiru jiuĵ releiire. Abaluii Dios narĵ sajĵ guchagsa'ĵ chutis bejn.

<sup>29</sup> Ni'cni, che gurejdxu narĵ biĵlgacĵ. Naj rniabdiidxĵ, Ĵxhicuent gurejdxu narĵ?

<sup>30</sup> Dxejcti rĵjpn Cornel loj Pedr:

—Gudajp dxej si'cti rcaĵoĵ gudxej, cabedx-canabĵ lo Dios rolĵzĵ chela baluĵloj te niguii najcw te ladnol ni rdimbicha'.

<sup>31</sup> Najni loĵ: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo reben proob, racbee Dios, di lajzni jiĵĵ luĵ.

<sup>32</sup> Ni'cni naj baxhaĵ tiop dade' chĵĵ guedx Jope te chaxiireni Simĵn Pedr nani rbĵzlaa rolĵjz Simĵn ni ruscoodz gujĵd. Rolĵjzni sojb gajxh ro' nisdoos. Che guidzujnĵni, laani gusule'ni xtidx Dios lojtu.”

<sup>33</sup> Dxejc baxhaĵĵ chu biĵdxĵilu. Xquixtiostelu biĵĵĵdu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

*Basule' Pedr xtidx Dios rolĵjz Cornel*

<sup>34</sup> Dxejcti rĵjpn Pedr lojreni:

—Naj gucheliĵ tebloj rinĵlajz Dios guiraa bejn; rebeĵzĵjt sigajc rexpejn Israel.

<sup>35</sup> Niluxh rinĵlajz Dios chutis bejn guedxliuj nani ruzuxhijb lojni, nani rusooob rextiidxni, nani laaca nabajn.

<sup>36</sup> Badeed Dios xtiidxni loj rexpejn Israel, basule' Dios biĵĵd Jesucrist te gac chanĵlaaznu Dios te cuedxilajznu, sa'csi Jesucrist rnĵbee guideb guedxliuj.

<sup>37</sup> Che gulujx baluii Juan ni rutiobnis xcuent yĵĵrobnis, dxejc gusloj basule' Jesucrist xtidx Dios nez reguedx Galĵlee. La'tu najntu xho bire'ch xtidx Jesucrist guideb nez neĵ reguedx Judea.

<sup>38</sup> Nancheetu xho badeed Dios yĵĵrnĵbee loj Jesucrist, beĵ Nazare't. Badeedza Dios Sprit Dxian xtenu te cuĵĵzni neĵ lastooni. Nancheetu xho bejnĵni redzunro, remilagwr,

basiajnci rebejn nani caguteed beŋdxab trabajwduxh. Redzunroga bejn ni sa'csi bennaj Diosni dzuun.

<sup>39</sup> Bahuiloonu guiraa redzuun ni bejn Jesucrist neŋ reguedx Israel najza guedx Jerusalén. Bacuaa rexpejn Israel Jesucrist lo cruzj, ro'c gujtni.

<sup>40</sup> Dxejcti che biojn dxej, guläs Dios Jesucrist lo rebengut, gubaŋsacni, badeed Dios yälrnibe lojni te gujc biädluiloj Jesucrist loonu.

<sup>41</sup> Di Jesucrist nululoj loj chutis bejn. Lojtis renani agule Dios gutie'ch diidx gubaŋsac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubaŋsacni lo rebengut.

<sup>42</sup> Baxhaġni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajŋ najza xte rebengut.

<sup>43</sup> Galooli bacuaa renani gunii xtidx Dios lo gujtz, räjpreni: "Guiraa rebejn ni chalilajz xtidx Jesucrist sudzucaj Dios xtojġreni."

*Biädġajz Sprit Dxi xten Dios nen lastoo rebenzajt*

<sup>44</sup> Laġ ni canii Pedr rediidxga, biädġajz Sprit Dxi xten Dios neŋ lastoo renani huililajz xtiidxni.

<sup>45</sup> Bidxeloloj guiraa rexpejn Israel nani huinä Pedr sa'csi biädġajz Sprit Dxi xten Dios nen lastoo renani najc benzajt.

<sup>46</sup> Gucheereni biu' Sprit Dxi xten Dios lastoo rebenzajt sa'csi bejn Sprit Dxi guniireni stee didxsaj nani gajdreni guisieed, calä'pzareni xpala'n Dios.

<sup>47</sup> Dxejcti räjp Pedr lo rexamiigwini:

—Chu laa ni gudxojn yälrobnis lo rebejnre, ni sigajc biädġajz Sprit Dxi xten Dios nen lastoonu, abiädġajzni neŋ lastoo rebejnre.

<sup>48</sup> Dxejcti gunibe Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choŋ dxej.

## 11

*Basule' Pedr xho biädġajz Sprit Dxi xten Dios lastoo rebenzajt lo rexpejn Jesucrist nen guedx Jerusalén*

<sup>1</sup> Reapost, najza renani huililajz xtidx Jesucrist neŋ reguedx Judea, biejn diajgreni huililajz rebenzajt ni digac xpejn Israel xtidx Dios.

<sup>2</sup> Che bidzujŋ Pedr guedx Jerusalén, rexpejn Israel nani rġajz chu guiraa rexpejn Jesucrist bee si'cni bejn toAbram, gudġġnajreni Pedr.

<sup>3</sup> Räjpreni lo Pedr:

—ĶXhicuent biu'lu rolizj benzajt nani xhet yu'di bee si'c nuure? ĶXhicuent gudaunäjġuren, ä?

<sup>4</sup> Dxejcti basule' Pedr diidx xho gujc huijni loj rebenzajt:

<sup>5</sup> —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä.

<sup>6</sup> Che bahuisa'cä, nenga yu' guiraloj reman ni yu' lo guedxġiuj nani rsianäj guidap ni'ni, renani rbäjz neŋ dajn, renani rxeeb si'c bäl, najza renani rutajt.

<sup>7</sup> Dxejcti biejn diagä naj Dios loä: "Pedr, huisu. Bagu't man gaulu."

<sup>8</sup> Dxejcti räpä: "Digacdini Dad. Nicla tej gadna gauä te man nani rnii leii xtenlu najc mandxuudx."

<sup>9</sup> Dxejc gunisac Dios loä: "Na'cru guiniilu nacdXuudx recos nani abasia Dios."

<sup>10</sup> Che gujc choŋ huält gunii Dios si'c, huä'psac bariaadga xhaguibaa.

<sup>11</sup> Lagajc orga bidzujŋ choŋ dade' ro yu' cadro yu'ä. Guedx Cesarea biriireni, biädxiiireni narä.

<sup>12</sup> Dxejc gunii Sprit Dxi xten Dios loä: "Huinä reniguiire. Na'c gun tiop lajzlu." Dxejcti huinää xho'p beŋ Jope, dade' nani rililajz xtidx Jesucrist. Che bidzujŋnu guedx Cesarea, biu'nu rolizj Cornel.

<sup>13</sup> Basule' Cornel diidx loonu xho baluiloj te angl xten Dios lojni lagajc rolizjni. Räjp angl xten Dios lojni: "Baxhaġ tiop dade' chää guedx Jope te chaxiiireni Simón ni rniireni Pedr.

<sup>14</sup> Laani siniini xtidx Jesucrist te gacbeelu con resa'lu xhini'c nanab gunlu te gusġaa Dios la'tu lo rextojġtu."

<sup>15</sup> Che gusloj cagusule'ä xtidx Dios lojreni, biu' Sprit Dxi xten Dios neŋ lastooreni si'c biu'ni lastoonu galooli.

<sup>16</sup> Dxejcti banaj lazä rextidx Dad Jesucrist che najni: "Juan abatiobnis con nistis, biädla narä suxhaġä Sprit Dxi xten Dios te cuääzni neŋ lastootu."

<sup>17</sup> Dxejc räjpza Pedr:

—Palga badeed Dios Sprit Dhan xtenni lojreni si'c baniidxni Sprit Dhan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dhan xtenlu lojreni.”

<sup>18</sup> Che biejn diajg reben Jerusalén rediidxga, biäuu ro'reni, dirureni nidilnäj Pedr. Alga gulä'preni xpala'n Dios, räjpreni:

—Näja rebenzajt nani digac rexpejn Israel abasaan Dios gusiechlazjreni te guibanäjreni Dios par tejpas.

*Rexpejn Jesucrist ni yu' guedx Antioquia*

<sup>19</sup> Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näja lo guedx Antioquia sa'csi cadejdreni trabajwduxh. Basule'reni rextidx Jesucrist lojtis rexpejn Israel.

<sup>20</sup> Lojreni nadxaag gaii beñ Chipre, näja gaii beñ Cirene. Redee bidzujñ guedx Antioquia. Ro'c gusloj caniireni lo beñzajt nani rnii didx griegw. Basule'reni lo rebenzajtga guiraa xcuent Jesucrist.

<sup>21</sup> Gucnäj Diosreni caniireni xtiidxni. Xhidajl rebejnğa huililajz xtidx Jesucrist, basoo-breni xtiidxni.

<sup>22</sup> Che biejn diajg rexpejn Jesucrist ni yu' guedx Jerusalén rililajzreni, baxhałreni Bernabé guedx Antioquia.

<sup>23</sup> Che bidzujñ Bernabé guedx Antioquia, bibalazduxhni che bahuiini xho cayunnäj Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist.

<sup>24</sup> Beñsa'c najc Bernabé. Rililazduxhni xtidx Jesucrist. Racnäjdugh Sprit Dhan xten Diosni. Xhidajl rebejn huililajz xtidx Jesucrist guejdxga.

<sup>25</sup> Che birii Bernabé guejdxga, huijni guedx Tarso satiilni Saulo.

<sup>26</sup> Che bidxälni Saulo, huinänini guedx Antioquia. Ro'c bia'nreni tebijz, bachagsa'reni renani huililajz te baluüireni xtidx Jesucrist lo xhidaldugh bejn. Ganid benguejdxga gulälaj “Cristianos” renani rililajz xtidx Jesucrist.

<sup>27</sup> Neñ redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquia.

<sup>28</sup> Huisulii te dade'ga ni laa Agabo. Gucnäj Sprit Dhan xten Diosni te guniini siääd te gubijn guideb guedxliuj. Luxh gujc gubijnğa neñ reijz ni gunibee reii Claudio ni sajru.

<sup>29</sup> Dxejcti rexpejn Jesucrist ni rbäjz guedx Antioquia bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea.

<sup>30</sup> Batojpreni meel, baxhałrenini lo rebengool ni rnibee rexpejn Jesucrist ro'c. Saulo näja Bernabé huinä meelga che huijreni Judea.

## 12

*Gujt Jacob, biäu Pedr neñ latzguiib*

<sup>1</sup> Neñ redxejga, trabajwduxh bateed reii Herodes gaii rexpejn Jesucrist.

<sup>2</sup> Gunibeeni gujt Jacob betz Juan, biru' guejnii.

<sup>3</sup> Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajreni Pedr. Dee gujc neñ redxe lanij che rajwreni yätxtiil ni di saguj.

<sup>4</sup> Che gunaaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij.

<sup>5</sup> Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

*Gulää Dios Pedr neñ latzguiib*

<sup>6</sup> Bidzujñti dxe bispr dxej ni rlaiz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p ñaa Pedr. Stiop soldaad canäj ro' latzguiib.

<sup>7</sup> Chela baluiloj te angl xten Dios, bianij te bajl nani basanij neñ latzguiib. Dxejcti gunaaazni xhajcw Pedr, basniibnini te gubajñni. Räjpni lo Pedr:

—Basquejnğa, huistie.

Dxejcti bixec recaden, bitejbreni ñaa Pedr.

<sup>8</sup> Räjp xangl Dios lo Pedr:

—Gajt xhajblu, baläj xcura'chlu.

Si'c bejn Pedr, dxejc räjp xangl Dios lo Pedr:

—Gajt xhablajzlu, gudanajl narä —räjpni.

<sup>9</sup> Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnii xhigab pet canixcałni.

<sup>10</sup> Gudejdreni nez loj te soldaad, gudedgajcreni nezloj steeni, dxejc bidzujñreni ro' puert-guiib xten latzguiib nani caj lo nezujy ni rdejd galäii guejdxga. Xtebca bixal puertroga, biriireni gusajreni tebnezujy. Dxejcti te squiin gunitloj xangl Dios. Xtebtis Pedr sasaj lo nezujy.

<sup>11</sup> Dxejc si'cni gubajñ Pedr, bejnni xhigab:

—Ñaj sii nanä baxhal Dios te xanglni baslaa narä ladzña Herodes te digacdi gun rexpejn Israel nani rlajzreni gunnäjreni narä.

<sup>12</sup> Che gucbee Pedr xhi gusajcni, huijni rolizj Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr.

<sup>13</sup> Cagusejz Pedr rolä', dxejc gubig te dxa'p ni laa Rode, bacuadijgni ro lä'.

<sup>14</sup> Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni nen yu', räjpni lojreni:

—Pedr suga' ro lä'.

<sup>15</sup> Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

<sup>16</sup> Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr.

<sup>17</sup> Dxejcti bazääb Pedr ñaani te na'cru jiejyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

<sup>18</sup> Che bara yääl, rsildooru, bieiduxh resoldaad sa'csi direni gan xho gujc birii Pedr nen latzguiib.

<sup>19</sup> Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

#### *Gujt Herodes*

<sup>20</sup> Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadre rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jäjl lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajcro lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebejnğa.

<sup>21</sup> Basoobtni te dxej te guininäjniren. Dxejga gojt Herodes xhajn reini, gurejni lo xyacxhil reini. Dxejcti gusloj caniini didxsa'c loj rebejnğa.

<sup>22</sup> Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

<sup>23</sup> Lagajc dxejc biääd te angl xten Dios, bejnni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn najcni te dios, sa'csi dini niliä'p xpala'n Dios.

<sup>24</sup> Xhidajl bejn biejn diajgni xtidx Dios, huililajzreni xtidx Dios.

<sup>25</sup> Che gulujx badeed Bernabé näjza Saulo meel ni batojp reben Antioquia lo rebengool, biriireni guedx Jerusalén. Sanäreni Juan ni rniireni Marcw lo guedx Antioquia.

## 13

### *Gule Sprit Dxan xten Dios Bernabé näjza Saulo*

<sup>1</sup> Lo rexpejn Jesucrist ni rdxaa sa' guedx Antioquia guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujcn si'c bejtzni; näjza Saulo.

<sup>2</sup> Bidzujñ te dxej cagucua'nreni laj ni cabedx-canabreni lo Dios, dxejc räjp Sprit Dxan xten Dios lojreni:

—Colcue Bernabé näjza Saulo te gunreni dzuun ni rlazä gunreni.

<sup>3</sup> Che gulujx bacua'nreni, che gulujxza guredx-gunabreni lo Dios, batzuubreni ñaareni yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

### *Guuro'preni baluii xtidx Dios lo reben Chipre*

<sup>4</sup> Baxhal Sprit Dxan xten Dios Saulo näjza Bernabé guedx Seleucia. Ro'c biu'reni nen barcw, sääreni nez yuj ni tre' galäii nisdoo, ni laa Chipre.

<sup>5</sup> Che bidzujñreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Näj Marcw gucnäjreni.



<sup>6</sup> Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios.

<sup>7</sup> Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlanjni jiejn diajgni xtidx Dios.

<sup>8</sup> Dxejcti Barjesús, ni laaza Elimas, bidxagdijñni guiro'preni sa'csi di rlanjni chalilajz Sergio Paulo xtidx Dios.

<sup>9</sup> Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

<sup>10</sup> —Rusgueduxhlu rebejn, najclu benlatsiaj, benguidxduxhlu, najclu xi'n Satanás, bendxab ni rnibee. Rdxehnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist?

<sup>11</sup> Naj siääd xcastiigw Dios yejclu. Xhidajl dxej sicäjy lojlu, xhetliidi fiilu —räjp Pabl.

Gujcsi räjpni si'c, bicäigajc lojni. Dxejctiru cuansajni caguilni chu guiniaaz ñaani guluini canejz chááni.

<sup>12</sup> Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcälrluui Dios.

*Bidzujñ Pabl näjza Bernabé guedx Antioquía xten distrit Pisidia*

<sup>13</sup> Che baluux Pabl näjza resa'ni xtzuunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni nriireni Marcw, Jerusalén.

<sup>14</sup> Dxejcti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejn Israel, biu'reni neñ xquidoo rexpejn Israel, ro'c gurejreni.

<sup>15</sup> Che gulujx bil te dade' reguijtz xten Dios ni laa leii näjza reprofet, baxhal reguxhtis xten guidoo chu huigajñreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejnre, colguiniini.

<sup>16</sup> Dxejc huisulii Pabl, guläsni ñaani bejnni seen lo rebejn te cuadiajgreni xtiidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajñ Dios.

<sup>17</sup> Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjdugh Diosreni bejnni remilagwr, te guläänireni guedx Egipto.

<sup>18</sup> Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni.

<sup>19</sup> Guyu' gajtz nación guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu.

<sup>20</sup> Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz.

<sup>21</sup> Dxejcti gunab rexpejn Israel te rei lo Dios te gunibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz.

<sup>22</sup> Che badzucaj Dios Saúl, badeedni gunibee to'reii David. Räjp Dios: “Agucbeä David xi'n Isai rujñ tejsi xhigab con narä. Susoobni xtidxä sujñni guiralii ni rlazä gac.”

<sup>23</sup> Räjpza Pabl:

—Galooli bia'n diidx lo rexagdoos David guxhal Dios te bejn ni gudzucaj xtojñnu, ni gusläa nuure lo dojl. Naj aguzojb diidxga. Jesucrist najc bejnğa, rudzucajni xtojñnu, rusläani nuure lo dojl.

<sup>24</sup> Che gusloj cagulijdx Juan rebejn, baluiini nanabpac gusiechljaz rexpejn Israel, tiobnisreni te jia xtojñreni.

<sup>25</sup> Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhal Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

<sup>26</sup> Räjpza Pabl:

—Rniä lojtu sa'a, rexagdoos Abram, näjza lo chutis ni rajñ Dios, loonu baxhal Dios xtiidxni ni rusule' xho rudzucaj Jesucrist xtojñnu, xho rusläani nuunu lo dojl.

<sup>27</sup> Rebejn Jerusalén, näjza renani rnibeereni, direni niembee Jesucrist nani rnibee, dizaren i niacbee diidx xcuent Dios nani bacuaa reniguii ni gunii xtidx Dios agujc xchero, luxh rojñreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga.

<sup>28</sup> Balijdxreni Pila't ju'tni Jesucrist, luxh xhet bejdini te guetni.

<sup>29</sup> Che bagujc guiraa ni caj lo guijtzc xcuent Jesucrist, gulätreni Jesucrist lo cruzj, bacua'tzrenini nen baa cuä' te guilaj.

<sup>30</sup> Dxejcti guläs Dios Jesucrist lo rebengut.

<sup>31</sup> Balti huält baluuloj Jesucrist lo reexamigwni nani biädnajlni nez rexyuj Galilee, renani biädnajlzani nez guedx Jerusalén. Bahuiulojreni gubansac Jesucrist lo rebengut, te naj rusule'reni diidxc xcuent Jesucrist.

<sup>32</sup> 'Naj siopnänu xtidx Diosre lojtu te guibalajztu. Agujc xchero bia'n Dios diidxc re toxtadgoldoonu.

<sup>33</sup> Guläs Dios Jesucrist te huile' diidxcga par nuure, rexagdooreni. Agujc xchero gunii Dios te diidxc ni caj nen Salmo ni bacuaa toDavid. Lo Salmo ni rojp räjp Dios: "Luj najclu xi'nä. Nadxej guleälu te guinibeelu."

<sup>34</sup> Räjpza Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: "Sunidxä recossa'c lojlu si'c ni bia'nä diidxc con toDavid."

<sup>35</sup> Ni'cni bacuaaza toDavid nen stee Salmo ni gunii Dios, guniini: "Dipaclu gusaan gudx tiejxh Xi'nlu nani sanälajzlu."

<sup>36</sup> Che gulujx gunibee toDavid lo rextotadgoldoonu, si'cni badeed Dios gunni, dxejcgujtni. Biga'tznäjni rextotadgoldooni. Niluxh guyujdx tiejxh toDavid.

<sup>37</sup> Niluxh guläs Dios Jesucrist lo rebengut, ni'c di tiejxhni niujdx.

<sup>38</sup> Ni'cni colyacbee, la'tu resa'ä, Jesucristre, bejn ni caniä xcuentni, laani rudzucajni rextojlnu.

<sup>39</sup> Chutis ni rililajz xtidx Jesucrist rusläa Jesucristni loj guiraa rextojlni nani digacdi guibicaj mascä rusoobni guirali ni caj lo leii xten toMoisés.

<sup>40</sup> Colsusin te na'c sajctu recos ni caj lo guijtzc ni bacuaa te niguii nani bacuaa xtidx Dios:

<sup>41</sup> Colhuilaa, la'tu ni ruxhiznaj xtidxä colguidxeloj,

colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jääd chu gusule'pacni lojtu.

<sup>42</sup> Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxc re loonu.

<sup>43</sup> Che care'ch rebejnğa, xhidajl rexejn Israel, näjza xhidajl rebenzajt nani rusoob xtidx Dios si'c rujn rexejn Israel, birinajlreni Pabl näjza Bernabé. Dxejcg balijdxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

<sup>44</sup> Che gojlti stee sabd, dxej ni rusilajz rexejn Israel, xhidalduxh rebenguejdx bire' te gucuaadijgreni guniini Pabl xtidx Dios.

<sup>45</sup> Che bahuii rexejn Israel guiraa rebejn ni bire', bidxechlajzreni, gucnadareni. Dxejcgusloj cadxagdijl rexejn Israel Pabl. Che rniini te diidxc, laareni rniireni "didxxhiini". Caniyajzareni Pabl näjza Bernabé, caguereni lojreni.

<sup>46</sup> Luxh di Pabl niclaza Bernabé nidxejb. Gusutijptireni, räjpreni lo rebejn:

—Nungäjil ganid lojtu guiniinu xtidx Dios, sa'csi la'tu najctu rexejn Israel. Niluxh ditu chalilajz xtidx Dios, lagajc la'tu caniitu digacdi guibannäjtu Dios par tejpas. Ni'c sibiré loonu, te guiniinu xtidx Dios lo rebenzajt ni digac xpejn Israel.

<sup>47</sup> Sa'csi si'c agunibee Xtiosnu. Scree caj xtidx Dios lo guijtzc:

Suxhalätu te guluiilu rextidxä lo rebenzajt ni digac xpejn Israel, te chalilajz rebejnğa xtidxä,

te laareni lo xtojlni, cadrotis yu'reni lo guedxliuj, räjp Dios.

<sup>48</sup> Che biejn diajg rebenzajt rediidxc re, bibalazduxhrene, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najcreni.

<sup>49</sup> Bire'ch xtidx Dios guideb nez reguejdxga.

<sup>50</sup> Dxejcg rexejn Israel balijdx regunaa ni sajcru, näjza reniguii ni sajcru nen guedx Antioquia, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquia.

<sup>51</sup> Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio.

<sup>52</sup> Baspaa Dios lajz rexejn Jesucrist guedx Antioquia xten Pisidia. Bazutijpza Sprit Dxfan xten Dios lastooreni.

<sup>1</sup> Che bidzujn Pabl nájza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel nájza lo rebenzjiz. Xhidajl rebejnğa huililajz xtidx Dios.

<sup>2</sup> Niluxh sgaii rexpejn Israel nani di chalilajz xtidx Jesucrist balijdx rebenzjiz te bidx echnäjreni rebejn nani huililajz xtidx Jesucrist.

<sup>3</sup> Ni'cni bia'n Pabl nájza Bernabé lo guejdxğa balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrmibee Dios te bahuii bejn cayacnäj Diosreni.

<sup>4</sup> Guyu' tiop cuaa bejn neñ guejdxğa. Gala' guejdxğa huililajz xtidx Dios nani gunii Pabl nájza Bernabé,

<sup>5</sup> dxejc sgala' guejdxğa bacuadiajg xtidx rexpejn Israel. Dxejc bire'te cuaa rexpejn Israel, nájza benzjiz, nájza reguxhtis, rlanjreni nidxagdi]reni reapost, rlanjzreni nucuaareni guij yejc Pabl nájza Bernabé.

<sup>6</sup> Dxejc gucbeereni xhi rlanjreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Lистра, guedx Derbe, nájza reguejdx ni re' nejzga.

<sup>7</sup> Che bidzujnreni ro'c, cadrotis huijreni basule'reni xtidx Dios.

<sup>8</sup> Guedx Lистра guyu' te niguii ni digacdi sa, che gojllini racxhuu ni'ni.

<sup>9</sup> Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzani sajz gusiajc Diosni.

<sup>10</sup> Dxejcti dip gunii Pabl lojni, räjpni:

—jHuisulii!

Dxejcti huisuyäl]ni, gusajni.

<sup>11</sup> Che bahuii rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—jRedios abiädluiloj loonu si'c niguii!

<sup>12</sup> Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani nruiiruni lo guiro'preni.

<sup>13</sup> Dxejcti te bixhojz xten xquidoo Júpiter cua' tiop gon najl guii guejnreni. Biädnäni regonga ro' xquidoo Júpiter ni suga' ro' guejdxğa. Rebejn nájza bixhojz rlanjreni nugu'treni regon te ganreni Bernabé nájza Pabl si'c rajnreni rextiosreni.

<sup>14</sup> Che biejn diajg reapost xhi cayajc, batiäjsreni tla' xhajbreni si'c te seen direni guichaglajz xhi cayujn rebejnğa. Ruxunreni bidzujnreni lo rebejn, räjpreni lo rebejn:

<sup>15</sup> —Colcuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc beñ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa nájza guedxliuj, nájza nisdoo, nájza guiralii ni yu' lojreni, neñreni,

<sup>16</sup> Galoo basaan Diosga gun rebeñ guedxliuj si'ctis ni rlanjreni.

<sup>17</sup> Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajreni. Ni'cni riembeepacnu yu' Dios.

<sup>18</sup> Xhidajl diidx guniireni te chäii bejnreni gaan guredxi rebejn, sa'csi rlanjpac rebejn nugu'treni regon.

<sup>19</sup> Dxejcti bidzujn gaii xpejn Israel siädreni guedx Antioquía nájza guedx Iconio. Baqu- ilreni rebeñ Lистра te gucuaareni guij yejc Pabl. Bacuaareni guij yejc Pabl, gudobxhajhrenini guläärenini ro' guejdxğa, sa'csi naareni agujtni.

<sup>20</sup> Dxejc la] ni suga' rexpejn Jesucrist guideb gabi cadro naga' Pabl, huistieni, biusacni guejdxğa. Che bara yääl, huinäni Bernabé sääreni guedx Derbe.

<sup>21</sup> Che bidzujnreni guejdxğa, basule'reni rextidx Dios lo rebejnğa. Xhidajlreni huililajz xtidx Dios. Dxejc gubi'reni, biu'reni guedx Lистра, nájza guedx Iconio, nájza guedx Antioquía.

<sup>22</sup> Balijdxreni rebejn nani huililajz xtidx Dios, gucnäjreni rebejnğa te batiplajz rebejnğa, räjpreni lo rexpejn Jesucrist:

—Colšnjaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

<sup>23</sup> Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, la] ni guredx-gunabreni lo Dios, basadiidxreni rebejn, räjpreni: "Gacnäj Jesucrist la'tu ni huililajz xtiidxni."

### *Gubisac guiro'preni guedx Antioquía xten Siria*

<sup>24</sup> Che gudejd Pabl nájza Bernabé distrit Pisidia, bidzujnreni estad Panfilia.

<sup>25</sup> Basule'reni xtidx Dios lo rebeñ Perge, dxejcti biriireni ro'c sääreni guedx Atalia.

<sup>26</sup> Che bidzujnreni guejdxğa, biu'reni neñ barcw, gudejreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxha]reni Pabl nájza

Bernabé chasule'reni xtidx Dios neñ guiraa reguejdx. Naj abaluux Pabl nájza Bernabé dzuunga.

<sup>27</sup> Che bidzujñreni guejdxga, bachagsa' rexpejn Jesucrist. Dxejcti bijreni diidx lo rebejnnga guira'ti ni bennáj Dios laareni, nájza xho badeed Dios huililajz rebenzjijt nani digac rexpen Israel.

<sup>28</sup> Xchej biannájreni rexpejn Jesucrist ro'c.

## 15

*Bidxagsa'zareni nen guedx Jerusalén*

<sup>1</sup> Neñ redxejga bidzujñ gail dade' ni siáad nez Judea, caguluiireni rexpejn Jesucrist, rájpreni lojreni:

—Palga ditu gusaļ bee si'c gunibee toMoisés, di Dios guslaatu lo xtojltu.

<sup>2</sup> Che biejn diajg Pabl nájza Bernabé rediidxga, bidxagdijñreni redade'ga. Dxejc gule rexpejn Jesucrist Pabl nájza Bernabé nájza sgail rexpejn Jesucrist cháäreni guedx Jerusalén te guinájreni reapost nájza rebengool te guidon xho gac xcuent beega.

<sup>3</sup> Huisunejz rexpejn Jesucrist ni najc ben Antioquia Pabl nájza rebejn ni sanájreni, sääreni guedx Jerusalén. Gudejdreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzjijt xtidx Dios. Bibalazduxh rexpejn Jesucrist che biejn diajgteni rediidxga.

<sup>4</sup> Che bidzujñreni guedx Jerusalén, huichagloj rexpejn Jesucristreni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnáj Diosreni.

<sup>5</sup> Dxejc huisulii gail refarisee ni ahuililajz xtidx Dios, rájpreni lojreni:

—Che chalilajz rebenzjijt xtidx Dios, nanab churení bee, nanabza gusoobreni leii xten toMoisés.

<sup>6</sup> Dxejcti bachagsa' reapost nájza rebengool nani rnibee rexpejn Jesucrist, te don xho gunreni.

<sup>7</sup> Huisulii Pedr, rájpreni lojreni:

—Guejbtu, resa'á, anajntu xho bejn Dios gubalti iij. Gule Dios narä lo guiraanu te gusule'ä xtidx Dios loj rebenzjijt, te chalilajzreni xtidx Dios.

<sup>8</sup> Luxh Dios, nani numbechee lastoo guiralii bejn, badeed seen huililajzpac rebenzjijt xtiidxni. Badeed Dios Sprit Dxan xtenni lojreni si'c te seen te gacbee bejn najceni xpejnñi. Sigac baniidxni Sprit Dxan xtenni loonu galoo, si'cza badeednini lo rebenzjijt.

<sup>9</sup> Sigajc rinälajz Dios nuunu, sigajcza rinälajzni rebenzjijt. Che huililajz rebenzjijt xtiidxni, basia Dios lastooreni.

<sup>10</sup> Naj ¿xhicuent rusieedtu Dios, ä? Di niajcdi nisianáj retoxtadnu releiiga, digacdiza chosanájnu releiiga naj. ¿Xhicuent rlaiztu chasanáj rebenzjijt releiiga?

<sup>11</sup> Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzjijt lo dojl che rililajzreni xtidx Jesucrist —rájpreni Pedr.

<sup>12</sup> Che gulujx gunii Pedr, dxitis gurej rebejn, bacuadijgteni xtidx Bernabé, xtidx Pabl. Guiro'preni bijreni diidx xho cayujñ Dios redzunro, remilagwr nez lo rebenzjijt.

<sup>13</sup> Che gulujx gunii guiro'preni, xhet guniidi rebejn. Jacoobtis rájpreni lojreni:

—Sa'á, colcuadijg xtidxä.

<sup>14</sup> Agunii Simón ni rniireni Pedr lojtu xho ganiddoo baxhaļ Dios laani lo rebenzjijt te gurejdx Dios rexpejnñi ni nadxaag lo rebenzjijt.

<sup>15</sup> Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che rájpreni:

<sup>16</sup> Sidzujñ dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajñ toDavid. Si'c gunä,

<sup>17</sup> te jiädgajñ rebejn narä te gacä Xtiosreni, nájza guiraa rebenzjijt nani najc xpenä jiädgajñ narä,

<sup>18</sup> si'c rájpreni Dios nani galooli balulioj guiraa redzuunre.

<sup>19</sup> Dxejcti rájpreni Jacoob lojreni:

—Dee najc xhigab ni runä. Na'cru gusieednu rebenzjijt ni cagusiechlaizreni, renani salilajz xtidx Dios.

<sup>20</sup> Gucuaanu te guijtz, jie'tznu lo rebenzjijt: Na'c gaurení xhi cos ni basuj bejn loj rebanájb, sa'csi dinu chalilajz xcuent rebanájb. Na'cza guesnájreni bejn ni di gac cháälñi, na'cza gaurení bälñi nani gurerejn, na'cza gaurení rejn.

<sup>21</sup> Dee gucuaanu te di guche'chreni xpejn Israel sa'csi neñ guiraa reguejdx galooli yu' rexpejn Israel nani rol leii xten toMoisés gasob sabd —rájpreni Jacoob.

<sup>22</sup> Che biejn diajg reapost nájza rebengool nani rnibee, nájza guiraa rexpejn Jesucrist xtidx Jacoob, bichagljazreni xtiidxni. Dxejcti gulereni tiop sa'reni chaná Pabl nájza Bernabé guedx Antioquía. Gulereni Judas ni rniireni Barsabás nájza Silas. Guiro'preni najc bejn ni sajcru loj rexpejn Jesucrist.

<sup>23</sup> Dxejcti bejnreni guijtjz huinäreni. Bacuaarení rediidxre:

“Nuure reapost, nájza rebengool ni rnibee, nájza rexpejn xquidoo Jesucrist ruxhalnu xtiixtios lojtu, resa'nu nani rbájz guedx Antioquía nájza estad Siria nájza estad Cilicia.

<sup>24</sup> Rucuaanu guijtjzre sa'csi biejn diaagnu birii gaii resa'nu ree biádsieedreni la'tu con xtiidxreni, cayu'tu yársia' sa'csi najreni lojtu nanab chutu bee si'c gunibee toMoisés, guibajnzatu si'c rnií leii xten toMoisés. Xhet nuudinu gunibeenu jiádnireni si'c.

<sup>25</sup> Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé nájza Pabl, nani sanálaaznu.

<sup>26</sup> Agajc balti huált rljazreni nugu'treni Bernabé nájza Pabl, luxh direni guidxeljz basule'reni xtidx Jesucrist.

<sup>27</sup> Naj ruxhalnu Judas nájza Silas lojtu. Laareni susule'za guiraa rediidxre lojtu.

<sup>28</sup> Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanájtu. Releiiitis nani nanab rusoobnu rucuaanu lojtu.

<sup>29</sup> Na'c gautu xhicos ni basuj bejn lo rebanájz, sa'csi dirunu chalilaaz xcuent rebanájz. Na'cru gautu rejn, na'cza gautu báal nani gurerejn, na'cza guesnájtu nani digac cháaltu. Palga gusoobtu recosre, laaca cayujntu. Sacrú guibajntu. Sujiannájtu Dios.”

<sup>30</sup> Dxejcti basadiidx rexpejn Jesucrist Judas nájza Silas huinäreni Pabl nájza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtjzga lojreni.

<sup>31</sup> Che biejn diajg rexpenzit Jesucrist diidx ni caj lo guijtjzga, bibalazduxhreni sa'csi gulecdxi diidxga lastooreni.

<sup>32</sup> Dxejcti basule' Judas nájza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist.

<sup>33</sup> Ro'c bia'nreni xchej, dxejcrú cuájz rexpejn Jesucrist gubi'reni te gudeedreni xtiixtios loj reni baxhalreni.

<sup>34</sup> Dxejc Silas bejn xhigab jia'nni ro'c.

<sup>35</sup> Luxh Pabl nájza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnájreni.

*Huihuisac Pabl rexpejn Jesucrist nen guiraa reguejdx*

<sup>36</sup> Che gudejd xhidajl dxej, rájp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

<sup>37</sup> Niluxh Bernabé rljaz chanäreni Juan ni laa Marcw.

<sup>38</sup> Naaddi Pabl chááni, sa'csi birii Marcw lojreni che guyu'reni nez Panfilia, diruni nisanáj Pabl nájza Bernabé.

<sup>39</sup> Dxejc gudildiidxreni. Gubicajtireni lo sa'reni. Ni'c saná Bernabé Marcw, biu'reni nen barcw, sääreni Chipre ni re' galáii nisdoos.

<sup>40</sup> Dxejcti Pabl gule Silas te sanánini. Badeed rexpejn Jesucrist xtiixtios lojreni, rájpreni gacnáj Diosreni.

<sup>41</sup> La] ni sasajreni gudejdreni guiraa reguedx Siria nájza guiraa reguedx Cilicia, ro'c gucnájreni guiraa rexpejn Jesucrist, basule'reni xtidx Jesucrist lojreni.

## 16

*Huiná Timoteu Pabl náj Silas*

<sup>1</sup> Bidzunsac Pabl nájza Silas reguedx Derbe nájza Listra. Ro'c bidxaagreni te xpen Jesucrist ni laa Timoteu. Xnanni najc bejn Israel ni huililajz xtidx Jesucrist. Xtadni najc bejn griegw.

<sup>2</sup> Didxsa'ctis rnií rexpen Jesucrist ni yu' Listra nájza Iconio xcuent Timoteu.

<sup>3</sup> Rljaz Pabl chanáni Timoteu. Dxejcti basá] Pabl bee Timoteu te gujcti si'c xpen Israel, te xhet naadi rexpejn Israel, sa'csi guiraareni nanchee xtad Timoteu najc bejn griegw.

<sup>4</sup> Che bidzujnreni cade tej reguejdx, basule'reni xtidx reapost nájza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtjz.

<sup>5</sup> Bazutijp xtidx Dios lastoo renani huililajz xtidx Jesucrist. Guixe-guixee xhidajlru bejn huililajz xtidx Dios xcuent Jesucrist.

*Lo te bacal gunii te niguii lo Pabl*

<sup>6</sup> Che gudejdreni distrit Frigia, nájza estad Galacia, di Sprit Dxan xten Dios nusaan nusule'reni xtidx Jesucrist nen reguedx Asia.

<sup>7</sup> Bidzujntireni gajxh estad Misia. Dxejc rlaizreni nijreni estad Bitinia, niluxh di Sprit Dxañ xten Dios nusaan nijreni ro'c.

<sup>8</sup> Ni'c gudejdtireni stelaad estad Misia, bidzujntireni guedx Troas.

<sup>9</sup> Te yääl si'c lo te bacal bahuüi Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlü nuunu.

<sup>10</sup> Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gubceenu Dios najc nani caguxhal nuure te guluiini xtiidxni lo rebeñ Macedonia. Narä, Lucas, ni cagucuaä rediidxre, gusanää Pabl näjza Silas.

*Che guyu' Pabl con Silas guedx Filipos*

<sup>11</sup> Biu'tinu neñ barcw ro' guedx Troas. Bidzunnu Samotracia, te yuj ni re' neñ nisdoo. Che bara yääl bidzunnu guedx Neápolis. Ro'c biriinu neñ barcw,

<sup>12</sup> bionnu guedx Filipos, guejdx nani sajru lo estad Macedonia. Guedx romanni. Ro'c bia'nnu tiop chon dxej.

<sup>13</sup> Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c.

<sup>14</sup> Lojreni nadxaag te nane' ni laa Lidia, te benzijt ni digac xpejn Israel. Guedx Tiatura siäädni. Ruto'ni ladmuraad ni sacduxh. Rajñ gunaaga Dios si'c rajñ rexpejn Israelni. Bacuadiajgni xtidx Jesucrist ni cagusule' Pabl. Guclnäj Dios nane'ga te huililajzni xtiidxni.

<sup>15</sup> Birobnisni, näjza guiraa reni rbäjz rolijzni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolijzni.

<sup>16</sup> Te dxej cheni sionnu cadro rrinäj bejn Dios, bidxaagnu te dxa'p nani yu' te beñdxab neñ lastooni. Räjp rexpaxhuaanni melduxh sa'csi rusule' dxa'pga recos ni gajd gac.

<sup>17</sup> Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

<sup>18</sup> Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo beñdxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii beñdxab neñ lastoo dxape'ga.

<sup>19</sup> Che bahuüi rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhaxhrene guiro'preni nez roguii cadro suga' reguxhtis.

<sup>20</sup> Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni biey lo guejdxre.

<sup>21</sup> Caguluiireni garenca lei nani digacdi gusoobnu sa'csi najcnu beñ roman.

<sup>22</sup> Dxejcti bidxechnäj rebejn Pabl näjza Silas. Gunibee rejejez gulääreni xhajb Pabl, näjza xhajb Silas, te batiäjlni baar guideb tiejxh guiro'preni.

<sup>23</sup> Che gulujx gudinduxhrene Pabl näjza Silas, biäuren neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

<sup>24</sup> Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

<sup>25</sup> Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni.

<sup>26</sup> Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni.

<sup>27</sup> Che gubajñ guixhajg ni canäj latzguiib, bahuüini naxhal latzguiib, gulääni spaad xtenti, te rlaizni nugu'tni lagajc laani, sa'csi naani abadxun reni niäu neñ latzguiib.

<sup>28</sup> Dxejc guredxa' Pabl, räjpni lo guixhajgga:

—Na'c gunlu si'c. Bahuüi, guiraliinu suga'nu ree.

<sup>29</sup> Dxejc gunibee guixhajg biääd te bajl te biu'ni neñ latzguiib. Racsejsni biäädni bazuxhijbni nez loj Pabl näjza nez loj Silas.

<sup>30</sup> Dxejcti gulää guixhajgreni neñ latzguiib. Gunabdiidxni räjpni lojreni:

—¡Colguini!, dade'! ¿Xhini'c nanab gunä te guslaa Dios narä lo dojl?

<sup>31</sup> Räjp Pabl näjza Silas lo guixhajg:

—Huililajzti xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

<sup>32</sup> Basule' Pabl näjza Silas rextidx Dios lojni näjza loj guiraa rebejn ni yu' rolijzni.

<sup>33</sup> Lagajc dxejc, garol yääl, huinä guixhajgreni gudiibni dejtreni cadro batiuug baarreni. Dxejcti batiobnisreni guixhajg näjza guiraa reni yu' rolizjni.

<sup>34</sup> Dxejc huinä guixhajgreni rolizjni, ro'c badeedni xhi gudajwreni. Laani näjza guiraa reni yu' rolizjni bibalazduxhreni sa'csi huililajzreni xtidx Dios.

<sup>35</sup> Che bara yääl, baxhal reguxhtis stiop guixhajg räjpni lo guixhajg nani cuanäj latzguiib: —Baslaa reniguiiga.

<sup>36</sup> Dxejcti huiye'tz guixhajgga lo Pabl, räjpni:

—Anaj reguxhtis guslaätu. Naj colchäj, gacnäj Dios la'tu, saru chäätu.

<sup>37</sup> Niluxh räjp Pabl loj reguixhajg:

—Nuure najczanu beñ roman. Batiäjreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäurenü nuure neñ latzguiib. Leii xten roman di gusaan gac reben roman si'c. Luxh naj rlanjreni guslaaarenü nuure xhiga'tz. ¡Dinu guiriü si'c! Lagajc laarenü sujiädsläärenü nuunu.

<sup>38</sup> Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas.

<sup>39</sup> Dxejcti biääd reguxhtis, gulääreni Pabl näjza Silas, gunabreni jäjilajzreni. Gunabduxhreni lo Pabl näjza Silas; räjpreni:

—Coljiunejz guejdxre.

<sup>40</sup> Che biriireni neñ latzguiib, huijreni roliz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

## 17

### *Cadxecluduxh guiraa reben Tesalónica*

<sup>1</sup> Che gudejdreni reguedx Anfópolis, näjza guedx Apolonia, bidzujñreni guedx Tesalónica cadro yu' te xquidoo rexpejn Israel.

<sup>2</sup> Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni.

<sup>3</sup> Basule' Pabl xtidx Dios ni caj lo guijtzi ni bacuaa reniguii ni gunii xtidx Dios galooli. Caj lo guijtzi: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

<sup>4</sup> Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani rajñ Dios näjza xhidajl reguna griegw ni sajru huililajz xtiidxni.

<sup>5</sup> Luxh yu' rexpejn Israel ni di chalilajz, ni bidxeclajz. Bati'e'reni gaii beñploj, beñlatsiaj, bejnreni bieji nez galäii. Biu'reni roliz Jasón caguilreni Pabl näjza Silas te cuääreni guiro'preni nez lo rebejn.

<sup>6</sup> Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujñreni laadxnu,

<sup>7</sup> luxh badeed Jasón rolizjni jia'nreni. Direni gusoob leii xten César, najreni yu' stee reiü ni laa Jesús.

<sup>8</sup> Che biejn diajg reguxhtis näjza rebejn diidxre, guyu'reni yärsia'.

<sup>9</sup> Cua' reguxhtis meel lo Jasón näjza lo reexamigwni. Räjp reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti baslaaarenü Jasón näjza reexamigwni.

### *Che guyu' Pabl con Silas guedx Berea*

<sup>10</sup> Che biu' guxhijn, baxhalgajc rexpejn Jesucrist Pabl näjza Silas ste guejdx ni laa Berea. Che bidzujñreni guejdxga, biugajczeni xquidoo rexpejn Israel.

<sup>11</sup> Huenru najc reben Berea loj reben Tesalónica, sa'csi rbaali lajzreni bacuadiajgreni xtidx Pabl ni guniini xcuent Jesucrist. Guixe-guixee bilreni guijtzi cadro caj xtidx Dios te gucbeereni la guliü rextidx Pabl.

<sup>12</sup> Xhidajl rexpejn Israel näjza xhidajl beñ griegw ni sajru, gunaa sigajc niguii, huililajz xtidx Dios.

<sup>13</sup> Che gucbee rexpejn Israel ni rbäjz guedx Tesalónica cagului Pabl xtidx Dios guedx Berea, biäädreni guedx Berea. Che bidzujñreni lo guejdxga bejnreni bieji ro'c.

<sup>14</sup> Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea.

<sup>15</sup> Dxejcti rebejn ni guzanäj Pabl huiänini guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jäädgajczeni lojni. Dxejcti rebejn ni sanä Pabl gubisac guedx Berea.

### *Guyu' Pabl guedx Atenas*

<sup>16</sup> La<sub>1</sub> ni guläjz Pabl guedx Atenas, guyuduxhni yärsia' sa'csi bahuiini rajn guiraa rebejn rebanäjb nani runchee lagajc bejn.

<sup>17</sup> Ni'c nen xquidooreni gudildiidx Pabl rexpejn Israel näjza rebenzajt ni rajn Dios si'c rajn rexpejn Israelni. Guixe-guixee gudildiidxni chutis bejn ni re' lo guii.

<sup>18</sup> Dxejcti biääð gatii bejn lojni. Yu' reni rolduxh guijt ni bacuaa epicüreos, yu'za renani rolduxh guijt ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zaren i räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resureccion”, ni säloj yälgubansac lo rebengut.

<sup>19</sup> Dxejcti gunaaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluuillu,

<sup>20</sup> sa'csi rujylo diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

<sup>21</sup> Reben Atenas näjza rebenzajt ni yu' ro'c rutedreni redxer rniireni didxcoob lo sa'reni, o rucuardiajgreni didxcoob. Ni'cpac rchagljazreni.

<sup>22</sup> Galäii Areópago huisulii Pabl, räjpni lojreni:

—Colcuadiajg guejbtu, ben Atenas. Abahuiä xho randuxhtu xhidajl banäjb.

<sup>23</sup> Che siädsaa lo guejdxre, bahuiä lo rexpänäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

<sup>24</sup> Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn.

<sup>25</sup> Diza Diosre guiquin chu gacnäjni sa'csi lagajc Diosre rudeed yäl'nabajn, yäl'nadaan, näjza guiralii nani rquini reben guedxliuj.

<sup>26</sup> Räjp Pabl:

—Guiralii reben guedxliuj najc rexagdo tejsi gunaa näjza tejsi niguii. Desde galooli gunibee Diosga bal ijj chu renacion, näjza cati gunibee renacionga.

<sup>27</sup> Benchee Dios guiraa reben guedxliuj te quilirni Dios te chalilajzreni xtiidxni. Luxh suga' Dios gajxh cadetejnu,

<sup>28</sup> sa'csi Dios rujn nabajnu lo guedxliuj, runiidxni rsiaan lo guedxliuj, runiidxzani rdajlru xcäl'nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.”

<sup>29</sup> Ni'cni, sa'csi najcnu xi'n Dios, di nungäjł jiennu xhigab najc Dios si'c rebanäjb ni nachee pla't, o guij, o yajc si'ctis ni runchee bejn rexpänäjbtu.

<sup>30</sup> Nen redxer ni di bejn niembee Dios, diza Dios niujn castiigwreni. Niluxh naj gunibee Dios gusiechlajz guiraa rebejn,

<sup>31</sup> sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuzä najc beñsa'c. Rnilił Jesucrist rediidx ni najc guliitis. Guläs Dios Jesucrist, baspañsacnini lo rebengut, te gacbeenu rajp Jesucrist yäl'mibee lo guiraa recos.

<sup>32</sup> Che biejn diajg rebejnga gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

<sup>33</sup> Dxejcti birii Pabl lojreni.

<sup>34</sup> Yu'za reni huinajłni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

## 18

### *Guyu' Pabl guedx Corinto*

<sup>1</sup> Biriiti Pabl guedx Atenas, huijni guedx Corinto.

<sup>2</sup> Ro'c bidxaagni te dade' ni najc ben Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn Israel guedx Roma. Birinäj Aquila Priscila chääłni. Biriireni Italia, biädreni guedx Corinto. Bihuii Pablreni,

<sup>3</sup> sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd.



<sup>4</sup> Gasob sabd, dxej ni rusilajz rexpejn Israel, basule' Pabl xtidx Dios neŋ xquidoo rexpejn Israel. Rajzni chalilajz rexpejn Israel nájza beŋ griegw ni digac xpejn Israel diidx ni rniini xcuent Jesucrist.

<sup>5</sup> Dxejcti birii Silas nájza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhaĵ Dios.

<sup>6</sup> Dxejc bidxehnáj rexpejn Israelni, guniyajzareni xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Rájpszani lo rexpejn Israel:

—Lagajc la'tu rajptu doĵl nittu lo Dios. Xhet doĵldi rapá nará. Aguniá xtidx Jesucrist lojt. Naj lo rebejn nani di gac beŋ Israel gusule'á xtidx Jesucrist —rájjni.

<sup>7</sup> Dxejcti biriini lojreni, huijni rolizj Justo, te bejn ni rajn Dios si'c rajn rexpejn Israelni. Rolizjni sojb cuá' xquidoo rexpejn Israel.

<sup>8</sup> Crisp, ni rnibee xquidoo Israel, huililajz xtidx Jesucrist. Huililajzta guiraa reni rbájz rolizjni. Xhidajzta beŋ Corinto huililajz xtidx Jesucrist, dxejcti birobnisreni.

<sup>9</sup> Goĵl te yáál gunii Dios lo te bacaĵ, rájjni lo Pabl:

—Na'c guidxeljblu. Guniitis, na'c gusaúlu ro'lu,

<sup>10</sup> sa'csi nará suganáá luj. Rut gacdi gun latsiaĵlu. Aguleá xhidalduxh bejn lo guejdxre te gacreni xpená —rájpn Dios.

<sup>11</sup> Ni'c bia'n Pabl ro'c tebizgarol. Baluuiini xtidx Dios lojreni.

<sup>12</sup> Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanáreni Pabl jusgaad cadro yu' Galíon.

<sup>13</sup> Rájjpreni lo Galíon:

—Niguiire caguluui rebejn ganreni Dios garenca mood, xhet si'cti ni caj lo xleiuini —rájpreni.

<sup>14</sup> Agoĵl ninii Pabl, che rájpn Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagá xtiidxtu.

<sup>15</sup> Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor nará, xho gucuadiagá diidxga. Lagajc la'tu colchahuii xho guntu yálguxhtis —rájpn Galíon.

<sup>16</sup> Gunibee Galíon barilaagw resoldaad rexpejn Israel.

<sup>17</sup> Dxejc gunaaz reGriegw Sóstenes nani rnibee xquidoo rexpejn Israel. Batiájlni baar dejtz Sóstenes nez ro' jusgaad xten Galíon. Niluxh nicla niu Galíonreni.

### *Chon huáit huihui Pabl rexpejn Jesucrist*

<sup>18</sup> Bia'nti Pabl Corinto xchej. Dxejc badeed Pabl xtiixtios lo rebejn nani huililaz xtidx Jesucrist, biriini ro'c. Sanáni Priscila nájza Aquila, biu'reni neŋ barcw te siireni nez estad Siria. Dxejc ganid gudejdreni guedx Cencrea, cadro bahuaĵ Pabl yejcti si'c te seen yu' xhi diidx bia'nni con Dios.

<sup>19</sup> Che bidzujnreni guedx Éfeso, basa'n Pabl Priscila nájza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel.

<sup>20</sup> Dxejcti che gunabreni jia'n Pabl ro'c xchej, naaddini jia'nni.

<sup>21</sup> Badeedni xtiixtios, rájjni lojreni:

—Nungájlpac chatedá laniro guedx Jerusalén. Siálsacá ree palga gusaan Dios jiálá.

Biusacni neŋ barcw, biriini guedx Éfeso.

<sup>22</sup> Che bidzujnri guedx Cesarea, biriini neŋ barcw, huijni guedx Jerusalén. Che bidzujnri, guniini xchan lo reapost nájza lo rexpejn Jesucrist. Dxejc huijni guedx Antioquía xten Siria.

<sup>23</sup> Che gudejd balti dxej, biriini guejdxga, gudejdni guideb estad Galacia nájza guideb distrit Frigia. Neŋ cade tej reguejdxga, balijdxni rexpejn Jesucrist te gutijpru lajzreni.

### *Baluii Apolos xtidx Dios neŋ guedx Éfeso*

<sup>24</sup> Neŋ redxejga, te dade' ni laa Apolos bidzujn guedx Éfeso. Najcni xpejn Israel, goĵlni guedx Alejandria xten Egipto. Lacti rajc rnisa'cni, nanduxhzani xtidx Dios.

<sup>25</sup> Nanduxhni xtidx Dios xcuent Jesucrist. Laaca basule'ni xtidx Dios, guideb xcáĵnabajnri rinálajzni Dios. Niluxh xcuent Jesucrist najntisni yáĵrobnis xten Juan.

<sup>26</sup> Nicla nidxejb Apolos gusloj caniini neŋ guidoo xten rexpejn Israel. Che biejn diaĵ Priscila nájza Aquila xtiidxni, huinäreniini rolizjreni. Ro'c basule'rureni xtidx Dios nani gajdni gan.

<sup>27</sup> Dxejc, sa'csi abejn Apolos xhigab chááni reguejdx ni tre' nez Acaya, bacuaa rexpejn Jesucrist guiĵtz lo rexpejn Jesucrist ni yu' neŋ reguejdxga te gacnájreni Apolos. Gucnáduxh Apolos rebejn nani badeed Dios huililajz xtidx Dios neŋ reguejdxga,

<sup>28</sup> sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: "Jesús najc Crist nani cayunlojtu guxhał Dios."

## 19

*Guyu' Pabl guedx Éfeso*

<sup>1</sup> Lał ni guyu' Apolos guedx Corinto, huij Pabl xhidajł reguejdx neņ región Asia, dxejcti bidzujñni guedx Éfeso cadro bidxaagni gaii bejn nani huililajz xtidx Dios.

<sup>2</sup> Gunabdiidx Pabl lojreni:

—Che huililajztu xtidx Dios, ¿la biädłajz Sprit Dxan xten Dios neņ lastootu, ä?

Räjpreni lojni:

—Nicla gajd diajgnu jiejn la yu' te Sprit Dxan xten Dios.

<sup>3</sup> Räjpreni lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.

<sup>4</sup> Dxejcti räjpreni lojreni:

—Guliica bastiobnis Juan che basiejch lajz rebejn xtojłreni. Räjpreni Juan lo rebejn: "Colchalilajz xtidx bejn ni siäd detzá." Bejn ni basä'tni najc Jesucrist —räjpreni Pabl.

<sup>5</sup> Che biejn diajgreni rextidx Pabl birobnisreni te gacbee rebejn najczeni xpejn Jesucrist.

<sup>6</sup> Che batzuub Pabl naani yejcreni, biu' Sprit Dxan xten Dios neņ lastooreni. Dxejcti gusloj caniireni garen-garen didxsaj. Guslojza caniireni diidx ni badeed Dios lojreni.

<sup>7</sup> Si'c tzubitio'p dade' gusajc si'c.

<sup>8</sup> Si'c choņ bäii, guixe-guixee gunii Pabl rextidx Dios, basule'ni xcuent xcälrmibee Dios loj rebejn neņ xquidoo rexpejn Israel. Dini nidxejb guniini loj rebejn.

<sup>9</sup> Dxejcti guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunej Pabl ro'c sanäni rexpejñni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni.

<sup>10</sup> Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios.

<sup>11</sup> Gucnäj Dios Pabl bejnni xhidajł dzunro, remilagw.

<sup>12</sup> Ni'cni biäd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riagajc rebejn ni racxhuuga, řigajcza rebenđxab lastoo renani yu' benđxab.

<sup>13</sup> Dxejcti guyu' gaii beņ Israel nani entis rcansaj, direni cuääz tejsi guejdx. Najczeni bejn ni rbää benđxab lastoo rebejn. Bejn redee xhigabcoob, naareni cuääreni benđxab xcuent laj Jesucrist, ni'cni räjpreni lo renani yu' benđxab neņ lastooni:

—Xcuent xcälrmibee Jesucrist nani ruluii Pabl rnibeenu guiriilu neņ lastoo bejnğa —räjpreni.

<sup>14</sup> Guyu' gajdz xi'n Esceva, te beņ Israel, nani sajcro lo rebixhojz. Rujn redee dzuun rbääreni rebenđxab neņ lastoo rebejn.

<sup>15</sup> Che gunii rexi'n Esceva loj benđxabga si'c, räjpreni benđxab ni yu' neņ lastoo bejnğa lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbaä la'tu.

<sup>16</sup> Dxejcti bixa't niguii nani yu' benđxab neņ lastooni yejcreni rexi'n Esceva, gudinduxhnireni, basälta'nireni, batiäjsni xhajbreni. Dxejcti baxunreni biriireni neņ yu'ga, bidxälgujdxzarenı biräsya' xhajbreni.

<sup>17</sup> Dxejcti guiraa reben Éfeso, rexpejn Israel sigajc beņ griegw, gucbee xho bennäj benđxab reniguiiğa. Bidxebduxh rebejnğa, luxh huä'p xpala'n Jesucrist.

<sup>18</sup> Xhidalduxh reni huililajz xtidx Dios biäd lo rexpejn Jesucrist. Cacäjpreni guiraa recos xhet laadi nani rujnreni.

<sup>19</sup> Xhidajł reni najc bidxaa biädnä reguijtz cadro caj yälñajn xten rebidxaa. Dxejcti base'reni reguijtzga nez loj guiraa rebejn. Bejnreni cuent lacti meel saj reguijtzga. Sajczeni tiubituu mił melpla't.

<sup>20</sup> Xhidalduxh rebejn huililajz xtidx Dios. Batijp Dios lastoo rexpejñni. Gulä'p guiraareni xpala'n Dios.

<sup>21</sup> Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzeni xhigab, naani:

—Che ahua'a Jerusalén, nanabza cha'a guedx Roma.

<sup>22</sup> Ni'cni baxhał Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

*Bidxecheduxh rebejn Éfeso*

<sup>23</sup> Nen redxejga, guyuduxh rebejn yärsia' sa'csi baluii Pabl xtidx Dios. Direni nichagljajz care'ch xtidx Dios.

<sup>24</sup> Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c.

<sup>25</sup> Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu.

<sup>26</sup> Abahuiitu niguire ni laa Pabl. Abiejnza diajgtu xtiidxn. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxn.

<sup>27</sup> Ni'c ries nitloj xtzunnu palga diru bejn sii ni'ch ni riencheenu. Luxh riesza diru bejn jiädgajn Diana nen xquidoro Diana. Naj rebejn Asia, näjza guiraa rebejn guedxliuj ran'duxh Diana, banäjb ni sajru, niluxh palga diru rebejn gan Diana, pet sinitlojni —räjpni.

<sup>28</sup> Che biejn diajg replateer xtiidxn, bidxe'chduxhreni, guredxa'reni räjpreni:

—Sacduxh Diana xtios rebejn Éfeso.

<sup>29</sup> Guideb guejdx guyu' biey. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, bejn Macedonia ni rinajl Pabl.

<sup>30</sup> Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni.

<sup>31</sup> Gaii guxhtis ni rribee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäälu cadro nadxagsa' rebejn —räjpreni.

<sup>32</sup> Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnca nicla gan xhicuent bidxagsa'reni.

<sup>33</sup> Dxejcti gulää rexpejn Israel te dade' ni laa Alejandro lo rebejn xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel.

<sup>34</sup> Niluxh che guebee rebejn najc Alejandro bejn Israel, tiop or guredxaduxhreni, räjpreni: —Sacduxh Diana xtios rebejn Éfeso.

<sup>35</sup> Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu bejn Éfeso, caguidxäjil te bejn guedxliuj ni di gacbee rebejn guedx Éfeso rajnpac Diana, nani xhaguibaali bitejb lo guedxliuj.

<sup>36</sup> Sa'csi rediidxre najc gulii, nungäjil cuedxitu, na'c guntu recos guijdxre.

<sup>37</sup> ¿Xhicuent gunaaztu reniguii ni siädnatu ree? Direni gac gubaan ni rbajn recos guidoo, dizareni niniyaj xtiosnu.

<sup>38</sup> Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

<sup>39</sup> Niluxh palga yu' xhi stee, nanab gac te junt xte rebenguejdx si'c ni caj lo xleiiu.

<sup>40</sup> Ries jii xquejnu lo gubier, naareni bidojpu te guidxagdilu gubier. ¿Dxejca? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

<sup>41</sup> Che gunii secretaar si'c, bire'ch rebejn, biunejzreni ro'c.

**20***Huihuisac Pabl rexpejn Jesucrist ni yu' Macedonia näjza Grecia*

<sup>1</sup> Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni tixtios lojreni. Sä'tini nez reguedx Macedonia.

<sup>2</sup> Guiraa reguejdxga cadro gudejdn, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia.

<sup>3</sup> Che bidzujn Grecia, bia'nni ro'c chon bäii. Dxejcti niu' Pabl nejn barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezuyuj, gubi'ni nez Macedonia.

<sup>4</sup> Huinäni Sópater, xi'n Pirios, te bejn guedx Berea; näj Aristarco näjza Secondo, bejn guedx Tesalónica; näj Gayo, bejn guedx Derbe; näj Timoteu; näj Tíquico näjza Trófimo, bejn Asia.

<sup>5</sup> Guiraa redee gunijd loonu, huiläjzreni nuure guedx Troas.

<sup>6</sup> Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu nejn barcw te sonnu nez guedx Troas. Gaii dxej gusaanu nejn barcw, dxej bidzujnu guedx Troas. Ro'c bia'nnu gajdz dxej.

*Baluu Pabl xhidalduxh xtidx Dios lo rexpejn Jesucrist guedx Troas*

<sup>7</sup> Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijn, gusloj caguseduxh Pabl xtidx Dios, huinuuni si'cti garolyäälli.

<sup>8</sup> Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c.

<sup>9</sup> Sobga' te bi'n ni laa Eutico ro' te bentaan. Laḷ ni caguseduxh Pabl xtidx Dios lo rebejn, gunaaz bacaḷ bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni.

<sup>10</sup> Dxejcti biäjt Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajn Diosni.

<sup>11</sup> Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni.

<sup>12</sup> Xhetliidiru rajcni bi'nga nani gubansac, nani guläs Pabl. Bibalazduxhreni, huisa'nrenini rolizjni.

*Biu'nu neḷ barcw, bionnu guedx Mileto*

<sup>13</sup> Gunijdnu lo Pabl. Biu'nu neḷ barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiiini guejdxga, ro'cli jiu'ni neḷ barcw.

<sup>14</sup> Che bidxaag Pabl nuunu guedx Asón, biu'ni neḷ barcw, sonnu lo nisdoo te bidzunu guedx Mitilene.

<sup>15</sup> Neḷ barcw biriinu ro'c. Che bara yääl, gudejdnu yuj ni re' lo nisdoo ni laa Quoío. Che bara stee yääl, bidzunu guedx Samos. Guedx Trogilio basilaaazu. Che bara stee yääl, bidzunu guedx Mileto.

<sup>16</sup> Di rlaiz Pabl jiu'nu guedx Éfeso, diza rlaizni chunu Asía xchej, sa'csi riojb laizni guidzunu guedx Jerusalén te ro'c tedni redxe lanij ni laa Pentecostés.

*Guedx Mileto guninäj Pabl reni rnibee xpejn Jesucrist ni yu' guedx Éfeso*

<sup>17</sup> Che guyu'nu guedx Mileto, baxhaḷ Pabl diidx lo rexpejn Jesucrist ni yu' guedx Éfeso, gurejdxni reni rnibee.

<sup>18</sup> Che bidzujnreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzuna, nabañnä Dios.

<sup>19</sup> La'tu najntu xho runä xtzuum Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlaiz rexpejn Israel nugu't narä, gudedä trabajwduxh.

<sup>20</sup> La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza roliz cade tejtu huiluiä xtidx Dios lojtu.

<sup>21</sup> Basule'ä xtidx Dios lo rexpejn Israel näjza lo rebenzijt ni di gac xpejn Israel. Rápä lojreni nanab gusiechlajzreni, gusa'nreni xtojlneni, nanab chalilajzreni xtidx Jesucrist te gudzucaj Dios xtojlneni.

<sup>22</sup> Naj cadedä te laad guejdx xtentu, sia'ä guedx Jerusalén, sa'csi caguxhaḷ Sprit Dxan xten Dios narä cha'ä guedx Jerusalén. Dina ganä xhi sacä ro'c.

<sup>23</sup> Niluxh nanä cade tej reguejdx cadro rdedä rnii Sprit Dxan xten Dios loä sidedä trabajwduxh, siäüä neḷ latzguib guedx Jerusalén.

<sup>24</sup> Niluxh dina guidxebä, dizana chanälazduxhä xcälñabañätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlneni palga chalilajzreni xtidx Dios xcuent Jesucrist —räjp Pabl.

<sup>25</sup> Räjpani:

—Naj agucbeä dirutu fisac loä, la'tu nani basule'ä xcälñrnibee Dios lojtu.

<sup>26</sup> Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni.

<sup>27</sup> Xhetliidi biäädxdi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlaiz Dios guibaḷnu.

<sup>28</sup> Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruzj te gac gudzucaj Dios xtojlneni.

<sup>29</sup> Anancheä che rutdiru narä, siääd bejn nani rlaiz chalilajz ste'ca diidx, na'c chalilajztu niclaza jiutu rebejnğa. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiiil.

<sup>30</sup> Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlneni redee ni rusguee.

<sup>31</sup> Colhunii te di gusgueerani la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

<sup>32</sup> Räjzpa Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejñni.

<sup>33</sup> Dina niniabä meel, niclaza xhabä che baluiä xtidx Jesucrist lojtu.

<sup>34</sup> Anajntu lagajc narä benä dzuun con naä te bio' xhi gudaunää rexamigwä.

<sup>35</sup> Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjñni.

<sup>36</sup> Che gulujx gunii Pabl rediidxga, bazuxhibnäjni rebejnga, guredx-gunabni lo Dios.

<sup>37</sup> Dxejcti ronduxh guiraareni gudääzreni guejn Pabl, bachagro'renini.

<sup>38</sup> Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

## 21

### *Huij Pabl guedx Jerusalén*

<sup>1</sup> Che basa'ntinu rexpejn Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara.

<sup>2</sup> Che bidzunu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c.

<sup>3</sup> Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunu guedx Tiro cadro gule'creni cargw ni nuu barcwga.

<sup>4</sup> Ro'c bidxälnu rexpejn Jesucrist. Biannäsureni gajdz dxej. Baluii Sprit Dxan xten Diosreni te guniireni lo Pabl, räjpñni:

—Na'c chäälu guedx Jerusalén.

<sup>5</sup> Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

<sup>6</sup> Che abazadiidxnu sa'nu, nuure biu'nu neñ barcw, biädla laareni gubisacreni rolizjreni.

<sup>7</sup> Biriitinu guedx Tiro. Che bidzunu ro' guedx Tolemaida, gulujx xpiajnu biäjtñu neñ barcw. Dxejc biohuiinu rexpejn Jesucrist ni yu' guejdxga, biannäsureni tejtis yääl.

<sup>8</sup> Che bara yääl, biriinu guejdxga, sonnu guedx Cesarea. Che bidzunu guejdxga, bionnu rolizj Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolizjni huijia'nnu.

<sup>9</sup> Yu' tajp xindxapxteb Felipe. Dios badeed diidx guiniireni lo bejn.

<sup>10</sup> Xhidajl dxej guläjznu rolizj Felipe. Lal ni dxunnu ro'c, bidzujñ te niguii ni laa Agabo, biriini nez Judea. Ruzanij Dios xcäriejñni te guiniini xtidx Dios.

<sup>11</sup> Che bidzujñni loonu, cua' Agabo xsindoor Pabl, baliibni lagajc reni'ni näjza renaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te gutedrenini ladznaa rebenzajt.”

<sup>12</sup> Che biejn diaagnu rediidxga, nuure näjza rebeñ ro'c, gunabduxhnu lo Pabl na'c chääni guedx Jerusalén.

<sup>13</sup> Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä neñ latzguuib, xhet najcdi palga nungälä guetä guedx Jerusalén xcuent Jesucrist —räjp Pabl.

<sup>14</sup> Che naaddi Pabl gusiechläjzñi, xhetru guniidinu lojni. Räjptisnu lojni:

—Sugac nani rlajztis Dios.

<sup>15</sup> Che gudejd redxejga, bilucheenu rexhixtennu, biriinu guejdxga, sontinu guedx Jerusalén.

<sup>16</sup> Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure rolizj te dade' ni laa Mnasón, beñ Chipre, yuj ni tre' lo nisdoo. Laani galooli huililajzñi xtidx Dios. Huijia'nnu rolizjñi, ro'c gulääznu.

### *Huihui Pabl Jacob*

<sup>17</sup> Che bidzunu guedx Jerusalén, bibalazduxh rexpejn Jesucrist sa'csi siopnu ro'c.

<sup>18</sup> Che bara yääl huinänu Pabl lo Jacob näjza lo renani rnibee guidoo xten rexpejn Jesucrist.

<sup>19</sup> Dxejc gudääz Pablreni, bijni diidx xcuent tebgaj redzuun nani badeed Dios bejñni che guyunäjñi rebenzajt nani di gac xpejn Israel, te biejn diajgreni xtidx Dios.

<sup>20</sup> Che biejn diajgreni xtidx Pabl, gulä'preni xpala'n Dios, räjpzarenini lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés.

<sup>21</sup> Abiejn diajg rebejn<sup>re</sup> xcuentlu. Abiejn diajgreni garenca ruluiu lu guiraa rexpejn Israel nani rbájz nen reguejdx xten rebenzjít, ruliidxlureni na'c gusál'reni bee rexi'n'reni, na'c za chazanáj'rureni rexcostumbrnu.

<sup>22</sup> ¿Xhini'c jiennu? Siejn diajgreni abidzujñlu ree, dxejc suchagsa'reni te jiáá'reni lojlu.

<sup>23</sup> Naj gunlu nani guiniinu lojlu. Yu' tajp resa'nu ree nani basa'n'reni diidx lo Dios.

<sup>24</sup> Huiná'reni, nájza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banij'treni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeerenei laaca rusooblu xleii toMoisés.

<sup>25</sup> Biáda rebenzjít nani huililajz xtidx Jesucrist, xhet najc di, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banáj'b, na'c gautu rejn, niclaza báal nani gurerejn, na'c guesnájtu nani di gac chááltu.

### *Gunaaz rexpejn Israel Pabl*

<sup>26</sup> Che bara yáal, huiná Pabl guidap niguiiga, bejn'reni si'c caj lo xleii toMoisés, biu'reni nen xquidoo rexpejn Israel te huie'tz'reni lo bixhojz nen guidoo xhi dxej jiáádná tejgareni te man te ju't rebixhojz remanga lo Dios.

<sup>27</sup> Si'c nanab gunreni gajdz dxej. Che ameer guiza' redxejga, bahuii rexpejn Israel ni siáá Asia lo Pabl nen guidoroga. Gunaaz'reni Pabl, dxejcti gusloj cayujn'reni bieje,

<sup>28</sup> guredxa'reni rájpreni:

—¡Coltaa xpejn Israel! ¡Coltaa te gacnájtu nuure! ¡Bahuilaa're! Niguiire najc nani rniyaj rexpejn Israel cadrotis rijni. Ruliidxni bejn te di chazanáj'rureni xleii toMoisés, riye'tzni lo bejn xhet sajcdi xquidoronure. Colhuilaa xho siáádnáni ree ben griegw, benzjít ni di gac xpejn Israel, te gundxuudxni xquidoronu —rájpreni.

<sup>29</sup> Si'c caniireni sa'csi te huáit bahuiireni saná Pabl Trófirmos lo nezyuj. Trófirmos najc te benzjít ni siáád guedx Éfeso. Naj cayujn'reni xhigab laa niguiiga ni siáádná Pabl nen xquidoro rexpejn Israel.

<sup>30</sup> Guideb guejdxga guyu' yársia', bire' ben guixhuj, bixa't'reni yejc Pabl, gunaaz'renini, gudobxhaxh'reni Pabl, gulá'gajc'renini nen guidoroga. Biá'gajc repuertro xten guidoro.

<sup>31</sup> La l ni cayujn'reni xhigab ju'trenini, yu' chu huie'tz lo nani rnibee resoldaad ni caya'p guejdxga, rájpreni:

—Cayajc te bieiduxh nen guejdxre.

<sup>32</sup> Guredxgajc comandant resoldaad nájza gaii capitán, ruxun'reni bidzujn'reni cadre tre' rebejn. Che bahuii rebejn lo comandant nájza resoldaad, gulájz caguijn'reni Pabl.

<sup>33</sup> Dxejcti gubig comandant lo Pabl, gunibeeni balliib resoldaad naa Pabl con tiop cadenguiib. Dxejcti gunabdiidxni lo Pabl, rájpreni:

—¿Chu luj? ¿Xhini'c bejnlu?

<sup>34</sup> Lo reben xhidaalga yu' r rexpejn Israel ni guredxa' tej diidx, yu'za'reni guredxa' ste'ca diidx. Di comandant nuijn gan niacbeeni xhucuent cayajc bieje sa'csi cabedxa' guiraa rebejn. Dxejc gunibeeni chaná resoldaad Pabl cadre rbájz'reni.

<sup>35</sup> Che bidzunáj resoldaad Pabl ro' scaleer ni caj ro'c, biireni Pabl te bejn'reni gan biunáj'reni Pabl, sa'csi nialazduxh rebejn rlajz'reni nugu't'reni Pabl.

<sup>36</sup> Siáádnajl guiraa rebejn Pabl, rbedxa'reni:

—Colgugu't'ni.

<sup>37</sup> Che agoj l jiu' Pabl nen yuro xten resoldaad, rájpreni lo comandant con diidx griegw:

—Rlazá guiniá tiop diidx lo guejblu.

Rájpreni comandant lo Pabl:

—¡An rniilu xtidxsaá!

<sup>38</sup> An dilu gac niguii ni siáád nación Egipto, nani gudilñáj gubier, nani huiná lo reyubijdz tajp mil niguii nani rugu't bejn.

<sup>39</sup> Dxejc rájpreni lojni:

—Nará nacá te bejn Israel, te bejn Tarso xten Cilicia. Sacduxh guejdxga lo reguedx Cilicia. Canabá gun guejblu te hueen, gusaan guejblu guiniá lo rebejn're.

<sup>40</sup> Dxejc cuáj'b comandant guinií Pabl lo rebejn. Lal ni suga'ni lo scaleer basááb Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, rájpreni:

## 22

1—Guejbtu ben'gool, guejbtu resa'á, nájza la'tu dade'. Gucudiajgtu rextidxá —rájpreni.

2 Che biejn diajgreni caniini didx hebreo, dxidujru guzuj rebejn. Rájpreni lojreni:

<sup>3</sup> —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijtz. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj.

<sup>4</sup> Dxejcti bidxechduxhä loj renani huililajz xtidx Jesucrist, bagu'täzareni. Balibä xhidajl bejn, niguii näjza gunaa, con cadenguuib. Basäuäreni neñ latzguuib.

<sup>5</sup> Bixhojz ni sajrcu näjza guiraa rebengool ni sajrcu neñ xquidootu, sajz guinii xhini'c benä. Laareni baniidxreni guijtz loä. Ni'c huinää lo rexpejn Israel ni yu' guedx Damasco, cadro hua'a te niniazä rebejn nani huililajz xtidx Jesucrist. Benä xhigab jiädnääreni guedx Jerusalén te jiäuren i neñ latzguuib, te gusacsäreni rebejn ga.

*Gunii Pabl xho huililajzni xtidx Jesucrist*

*(Hch. 9:1-19; 26:12-18)*

<sup>6</sup> Räjzani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siäd bajlga.

<sup>7</sup> Biabroä lo yuj, dxejc biejn diağ te se' ni canii loä, najni: “Saulo, Saulo, çxhicuent rusacsilu narä näjza rexpeñä?” najni.

<sup>8</sup> Dxejcti räpä lojni: “çChuluj, Dad?” Najni loä: “Narä nacä Jesucrist ni siäd Nasare't, nani cagusacsiduxhlu.”

<sup>9</sup> Rebejn ni sanää bahuiloj bajlga, bidxejbreni, niluxh di diajgreni niejn xse' nani gunii loä.

<sup>10</sup> Räpä lojni: “Dad, çxhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.”

<sup>11</sup> Bastujxh bajlga loä, diru loä nien, ni'cni gunaaz resa'ä naä, sontinu guedx Damasco.

<sup>12</sup> Räjz Pabl:

—Guejdxga guläjz te niguii ni laa Ananias. Rusoobni guiraa releii xten toMoisés. Guiraa rexpejn Israel rni nadalajz lo dade'ga. Biäd Ananias loä.

<sup>13</sup> Cuä'ä guzujni najni loä: “çSaulo, betzä, bahuisac!” Lagajc dxejc bjaic loä, bahuiä lojni.

<sup>14</sup> Naj Ananias loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjz ni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist.

<sup>15</sup> Loj guiraa bejn susule'lu guiraa ni bahuilu näjza nani biejn diajglu.

<sup>16</sup> çXhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojlu.”

*Gunii Pabl xhicuent baluini xtidx Dios lo rebenzajt*

<sup>17</sup> 'Che gubi'ä guedx Jerusalén, biu'ä neñ guidoro xten rexpejn Israel te guredx-gunabä lo Dios. Lal ni cabedx-canabä lo Dios, astoo gunixcalä,

<sup>18</sup> dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.”

<sup>19</sup> Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni neñ latzguuib.

<sup>20</sup> Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban lal ni bacuaareni guij.”

<sup>21</sup> Dxejcti naj Jesucrist loä: “Huij. Suxhajä luj zitduxh. Chäälü lo guiraa rebenzajt ni di gac xpejn Israel.”

*Bia'n Pabl neñ rolizro xten resoldaad*

<sup>22</sup> Bacuadiajz guiraa rebejn lal ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäj l guibajnrni.

<sup>23</sup> Sanuutis cabedxa'reni. Gulääreni xcamangwreni, cacuaazareni yuyol jiaa.

<sup>24</sup> Dxejcti gunibee comandant lo resoldaad, räjzni:

—Colchanä Pabl neñ yuro xtenu. Ro'c colquün Pabl te guiniini didxgulii, te gacbeenu xhicuent rbedxaduxh rebejn lojni.

<sup>25</sup> Sanätireni Pabl. Entis balibreni ni', naa Pabl con duguijd te niguijnrenini che gunabdiidx Pabl lo capitán, räjzni:

—çLa rajc rguijntu te beñ roman che gajdtu gacbee xhi dojl bejnni, ä? Et si'cti caj lo xleilu.

<sup>26</sup> Che biejn diajz capitán xtiidxni, bidxejbni, huijni lo comandant, räjzni lojni:

—Colnati xhi gunnäjlu dade're, sa'csi najcni beñ roman.

<sup>27</sup> Biädguxuñ comandant lo Pabl, räjzni:

—çLa gulii najclu beñ roman, ä?

Räjz Pabl lojni:

—Guliini.

<sup>28</sup> Dxejcti räjz comandant:

—Narä badedä xhiroob meel te nacä beṇ roman.

Dxejcti räjp Pabl lojni:

—Narä che gołali nacä beṇ roman.

<sup>29</sup> Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beṇ roman, bidxejbni sa'csi gunibeeni biliib Pabl.

*Basule' Pabl diidx xcuentni lo rebixhojz nani rnibee rexpejn Israel*

<sup>30</sup> Che bara yääl, rlajz comandant gacbeeni xhicuent rlajz rexpejn Israel ju't Pabl. Ni'c gunibeeni jiääd rebixhojz ni sajcru näjza reguxhtis xten guidoro. Dxejcti biädñani Pabl, bazujnini nez loj guiraa rebejn ni bire' ro'c.

## 23

<sup>1</sup> Rdxelodzu'tz Pabl lo rebejn ni tre' ro'c laḷ ni räjpni lojreni:

—Narä gusule'ä tiop diidx lo guejbtu, beṇ Israel, sa'ä. Guideb ni nabaṇä ruzobä xtidx Dios. Di lastoä guidxejb nez lo Dios —räjp Pabl.

<sup>2</sup> Che biejn diajg Ananías, bixhojz ni sajcru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

<sup>3</sup> Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

<sup>4</sup> Reni suga' cuä' Pabl räjp lo Pabl:

—¿La dilu gacbee laa bixhojz ni sajcru xten Dios? Na'c guiniyajluni.

<sup>5</sup> Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtzi ni bacuaa reni gunii xtidx Dios.

<sup>6</sup> Gucbee Pabl tiop cuaa najc reni tre' ro'c. Yu' reni najc beṇ saducee, yu'za reni najc beṇ farisee. Dxejc guredxa' Pabl räjpni lojreni:

—Sa'ä, narä nacä te beṇ farisee, xi'nza te beṇ farisee narä. Rililazä sibansac bejn lo rebengut, ni'c cabe'creni xquejä ree.

<sup>7</sup> Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee.

<sup>8</sup> Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga.

<sup>9</sup> Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni: —Di niguiire gac benguijdx. Palga gunii te angl xten Dios o te togool lojni, alga Dios tilnäjnu, dxejc sidxechñäj Diosnu.

<sup>10</sup> Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni yejcni. Dxejcti gunibeeni biäjt resoldaad cadre suga' Pabl. Guideb xtijpreni gulääreni Pabl galäii rebejnnga huinäsaacreni nen yuro xtenreni.

<sup>11</sup> Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

*Rexpejn Israel bejn xhigab nugu'treni Pabl*

<sup>12</sup> Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

<sup>13</sup> Si'cti tiuu niguii bia'n diidxga.

<sup>14</sup> Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidudinu palga dinu guigutxga Pabl —räjpreni—.

<sup>15</sup> Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jiädñani Pabl lojtu. Colyejn si'c ni rlajztu jiejnru diajgtu diidx xcuent Pabl. Che jiädñä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

<sup>16</sup> Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royo xten resoldaad. Che bidzujn, biu'ni räjpni lo Pabl rediidx ni biejn diajgni.

<sup>17</sup> Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

<sup>18</sup> Huinäti capitán bi'nga lo comandant, räjpni lo comandant:



—Pabl, nani niäu neñ yuro xten resoldaad, gunab loä jiadnälää bi'nre lo guebju te guiniini te diidx lo guebju —räjpmi.

<sup>19</sup> Dxejc gunaaz comandant naa bi'nre, huinänini te laad cadro rut jiejni diajgni xti-idxreni, dxejc räjpni lojni:

—¿Xhini'c rlanjlu guiniilu loä?

<sup>20</sup> Dxejc bazejcmi diidx, räjpni loj comandant:

—Abia'n te cuaa xpejn Israel diidx siniabreni lo guebju jiadnä guebju Pabl ro jusgaad guixee. Sujnsireni si'c ni rlanj jiejnru diajgremi diidx xcuent Pabl.

<sup>21</sup> Na'c chalilajz guebju xtiidxreni. Tiu niguii sibäzcxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztsireni guxha guebju diidx sinä guebju Pabl ro jusgaad.

<sup>22</sup> Che biejn diajg comandant diidxga, basaanni sii bi'nga rolizjni, räpxgaani lojni:

—Rut lojdipac gäblu guniilu diidxre loä.

*Huij Pabl lo Pels ni najc gubernadoor*

<sup>23</sup> Dxejcti gurejdx comandant tiop capitán, räjpni lojreni:

—Colgutoj tiop gayuu soldaad, cháä guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcagaa guxhijn guiriireni ree.

<sup>24</sup> Colquii tiop cabaii cuib Pabl te xhet gacdi Pabl cheni chanätuni lo gubernador Pels —räjpmi.

<sup>25</sup> Dxejcti bejn comandant te guijt chanäreni lo gubernadoor.

<sup>26</sup> Loj guijtza rni scree: "Gubernador Pels, nani sacduxh. Narä, Claudio Lisias, ruxhalä xtixtios lo guebju.

<sup>27</sup> Rediidxre rucuaä lo guebju. Gunaaz rexejn Israel niguiire, luxh paru dina nidzunga'cä con resoldaad, nugu'trenini. Che gucheä najcni beñ roman, guläänuni ro'c.

<sup>28</sup> Rlazä niacheä xhi quej rbe'creni, ni'c huanääni lo junt xten rexejn Israel ni rnibee guidoro.

<sup>29</sup> Dxejc gucheä requej ni rbe'creni najc ganax xcuent leii xtenreni, niluxh xhet bejndini te nungäj guetni, nicläzä nanab jäüni neñ latzguuib.

<sup>30</sup> Che baxhalreni diidx loä cabäzcxhiga'tz rexejn Israelni te ju'treni dade're, baxhalga'cäni lo guebju. Agunibeäza jiadle'c rexejn Israelre xquejreni lo guebju. Ni'ctis rniä lo guebju", si'c caj lo guijt ni bejn comandant.

<sup>31</sup> Che biu' guxhijn, huixii resoldaad Pabl sanärenini guedx Antípatris si'cni gunibee comandant gunreni.

<sup>32</sup> Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea.

<sup>33</sup> Che bidzuj redee Cesarea, badeedreni xquijt comandant lo gubernadoor, huinäzarenini Pabl lojni te biembeeni.

<sup>34</sup> Che gulujx bilni guijtza, gunabdiidxni lo Pabl:

—¿Caro siäädlu?

Che gucheeni siääd Pabl Cilicia,

<sup>35</sup> räjpni lo Pabl:

—Guidzujnsi rexejn Israel ni cadxechnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

## 24

*Gunii Pabl xtiidxni lo Pels*

<sup>1</sup> Gudejdti gaii dxej, dxejc bidzujn Ananías, bixhojz ni sajcro, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor.

<sup>2</sup> Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guebju dxiduxh nabañnu. Cayacnäduxh guebju laadxnu con redzunsacduxh ni cayujn guebju.

<sup>3</sup> Xquixtiosduxh guebju, gubernadoor Pels, xcuent guiraa redzunsac ni rujn guebju guira nejz.

<sup>4</sup> Luxh na'cru gusieednu guebju, gucuadiaglaa guebju tiop diidx.

<sup>5</sup> Agucheenu xho najc niguiire. Benguidxduxhni. Cadrotis rijni rujni bieje lo rexejn Israel. Laani rnibee te cuaa ni laa nasaren, nalajznu rebejn nani rililajz xtidx Jesucrist ni biääd guedx Nasare't.

<sup>6</sup> Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu.

<sup>7</sup> Niluxh bidzujñ comandant Lisias näjza resoladaad. Diptis badzucajreni niguiiga ladzñaanu.

<sup>8</sup> Laani gunibeeni lo guejblu jääd reni rbe'c xquejni. Naj lagajc guejblu sajç guiniabdiidx lojni te gacbee guejblu guliï guiraa requej nani rbe'cnu xcuentni —räjp Tértulo.

<sup>9</sup> Dxejcti guiraa rexpejn Israel ni suga' ro'c räjp guliica xtidx Tértulo.

<sup>10</sup> Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazá guze'cä diidx lo guejblu, sa'csi anana agujc xchero lacti huen rujñ guejblu yälguxhtis nacióñ Israelre —räjp Pabl—.

<sup>11</sup> Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx.

<sup>12</sup> Nicla tej dina nichagdiäl bejn neñ guidoro. Nicla tej dina niunä biey neñ reguidobäz, nicla ro nezuyj.

<sup>13</sup> Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guliï najc xtiidxreni.

<sup>14</sup> Rniliäpac lo guejblu: Rañä Xtios retoxtaggoldoonu. Jesucrist baluii xho gañsa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gañ bejn Dios. Ruzobä guiraali releii xten to Moisés. Rililazä guiraa rextidx Dios ni bacuaa reni gunii xtidx Dios.

<sup>15</sup> Rililazä xtidx Dios si'c rililajza rebejnre xtidx Dios. Si'c ni najnreni, si'cza nanä sidzujñ te dxej che guibañsac rebengut, rebenguijdx sigajc rebensa'c.

<sup>16</sup> Ni'cni racbeä laaca nabañä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

<sup>17</sup> Räjp Pabl:

—Agujc xchej yu'ä zijt, lajdx garenca bejn, ñaj gubinää meel ni baxhaļ reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios.

<sup>18</sup> Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza bieydi cayunä.

<sup>19</sup> ¿Con rebejnğa ñaj? Te cue'creni quej lo guejblu palga yu' xhini'c rdxechnäjreni narä.

<sup>20</sup> O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—.

<sup>21</sup> Tejtis diidx guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejn lo rebengut, ni'c biädnätu narä lo rebejnre —si'c guniä lojreni.

<sup>22</sup> Che biejn diajç Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jäädli comandant Lisias dxejc gunä yälguxhtis —räjp Pels.

<sup>23</sup> Dxejcti gule Pels te capitán ni rnibee te gayuu resoladaad ga'p Pabl. Niluxh räjpni lojni gusaanni gun Pabl nani rlajztisni gunni. Na'cza gudxojnni jääd rexamigwni te fiireni lojni.

<sup>24</sup> Che gudejd balti dxej, gubi' Pels, biädnäni chäälñi Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist.

<sup>25</sup> Gunii Pabl xho nanab guibañsa'c bejn nez loj Dios si'c ni gunibee Dios guibajñ bejn. Nanabza gacbee bejn na'c gun bejn cos guijdx, sa'csi sidzujñ dxej gac Dios juejz loj guiraa rebejn te fiini xhi bejnreni. Racsesli Pels tant bidxejbni biejn diajçni diidxto. Räjpni lo Pabl:

—Huij naj. Sibedxsacälu che latä stee —räjp Pels.

<sup>26</sup> Naa Pels sudeed Pabl meel lojni te guslaanini, ni'c masru guet-guejt gurejdxnini te guniäjnini.

<sup>27</sup> Si'c gudejd tiop iijz. Dxejc birii Pels gubernadoor. Dxejcti biu' Porcio Festo, gujçni gubernadorcoob. Niluxh Pels rlajç chanälajz rexpejn Israelni, ni'c basa'nñi niäusijc Pabl.

## 25

### *Gunii Pabl xtiidxni lo Festo*

<sup>1</sup> Che biu' Festo gujçni gubernadorcoob xten reguejdxga, bia'nñi guedx Cesarea chon dxej. Dxejc biriiñ ro'c sääni guedx Jerusalén.

<sup>2</sup> Che bidzujñni guejdxga, rebixhojz nani rnibee näjza reniguii ni sajçru lo rexpejn Israel biäd lo Festo. Gusloj cabe'creni xquej Pabl lojni. Gunabduxhrene lo Festo

<sup>3</sup> sa'csi rlajzreni gunni te huen laareni, gunibeeni jäädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezuyj.

<sup>4</sup> Dxejcti räjp Festo lojreni:

—Suniaü Pabl guedx Cesarea. Di gaclaa guibi'ä guedx Cesarea.

<sup>5</sup> Suchää reniguii ni sajcru lo sa'tu guedx Cesarea, te ro'c cue'creni xquej Pabl loä, don la yu' xhi dzunguidx bejnii —räjpni.

<sup>6</sup> Che gudejd si'tci tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni.

<sup>7</sup> Che bidzujñ Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

<sup>8</sup> Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

<sup>9</sup> Dxejcti Festo, sa'csi rlazjni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

<sup>10</sup> Dxejcti räjp Pabl lojni:

—Ñaj suga'a loj guejblu, ni gule reii César. Guejblu rnibee guiraa reguejdxre. Ree nungäjil cue'creni xquejä lo guejblu, xhet guedx Jerusaléni. Ananchee guejblu xhet latsiajdi benä lo rexpejn Israel.

<sup>11</sup> Palga nacä te beñguidx, o palga yu' xhi latsiaj benä te nungäjil guetä, xho dina xcäbä guetä. Palga xhet latsiajdi benä nani canii rexpejn Israel benä, dxejcn rutiidi sajc guteed narä ladznaareni. Suchale'creni xquejä lo César nani najc reii xten reben roman —räjp Pabl.

<sup>12</sup> Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäällo loj reii César. Mbaj. Sijlu lo reii César —räjp Festo.

*Huixiireni Pabl huinärenini lo reii Agripa*

<sup>13</sup> Che gudejd balti dxej, bidzujñ reii Agripa näja chäälni Berenice guedx Cesarea. Biädhuiireni gubernadoor Festo.

<sup>14</sup> Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels.

<sup>15</sup> Che guyu'ä guedx Jerusalén, rebixhojz ni rnibee näja rebengool xten rexpejn Israel gule'c xquejni loä. Rlazjreni guinibeä guetni.

<sup>16</sup> Rápä lojreni: “Di leii xten nación roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.”

<sup>17</sup> Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä.

<sup>18</sup> Benä xhigab pet yu' xhi cosro bejnii. Luxh che gusloj cabe'creni xquejni, guchegacä xhet latsiarodi bejn Pabl.

<sup>19</sup> Alga cadilñäjrenini xcuent xleiireni, xcostumbreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut.

<sup>20</sup> Guxii nanä xcuent sa' diidxre, ni'cni gunabdidxä lo Pabl top sicäjbn chanaäni guedx Jerusalén te ro'c cue'c rexpejn Israel xquejni.

<sup>21</sup> Dxejcti che gunii Pabl lojpac reii César chale'c rexpejn Israel xquejni, ni'c gunibeä jiäusijcni la ni gac guxhaläni lo César —räjp Festo.

<sup>22</sup> Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucudiajglu xtiidxni —räjpni.

<sup>23</sup> Che bara yääl, biääd Agripa näja Berenice, luxh sucheduxhreni. Näja recapitán ni sajcru näja rebejn ni sajcru lo guejdxga biu'reni nen yuro xten Festo. Dxejc gunibee Festo biääd Pabl.

<sup>24</sup> Dxejcti räjp Festo lo guiraa reni re' nen yuro:

—Reii Agripa näja guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näja guejdxre agule'c xquejni loä, canabduxhreni guetni.

<sup>25</sup> Niluxh narä rchaloä xhet bejndini te nungäjil guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni.

<sup>26</sup> Naj dina ganä xhini'c gucuaä lo guijtzt te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtzt ni chää lo César.

<sup>27</sup> Narä runä xhigab di nungäjil guxhalä niguiire ni niäu latzguuib lo César palga di gacdi gusule'ä xhi quej xcuentni cabe'c rexpejn Israel loä.

<sup>1</sup> Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpmi:

<sup>2</sup> —Reii Agripa, rbalazduxhä sa'csi sajç gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel.

<sup>3</sup> Sa'csi guejblu nanduxh xcuent guiraa relei xten rexpejn Israel. Najnza guejblu xhicient rdxagdijl sa'reni. Ni'c rniabduxhä na'c jieed guejblu gucuadiaglaa guejblu guiraa rextidä.

<sup>4</sup> Räjpa Pabl:

—Guiraa rexpejn Israel nañchee xho nacä che gucäli biuux guedx Jerusalén. Galooli najç guedx Jerusalén ladxä.

<sup>5</sup> Galooliza numbeereni narä, malaii guicäjpreni gucä te farisee nani bazobduxhru xleiuu si'cni rililajznu.

<sup>6</sup> Naj suga'a ree, rlazjreni jläüä sa'csi rililazä diidx nani bia'n Dios con reloxatadgoldoonu.

<sup>7</sup> Guitzubitiop cuaa rexpejn Israel huililajz siliäs Dios guiraa rebengut te guibansacreni. Ni'cni bazuxhijbreni lo Dios dxej-yääl. Naj rniliiä lo guejblu rei Agripa, sa'csi rililazä siliäs Dios guiraa rebengut te guibansacreni, ni'cni rlazjreni gusäureni narä.

<sup>8</sup> Palga abejn Dios xhigab guiliäsni guiraa rebengut te guibansacreni, çxhicient di lajztu chalii xtidx Dios?

<sup>9</sup> Räjpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwduxh basäüäreni neñ latzguuib.

<sup>10</sup> Guiraa recosre benäza guedx Jerusalén. Baniidx rebixhojz ni rnibee guijtç loä te basäüä rexpejn Jesucrist neñ latzguuib. Che biäureni neñ latzguuib, narä gule'cä xquejreni te gajtreni.

<sup>11</sup> Balti huält basacsiduxhäreni lagajç neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijz te ro'c huisacsä rexpejn Jesucrist.

*(Hch. 9:1-19; 22:6-16)*

<sup>12</sup> Räjpa Pabl:

—Ni'c sa'a nez guedx Damasco, ca'a guijtç ni baniidx rebixhojz ni rnibee.

<sup>13</sup> Rniliiä lo guejblu, rei, si'cti läidxej, bahuiä te bajl ni siääd xhaguibaali. Rsanijruni loj gubijdx. Rsanijni guideb gabi cadro suga'a näjza reni sanää.

<sup>14</sup> Che biabrloonu lo yuj, biejn diagä xse' te ni canii loä con didx hebreo: “Saulo, Saulo, çxhicient rusacsilu narä näjza rexpänä? Che rusacsilu narä, lagajç luj rdejdlu trabajw, si'c te gon ni rucuan' yejç gar'u'ch.”

<sup>15</sup> Dxejcti räpä lojni: “çChu luj Dad?” Dxejç najni loä: “Narä nacä Jesucrist nani cagusacsiduxhlu.

<sup>16</sup> Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu.

<sup>17</sup> Naj suxhalälu loj rexpejn Israel näjza lo rebenzijz nani di gac xpejn Israel. Che gusacsä rexpejn Israel näjza rebenzijz luj, sacnäduxhälu, te di ju'treni luj.

<sup>18</sup> Gacnää lastooreni te che jiejn diajgreni xtidxä, chaliilajzrenini, diru xcäriejnreni gac nayääl, sianij xcäriejnreni. Dxejç dirureni gusoob xtidx Bendxab ni rnibee rebendxab, sa'csi susoobreni xtidx Dios. Che chaliilajzreni rextidä, sudzucä Dios xtojllreni. Dxejcti suchaag Diosreni loj renani anajç benäya sa'csi basoobreni xtidx Dios, huililajzreni xtidxä.”

<sup>19</sup> Räjpa Pabl:

—Ni'cni rniliiä lo guejblu, rei Agripa, cayunä si'cni naj Jesucrist loä gunä che baluiojni loä.

<sup>20</sup> Gunixgää xtiidxni lo rebejn Damasco. Räpä lojreni: “Colgusiechlaz, colgusoob xtidx Dios. Colujn dzunsac'te gachee rebejn abasiechlaztu, arusoobtu xtidx Dios.” Si'cza guniä lo rebejn Jerusalén, näjza lo rebejn ni yu' reguedx Judea, näjza lo rebenzijz ni di gac xpejn Israel.

<sup>21</sup> Sa'csi benä si'c, gunaaz rexpejn Israel narä neñ gudiooro, rlazjreni nugu'treni narä.

<sup>22</sup> Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajç loj rebejn ni rapduxh. Rusule'ätis nani caj lo guijtç nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj.

<sup>23</sup> Najreni sidejd Crist trabajwduxh, sugu'trenini. Niluxh sa'csi ganiddoo laani guibansacni lo rebengut, ganiddooza laani suluiini loj rexpejn Israel näjza loj guiraa rebenzijz guliipac xtidx Dios, sibansac bejn lo rebengut, si'c ni guniini galooli.

*Di Agripa nililajz xtidx Jesucrist*

<sup>24</sup> La'l ni canii Pabl rediidxga lojreni, dip gunii Festo, räjpmi lo Pabl:

—Pabl, yejçlu cayajç. Pet sa'csi nanduxhlu guijtç ni'c cayajç yejçlu.

- <sup>25</sup> Dxejcti räjp Pabl lojni:  
—Rniliä lo guejblu dad gubernador Festo, xhet rajcdi yecä. Ganax didxli caniä.
- <sup>26</sup> Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajjni guliü guiraa ni gujc, sa'csi xhet xhiga'tzdi gujcreni.
- <sup>27</sup> Guejblu reii Agripa, çla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.
- <sup>28</sup> Dxejcti räjp Agripa lo Pabl:  
—Tuche'nsi riäädx gunlu gan chalilazä xtidx Jesucrist te gacä xpeñ Dios.
- <sup>29</sup> Räjp Pabl lojni:  
—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajz xtidxä te gactu si'c nacä, niluxh xhet näjdi resa' cadenre —räjp Pabl.
- <sup>30</sup> Dxejcti huisu Agripa, Festo, Berenice, näjza rebejn ni sobganäjreni.
- <sup>31</sup> Che gubigreni stelaad, räjpreni lo sa'reni:  
—Niguiire xhet bejndini te guetni, xhetza bejndini te jäüni.
- <sup>32</sup> Dxejcti räjp Agripa lo Festo:  
—Paru dini niniab chääni lo César, sajc nuslaanuni.

## 27

### *Birü Pabl säa nez guedx Roma*

<sup>1</sup> Basoobtirenü dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najczeni te cuaa ni laa Augusto.

<sup>2</sup> Näjza te dade' ni laa Aristarco guzaj, siäädni guedx Tesalónica xten Macedonia. Biu'nu neñ barcw ro' guedx Cesarea. Barcwga siääd guedx Adramitio. Biriütinu, najc xhigab teednu nez reguejdx nani yu' ro' nisdoo lo reyuj xten Asia.

<sup>3</sup> Che bara yääl guläz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, badeedreni xhi rquiinni.

<sup>4</sup> Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäjgwnu, te guxiiru rda' bej loonu.

<sup>5</sup> Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia.

<sup>6</sup> Ro'c bidxäjł capitán xten resoldaad stee barcw ni siääd guedx Alejandría. Agojł chää barcwga Italia. Bateedtini guiraanu lo barcwga.

<sup>7</sup> Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnü guedx Salmón.

<sup>8</sup> Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadro guxii säab bej. Gajxh ro'c tre' guedx Lasea.

<sup>9</sup> Agujc balti dxej cayaclaanu, luxh agudejdzä dxej ni rucua'n rexepeñ Israel, guxii riäädx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c baliidx Pabl rebejn,

<sup>10</sup> räjpni lojreni:

—Rexamigwä, runxgää bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

<sup>11</sup> Niluxh di capitán xten resoldaad niu xtidx Pabl. Biurunü xtidx nani rusaj barcw näjza xtidx baxhuaan xten barcw.

<sup>12</sup> Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajł, räjpreni.

<sup>13</sup> Ni'c che gusloj cabi' te bebáz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta.

<sup>14</sup> Niluxh di niacłaa gusloj te nisguipeduxh birii nez redajn xten Creta.

<sup>15</sup> Gunaaz bejga barcw, diru gacdi gusajrenini. Basa'ntireni sanä bejga barcw cadrotis rłajzni.

<sup>16</sup> Siädgobij barcw te canuu. Che bidzunnu stelaad te yuje' ni tre' lo nisdoo ni laa Claua, guxiiru cabi' beduxhga. Dxejcli bejnreni gaan guläsreni canuu neñ barcw.

<sup>17</sup> Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiłni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdgä neñ barcw. Sanäti beduxhga barcw cadrotis rłajzni.

<sup>18</sup> Che bara yääl caguscua' beduxh barcw lo nisdoo. Sas basälreni che'n cargw lo nisdoo te bicharu barcw.

<sup>19</sup> Ni riojn dxej, lagajc laareni basälreni lo nisdoo guiraa xtrast barcw.

<sup>20</sup> Che agujc balti dxej niäu lo gubijdx, diza rebale' nen xhaguibaa sa'csi laltis cayajb nisguipeduxhga, biennu xhigab guiraanu sejtnu.

<sup>21</sup> Xchero rut rlanjdi gau. Dxejc gusuj Pabl galäii rebejn räjpni lojreni:

—Rexamigwä, paru nuquadijg guejbtu xtidxä, na'c niriitu xyuj Creta, di läädxre niajc, dizanu nidejd trabajwduxhre.

<sup>22</sup> Niluxh colcuedxdi lastootu. Niclateg bejn ni siääd lo barcw di guet. Barcwitis sinitloj.

<sup>23</sup> Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä,

<sup>24</sup> najni loä: “Na'c guidxeljbu Pabl. Nanabpac chääl lo rei César. ¡Bahuilaa! Abasalajz Dioslu reni siädnälu; nicla tej reni yu' nen barcwre di guet”, najni loä.

<sup>25</sup> Ni'cni caniä lo guejbtu, na'c guidxeljbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä.

<sup>26</sup> Niluxh yu' cadro chalaj barcw lo yujxh nen nisdoo gajxh lo te yuje' ni tre' nen nisdoo —räjp Pabl.

<sup>27</sup> Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj,

<sup>28</sup> ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jäät si'cti galbigajdz metr.

<sup>29</sup> Dxejc bidxeljbrene te di chalaj barcw yejc reguij. Bacuaatireni tajp guibro si'c guench ni naliib te caden te ru'reni nen yujxh te ruscuääzreni barcw, te jia'nni tejsi lajt. Dxejc rlanjreni malaii jianijga lo guedxliuj.

<sup>30</sup> Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rlanjreni guxunreni guidon la sajc guidzujnreni ro' nisdoo.

<sup>31</sup> Dxejcti räjp Pabl lo capitán näjza lo resoldaad:

—Palga di redee jia'n nen barcw, di gacdi guslaatu xcäl nabajntu —räjpni.

<sup>32</sup> Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga.

<sup>33</sup> Che gusloj cayanij, gunibee Pabl, räjpni lojreni:

—Nadxej rajc tiop xman gajdttu gues, gajdzatu gau.

<sup>34</sup> Naj coltajw te gac guixoobtu lo nisdoo. Na'c guntu xhigab guettu, nicla tej xquidxejctu di nitloj.

<sup>35</sup> Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini.

<sup>36</sup> Dxejc bibaa-lajzreni, näjza laareni gusloj cayajwreni.

<sup>37</sup> Nuunu najcnu tiop gayuu gayonbitzubixho'p bejn ni yu' nen barcwga.

<sup>38</sup> Che agujc gudajwreni, basälreni triuu lo nisdoo te bicharu barcw.

<sup>39</sup> Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nisdoo. Rlanjreni nusiu'reni barcw ro'c.

<sup>40</sup> Dxejcti baslaareni guidap guench guiib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo.

<sup>41</sup> Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw.

<sup>42</sup> Dxejcti rlanj resoldaad nugu't repres te di guixoobreni lo nis guxunreni.

<sup>43</sup> Niluxh di rlanj capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh.

<sup>44</sup> Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

## 28

*Bidzujn Pabl lo yuj ni laa Malta ni re' lo nisdoo*

<sup>1</sup> Che bidzujn nu lo yuj ni tre' lo nisdoo, biembeenu yujga najc ni laa Malta.

<sup>2</sup> Gucnäj rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij.

<sup>3</sup> Ca' Pabl te dääz yajg, sale'cnini lo guiboo, chela biriyäl te bäl nialajz neñ yajgga. Saa gudauya'ni naa Pabl.

<sup>4</sup> Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni: —Pet rugu'tni bejn ni'c mase bejnni gaan lo nisdoo siguijxni xtojlni, sejtni naj.

<sup>5</sup> Gubijb Pabl naani dxejcti bitejb bälga lo guiboo. Xhet gujcdi naa Pabl.

<sup>6</sup> Dxejc reben ro'c cabäzj fiireni la sisiägüij naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

<sup>7</sup> Gajxh ro'c naga' xyuj te dade' ni laa Publio ni najc xubernadoor Malta. Biojia'nnu rolizjni choñ dxej. Huenduxh gujc dade'ga, baniidxni guiraa ni biquinnu.

<sup>8</sup> Naga' xtad Publio cayacxhuuni, yu'ni xliaa, cayajczani yobrejn. Huihuii Pabl. Guredx-gunab Pabl lo Dios, dxejc batzuub Pabl naani yejcnj, basiacgajcnini.

<sup>9</sup> Che guchee rebeñguejdxga abasiajcnj beñ racxhuuga, bidzunñajreni beñ racxhuu lo Pabl, basiajc Pabl guiraareni.

<sup>10</sup> Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquinnu neñ barcw.

### *Bidzujñ Pabl guedx Roma*

<sup>11</sup> Agujc choñ bäii yu'nu ro'c che biu'nu neñ te barcw ni siäd Alejandria. Lagajc ro'c bateed barcwga rebäinajl che rsiäd beduxh. Yejc barcwga caj tiop figuur xten tiop biuux ni laa Cästor näza Pólux, rexingancua'ch dios ni laa Zeus.

<sup>12</sup> Biriinu Malta sonnu neñ barcw nez guedx Siracusa. Ro'c bia'nnu choñ dxej.

<sup>13</sup> Dxejcti biusacnu neñ barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzunñu guedx Puteoli.

<sup>14</sup> Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma.

<sup>15</sup> Che guchee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios.

<sup>16</sup> Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

### *Baluii Pabl xtidx Dios lo reben Roma*

<sup>17</sup> Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejbtu rexamigwä, resa'a, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäurenj narä neñ latzgüiib guedx Jerusalem, dxejcti bateedreni narä ladzñaa reroman.

<sup>18</sup> Che biejn diajgreni xtidxä, rlanj reguxhtis roman nuslaa narä sa'csi xhet benädi te nugu'treni narä.

<sup>19</sup> Niluxh naaddi rexpejn Israel guslaareni narä, gunabätis lojpac reii César jiadle'creni quej ni cabe'creni xcuentä. Niluxh narä xhet xquejdi rexpejn Israel cue'cä.

<sup>20</sup> Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebeñgut, ni'c nalibä cadeñre.

<sup>21</sup> Dxejcti räjpreni lojni:

—Nidla tej guijtj gajd reguxhtis xten reguedx Judea guxhal loonu xcuentlu, gajdza rexpejn nu ni bidzujñ ree jiädsan diidx xhet laadi bejnlu.

<sup>22</sup> Rlajznu jiejn diajgnu xtidxlu, don xhi naalu, sa'csi racbeenu xhidajl lajt rniyajreni redixcoob xten Jesucrist —räjpreni.

<sup>23</sup> Guletireni te dxej guidxagsa'reni. Che bidzujñ dxejga, bidxagsa' xhidalduxh bejn neñ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näzja diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben Israel jiaäd.

<sup>24</sup> Yu' reni huililajz xtidx Pabl, yu'za reni di nililajz xtiidxni.

<sup>25</sup> Sa'csi di nijajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj tolsaías che badeed Sprit Dxan xten Dios rediidxre guniini, räjpni lo rextadgooloonu:

<sup>26</sup> Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

<sup>27</sup> Agucnajd lastoo rebejnre sa'csi di rlanjreni chalilajzreni xtidxä.

Direni cuadijg xtidxä sa'csi di rlanjreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojreni.

<sup>28</sup> Räj p Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucaj Dios xtojreni. Rniliäpac lojtu, sililajzreni rextidx Dios.

<sup>29</sup> Che gulujx gunii Pabl rediidxga lojreni, ensilaareni gusloj cadxagdijl sa'reni laj ni sääreni.

<sup>30</sup> Tiop ijz guläjz Pabl guejdxga neñ yu' ni cualaani. Biuni guiralii rebejn ni biääd rolijzni.

<sup>31</sup> Lo guiraa rebejnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojn di guniini.



## Guijtz Nani Bacuaa Pabl Lo Reben Roman

*Rucuaa Pabl lo reben guidoo nen guedx Roma*

- <sup>1</sup> Narä, Pabl, nacä te xmos Jesucrist, laani gule narä te gusule'ä xtidx Dios loj rebejn.  
<sup>2</sup> Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprof'e'tga.  
<sup>3</sup> Rediidx ni rusule'ä najc xcuent Jesucrist, Xi'n Dios, ni najc xagdoo to'reii David xcuent tiejxhni.  
<sup>4</sup> Xcuent Xsprit Dxaan Dad Jesucrist, najcni Xi'npac Dios. Badeed Dios yäl'rnibee lojni, ni'cni gubansacni lo reben'gut.  
<sup>5</sup> Laani gucnäjni narä, guleni narä te gusule'ä xtiidxni te guzobdiajgtu, te chalilajz rebejn ni rej guideb guedxliuj xtiidxni.  
<sup>6</sup> Luxh nadxaagtu loj rebejn ni guleni te chalilajzreni xtiidxni.  
<sup>7</sup> Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu bendxan. Gacnäj Dios ni najc Xtdanu näjza Dad Jesucrist la'tu, guscuecdxireni lajztu.

*Rlajz Pabl chää guedx Roma*

- <sup>8</sup> Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj rujy bejn diidx xcuent xcäl'r'ililajztu.  
<sup>9</sup> Lagajc Dios anajn xho rniabä guet-guejt xcuent la'tu lojni. Narä runä xtzuum Dios guideb lastoä, rusule'ä diidx xcuent Xi'nni Jesucrist.  
<sup>10</sup> Sanuutis canabä lojni, top sajc jiädhuüä lojtu si'cni rlazä gunä agujc xchejli.  
<sup>11</sup> Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni.  
<sup>12</sup> Nalajznu, te gustioobnu lajz sa'nu xcäl'r'ililajz xtidx Dios xten sa'nu.  
<sup>13</sup> Rebetzä rlazä gacbeetu balti huält benä xhigab jiädhuüä lojtu, luxh gajd gacdi jiälä. Rlazä jiädhuüä lojtu te chalilajz xhidajlru bejn xtidx Dios sigajcni salilajzreni guiralajt cadro hua'a loj rebejn ni di gac xpen Israel.  
<sup>14</sup> Nungäjlpac gusule'ä xtidx Dios loj rebejn nani rniü garen-garen didxsaj, sigajc loj reben griegw, loj renani nayääl, sigajc loj reben najn.  
<sup>15</sup> Rbaali lazä suga'a naj, te gusule' xtidx Dios näjza lojtu ni yu' guedx Roma.

*Xcäl'rnibee xtidx Dios*

- <sup>16</sup> Sa'csi dina guituiä xcuent xtidx Dios, sa'csi najcni yäl'rnibee xten Dios te guslaani lo dojl chutis bejn nani rlazj chalilajz xtiidxni, ganidtoo reni najc rexpejn Israel, dxejcti näjza rebejn ni di gac xpen Israel.  
<sup>17</sup> Sa'csi xtidx Dios rusule' xho nanab chalilajz te bejn te gacni te be'nsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te bejn xtidx Dios, najcni te be'nayza nez lo Dios, nabannäjni Dios xcuent xcäl'r'ililajzni."

*Rextojl bejn*

- <sup>18</sup> Xcäl'rdxe'ch Dios nani yu' xhaguibaa siajbni yejc rebejn nani gun dojl, nani rlazj gun cosguijdx, nani di gusaan guiseed sabejnreni didxgulii.  
<sup>19</sup> Sa'csi anancheereni nani sajc gan bejn xcuent Dios, ni'cni najnreni rajpreni dojl, sa'csi ruluipac Dios na'c gunreni dojl.  
<sup>20</sup> Cheni birixtiejli guedxliuj, recos nani di gacdi fii bejn xcuent Dios, si'c xcäl'rnibeeni ni najc par tejpas, si'c xtujxh xtenni, huenliisi ruzenreni sa'csi ruluilajzreni recos ni ruzen nani benchee Dios. Guiraa reni'c ruluilajz najcni Gueb Dios ni rajp yäl'rnibee par tejpas, ni'c di gacdi guiniireni loj Dios direni niembee xhini'c rlazj Dios gunreni.  
<sup>21</sup> Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga gualajz gujcreni, bicäjy xcäriejnreni, naarenen hueen najc gunreni si'ctis ni jiajb yejcreni, si'cni rsia' lajzreni nen lastooren.  
<sup>22</sup> Caniireni nanduxhrene, per direni gan, nayäälreni.  
<sup>23</sup> Gulälazreni xcäl'rdimbicha' Dios ni najc tejsi par tejpas, te bazuxhijbreni nez loj rebanäjbn ni benchee naarenen, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäj.  
<sup>24</sup> Ni'cni gulälaz Diosreni, basaanni gunreni si'ctis ni rlazjreni. Bejnreni dojl con resa'reni.

<sup>25</sup> Sa'csi ahuuilajzreni didx-xhii lacuaa nililajzreni xtidxlii Dios, ruzuxhijbza'reni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

<sup>26</sup> Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäy niguii, lagajc sagunaareni resnäjreni.

<sup>27</sup> Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

<sup>28</sup> Luxh sa'csi di rlaizreni jiureni Dios, basaanti Dios suyu' cosguijdxitis xcäriejnreni, te chanuutisreni lo xcällatsiajreni, rujnreni recos ni xhet laadi.

<sup>29</sup> Guidxareni dojl, näjza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizarenididxxhii.

<sup>30</sup> Rniyaj sa'reni, rdxe'chreni lo Dios, guyalajzreni, dipacreni guitujy, rliä'preni lagajc xpala'nreni, entis latsiacoob rbäxtiejreni, guyalajzreni lo xczujnreni,

<sup>31</sup> nadduxh'reni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjlgacni, dizarenigulasajz sa'reni.

<sup>32</sup> Luxh mase agucbeereni gun Dios yälguixhtis lojreni, najnzareninungäjlguetpac renani rujn recosre, nicla juren, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

## 2

### *Dios rujn yälguixhtis con didxguliipac*

<sup>1</sup> Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareniluj, lagajc xcuent ni'c sajclu yälguixhtis, sa'csi luj rgubeelu sabejnlu, lagajcza luj rujnlu lagajc dojlga.

<sup>2</sup> Nancheenu sujn Dios yälguixhtissa'c loj renani rujn sa' dojlga.

<sup>3</sup> Bejn guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguixhtis lojlu xcuent xtojllu, ä?

<sup>4</sup> O ¿la rbälazlu ni rujn Dios, najcni huenduxh, lacti guroob najc xcäl'rulasajzni, rapduxh-zani pasens? ¿La dilu gan dee najc ni gacnäjlugusiechlahjzlu te guibicajlu lo dojl, ä?

<sup>5</sup> Luxh sa'csi nadduxhlu, di lastoolu guigoodz te gusiechlahjzlu, cagutajllu yälguixhtis ni gaclu che guidzujn dxej ni gun Dios yälguixhtis loj reben guedxliuj,

<sup>6</sup> siguijx Dios loj tejgatu xcuent dzuun nani bejn tejgatu.

<sup>7</sup> Loj rebejn nani rlaiztisreni guiba'nsa'c, ni gusoob xtiidxni, sudeed Dios yäl'nabajn par tejpas sa'csi gudiilreni xhaniduj näjza go'preni xpala'nreni loj Dios, rlaizreni guibajjnreni loj Dios par tejpas.

<sup>8</sup> Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusooobreni reyällatsiaj, redidxguijdx.

<sup>9</sup> Guiraa rebejn guedxliuj ni rujn dojl sidejd trabajwduxh näjza sac-huin lastooreni; ganid rexpen Israel, dxejcti näjza reben griegw.

<sup>10</sup> Loj guiraa rebejn nani rujn cos-hueen, sudeed Dios xhaniduj, näjza bala'n, näjza yälrbecdx lastooreni, ganid rexpen Israel, dxejcti näjza reben griegw.

<sup>11</sup> Sa'csi teb loj najc guiraasi rebejn nez loj Dios.

<sup>12</sup> Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguixhtisreni xcuent xtojlneni.

<sup>13</sup> Xhet ganaxdi renani rucudiajgjtis xleii Moisés najc bejnaya nez loj Dios; rebejn ni rusoobpac rexleii toMoisés, reni'c najc bejnaya loj Dios.

<sup>14</sup> Yu' xhidal bejn ni di gumbee xleii toMoisés, dizareni gac rexpen Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni.

<sup>15</sup> Recossa'c ni rujnreni rululoj nezyusa'c ni yu' lastooreni. Xcäriejnreni rululoj xhini'c loj guiraa nani rujnreni najc cos sa'c, xhini'c najc dojl.

<sup>16</sup> Guiraa recosre saj che guidzujn dxej ni gun Dios yälguixhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

### *Rexpen Israel näj xleii toMoisés*

<sup>17</sup> Luj ni laalu xpen Israel, ni rniilu sanäpaclu xleii toMoisés, rniiduxhlu najclu xpen Dios,

<sup>18</sup> rniilu nancheezalu xhini'c rlaiz Dios gunlu, anajnzalu xhini'c najc hueenru sa'csi bisiedsa'c paclu leii.

<sup>19</sup> Rchalolu saj guluuiloj nezyusa'c lo rebejn nani najc si'c lotiä'p, saj guzanijlu xcäriejn reni nacäy xcäriejnreni.

<sup>20</sup> Rchalolu najclu maestr lo renani nayääl, najczalu maestr lo rebiuux, sa'csi nansa'clu leii, luxh lojni caj guiraa yäl'najn näjza guiraa didxguliipac.

<sup>21</sup> Ni'cni rniä lojlu, luj ni caguseed xtee bejn, çxhicuent dilu guseed lagajc luj? Luj ni rusule'lu diidx na'c cuan bejn, çxhicuent rbajnlu?

<sup>22</sup> Luj nani rniilu na'c guesnäjni te ni di gac chäälni, çla resnäjlu nani di gac chäällu, ä? Rdxex'chlu xcuent rebanäjb, çxhicuent rbäälu xhicos nen xquidoo rebanäjb, ä?

<sup>23</sup> Luj rlajzlu chä'p xpala'nlu sa'csi najnlu leii, çla rusanxtujylu Dios sa'csi dilu gusoob xtidx leiiga, ä?

<sup>24</sup> Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxn, rujntu dojl, sigajc ni caj lo xtidx Dios.

<sup>25</sup> Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl.

<sup>26</sup> Ni'cni palga te bejn ni di chu beega, luxh rusoobni guirliipac xtidx leiiga, çla di gacdi guchaagni cuent najcni si'c te nani yu' beega, ä?

<sup>27</sup> Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl.

<sup>28</sup> Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga.

<sup>29</sup> Najpcu te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejndi.

### 3

<sup>1</sup> Çxhini'c sacnä j te bejn najcni te rexpen Israel, ä? O çxhi sajç chuni beega?

<sup>2</sup> Empac sacduxhni! Ganidtoo, sa'csi loj rexpen Israel badeed Dios xtiidxn.

<sup>3</sup> Mase yu' renani di nililajç diidxga, çla ni'cni xhet sajçdi diidx ni bia'n Dios loj rexpejni, ä?

<sup>4</sup> Xho gacni si'c! Diostis najc guliipac, guiralii bejn rusguee. Scree caj lo xtidx Dios: Lagajc xtiidxlu suluu laaca rujnlu,

te che gaclu yälguxhtis, niçla tej xtojllu di guidxäjl.

<sup>5</sup> Palga xcällatsiajnu ruluiiru najc Dios huenduxh, çxhini'c guiniinu dxejc? Palga gun Dios yälguxhtis nurnu, dxejc tednu trabajwduxh, çla rujnni latsiaj loonu, ä? (Caniä si'c te bejn guedxliuj naj.)

<sup>6</sup> Xho gacni si'c! Paru najcni si'c, çxho mood gun Dios yälguxhtis loj rebejn guedxliuj?

<sup>7</sup> Paru redidx-xhii ni rniä rilii'p'ru xpala'n Dios näjza xtidxliini, çxhicuent gunni yälguxhtis narä si'c te bejndojl?

<sup>8</sup> Yu'za bejn ni canii didx-xhii, najreni cayäjpnu lo rebejn: "Colyejn cosguijdx te guiluiojni recoshuen." Per rebejn ni canii si'c sidzujn dxej gacreni yälguxhtis.

#### *Guiraanu najcnu bejndojl*

<sup>9</sup> ÇDxejca'? ÇLa najcnu benhuenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu' reni lo dojl.

<sup>10</sup> Si'cni caj lo guijtz:

Ruti te bejnsa'c, niçla tejni.

<sup>11</sup> Ruti te bejn ni racbee, ruti chu tej nani rguuil Dios.

<sup>12</sup> Guiragajcreni abirii lo xnejz Dios, teblojsi xhet sajçdiren.

Ruti chu tej ni rujn cossa'c, niçla tejni.

<sup>13</sup> Ro'reni rii ganax didxguijdx,

najcni si'c te baa ni naxal, rusgueereni con lujdxreni,

didxlatsiaj rii ro'reni najcni si'c benen ni yu' ro' te bälñialajz.

<sup>14</sup> Ro'reni entis cague, entis canii didxrdxe'ch lo sa'reni.

<sup>15</sup> Ni'reni ruxunli saxhe' xtiejn sa'reni.

<sup>16</sup> Cadrotis rijreni rujnreni latsiaj, ruteedreni sa'reni trabajw.

<sup>17</sup> Direni gumbec nezyuj ni ruscuecdxilajz.

<sup>18</sup> Niçlaza guidxelojreni Dios.

<sup>19</sup> Racbeenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben guedxliuj gacbeereni yu' xtojlneni nez loj Dios.

<sup>20</sup> Sa'csi mase gusoob bejn guira'ti diidx ni caj lo leii, di leiiga gudzucaj xtojł bejnga, sa'csi leiiga najc nani guluii dojl ni yu' neñ lastooni.

*Rusłaa Dios lo dojl xcuent yälřililajz xtiidxni*

<sup>21</sup> Naj ruluii Dios stee mood guibicaj xtojłnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii nájza lo reguijtz ni bejn rebejn nani gunii xtidx Dios galoo.

<sup>22</sup> Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni.

<sup>23</sup> Sa'csi guiralii rebejn guedxliuj abanijt lo Dios, direni guiga' guidzujñreni lo xnezyuj Dios.

<sup>24</sup> Niluxh balaslajz Dios nuunu, banidxxli'a'ni loonu yälñabannaya nez loj Dios sa'csi Jesucristis gudijx yälğuxhtis xten dojl che baxhe'ni xtiejnni lo cruzj te badzucajni xtojłnu.

<sup>25</sup> Baxhał Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojł chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibanannaya bejn lojni. Galoo gojptis Dios pasens rebejn, dini niujn yälğuxhtis rextojłreni,

<sup>26</sup> sa'csi acanajn Dios guc gunni yälğuxhtis redołga, te si'c guluiini xčälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

<sup>27</sup> Ni'cni ĩcon yälñaro? ĩCon yälñindaan? ĩXhet sajcđini! ĩXhi leii rudzucaj xtojłnu? ĩLa leii najc ni rñii ĩjennu dzunsa'c, ä? ĩDini gac si'c! Yu' tejtis leii ni rudzucaj dojl, nani rñii chalilajztis bejn xtidx Jesucrist.

<sup>28</sup> Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujñni redzunsa'c ni caj lo leii.

<sup>29</sup> ĩLa najc Dios Xtiooztis rexpñ Israel, ä? ĩLa dini gac nájza Dios xten rebejn ni di gac xpen Israel? ĩXho dini gac! Najcni Dios xten guipor cuaa bejn.

<sup>30</sup> Ruti chu stee Dios, tejtis Dios yu'. Rusłaa ni dojl rebejn ni guyu' bee sa'csi huililajzreni xtiidxni, sigajcza rusłaa ni dojl rebejn ni xhet beedi guyu' sa'csi huililajzaren i xtiidxni.

<sup>31</sup> ĩLa rudzucajnu leii sa'csi rililajznu, ä? Ajñdi. ĩXho gacni si'c! Alga basoobnu xtidx leiiga che huililajznu xtidx Jesucrist.

## 4

*Xčälřililajz toAbram*

<sup>1</sup> ĩXhini'c sajc guiniinu xcuent toxtadgoldoonu, Abram?

<sup>2</sup> Paru ni ajc toAbram beñnaya nez loj Dios por redzuun ni bejn i, pet sajc guibalazduxhni, per xhet nez lojdi Dios.

<sup>3</sup> ĩXhini'c caj lo xtidx Dios? Caj rediidxre:

Huililajz toAbram xtidx Dios,

ni'c bachaag Dios cuent najcni te beñnaya nez lojni.

<sup>4</sup> Meel nani rca' te bejn ni rujñ te dzuun, meelga najc ni riälj xca'ni, xhet rcaxlia'dinini.

<sup>5</sup> Luxh nani rililajztis xtidx Dios ni rusłaa bejn lo dojl, lacuaa naani yu' xhi dzuun sajc gunni te guibicaj xtojłni, bejnga najc te beñnaya nez loj Dios, sa'csi huililajzni xtiidxni.

<sup>6</sup> Sigajcza naj toDavid, chicbaa bejn nani ručhaag Dios cuent najcni te beñnaya luxh di niqiuin niujñni redzuun ni caj lo leii. Räjñni:

<sup>7</sup> Chicbaa renani abasłaa Dios lo xtojłreni,

renani abiäuu loj xtojłreni.

<sup>8</sup> Chicbaa bejn nani řiru Dios gun cuent xtojłni.

<sup>9</sup> ĩLa sajc guiniini chicbaa rebejntis nani guyu' bee, ä? ĩLa et nädjiza renani di niu' bee, ä? Sa'csi rñiinu: "ToAbram gujc te beñnaya nez loj Dios sa'csi huililajzni xtidx Dios."

<sup>10</sup> Guc bidxaaag cuent najcni te beñnaya nez loj Dios ĩche gajđni chu bee, ä? O ĩLaa che guyu'ni bee? Bidxaaagpac xcuentni che gajđni chu bee.

<sup>11</sup> Dxejcti guyu'ni bee si'c te seen xten yälñaya sa'csi huililajzni xtidx Dios che gajđlini chu bee te gacni xtdad guiraa renani rililajz lał ni xhet beedi yu'reni, te nájza laareni guidxaaag cuent najcñeni beñnaya nez loj Dios,

<sup>12</sup> te gaczani xtdad guiraa renani yu' bee ni huililajzxa xtidx Dios si'c huililajz toAbram cheni gajđni chu bee.

*Diidx ni bia'n Dios rsiojb xcuent yälřililajz*

<sup>13</sup> Bia'n Dios diidx loj toAbram nájza loj rexagdooni, xca'ni guedxliujre si'c yälñasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios.

<sup>14</sup> Sa'csi paru renani rusoob xtidx leiiga najc nani xca' yälñasa'cga, xlia'si chalilajz bejn xtidx Jesucrist, luxh xhetza sajcđi diidx nani bia'n Dios loj toAbram.

<sup>15</sup> Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojłreni.

<sup>16</sup> Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yálnasa'c, xhet xtebtis renani sasanäj xleii toMoisés, năgajcza renani rililajz xtidx Dios si'c huililajz toAbram, nani najc xtdad guiraaunu nani chalilajz xtidx Dios.

<sup>17</sup> Si'cza caj lo xtidx Dios, caj rediidxre: "Abenă gaclu xtdad xhidald renaciôn." Si'c bia'n Dios diidx loj toAbram, Gueb Dios nani gudeed yălnabajn loj rebengut, nani rnii xcuent recos nani gajd gac ascanu ala najcni.

<sup>18</sup> Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcnj xtdad xhidajł naciôn, te gusojb xtidx Dios ni guniini che răjpnj: "Sceeg gac xhidajł rexagdoolu."

<sup>19</sup> Di toAbram nunijł xcălrililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu.

<sup>20</sup> Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulă'pni xpala'n Dios, badeedni xquixtios lojni.

<sup>21</sup> Anajnni rajp Dios yălrnibee te gunni guiralii nani bia'n diidx gunni.

<sup>22</sup> Ni'c bachaag Dios cuent najcni te beņnaya nez lojni sa'csi huililajzni xtidx Dios.

<sup>23</sup> Xhet xtebtisdi xcuent toAbram cuaj rediidxre: "Bidxaag cuent najcni te beņnaya nez loj Dios sa'csi huililajzni xtidx Dios",

<sup>24</sup> năjza xcuentnu cuajni, sa'csi che chalilaaazu xtiidx nani baspaņsac Xtdad Jesucrist loj rebengut, sidxaag cuent najcni te beņnaya nez loj Dios.

<sup>25</sup> Bacuaareni Jesucrist lo crujz te gudijxni rextojłnu nez loj Dios, luxh gubaņsacni lo rebengut, te gac gacnu beņnaya nez loj Dios.

## 5

### *Xhi rsiajc bejn che najcreni beņnaya nez loj Dios*

<sup>1</sup> Ni'cni che rililajznu xtidx Dios rudzucaj Jesucrist xtojłnu rajcnu beņnaya nez loj Dios, ni'cni ruscuecdxini lajznu.

<sup>2</sup> Sa'csi gujt Jesucrist, sa'csi gubaņsacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yălnabajn, su'pacnu lo xcăłrdimbicha' Dios.

<sup>3</sup> Luxh xhet ni'ctis, sajcaz guibalaaznu che tednu trabajw, sa'csi najnnu trabajwga sujn jia'pnu pasens.

<sup>4</sup> Luxh che rajpnu pasens rajcnu te benguyajłru; che anajczanu benguyajł, rililazsa'crunu.

<sup>5</sup> Luxh yălrililazsa'cnu dini gusanxtujy, sa'csi yăłsanălajz ni rajp Dios ruchaj lastoonu sa'csi neņ lastoonu rbăjz Xsprit Dxan xten Dios ni baniidxni loonu.

<sup>6</sup> Lał ni xhetliidi sajcdi jiennu lagajc xcuentnu te guibicaj xtojłnu, che basa' dxej biăăd Jesucrist te gujtni lo crujz xcuent rebendojł.

<sup>7</sup> Guliipacni, naganduxh guidxălni te bejn ni xcăjb guet lacuaa te bejn ni laaca rujnni. Per sidxăjł te bejn ni xcăjb guet lacuaa te beņsa'c.

<sup>8</sup> Luxh Dios baluiloj xcăłrinălajzni xcuent nuurnu sa'csi lał ni yugajcnu lo dojł, gujt Jesucrist lo crujz xcuentnu.

<sup>9</sup> Aticaxh naj ni najcnu beņnaya nez loj Dios sa'csi baxhe'ni xtiejnni te gubicaj xtojłnu, naj sidedcaj gacnu xcăłguxhtis Dios.

<sup>10</sup> Palga lał ni rdxe'chnu lo Dios, basiăjłni lajzni xcuentnu sa'csi gujt Xi'nni lo crujz, naj ni abiăjł lajzni, suslaani nuure lo dojł sa'csi gubaņsac Xi'nni loj rebengut.

<sup>11</sup> Luxh xhet ni'ctis, sibalaznăjnu Dios xcuent Dad Jesucrist, sa'csi xcuentni ara'pnu yăłrbedxi lajzni nez loj Dios.

### *Adăn con Dad Jesucrist*

<sup>12</sup> Ni'cni, xcuent tejtis niguii biu' dojł lo guedxliuj, luxh xcuent dojł biăădza yăłgajt, gudejdti yăłgajt loj guiraa rebejn, sa'csi guiraa rebejn bejnreni dojł.

<sup>13</sup> Cheni gajd xleii toMoisés chu lo guedxliujre, alabejn rebejn dojł, per di niajcdi nucuaquijni rebejn sa'csi xheti leii.

<sup>14</sup> Luxh empac gujt rebejn neņ redxej ni gubajł toAdăn hasta redxej ni gubajł toMoisés, mase direni niujn lagajc dojł nani bejn toAdăn; luxh ruluiloj yu' chu stee bejn nungăjł jiăăd.

<sup>15</sup> Luxh nani runidx-xlia' Dios dini gac si'c najc xtojł toAdăn. Dini gac si'c sa'csi palga xcuent dojł ni bejn toAdăn, gujt xhidalduxh bejn, cuantimaaz naj sunidx-xlia' Dios yălnabajn par tejpas loonu por xcăłrulaslajz Dios, năgajc por xcăłrulaslajz Dad nani laa Jesucrist.

<sup>16</sup> Luxh nani runidx-xlia' Dios loonu dini gac si'c yăłrunijł ni biăăd loonu xcuent dojł ni bejn toAdăn; sa'csi xcuent tejtis dojłga biăăd yăłguxhtis xten Dios, sa'csi guiraliza rebejn

guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl, te xcuent ni bejn Jesucrist sajc gac bejn bejnaya nez loj Dios.

<sup>17</sup> Palga xcuent dojl ni bejn tejsi bejnga gunibee yälgujt lo guiraa bejn, cuantimaaz lo yäl nabajñ par tejpas sinibee guiraa reni rca' xcäl rulaslajz Jesucrist näjza renani rcaxlia' lojni yäl racnaya nez loj Dios.

<sup>18</sup> Ni'cni sigajc ni biäd yäl guxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc bejnaya nez loj Dios, cua' reni yäl nabajñ par tejpas.

<sup>19</sup> Nalajznu sigajc ni banijt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajc bejnaya nez loj Dios xcuent tej niguii ni basoob xtiidx Dios.

<sup>20</sup> Ni'cni badeed Dios xleii to Moisés, te guzenru dojl. Niluxh cadro guyuduxh dojl, ro'c nanabza chuduxhru xcäl rulaslazduxh Dios,

<sup>21</sup> te sigajc ni gunibee dojl guyu' yälgujt, sigajcza guinibeeru xcäl rulaslajz Dios te jia'cnu bejnaya nez loj Dios, te xca'nu yäl nabajñ par tejpas xcuent Xi'nni, Dad Jesucrist.

## 6

*Agujtnu lo dojl per nabannäjnu Jesucrist*

<sup>1</sup> ¿Xhini'c guiniinu, naj? ¿La sajc guidxunrunu lo dojl te tioobru xcäl rulaslajz Dios, ä?

<sup>2</sup> ¡Gurniälöjtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajñrunu lo dojl?

<sup>3</sup> ¿La ditu gan, che guobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist?

<sup>4</sup> Sa'csi che guobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcäl rimee Dios, sigajcza näj nuurnu sajc guidxunnu lo te yäl nabancuob.

<sup>5</sup> Sa'csi palga gujtnu tejsi con laani lo xcälgujtni che birobnisnu, sigajcza sajtnu tejsi con laani lo yäl nabansac lo rebengut.

<sup>6</sup> Ni'cni xcärienbiejwnu cuaj lo cruzj con laani, te badzucajni rextöjñnu, te di gacdiru guinibee dojl loonu.

<sup>7</sup> Sa'csi nani agujt, di gacdiru guinibee dojl lojni.

<sup>8</sup> Palga nuurnu agujtnu con Jesucrist, rililaaaznu sibansaczanu con laani.

<sup>9</sup> Sa'csi naddonpacnu gubansac Jesucrist loj rebengut, ni'c diruni guet, diru yälgujt ga'p yäl rimee lojni.

<sup>10</sup> Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubansacni, nabajñni nez loj Dios.

<sup>11</sup> Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

<sup>12</sup> Ni'cni na'c gusaantu guinibee dojl tiejxhtu te guntu si'ctis ni rlanj tiejxhtu.

<sup>13</sup> Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb lagaa tiejxhtu te guntu recoshueen si'c ni rlanj Dios guntu.

<sup>14</sup> Sa'csi diru dojl guinibee lojtu, sa'csi dirutu chu loj xleii to Moisés, sa'csi yu'tu lo xcäl rulaslajz Dios.

*La'tu najc si'c remos*

<sup>15</sup> ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl rulaslajz Dios, ä? ¡Xho gacni si'c!

<sup>16</sup> La'tu nansa'ctu palga yu'tu si'c te mos loj te lam te gusbodiajgtu xtiidxni, najc pactu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu bejnaya nez loj Dios.

<sup>17</sup> Xquixhtis lo Dios, galoo gujctu xmos dojl, per naj guideb lastootu basobiajgtu xtidxcoob Dios, huililajztu xtiidxni ni basule'nu lojtu.

<sup>18</sup> Luxh agułaatu lo dojl, biädjiajctu xmos Dios lo dzunsa'c.

<sup>19</sup> Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bejnaya nez loj Dios.

<sup>20</sup> Sa'csi che gujctu xmos dojl, di rextidx Dios guinibee la'tu.

<sup>21</sup> Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujñ loj yälgujttis.

<sup>22</sup> Per naj, sa'csi agulaatu lo dojl, abiu'tu najctu xmos Dios, sujntu sajctu bejnaya nez loj Dios, luxh xnezyuj recoscoobre rdzujñ lo yalnabannaj Dios par tejpas.

<sup>23</sup> Xcälrajx xten dojl najc yälgujt, per nani runidx-xlia' Dios najc xcälñabannaj Dios par tejpas xcuent ni bejn Jesucrist xtadnu.

## 7

### *Yälrluui ni rudeed yälguchnaa*

<sup>1</sup> Caniä lojtu ni najñ xleii toMoisés. ¿La ditu gan, resa'a, xleii toMoisés rnibee loj te bejn guideb nabajñni lo guedxlijre?

<sup>2</sup> Najcni si'c te gunaa nani bachnaa te niguii. Nanabpac cuäznäjni chäälni guideb nabajñni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni.

<sup>3</sup> Ni'cni, lal ni nabajñ chäälni gunaaga, palga cuäznäj gunaaga ste'ca niguii, cayujñni dojl sirilajni gunagujdx. Palga agujt chäälni gunaaga, agulaani lo leiiga, sajç guchnaani stee niguii, xhet dojldi cayujñni, dizani guirilaj gunagujdx.

<sup>4</sup> Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo crujuj, te naj sajç jiu'tu lo ste'ca bejn, loj lagajc Jesucrist nani gubansac loj rebengut te sajç jiennu redzunsac ni rlanj Dios jiennu.

<sup>5</sup> Sa'csi lal ni gubajñnu lo yälñabanbiejwga, lagajc rediidx nani rnii leiiga di gacdi gun bejn, lagajc recosga rlanj gun tiejxhnu, luxh si'c sozaatisnu lo xnezyuj yälgujt.

<sup>6</sup> Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpriicoob ni yu' nen lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

### *Redojl nani yu' tiexhä*

<sup>7</sup> ¿Xhixhni'c guiniinu naj? ¿La dojl najc leii, ä? ¡Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: "Na'c chuguij lajzlu rexhixten bejn."

<sup>8</sup> Ni'cni lagajc diidx ni caj lo leiiga bejn guyuguij lazä rexhixten bejn sa'csi nancheä najcni dojl. Paru xheti leii, xhetiza dojl, agujtni.

<sup>9</sup> Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä.

<sup>10</sup> Luxh baxhal Dios leiiga loonu te jiuäni, te xca'a yälñabajñ, luxh alga bazenni benä dojl, banitä nez loj Dios, gutäti dxejc.

<sup>11</sup> Con leiiga, basguc dojl narä, bejnñni narä si'c te bengut nez loj Dios.

<sup>12</sup> Ni'cni, leii najc dxan, najza rediidx ni caj lo leiiga najc dxan; hueen najcni, didxgulii najcni.

<sup>13</sup> ¿Dxejca'? ¿La nani najc te coshuen huinä narä lo yälgujt, ä? ¡Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojpac najc dojl sa'csi bagu'tni narä con te coshuen, te lagajc rediidx ni caj lo leiiga jienloj lacti latsiaj najc dojl.

<sup>14</sup> Sa'csi nadonnu leiiga najc xtidx Dios, luxh narä nacä te bejn guedxliujre, nacä xmospac dojl.

<sup>15</sup> Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä.

<sup>16</sup> Naj palga narä runä latsiaj nani dipacna rlazä gunä, lagajcza ni'c ruluui hueenca najc leii.

<sup>17</sup> Naj, diruni gac narä ni cayujñ latsiaj, sa'csi yu' dojl nen lastoä, ni'c ni cayujñ runä latsiaj.

<sup>18</sup> Sa'csi narä nanä nen lastoä, nalajznu lo tiexhä, xhetliidi cossa'cdi yu'; sa'csi rlazä gunä cossa'c, per dina gacdipä te gunäpac recossa'cga.

<sup>19</sup> Sa'csi dina gunä redzunsac nani rlazä gunä, alga latsiaj nani diru rlazä gunä, ni'c runä.

<sup>20</sup> Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujñ runä latsiaj.

<sup>21</sup> Ni'cni narä, nani rlazä gunä redzunsac, rdxälä leiire: yu'pa dojl tiexhä.

<sup>22</sup> Sa'csi nen lastoä, rlazäpac gusobä diidx xten xleii Dios.

<sup>23</sup> Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladzñaä xleii dojl nani yu' guideb lagaa tiexhä.

<sup>24</sup> ¡Proobza narä! ¿Chuni'c guslaa tiexhä ni nungäjñ guet xcuent dojl?

<sup>25</sup> ¡Xquixtios loj Dios sa'csi Dad Jesucrist sajç guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlanj gusoob xtiidx dojl, chuni lo xleii dojl.

## 8

*Yäl'nabajn ni najc xcuent Sprit Dxa xten Dios*

<sup>1</sup> Ni'cni naj rut rajcđi rbe'c xcälquij renani ahuililajz xtidx Jesucrist, renani diru jiu gunreni latsiaj ni rlaiz gun tiejxhreni, alga riurureni rujnreni ni rnibee Sprit Dxa xten Dios ni rbäjz neñ lastooreni.

<sup>2</sup> Sa'csi leii xten Sprit Dxa xten Dios ni rudeed yäl'nabajn xcuent Jesucrist, abaslaani narä lo yäl'rnibee xten xleii dojl näjza yälgujt.

<sup>3</sup> Sa'csi nani di niajcdi niujn leibiejw, sa'csi dini niajc nadip lo rebenguedxliuj te gacreni beñnaya nez loj Dios, ni'c bejn Dios che baxhalni Xi'nni Jesucrist, si'c te beñ guedxliujre xcuent dojl, te bejnii yäl'guxhtis lo dojl ni rnibee tiejxh bejn.

<sup>4</sup> Te si'c gac xcäl'guxhtis xten leibiejw lo tiejxh nuurnu, renani dirunu gusoob nani rlaiz gun tiejxhnu, sa'csi naj rbajnnu si'c ni rnibee Sprit Dxa xten Dios ni yu' neñ lastoonu.

<sup>5</sup> Sa'csi renani rusoohtis nani rlaiz gun tiejxhreni, rujntisreni xhigab xcuent redojlga, luxh renani rusooob xtidx Sprit Dxa xten Dios rujntisreni xhigab xcuent nani rlaiz Dios gunreni.

<sup>6</sup> Sa'csi renani yu'tis yejcreni nani rlaiz gun tiejxhreni, sejtreni, sinijtreni; luxh renani yu'tis yejcreni nani rniü Sprit Dxa Dios, reni'c sibecđxi lajzreni, sica'reni yäl'nabajn lo Dios par tejpas.

<sup>7</sup> Te xcärejn nani riutis ni rlaiz gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini.

<sup>8</sup> Renani nabajntis te gunreni latsiaj ni rlaiz gun tiejxhreni di Dios guibalaznäjreni.

<sup>9</sup> Luxh la'tu dirutu gun si'ctis ni rlaiz gun tiejxhtu, ni'cni rujntu si'c ni rlaiz Sprit Dxa xten Dios guntu, palga rbäjzni neñ lastootu. Palga yu' chu tejtü ni di Sprit Dxa cuääz neñ lastooni, di ni'c gac xpejñni.

<sup>10</sup> Palga rbäjz Jesucrist neñ lastootu, agujt tiejxhtu xcuent dojl, xpriutu nabajn sa'csi anajctu beñnaya nez loj Dios.

<sup>11</sup> Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajn lo guedxliujre xcuent Xpřitni nani yu' neñ lastoonu.

<sup>12</sup> Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlaiz gun tiexhnu.

<sup>13</sup> Sa'csi palga cayujntu si'c ni rlaiztis gun tiejxhtu, sejtpectu. Palga nabajntu xcuent Sprit Dxa xten Dios ni rbäjz neñ lastootu, sibälaztu latsiaj ni rlaiz gun tiejxhtu, sibañnäjtu Dios par tejpas.

<sup>14</sup> Sa'csi guiraa renani rulüii Sprit Dxa xten Dios guiraa reni'c najc rexi'n Dios.

<sup>15</sup> Naj ditu nica' te sprit xten te mos te chusactu lo yäl'rdxejb, alga cua'tu sprit xten ni najc si'c te bisiäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä."

<sup>16</sup> Sa'csi lagajc Sprit Dxa xten Dios rulüii loj xpřitnu, najcpacnu xi'n Dios.

<sup>17</sup> Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejđni xcuent xtiidxnü, te tejsiza siliä'p xpala'nnu con laani.

<sup>18</sup> Sa'csi narä runä xhigab retrabajw ni cadejđnu neñ redxejre, digacđi gun tebloonureni con yäl'rdimbicha' nani churu guihuiinu.

<sup>19</sup> Sa'csi guiraa recos nani benchee Dios lo guedxliujre, cabäjzreni, yuduxhreni gaan fireni dxej che guluiloj Dios chuni'c najc rexi'nni.

<sup>20</sup> Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlaizdi recosga, per sa'csi si'c bejn Dios, ni cabäjztis

<sup>21</sup> guslaapacni guiraa recos ni bencheeni lo guedxliujre lo xcäl'rnibee yälgujt, yäl'rnitloj, te dxej sajc jiu'ni lo yäl'rbedxi xten xcäl'rdimbicha' xten rexi'n Dios.

<sup>22</sup> Guiraa recos ni gulecxtiej Dios lo guedxliujre entis roonreni, guira dxej rdejđreni trabajw, si'c rdejđ te gunaa trabajw che rajl xi'nni.

<sup>23</sup> Luxh xhet nani tre'tis lo guedxliujđi, näjza nuunu ni yu' Sprit Dxa xten Dios neñ lastoonu, roonzanu cabääznu dxej cheni xca' Dios nuure si'c rexi'nni, cheni guscoobzani tiexhnu.

<sup>24</sup> Sa'csi xcäl'rililaaznu ni rbääznu, ni'c bejn gułaanu luxh yäl'rbäjz ni guyasi rien, di ni'c gac yäl'rbäjz, sa'csi ĸchu laa ni cuääz xcuent te cos ni ala bahuiini?

<sup>25</sup> Palga cabääznu xcuent te cos ni gajđnu guihuii, rbaali laaznu, rsiudzu'tznu rbäjznu guihuiinu gacni.



<sup>26</sup> Sigajcza racnäj Sprit Dhan xten Dios nuure cadro xheti yälrutijp laaznu sa'csi nicla guidonnu xho mood riäjļ guiniab bejn lo Dios. Luxh lagajc Sprit Dhan ni yu' lastoonu rniabni lo Dios xcuent nuure con yälrbēdxneņ nani nicla gajd bejn gāb con diidx xho najcni.

<sup>27</sup> Dios, nani rula'tz lastoonu, nanchee xhini'c rniab Sprit Dhan xtēni xcuent nuurnu, sa'csi rniabni si'cpac ni rļajz Dios guiniabnu xcuent rexpejņpac Dios.

### *Sienu gaanpac loj guira'ti*

<sup>28</sup> Nadoncheenu guira'ti ni rsiajc rebejņ ni sanāļajz Dios, reni agule Dios te gunreni xtzūunni rsiajcrenini te gun Dios gac recosga par xcāl'nasa'creni.

<sup>29</sup> Sa'csi renani biembeē Dios galooli, reni'c gule Dios cheni gajdli guirixtiej guedxļiujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios.

<sup>30</sup> Renani guleni galooli, reni'c gurejdxni; renani gurejdxni, bejnzani najceni beņnaya nez loj Dios; renani bejnni najceni beņnaya nez loj Dios, gulā'pzeni xpala'nreni.

<sup>31</sup> ĶXhixhni'c guiniinu xcuent dee? Palga yu' Dios xlaadnu, Ķchuxh ni'c najc ni gun gaan loonu?

<sup>32</sup> Dios nani di nudxojņ Xi'nni, nani cuājb cuaj Xi'nni lo cruzj te gujtņi, te gudijxni xcuent xtojņnu, Ķxho dini guniidx loonu xcuent Xi'nni guira'ti nani rquinnu, ā?

<sup>33</sup> ĶChuni'c sajc cue'c xhi xcālquij reni agule Dios nez lo Dios, ā? Ni lagajc Dios najc nani rniļ najcnu beņnaya nez lojņi.

<sup>34</sup> ĶChuni'c najc nani cue'c xhi xcālquijņ nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh ņaj sobga'ni xladbee Dios cadro rnibeeni; laazani cabejdx canabni lo Dios xcuentnu.

<sup>35</sup> ĶChuni'c sajc gudzucaj nuurnu lo yālsanāļajz xten Jesucrist: trabajw, o yāļxļiajs, o yāļrusacsī, o yāļrļiaan, o yāļxhabāā, o yāļrdxejb, o te spaad, ā? Nicla tejņi.

<sup>36</sup> Si'c ni caj lo guijtņ ni caj xtidx Dios:

Xcuentlu, sa'csi najcnu xpejņlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejņņi.

<sup>37</sup> Luxh loj guiraa recosre, sujņpacnu gaan xcuent nani sanāļajz nuure, sa'csi sacnājpacni nuure.

<sup>38</sup> Sa'csi anancheā nicla yāļgujt, niclza yāļnabajņ, nicla rexangļ Dios, niclaza renani rnibee, nicla recos ni yu' naj, niclaza recos nani churu gac, niclaza yāļmilaagwr,

<sup>39</sup> nicla jiaroduxh, niclaza jļājtpac, niclaza xhitis cos ni guc-chee, nicla tej redee di gacdi gudzucaj nuurnu lo xcāl'sanāļajz Dios, yāļ'sanāļajz ni rapza Dad, Jesucrist.

## 9

### *Dios agule rebeņ Israel*

<sup>1</sup> Caniā didxguliipac lojtu sa'csi rililazā xtidx Jesucrist. Dina guiniā didx-xhii. Sprit Dhan xten Dios caguluūi xcārienā laaca rniā;

<sup>2</sup> cayac-huinduxh lastoā, sanuutis yāļxļiajsga.

<sup>3</sup> Sa'csi narā rļazā malaiļ sajc lagajc narā nitlōā lo Dios te sajc gacnāā resa'ā lo guedxļiujre, rexpejņ Israel.

<sup>4</sup> Sa'csi laareni najc xagdoo toIsrael, luxh laareni nungājļ gacreni si'c xi'ņpac Dios. Gubannāj Diosreni. Bia'n Dios didx con laareni. Basa'n Dios xleiļ Moisés lojreni. Bazux-hijbreni nez lo Dios neņ guidoo. Sica'reni reyāļ'nasa'c xten Dios palga jiuveni xtiidxni.

<sup>5</sup> Laareni najc rexagdoo xten toxtadgoldoonu ni gubajņ agujc xhero. Jesucrist gujczā xagdoo xten toIsrael che gojļni si'c te beņ guedxļiuj. Laani najczani Dios loj guiraanu. Suchā'p xpala'ņni par tejpas. Sugacni si'c.

<sup>6</sup> Luxh dini gac si'cni abanijt xtidx Dios nani bia'ņni loj toIsrael. Sa'csi xhet guiraadi rebejņ ni najc xagdoo toIsrael najc xpejņpac Israel.

<sup>7</sup> Diza guiraa reni najc rexagdoo toAbram gac xi'nguliipacni sa'csi rājp Dios lo toAbram: "Rexagdodoolu nani guigab najc reni gac xagdoo Isaac."

<sup>8</sup> Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'ņni.

<sup>9</sup> Sa'csi bia'n Dios diidx loj toAbram: "Stebijz, lagajc bāiire guibisacā, te dxejc chu te xi'n Sara."

<sup>10</sup> Xhet diidxtisga gunii Dios. Guniizani lo toRebeca, che nuxi'ņni cua'ch, xi'n chāāļni, toxtadgoolnu Isaac.

<sup>11</sup> Ni'cni ansde gaal rexi'ņni, ansde niujņreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebāzre, xhet sa'csi bejņdireni dzunsa'c, per sa'csi agule Diosni,

<sup>12</sup> ni'c rājp Dios lo toRebeca: "Xingangaloolu gac xmos xinhuinlu."

<sup>13</sup> Si'cza caj lo guijtņ rediidxre: "Sanālazā Jacoob, ni luxh bidxehnāā Esaū."

<sup>14</sup> ¿Xhini'c guiniinu naj? ¿Xhet laadi rujn Dios, ä? ¿Xho gacni si'c!

<sup>15</sup> Sa'csi räjp Dios loj toMoisés: “Sulaslazä chutis bejn nani rlazä gacnaä.”

<sup>16</sup> Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn.

<sup>17</sup> Ni'cni caj lo guijtj xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.”

<sup>18</sup> Rulaslazjni rebejn nani rrajztisni, runnadipzani lastoo bejn nani rrajztisni.

<sup>19</sup> Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rrajzni gac, ä?”

<sup>20</sup> ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?”

<sup>21</sup> Gurniälöjlu. Bejn nani runchee guejs, ¿la di gacdi gunni si'tisni rrajzni con bajnga, ä? ¿La di gacdi guncheeni te guessa'c nägajza te guesyuj ni xhet sirbdi con lagajc bajnga?

<sup>22</sup> ¿Xhiru najc, palga Dios rrajzni guluilojni xho rujni yälguxhtis, näjza rrajzni guluilojni xcälrnibeeni, gopnäjni pasens renani nungäjl gac yälguxhtis, te nitlojzareni, ä?

<sup>23</sup> Bejni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni.

<sup>24</sup> Lagajc nuurnu najcnu reni aguleni; xhet xtebtis loj rexpem Israel guleni nuurnu, näjza loj rebejn ni di gac rexpem Israel guleni nuurnu.

<sup>25</sup> Cajza lo guijtj ni bacuaa Oseas:

Renani di gac xpenä, reni'c cuälää “xpenä”.

Luxh nani dina ninälazä, sinälazäni.

<sup>26</sup> Dxejcti lagajc cadro räjpreni lojreni:

“Ditu gac rexpemä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

<sup>27</sup> Cajza lo guijtj ni bacuaa Isaías: “Mase najc xhidajl rexpem Israel si'c najc yujxh ni tre' ro' nisdoos, guxii gac reni laa lo dojl.

<sup>28</sup> Sa'csi nusoobpac Dad, Dios xtiidxni xcuent xcälguxhtis reben guedxliuj, luxh siojzba gunnini.”

<sup>29</sup> Guniiiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoos reben tiemp,

niajcnu si'c gujc Sodoma näjza Gomorra, reguejdx ni gunitloj.

### *Xtidx Dios näj rexpem Israel*

<sup>30</sup> ¿Xhini'c sajc guiniinu naj? Rebejn nani di gac xpen Israel, direni niguiil xho gacreni bennaya nez loj Dios, niluxh agujczeni bennaya nez loj Dios sa'csi huillilajzreni xtidx Jesucrist.

<sup>31</sup> Luxh rexpem Israel, mase sanuutisreni lo xleii Moisés ni ruluii xho gac bejn bennaya nez loj Dios, banijtreni, direni niujn gaan nusoobreni guideb leiiga.

<sup>32</sup> ¿Xhicuent gujcn si'c? Sa'csi direni nililajz xtidx Dios, alga rrajzreni guntisreni dzuun xten leii, naareni si'c gacreni bennaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist.

<sup>33</sup> Si'cza bacuaa Isaías, räjpni:

Aguleä te bejn lo guedx Sión ni gac si'c te guij cadro rtiäjli ni' bejn,

te guij ni rusälta' bejn.

Chutis tej nani chalilajz xtiidxni, dini jianxtujy.

## 10

<sup>1</sup> Rebetzä, rlazduxhä chalilajz rexpemä xtidx Dios. Rniabduxhä lo Dios te guslaanireni lo xtojreni.

<sup>2</sup> Narä rniäpac nancheä ruzuxhijb rexpem Israel lo Dios, niluxh direni gumbesa'c xhini'c rrajz Dios gunreni.

<sup>3</sup> Sa'csi direni niachee xcuent xho rajc te bejn te bennaya nez loj Dios, ni'c rrajzreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni.

<sup>4</sup> Abasoob Jesucrist xtidx Leii, ni'cni che chalilajz bejn xtidx Jesucrist, anajczeni bennaya nez loj Dios.

<sup>5</sup> ToMoisés bacuaa rediidxre: “Chutis ni rrajz gac bennaya nez loj Dios sa'csi rusoobni xtidx leii, nanab gusobsa'cpacni diidxga guideb nabajni lo guedxliujre.”

<sup>6</sup> Xcälñayareni nez loj Dios sa'csi rililajzreni xtidx Jesucrist, rnii scree: "Na'c guiniitu nen lastootu, çchuni'c chä'p xhaguibaa?" nalajznu, te jiädñäsacni Jesucrist loj guedxliuj.

<sup>7</sup> Na'cza gäbni: "çChuni'c jäjt gabijl?" (nalajznu te chaxiini Jesucrist loj rebengut).

<sup>8</sup> çXhini'c rniiini ñaj? Rniini: "Diidxga suga' gajxh ro'tu, nen lastootu." Nalajznu, diidx xcuent yälñililaaz nani cagusule'nu lojtu.

<sup>9</sup> Rniinu lojtu, palga guiniitu con ro'tu, Jesucrist najc Dad loonu, palga chalilajztu baspansac Dios Jesucrist loj rebengut, suslaani la'tu lo dojl.

<sup>10</sup> Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

<sup>11</sup> Sa'csi rnii xtidx Dios scree: "Chutis ni rililajz xtidx Dad Jesucrist, dini jianxtujy."

<sup>12</sup> Sa'csi guiraa rebejn najc tebloj nez lojni, rexpejn Israel sigajc rebenzajt, sa'csi lagajc laani najcni Dad lo guiraaareni, rulaslazduxhni guiraa renani rbedx-rniab lojni.

<sup>13</sup> Lo xtidx Dios caj rediidxre: "Chutis ni rbedx-rniab lo Dad, siliaani lo xtojlni palga rililajzni xtidx Dios."

<sup>14</sup> çXho gac guiniabreni lo Dad, palga direni chalilajz xtiidxni? çXho gacza chalilajzreni xtiidxni, palga gajd diajgreni jiejn xtiidxni? çLuxh xho jiejn diajgreni xtiidxni palga rut rusule'di diidxga lojreni, ä?

<sup>15</sup> Luxh çxhoza gusule'reni diidxga palga rut guxhaldireni? Si'cni caj lo guijt: "Chipza saru najc ni' renani riädñä diidx xcuent cossa'c, yälñbecdxi lajz rebejn."

<sup>16</sup> Xhet guiraaadireni rusooob xtiidxni, sa'csi guniiza toIsaias: "Dad, çchuni'c chalilajz xtiidxnu?"

<sup>17</sup> Rililajz bejn xtidx Dios che rucudiajgreni diidxga; rucudiajgzareni che yu' chu rusule' xtidx Jesucrist.

<sup>18</sup> Ñaj arniä: Gajdpac diajgreni jiejn xtiidxni, o çla babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,  
abidzujza rextiidxreni lo guiraa reguejdx ni tre' lo guedxliujre.

<sup>19</sup> Rniäza: Dipac rexpen Israel niachee, o çla gucheereni, ä? Galooli gunii toMoisés rediidxre:

Sunä gudxoju xcuent rebejn ni di gac te guejdx,  
con te guejdx nani di gabee suche'chä la'tu.

<sup>20</sup> Diza toIsaias nidxejb guniini rediidxre:

Renani di niguiil narä, bidxäjl narä,  
baluiloäza loj renani di niniabdiidx narä.

<sup>21</sup> Guniiiza toIsaias xcuent rexpen Israel:  
Desde galooli, dxej-yääl basgää ñää lo rebejn ga te niureni xtidxä,  
luxh najczeni bejn ni di gusooob diidx, rutzu'reni didxnaj.

## 11

### *Rexpen Israel nani gulaa lo dojl*

<sup>1</sup> Arniä: çLa agulälaz Dios rexpen Israel, ä? çXho gacni si'c! Ni lagajc narä nacä te xpen Israel, te xagdoob toAbram, nadxagä lo resa' toBenjamín.

<sup>2</sup> Di Dios nibälaz rexpejni, xpen Israel nani guleni galooli che gajdli guirixtiej guedxliuj. O çla dilu gacbee xhi caj lo xtidx Dios cadro rnii xcuent Eliás, xho gunabduxh Eliás didxnaj lo Dios xcuent rexpen Israel, ä? Räjpni scree:

<sup>3</sup> "Dad, abagu'treni guiraa reniguii nani gunii xtiidxlu, abatzujlreni rexquidoolu, xtebtis narä bia'nä, luxh ñaj rajlajzreni ju'treni narä."

<sup>4</sup> Luxh, çxhini'c räjp Dios lojni? Räjpni: "Abalucheä gajdz miñ bejn nani gajd guzuxhijb nez loj Baal."

<sup>5</sup> Si'cza ñaj, abia'n te chinae' rexpen Israel nani agule Dios xcuent xcälñulaslajzni.

<sup>6</sup> Dxejc palga ruslaani nuure lo dojl xcuent xcälñulaslajzni diruni gac sa'csi yu' xhi dzuunu biennu te nuslaani nuure lo dojl. Paru si'c najcni diru xcälñulaslajz Dios gac yälñulaslajz.

<sup>7</sup> çDxejca'? Di rexpen Israel nidxäl nani caguiilreni, luxh rebejn nani agule Dios, ni'c bidxälni, luxh ste cuaareni, aguyalajzreni.

<sup>8</sup> Gujcní si'c caj lo xtidx Dios:

Bascäy Dios xcäriejnreni, näjza balojni di jien,  
lo dxe najli di diajgreni jiejn.

<sup>9</sup> Guniiiza toDavid, scree caj lo xtidx Dios:

Sugun xmex lanijreni jiajbreni,  
te gac guiga'reni,

sugacni si'c guij ni rulani' bejn, te gacreni yälñuxhtis.

<sup>10</sup> Suguscäjy Dios balojreni te na'c fisa'creni, sujie't dejtzeni, sutedreni trabajwduxh par tejpas.

*Yälruslaa lo dojl xten bejn ni di gac xpen Israel*

<sup>11</sup> Naj rniabdidxä: ¿La biajb rexpen Israel te gunijtreni par tejpas, ä? ¿Xho gacni si'c! Sa'csi biajb rexpejn Israel, ni'cni gojl biääd yälruslaa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl.

<sup>12</sup> Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijf xten rexpen Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

<sup>13</sup> Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä,

<sup>14</sup> te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist.

<sup>15</sup> Palga gulecdxireni lajz reben guedxliuj con Dios sa'csi gulälaz rexpen Israel xtidx Jesucrist, aticaxh che chalilajz rexpen Israel rextidx Jesucrist, sibañsac renani najc si'c bengut.

<sup>16</sup> Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

<sup>17</sup> Rexpen Israel najcreni si'c te yajg oliib; palga gutiuugreni te ñaa yajgga, dxejc ro'c guquiidreni ñaa ste'ca yajg te guibajñni con xtiejn yajg oliibga.

<sup>18</sup> Ni'cni, na'c gactu guyalajz lo reñaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

<sup>19</sup> Dxejc colguini: "Batiuugreni ñaapac yajgre, te gujc biguidä cuä' yajgga."

<sup>20</sup> Guliipacni, biru' ñaapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu guyalajz, colgudxejb,

<sup>21</sup> sa'csi palga di Dios nutedbia reña yajgga, diza Dios gutedbia la'tu.

<sup>22</sup> Bahuü j'acti hueen najc Dios! Luxh lacti niälajzani; con renani banijf najcni niälajz, luxh lacti rulasajz Dios la'tu palga chanuu jiuutu xtiidxni. Palga ditu jiu xtiidxni, näjza la'tu sudzucaj Dios.

<sup>23</sup> Luxh sigajcza reni bidin, palga di chanuu cuälazreni xtiidxni sajz suquidsac Diosreni lo yajgga.

<sup>24</sup> Luxh la'tu najctu benzijf, najctu si'c ñaa te yagoliib ni xtebca gulejn neñ dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpen Israel ni banijf najc si'c ñaapac xten yagolibs'a'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

*Che laapac rexpen Israel lo dojl*

<sup>25</sup> Rebetzä, rlazä gacbeetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijf xtidx Dios.

<sup>26</sup> Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadro caj rediidxre:

Nani ruslaa sajz beñ guedx Siön, luxh sudzucajni xtojñ renani najc xagdo toJacoob.

<sup>27</sup> Dee najc diidx ni bia'nä con laareni, che gudzucaä xtojñreni.

<sup>28</sup> Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retextadgoldooreni.

<sup>29</sup> Sa'csi rut rajcdi rudzucaj nicla yäl'nasa'c ni rudeed Dios, niclaza yäl'rbejdx xten Dios.

<sup>30</sup> La'tu galoo ditu nusoob xtidx Dios. Naj rulasajz Dios la'tu sa'csi gulälaz rexpen Israel xtiidxni.

<sup>31</sup> Sigajcza naj direni gusoob xtidx Dios, niluxh si'c najcni te gulasajz Diosreni sa'csi balasajzani la'tu.

<sup>32</sup> Dios basaan biajb guiraanu lo dojl, te si'c sajz gulasajz Dios guiraanu.

<sup>33</sup> j'Lacti guroob najc yäl'nasa'c xten xcäl'najn, xcäl'rabee xten Dios! Nicla tej bejn guedxliuj di gacbee guiraa rexcäl'guxhtisni, rudliidiza najn rexrezyujni.

<sup>34</sup> Si'c caj lo guijtz: "¿Chuni'c gacbee xcäriejn Dios? ¿Chuni'cza abaluini? Rutliidi.

<sup>35</sup> O ¿chuni'c badedxgaa te xhi cos lojni, te quixsacnini lojni, ä? Rutliidi."

<sup>36</sup> Sa'csi loj Dios siääd guira'ti, luxh laani bencheeni guira'ti par lagajcza laani. Sug- uiliä'pnu xpala'nni par tejpas. Sugacni si'c.

## 12

### *Yäl'nabajn rliä'p xpala'n Dios*

<sup>1</sup> Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajntu lo Dios te gac guiba'nsa'ctu si'cni rrajz Dios. Dee najc yäl'rajnpac Dios si'c ni nungäj'l gantu Dios.

<sup>2</sup> Na'c rujntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rrajzni guntu, nalajznu xhini'c najc hueen, xhini'c rdxagljaz Dios, xhini'cza najc laapac.

<sup>3</sup> Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni.

<sup>4</sup> Sa'csi sigajc najc tiejxhnu, yu' xhidäl la'ni, luxh tejgareni rujn xtzuun-xtzuunreni, <sup>5</sup> sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

<sup>6</sup> Luxh sa'csi tejganu rajpnu garen-garen dzuun xcuent yäl'rulaslajz ni baniidx Dios loonu, sujiennu rextzuunnu screeza: nani rajc rniä xtidx Jesucrist, suguininiini, si'c ni najc xcäl'rililajzni;

<sup>7</sup> nani rajc racnäjä sa'ni, sugacnäjni; nani rajc ruluii xtidx Dios, suguluiini;

<sup>8</sup> nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

### *Xho nanab guibanu lo xnezyuj Dios*

<sup>9</sup> Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac.

<sup>10</sup> Colchanälajz resa'tu si'c rinälajz bejn rebejztni. Colguiliä'p xpala'nreni.

<sup>11</sup> Colyejn dzunsa'c, na'c cuedxitu. Colyejn xtzuun Jesucrist con guideb xtijptu, guideb xcäriejntu.

<sup>12</sup> Colguibalajz sa'csi ahuililajztu xtiidxni. Colcuedxni lajztu che tedtu trabajw. Colcuedx-colnabtis lo Dios guideb nabajntu.

<sup>13</sup> Colgacnäjä rebejn nani rililajz xtidx Dios; sacru colnii loj ni riädhuiitu.

<sup>14</sup> Colguinii didxsa'c xcuent renani rusacsä la'tu, na'c gudzubdetureni.

<sup>15</sup> Colguibalaznäjä renani rbalajz, colyonnäjä renani roon.

<sup>16</sup> Colyejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najctu benanduxh.

<sup>17</sup> Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn.

<sup>18</sup> Cadrotis sajcnä, dxitis colguibannäjä guiraa rebejn.

<sup>19</sup> Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yäl'guxhtis lojreni, ni'cni caj lo xquijztni scree: "Narä gunä yäl'guxhtis, narä quixä lojreni si'c naj Dad, Dios."

<sup>20</sup> Näjza: "Palga calaan nani rdx'e'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni."

<sup>21</sup> Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

## 13

<sup>1</sup> Guiraatu nanab jiutu xtidx renani rnibee lojtu. Sa'csi xheti te yäl'rnibee nani di Dios nudeed, luxh guiraa reyäl'rnibee ni yu' lo guedxliujre, lagajc Dios gule'ceni.

<sup>2</sup> Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yäl'guxhtis lojreni.

<sup>3</sup> Renani rnibee di guchejb renani riu xtiidxreni, ruchejbreni renani najc bejn guijdx ni di jiu xtiidxreni. Palga di rrajztu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c.

<sup>4</sup> Reguxhtis rujnreni lojtu xtzuun Dios te guiba'nsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najceni nani rujn xtzuun Dios te gunreni yäl'guxhtis, te quixpac renani rujn dojl.

<sup>5</sup> Ni'cni nanab jiutu rextiidxreni, xhet ganaxtis sa'csi rujnreni yäl'guxhtis lojtu, näjza te ga'ptu te xcäriejnsa'c, te xcäriennaya.

<sup>6</sup> Ni'cni colquijx lojreni nani riälj xca'reni sa'csi renani rnibee najc xmos Dios, luxh ni'cpac najc xtzuunreni.

<sup>7</sup> Colgudeed lo guiraa bejn nani riäjł xca'reni. Colquix loj renani nazääbtu; colquix impuest loj ni riäjł xca'ni; colchanälajz renani riäjł chanälajztu; colguiliä'p xpala'n renani riäjł chä'p xpala'reni.

<sup>8</sup> Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejnga abasoob xleii Dios.

<sup>9</sup> Sa'csi lo xleii Dios caj scree: "Na'c guesnäjlü bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu." Luxh palga yu' xhi stee leii rsa'ni con leii ni rni: "Chanälajzlu resa'lu si'c sanälajzlu lagajc luj."

<sup>10</sup> Nani rajp yälsanälajz, dini gun latsiaj lo resa'ni. Ni'cni yälsanälajz rusoob releii ni caj lo xtidx Dios.

<sup>11</sup> Colyejn guiraa redee, sa'csi anajntu xho najc redxej ni nabajntu naj, anajntu alagojl or guibajntu lo bacad sa'csi abidzungajxhru dxej che laanu nen dojl lo dxej che huillilajznu.

<sup>12</sup> Aguxhınduxh, asiädgajxh bianij. Ni'cni cuääz jiennu redzuun guijdx ni rajc lo xcäyj, te jientisnu redzusa'c ni rajc rdxee, lo bianij.

<sup>13</sup> Guibansa'cnu si'c riäjł guibajn rebejn rdxee, na'c guibanu lo yälrä', niclaza lo yälbiej, na'c guidiesnäjnu bejn ni di gac chäällu, na'c ga'pnu rebis, na'c guidxagdiłnu resa'nu, na'c chuguij lajznu xhixten resa'nu.

<sup>14</sup> Ni'cni colca' xcälrbinee Jesucrist te na'c guntu redojl ni rrajz gun tiejxhtu.

## 14

### *Na'c guiniyajtu rebejztu*

<sup>1</sup> Colnii didxdoo lo rebejn nani di gumbesa'c xtidx Dios, na'c tilnäjtüreni.

<sup>2</sup> Sa'csi yu' reni rililajz nani sajc gaurenii guira'ti xhi cos, niluxh nani gajd sutijp lo yälirilajz, ganaxis berduur rajwni.

<sup>3</sup> Nani rajw guira'ti, na'c guidxehnäjni nani di gau guira'ti; luxh nani di gau guira'ti, na'ca guiniyajni nani rajw sa'csi Dios aguleza bejnga.

<sup>4</sup> ÇChuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

<sup>5</sup> Tej bejn naa sajrcu tej dxej lo stee dxej, dxejc ste'ca bejn rchalo guiraa redxej najc tebloj. Xhet najcđi, teja bejn sugunpac lagajc xhigabni.

<sup>6</sup> Nani rapda te dxej, rujnni te guiliä'pni xpala'n Dios, luxh nani di gunni, rliä'pzeni xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzeni xpala'n Dios, rudeedzani xquixtios lo Dios.

<sup>7</sup> Sa'csi nicla teju dinu guibajn xcuentcanu, nicla tejzanu dinu guet xcuentcanu.

<sup>8</sup> Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lałtis najcnu rexpen Dad, Jesucrist.

<sup>9</sup> Ni'cni gujt Jesucrist, ni'cni gubansaczani, te sajc gacni Dad xten rebengut, näjza Dad xten rebejn nani nabajn.

<sup>10</sup> Dxejc luj, çxhicuent cubeelu bejztlu, ä? O çxhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu.

<sup>11</sup> Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios,  
guiraa reben guedxliuj suzuxhijbreni loä,  
luxh guiragajc ro'reni sicäjp narä nacä Dad Dios.

<sup>12</sup> Ni'cni guiraanu, tejanu sudeednu cuent loj Dios xcuent nani biennu.

### *Na'c guzällu bejztlu*

<sup>13</sup> Ni'cni na'cru cubeenu sa'nu. Maazru hueen jiennu xhigab nen lastoonu xhetliidi jiennu ni gun jiajb resa'nu lo dojl.

<sup>14</sup> Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen.

<sup>15</sup> Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni.

<sup>16</sup> Ni'cni na'c gusaanlu guiniyajreni nani najc te cos hueen par luj.

<sup>17</sup> Sa'csi xcälrbinee Dios dini gac xcuent yälrajw, niclaza xcuent yälrä'; xcälrbinee Dios najc xcuent te yäl'nabannya nez loj Dios, näjza yälrbexilajz con yälrbalajz xcuent Sprit Dxan xten Dios.

<sup>18</sup> Sa'csi nani rujn si'c lo xtzuun Jesucrist, bejnga rchaglaiz Dios, luxh reben guedxliuj rniiza didxsa'c xcuent sa' bejnga.

<sup>19</sup> Ni'cni chanuutis guidiłnu recos nani rujn chu yälrbexilajz, näjza nani rujn racnäjnu resa'nu te tioobrurenii loj xnezyuj Dios.

<sup>20</sup> Na'c guntu nit xtzuum Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu nen dojl, ni'c najc xhet laadi.

<sup>21</sup> Hueen najc na'c gautu baäl, na'cza ya'tu bin, na'cza guntu jiajb sa'lu nen dojl.

<sup>22</sup> Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.

<sup>23</sup> Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent ya'lrililajz, sa'csi xhitis ni di gac xcuent ya'lrililajz, lagajc ni'c najc dojl.

## 15

### *Huinälajz sa'lu*

<sup>1</sup> Nuurnu ni agusutijpnu lo ya'lrililajz nanab gacnäjnu resa'nu nani gajd chalilazsa'c. Di gacdi guiban'tisnu xcuentcanu.

<sup>2</sup> Tejganu nanab chonälaaznu resa'nu lo xcäl'naba'sa'cni te gacnäjnu chalilajzrueni.

<sup>3</sup> Sa'csi nicla Jesucrist dini nibajp xcuentcani, luxh si'cni caj loj xtidx Dios: "Redidxyaj ni guniyajreni lojlu biajbreni yecä."

<sup>4</sup> Guiraa rediidx ni cuaj lo guijtz galooli, cuajreni te guluiireni nuurnu te ga'pnu ya'lsutijp näjza ya'lrustioblajz te gacza guibääznu lo xtidx Dios.

<sup>5</sup> Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu.

<sup>6</sup> Te dxejcti tejtis gac xse'tu guiliä'ptu xpala'n Dios, Xtrad Jesucrist.

### *Gusule' xtidx Dios loj rebenzijt*

<sup>7</sup> Ni'cni col'ca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios.

<sup>8</sup> Sa'csi narä rniä lojtu, biääd Jesucrist te gujcnä si'c te mos loj rexpen Israel te baluiini xcuent didxgului xten Dios te gusojb rediidx nani bia'n Dios loj retoxtadgoldoonu,

<sup>9</sup> näjza par rebenzijt, te guiliä'preni xpala'n Dios sa'csi baluilojni xcäl'rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt,

soläza dij lojlu.

<sup>10</sup> Dxejcti stee lajt rniini:

La'tu benzijt, colguibalanzäj rexpenä rexpejn Israel.

<sup>11</sup> Stee lajt caza:

Guiraaatu, rebenzijt, colguiliä'p xpala'n Dad, suguiliä'pza guirali rebejn xpala'nni.

<sup>12</sup> Stee huält guniiza Isafas scree:

Siricaj te xagdoo toIsai,

näjza te ni chäs te guinibeeni loj rebenzijt,

laani cabäjz rebenzijt.

<sup>13</sup> Naj rniabä lo Dios ni rudeed ya'lrbäzljajz, te laani gacnäj guibalajztu, cuecdxilajztu, sa'csi salilajztu, te tiobru ya'lrbäzljajz ni rajptu sa'csi Sprit Dxaan xten Dios yu' nen lastootu, luxh laani rajpni ya'lrnibee.

<sup>14</sup> Luxh xcuent la'tu rebetzä, anancheä naba'sa'ctu nasin'duxhtu, arajcza rulijdxtu sa'tu,

<sup>15</sup> luxh loj guijtzre bacuaä gai didxnaj xcuent tiop-chon cos, te gusnaä lajztu. Runä si'c xcuent ya'lrulaslajz ni baniidx Dios loä

<sup>16</sup> te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujczeni ben'naya sa'csi rbäjz Sprit Dxaan nen lastooreni.

<sup>17</sup> Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios.

<sup>18</sup> Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni,

<sup>19</sup> con ya'lmilaagwr xten redzunro, resenro, ni gujc con xcäl'rnibee Sprit Dxaan xten Dios. Ni'cni lo guedx Jerusaléni, näjza guideb gabi ro'c, lo guedx Ilirico, guiraa nejzga abasule'ä xtidx Jesucrist.

<sup>20</sup> Si'cza guyu'ä ganduxh gusule'ä xtidx Dios xhet cadre ahuisule'direni xtidx Jesucrist, alga ganax cadre gajdreni gumbee Jesucrist, te na'c gunä dzuun cadre gusloj cayujn ste'ca bejn dzuun.

<sup>21</sup> Te gacni si'cni caj lo guijtz:

Renani rutliidi bij diidx xcuentni, suhuiipacreni lojni,

luxh renani gajdpac diajgreni jiejn xtiidxni, sachecheereni xtiidxni.

*Rujn Pabl xhigab chääni guedx Roma*

<sup>22</sup> Ni'cni balti huält badxojn Dios narä jiidhuiä lojtu.

<sup>23</sup> Luxh naj sa'csi abaluxä xtzunä guideb nezree, näjza sa'csi agujc balti ijz rlazduxhä jiidhuiä lojtu,

<sup>24</sup> Naj che cha'a España siädhuiäpac lojtu. Che tedä, jiidhuiäpac contu te ganid guibalaznää la'tu, dxejcti gacnäjtu narä te cha'a España.

<sup>25</sup> Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c.

<sup>26</sup> Sa'csi rebejn Macedonia näjza reben Acaya rlanjpacreni guxhałreni te coobr loj rebenproob ni yu' lo reni huillilajz xtidx Dios nen guedx Jerusalén.

<sup>27</sup> Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhał xtidx Jesucrist lojreni, naj laaca rujnreni cay-acnäjreni reben Jerusalén con xhixtenreni.

<sup>28</sup> Ni'cni che chasa'nä meel lojreni dxejc tedä lajdxtu, jiidhuiä contu, dxejc cha'a España.

<sup>29</sup> Luxh ananä che jialä lojtu, li guidxa lastoä xcäl'nasa'c xtidx Jesucrist guidzunä lojtu.

<sup>30</sup> Rebetzä, rniabduxhä lojtu xcuent xtidx Dad Jesucrist näjza xcuent xcäl'rinälajz Sprit Dxdan xten Dios, colguidxagsa'tu, te colgacnäj colcuedx-guiniabtu lo Dios xcuentä.

<sup>31</sup> Colnab lo Dios te gušlaani narä loj reben Judea nani di gusoob xtiidxni te saru gun rebenxdan ni yu' Jerusalén te xca'reni ni chanää lojreni.

<sup>32</sup> Te cabaa lazä guidzunä lojtu, sa'csi rlanjpac Dios jialä lojtu, te lałni yu'ä lojtu siälyuä, susilazäza con la'tu.

<sup>33</sup> Dios ni rbecdxilajz bejn gacnäj guiraatu. Sugacni si'c.

**16***Ruxhalni xtixtios lojreni*

<sup>1</sup> Colgacnäj bisiajnno Febe. Nane're bejn dzunduxh nen guidoo ni tre' Cencrea.

<sup>2</sup> Colca'ni xcuent Dad, Jesucrist, si'cni riäjł gun bejn gacnäj renani rililajzpac xtidx Dios. Colyacnäjni lo xhitis nani guiquinni, sa'csi laani gucnäduxhni xhidal rebejn, nägajcza narä gucnäjni.

<sup>3</sup> Ruxhalä xtixtios lo Priscila näjza lo Aquila, ni racnäj narä lo xtzuun Jesucrist.

<sup>4</sup> Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzajt.

<sup>5</sup> Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduxhä, ni gujc beņganid ni huillilajz xtidx Jesucrist nen guedx Acaya.

<sup>6</sup> Ruxhalä xtixtios lo Marii nani benduxh dzuun lojtu.

<sup>7</sup> Ruxhalä xtixtios loj reben ladxä ni laa Andrónico näjza Junias; laareni guyunäj narä nen latzguiib, najcreni beņro loj reapost. Ganid laareni huillilajz xtidx Jesucrist, dxejcti huillilazä.

<sup>8</sup> Ruxhalä xtixtios loj Amplias, ni sanälazä xcuent Jesucrist.

<sup>9</sup> Ruxhalä xtixtios loj Urbano, ni runnäj nuurnu xtzuun Jesucrist. Ruxhaläza xtixtios loj Estaquis, ni sanälazä.

<sup>10</sup> Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo.

<sup>11</sup> Ruxhaläza xtixtios lo Herodiön beņ ladxä, näjza loj resa' Narciso nani ahuillilajz xtidx Jesucrist.

<sup>12</sup> Ruxhaläza xtixtios loj nan Trifena näjza nan Trifosa, guiro'preni cayujn xtzuun Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist.

<sup>13</sup> Ruxhaläza xtixtios lo Rufo nani agule Dios, näjza lo xnanni, sa'csi gujcti si'c xnanäza.

<sup>14</sup> Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni.

<sup>15</sup> Ruxhaläza xtixtios loj Filólogo, näjza lo Julia, näjza lo Nereo con bisiajnno, näjza lo Olimpas näjza guiraa rexpejn Dios nani yunäjreni ro'c.

<sup>16</sup> Colye'tz xchan loj resa'tu. Guiraa rexquidoo Jesucrist ruxhał xtixtios lojtu.

<sup>17</sup> Rebetzä, rniabduxhä lojtu ga'ptu cuidaad xcuent renani rujn bieje te guilia' sa' bejn, nani rlanj guntu guiraloj nani najc garenca loj yäl'ruluii ni bisieedtu, colguibicaj lojreni,

<sup>18</sup> sa'csi sa' rebejnğa direni gun xtzuun Jesucrist. Laareni rlanjtisreni gunreni si'c rlanj tiejxhreni; rniireni didxdo, diidx ni rgudxguel diajg bejn te rusgueereni lastoo rebejn nani di susin.

<sup>19</sup> Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasinduxh xcuent recoshueen, luxh si'c báz xhet ganditu xcuent recos-gujdx.



<sup>20</sup> Luxh Dios nani ruscuecdxilajz bejn siojb guta'cwni beṅdxab xhan ni'tu. Gacnäj Dad Jesucrist la'tu.

<sup>21</sup> Timoteu nani racnäj narä lo dzuun, ruxhaḷ xtixtios lojtu. Lucio, Jasón, näjza Sosípater, beṅ ladxä, ruxhaḷza xtixtios lojtu.

<sup>22</sup> Najrä Tercio, ni cagucuaä guijtzre xcuent Pabl, ruxhaḷäza xtixtios lojtu xcuent Jesucrist.

<sup>23</sup> Ruxhaḷza Gayo xtixtios lojtu. Rbääznu rolijzni, luxh rudeedzani rolijzni guidxagsa' rebeṅ guidoo. Ruxhaḷza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

<sup>24</sup> Gacnäj Dad Jesucrist la'tu. Sugacni si'c.

*Rediidx lult xten Pabl*

<sup>25</sup> Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rehxigab ni naga'tz galooli,

<sup>26</sup> naj abaluiloj rediidxga lojtu; näjza xcuent ni bacuaa reprofet galooli; si'c najc diidx ni bia'n Gueb Dios ni nabajṅ par tejpas loj rexpejṅni, agusule'ni loj guiraa rebeṅ guedxliuj, te gusoobreni diidx sa'csi rililajzreni xtiidxni,

<sup>27</sup> colguiliä'p xpala'n ni najc tejtis Dios ni nanduxh. Suguliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

## Guijtz Ganid Ni Bacuaa Pabl Lo Guidoo Xten Guedx Corinto

*Bacuaa Pabl te guijtz lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijtzre lojtu

<sup>2</sup> ni ahuililajz xtidx Dios, ni yu' nen guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu.

<sup>3</sup> Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

*Abaniidx Dios xhidajl dzunsa'c xcuent Jesucrist*

<sup>4</sup> Rudedäts xquixtios lo Dios xcuentu, xcuent yäl'rulasajz xten Dios ni cua'tu xcuent Jesucrist,

<sup>5</sup> te xcuentni acua'zatu guiraa dzunsa'c, te gusule'tu xtiidxni, näjza te gachesa'ctu xtiidxni;

<sup>6</sup> sigajcza con xcäl'nabansa'ctu baluuitu huililajzfactu xtidx Dios xcuent Crist.

<sup>7</sup> Ni'cni xhetliidi cayäädxditu loj redzunsa'c ni runiidx Dios, la'l ni ganduxh yu'tu cabäjztu guibisac Jesucrist lo guedxliuj.

<sup>8</sup> Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu.

<sup>9</sup> Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtuni.

*Rlia' sa'reni nen guidoo*

<sup>10</sup> Rulidxä la'tu, rebetzä, xcuent Xtdad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn.

<sup>11</sup> Sa'csi aguceä xcuenttu, betzä ni huililajz xtidx Dios. Tej resa' Cloé biäds'a'n diidx loä xcuenttu, yu' yäl'rdijl lojtu.

<sup>12</sup> Rlazä guiniä scree lojtu sa'csi yu'reni rnii: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zarenii rnii: "Narä nacä xpejn Crist."

<sup>13</sup> ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä?

<sup>14</sup> Rudedä xquixtios lo Dios dina nutiobnisä nicla tejtutu, xtebtis Crispo näjza Gayo,

<sup>15</sup> te rut naadi con laä batiobnisäreni.

<sup>16</sup> Abanaj lazä batiobnisä resa' Estéfanas. Di lazä guinaj la yu' chu stee bationnisä.

<sup>17</sup> Di Crist nuxhalä narä te gutiobnisä. Baxhaläni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

*Crist najc xcäl'milaagwr näjza xcäl'najn Dios*

<sup>18</sup> Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni rusläa Dios lo dojl najc rediidxga xcäl'milaagwr Dios.

<sup>19</sup> Scree caj loj rexquijtz Dios:

Narä sutzulä yäl'nasiñ xten rebennajn,

sudzucaäza xcäl'nadxällajz, xhigab rebejn ni nadxällazduxh.

<sup>20</sup> ¿Con bejn ni nanduxh? ¿Con bejn ni rucuaa, ni najc mast? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasiñ xten guedxliuj si'c nayällajz nez loj Dios, ä?

<sup>21</sup> Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre, ni'c bichagljaz Dios con yäl'rusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

<sup>22</sup> Rexpejn Israel rlanjzpacreni fireni remilaagwr; rebejn griegw rguuil yäl'nanduxh.

<sup>23</sup> Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalan' bejn, luxh loj rebenzijt xhet sajcdi rediidxre.

<sup>24</sup> Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yäl'milaagwr najczani yäl'nasiñ xten Dios.

<sup>25</sup> Sa'csi xcäl'nayääl xten Dios si'c rchalo rebejn ni'c najc nasinduxhru loj xcäl'nasiñ xten reben guedxliuj; luxh xcäl'rniaj xten Dios sacduxhruni loj guiraa xcäl'nadaan reben guedxliuj.

<sup>26</sup> Colhunii la'tu, betzä ni ahuililajz xtidx Dios, xho gule Dios la'tu, coljejn xhigab guxiitu najctu beñ nasin loj reben guedxliuj, guxiiza rajptu yälrnibee, guxiizatu najctu bejn ni agojl guiga'tu beñsa'c.

<sup>27</sup> Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh.

<sup>28</sup> Agule Dios rebejn ni di guiga' beñro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c.

<sup>29</sup> Te nicla tej bejn digacdi guiliä'p lagajc xpala'nni nez loj Dios.

<sup>30</sup> Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yälnasin xten Dios, te guibañsa'cnu nez loj Dios, te gacnaya lastoonu, näjza te quixni rextoljnu.

<sup>31</sup> Si'c bejn Dios te soob xtiidxni cadro caj scree:

Ni rlanj guinii didxro, suguiliä'pni xpala'n dzuun ni bejn Jesucrist.

## 2

### *Rediidx xcuent Crist ni cuaj lo cruzj*

<sup>1</sup> Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist.

<sup>2</sup> Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj.

<sup>3</sup> Bidzunä lojtu guideb rdxagä, guideb racditä sa'csi cadxebduxhä.

<sup>4</sup> Cheni basule'ä diidx lojtu, dina niniä didxro xten yälnasin xten guedxliuj, alga guniä xtiidx yälnasin xten Sprit Dxan xten Dios näjza xcälrnibee Dios,

<sup>5</sup> te di gac xcälrlilajztu xcuent yälnasin xten guedxliujre, te gac xcälrlilajztu xcuent yälrnibee xten Dios.

### *Rumbee bejn Dios xcuent ni ruluii Sprit Dxan xten Dios*

<sup>6</sup> Rniizanu lo sa'nu ni aguyajl lo xtidx Dios rediidx xten yälnasin xten Dios, per te yälnasin ni di gac xcälnasin di guedxliuj, niclaza xten reni rnibee lo guedxliujre, sa'csi sidzujn dxej sinitlojreni.

<sup>7</sup> Niluxh che rniinu yälnasin xten Dios, rniinu diidx ni rut racbextebdi, xcuent xho gac guidzunnu cadro yu' Dios xhaguibaa. Cheni gajdli gac guedxliuj, rapcheeni yälnasinxhiga'tz xtenni. Baluiinini loonu te guibañnäänuni lo xcälrdimbicha' xtenni.

<sup>8</sup> Nicla tej reni rnibee lo guedxliujre gajd gabee recosre niluxh paru niabeereneni, direni nucuaa lo cruzj Dad Jesucrist nani rajp xcälrdimbichaduxh.

<sup>9</sup> Najcni si'cni caj lo rextidx Dios cadro rni:

Recos ni gajdpac baloj bejn fii,

nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

<sup>10</sup> Niluxh abaluii Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios rachesa'c guiraa rexhigab, näjza recos xhiga'tz xten Dios.

<sup>11</sup> Loj reben guedxliuj ¿chuni'c racbee rexhigab ni rujn bejn? Lagajc sprit xten bejn ni yu' neñni racbee xhi xhigab cayujnni. Sigajcza rut racbeedi rexhigab xten Dios; Sprit Dxantis xten Dios racbeeni.

<sup>12</sup> Luxh nuurnu dinu nica' yälnajn xten guedxliuj, alga cua'nu Sprit Dxan ni siääd lo Dios te gacheenu rexhicos ni abasalajz Dios loonu.

<sup>13</sup> Nuurnu rniizanu xcuent recosga, xhet diidxdi ni ruluii xcälnajn guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios neñ lastooni.

<sup>14</sup> Niluxh reni di chalilajz xtidx Dios, direni gabee rexhigab xten Sprit Dxan xten Dios, sa'csi laareni xhigabyäältis rchaloreni xcälnasin Dios. Di gacdiza gabeereni rexhigabga, sa'csi Sprit Dxan xten Diostis rajc ruluii lo bejn rexhigab xtenni.

<sup>15</sup> Rebejn ni ahuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn ni ahuililajz rutliidi rula'tz direni.

<sup>16</sup> Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluuini Gueb Dios, ä?” Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.

## 3

### *Reni rujn dzuun lo Dios*

<sup>1</sup> Rebetzä, di niajcdi niniä redidxnagajn lojtu si'c ni rniä loj rebejn ni rajp yäl'nasiñ xten Sprit Dxiän xten Dios, basule'ä ganaxtis didx guyasi lojtu, sa'csi najctu beñ guedxliuj o biuxbäz ni guxii racheeni xcuent Crist.

<sup>2</sup> Basule'ä ganax didxguyasi lojtu si'c ruedeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni,

<sup>3</sup> Sa'csi nabansijctu si'c nabajn rebeñ guedxliuj lajtis runembiidtu, rdxechlajzto lo sa'tu, ¿la ditu gacbee nacsijctu si'c beñ guedxliuj, ä? ¿La lajtis nabajntu si'c nabajn rebeñ guedxliuj ni di gumbee xtidx Dios, ä?

<sup>4</sup> Sa'csi cheni rniä tejni: "Narä nacä te xpejn Pabl", dxejcti steeni rniä: "Narä nacä te xpejn Apolos", ¿la xhet cayujnditu sigajctis ni rujn rebejn guedxliuj, ä?

<sup>5</sup> ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huillilajzto, luxh cade tejnu riennu dzuun ni runiidx Dios jiennu.

<sup>6</sup> Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gachesa'ctu xtiidxni.

<sup>7</sup> Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajdireni; Diostis sajc nani rusanij xcäriejn rebejn.

<sup>8</sup> Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejanu dzuun nani riennu.

<sup>9</sup> Nuurnu najcnu si'c remos ni runnäj Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios.

<sup>10</sup> Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejci. Niluxh teja ni chanuu gun dzuun loja, suga'pni cuidaad xho guiliäsni padeerga.

<sup>11</sup> Sa'csi di gacdi gusujreni garenca cimient loj nani najc-xgaa, ni najc Jesucrist.

<sup>12</sup> Naj palga guiliäs bejn te padeer yejc cimientga con oor, con pla't, con guij ni sacduxh, o con baräj, guixhtriuu, o balag biquii,

<sup>13</sup> sidzujn dxej sien xho najc dzuun ni bejn teja bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcni.

<sup>14</sup> Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnga ni riäj l xca'ni sa'csi bejn ni yusa'c.

<sup>15</sup> Niluxh palga chec ni bejn ni yejc cimientga xhet xca' dini, xcäl'nabajntisni di nit, luxh xtzuunni sejc.

<sup>16</sup> ¿La ditu gan la'tu najctu xquidoo Dios, luxh neñ lastootu rbäjz Sprit Dxiän xten Dios, ä?

<sup>17</sup> Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

<sup>18</sup> Nicla tejtü na'c gusgueetu lagajc la'tu. Palga yu' chu rujn xhigab nanduxhni xcuent yäl'nasiñ xten guedxliujre, nanabpac gacni si'c te bejn ni xhet najndi te xca'ni yäl'nasiñ xten Dios te guliipac gacni te bennajn, te beñ nasin.

<sup>19</sup> Sa'csi yäl'nasiñ xten guedxliuj xhet sajdci nez loj Dios. Lo rexquijtz Dios caj scree: "Dios rujn rga' reni rajp yäl'nasiñ xten guedxliuj lagajc xcuent xcäl'rusgueereni ni rujn lagajc xcäl'nadxäl'lajzreni."

<sup>20</sup> Ste'ca lajt caj scree: "Nanchee Dios xho najc xhigab ni rujn rebejn ni rajp xcäl'nasiñ guedxliujre, luxh xhetliidi sajcni nez loj Dios."

<sup>21</sup> Ni'cni na'c guiliä'p bejn xpala'n te bejn guedxliuj. Sa'csi loj tejpgatu abaniidx Dios guira'ti rexhicos najc xtengatu,

<sup>22</sup> palga najcni Pabl, o Apolos, o Pedr, o guedxliuj, o yäl'nabajn, o yäl'gujt, o recos ni yu' naj, o recos ni churu gac, guiraareni najc xtentu.

<sup>23</sup> La'tu najctu xten Crist, luxh Crist najc Xi'n Dios.

## 4

### *Xtzuun reapost*

<sup>1</sup> Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu.

<sup>2</sup> Mbaj pues, te bejn ni cahuii te dzuun nanab gusoobreni diidx, gunreni te dzunsa'c.

<sup>3</sup> Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios.

<sup>4</sup> Entis rbedxi xcärienä, per xhet xcuent ni'cni sajc guiniä xheti xtolä, Dad Jesucrist najc nani rula'tz narä, rhuilojni xho nacä.

<sup>5</sup> Ni'cni la'tu na'c gucuaquijtu bejn che gajd guidzujn dxej; colcuäjz jiääd Jesucrist dxej laani sibääni lo bianij guiralii ni naga'tz lo nacäjy, luxh suluiiojzani xhi xhigab yu' neñ lastoo teja rebejn, dxej lo tejanu sudeed Dios ni nungäjł xca'nu.

<sup>6</sup> Rebetzä, xcäl'nasa'ctu caniä rediidxre lojtu. Caniä xcuent Apolos näjza narä, si'c te yäl'ruliii te fitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtı lo resa'tu, lał ni cabälaztu steeni.

<sup>7</sup> Sa'csi çhuni'c rniı najclu beñsa'cru lo ste'ca bejn?, o çxhini'c rajplu ni di Dios nuniıdx lojlu? Luxh palga cuaxliä'luni, çxhicuent lagajc luj rliä'plu xpala'ntu, lascanu rut baniıdxdi lojlu recos ni rajplu?

<sup>8</sup> Rujntu xhigab rajptu xhidajł cos, naatu najctu ricwduxh, rchalotu najctu reii, dirutu guiquin nuurnu. Malaıı guliı najcpactu reii te näjzanu guinibenäjnu la'tu.

<sup>9</sup> Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangł Dios najcnu si'c reben ni rdedlojtz bejn lojreni.

<sup>10</sup> Nuurnu najcnu beñnayääl xcuent Crist, niluxh la'tu rchalotu racheduxhtu rextıdx Crist. Nuurnu najcnu bejn ni xhet nadıpdı, niluxh la'tu najc beñdanduxh. Rliä'p rebejn xpala'ntu, ni'c rbälazreni nuurnu.

<sup>11</sup> Cadeednu trabajwduxh naj, rliaannu, riojłnu, xho rniäx xhajbnu, rdılnäj rebejn nuurnu, luxh xheti rolıjznu.

<sup>12</sup> Rdxaagnu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsı rebejn nuurnu, rientisnu huant.

<sup>13</sup> Che rniyajreni nuurnu, rulıdxnäänurenı dıdxdo. Rujnreni xhigab najcnu si'c guıjxh xten guedxliujre, ruhııreni loonu si'cni xhet sajcdınu.

<sup>14</sup> Dına gucuaä rediidxre te gusanxtuiyätu. Rucuaä rediidxre te gulıdxätu si'c rexi'nä ni sanälazä.

<sup>15</sup> Palga ga'ptu tzuu mił bejn ni guluiıtu redııdx xten Crist, ruti stee xtadtı; narä gucä xtadtı, ganıd narä basule'ä rextıdx Dios lojtu.

<sup>16</sup> Ni'cni rulıdxä la'tu, colıejn si'cni ruhııtu runä.

<sup>17</sup> Ni'cni baxhalä Timoteu lojtu, najcni si'c xi'nä ni sanälazä, ni rusooob dııdx xcuent Crist. Laani susnajni lajztu xho mood nabañä lo yäl'nabajł xten Jesucrist, sigajcni rluıä neñ regıdoo guıraasi lajt.

<sup>18</sup> Yu'tu ni acayajc gıyalajz, naatu pet dina guıbisacä lojtu.

<sup>19</sup> Cabäzä jiädhuiätu, palga si'c rıajz Dios, dxejç sacbeä çhuni'c najc rebejn ni cayajc gıyalajz, fıä xhipacni rujnreni, xhet xtiıdxıstırenı gacbeä.

<sup>20</sup> Sa'csi xcäl'rnıbee Dios xhet ganaxtıx xcuent dııdx najcni, näjza dzuun ni rujnreni ruluiılo xcäl'rnıbee Sprıt Dxan xten Dios ni rajpreni.

<sup>21</sup> Çxho rıajzzatu guidzunä lojtu, ä? ÇLa sidzunä si'c te dad ni ca' te baar te quinätu o la guidzunä yäl'rinälajz näjza yäl'nadolajz te gulıdxätu, ä?

## 5

*Xho nanab gınnäjtu te bejn ni rujn falt lo sa'ni*

<sup>1</sup> Agucbeä yu' tejtı ni ahuılıııajz xtıdx Dios, cua'ni si'c çhäälni te gunaa ni gujç çhääl xtadni. Dee najc te dolıduxh nani niçla renı di çhalııajz xtıdx Dios direni gun.

<sup>2</sup> Luxh la'tu gujctu gıyalajz lacuaa niac-huin lastootu; te bejn nani bejn dojłga, riäjł ni bääıtıni nez lojtu.

<sup>3</sup> Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dolıduxhğa, sigajc ni niunä parı suga'ä ro'c.

<sup>4</sup> Con laj Dad Jesucrist, che abıdxagsa'tu, luxh alastoä suganäj la'tu, con xcäl'rnıbee Dad Jesucrist,

<sup>5</sup> abenä xhigab gıteednu bejnğa ladznäa beñdxab te ted tiejxhni trabajw, niluxh sprıt xteni laani neñ dxej ni jiädsac Dad Jesucrist lo guedxliujre.

<sup>6</sup> Di gıchaag guiliä'ptu xpala'ntu xcuent dzuun ni rujntu. ÇLa ditı gan te dojł najc si'c tudxe'n cojb ni rusıaj, rusagııjni cojb cadro ru'çhni, ä?

<sup>7</sup> Colgudzucaj cobyujxhğa, te guıbajntı te yäl'nabannayacoob si'c te cobyä, sa'ni racchee yätxtiı ni xheti levaduıur yejçni par lanıj xten pascw. Rajptı yäl'nabannaya sa'csi agıjt Jesucrist sigajç gujt te xile' lo lanıj pascw te badzucajni rextıojłnu.

<sup>8</sup> Si'c nanab jiennu lanıj xten pascw con yätxtiıı ni xheti levaduıur yejçni, nalajznu con yäl'gulııpac neñ lastoonu, xhet yätxtiııdi ni yu' cobyujxhğa yejçni, nalajznu na'c gunlu latsıaj.

<sup>9</sup> Lo stee guıjtz abacuaä lojtu, na'c gıchaagtu reben ni runnäj cosguıjdx bejn ni di gac çhäälreni.

<sup>10</sup> Niluxh xhet caniädi xcuent rebeñ guedxliuj ni rujn cosguijdx con bejn ni di gac chäälni, niclaza xcuentdi rebeñ ni rchaglaztey meel, niclaza rebeñ ni najc gubaan, niclaza rebeñ ni riu rebanäjb. Paru si'c gacni, nanab jiunejztu guedxliujre.

<sup>11</sup> Niluxh narä bacuaä guijtza lojtu te na'c guchagsa'tu te bejn nani rni ahuililajzni xtidx Dios, luxh rujnrni cosguijdx con bejn ni di gac chäälni, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejn te rca'ni xhi xteni. Rniäza lojtu, nicla gaunäjtu sa' bejnga.

<sup>12-13</sup> Sa'csi narä di gacdi gunä yälguxhtis loj rebeñ ni gajd chalilajz xtidx Dios. Gunti Dios yälguxhtis lojreni. La'tu nungäj lojtu yälguxhtis loj rebeñ ni ahuililajz xtidx Dios. Ni'cni colgudzucaj bendojlga lojtu.

## 6

*Na'c chäätu loj rebendojl te gunreni yälguxhtis lojtu*

<sup>1</sup> Palga tejtju ni ahuililajz xtidx Dios rrajz cue'c xquej stee sa'tu, ¿xhicuent chale'ctu xquejni loj rebendojl te gunreni yälguxhtis lojtu? ¿Xhicuent ditu guiniab yälguxhtis loj rebeñ ni ahuililajz xtidx Dios, ä?

<sup>2</sup> ¿La ditu gan, rebeñ ni ahuililajz xtidx Dios sujn yälguxhtis lo rebeñ guedxliuj, ä? Palga la'tu sujntu yälguxhtis lo rebeñ guedxliuj, ¿la di gacdi guntu yälguxhtis lo sa'tu lo recosbáz lacuaa chäätu loj rebendojl te gunreni xcälguxhtisreni lojtu, ä?

<sup>3</sup> ¿La ditu gan sienzanu yälguxhtis lo rexangl Dios, ä? ¿Aticaxh jiennu yälguxhtis loj recos baze' xten sa'nu lo yäl'nabajre!

<sup>4</sup> Palga la'tu cadil'näj sa'tu xcuent recos xten guedxliujre, ¿xho mood chäälu loj rebendojl ni rut najc di loj xquidootu, te naareni lojtu xhini'c guntu, ä?

<sup>5</sup> Rniä rediidxga lojtu te guitujyju. ¿La ruti nicla tej bennasin loj guiraatu ni sajc gun yälguxhtis lo resa'tu, ä?

<sup>6</sup> ¿Xhicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj rexgxtis ni di chalilajz xtidx Dios?

<sup>7</sup> Mbaj naj, guliipacni alabanijtu sa'csi yu' yälrdil'näj sa'tu; colgutijp lajztu rebeñ ni rujn dojl lojtu. Maazru huen colgusaan sucua'reni xhixtentu.

<sup>8</sup> Per dee, alga lagajc la'tu runnijtu loj lagajc resa'tu, luxh rca'tu xhixten lagajc resa'tu.

<sup>9</sup> O ¿la ditu gan reben dojl dipacreni jiu' lo xcäl'rnibee Dios, ä? Na'c gusaantu gusgueereni la'tu; nicla te resa' dee di jiu' lo xcäl'rnibee Dios: guiraa reni richagtoo regunaa; guiraa reni rajn rebanäjb; reni resnäjb bejn ni di gac chäälni; reniguii ni rungunaa; reni najc biräax;

<sup>10</sup> reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcäl'rnibee Dios.

<sup>11</sup> Yu'zatu ni gujc si'c galoo, niluxh naj abasia Dios lastootu, naj anajctu bennaya nez loj Dios sa'csi abiäl'lajz Dios xtojltu xcuent Jesucrist, näjza xcuent Sprit Dxan xteni. La'tu anajctu rexpejni.

*Tiejxhnu najc xquidoo Dios*

<sup>12</sup> Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä.

<sup>13</sup> Guliini najc yälrajw par xque'ni, luxh xque'ni najc par yälrajw, niluxh sidzujn dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu.

<sup>14</sup> Luxh naj lagajc Dios guläs Dad Jesucrist lo rebengut, siliäsani nuurnu con xcäl'rnibeduxhni.

<sup>15</sup> ¿La ditu gan tejtju najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¿Gurniälojlu jiennu si'c!

<sup>16</sup> ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijt Dios caj: "Guiro'preni sajc si'c tejtis bejn."

<sup>17</sup> Niluxh nani ruede lastooni lo Dios anajczani tejtis con laani sa'csi rbäjz Sprit Dxan xten Dios nen lastooni.

<sup>18</sup> Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nen tiejxhni.

<sup>19</sup> O ¿la ditu gacbee tiejxhtu najc xquidoo Sprit Dxan ni abaniidx Dios te cuääzni nen lastoonu, ä? Ni'cni di gacdi guinibeetu lagajc la'tu.

<sup>20</sup> Agudijx Jesucrist xtojlnu con xtiejni ni cruiz, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtnu.

## 7

*Yäl'rulijdx xcuent yäl'ruchnaa*

<sup>1</sup> Naj gudzu 'a diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii.

<sup>2</sup> Niluxh sa'csi yu' xhidajl reni richunäj chutis gunaa, suga'p tejsa reniguii chäälpacni; sigajcza suga'p tejsa regunaa chäälpacni.

<sup>3</sup> Nanab niguii guchaagni chäälni che rlanj chäälni, sigajcza gunaa nanab guchaagni chäälni che ni si'c rlanj chäälni.

<sup>4</sup> Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni.

<sup>5</sup> Na'c gusuni' tejtlo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxabtu chunäjtu ste'ca bejn.

<sup>6</sup> Rniä rediidxre lojtu te ni rlanj guchnaa sajz guchnaani, niluxh dina guiniä lojtu, nanabpac guchnaatu.

<sup>7</sup> Narä rlazä maläii sajz gac guiraa bejn si'c ni nacä. Dios abadeed loj tejsa bejn xho mood guibajjni. Yu'reni sajz guibajñ tej mood, yu'zarenı sajz guibajñ garenca mood.

<sup>8</sup> Loj rebeñ xteb najza loj regunabiıud rniä, hueen najc na'c guchnaareni, gacrenı si'c narä.

<sup>9</sup> Niluxh palga di gacdi cue'cdxi lajzrenı, suguchnaareni. Maazru huen guchnaareni te na'c guntisrenı xhigab rlanjrenı guchaagrenı te niguii o te gunaa.

<sup>10</sup> Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni."

<sup>11</sup> Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nmi chäälni.

<sup>12</sup> Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäznäjni niguii, na'c guro'n niguiigani.

<sup>13</sup> Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjni cuäznäjni gunaaga, na'c guro'n gunaaga chäälni.

<sup>14</sup> Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yäl'ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, huen najc yäl'ruchnaaga nez loj Dios. Palga dini gac si'c, di Dios gunle' rexi'nrenı, per naj abenle' Dios rexi'nrenı.

<sup>15</sup> Palga chääł te gunaa o chääł te niguii ni di chalilajz xtidx Dios luxh rlanjni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuedcxini lajznu.

<sup>16</sup> Sa'csi ¿xho najnlu, gunaa, la suslaa Dios chäällu lo dojl xcuentlu, ä? O ¿xho najnlu, niguii, la suslaa Dios chäällu lo dojl xcuentlu, ä?

<sup>17</sup> Si'ctis ni baniidx Jesucrist lo tejganu, si'ctis ni gule Dios tejganu, si'c suguibajñnu. Si'cza rulidxä gunrenıni nen guiraa reguidoo.

<sup>18</sup> Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni.

<sup>19</sup> Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios.

<sup>20</sup> Tejgani jia'n si'cni najcni cheni gurejdx Diosni.

<sup>21</sup> Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajz gudzu'lu meel lo xlamlu, badzu'zani te gaclu te bejn ni rut rnibeedi.

<sup>22</sup> Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios.

<sup>23</sup> Guzii Cristtu con xtiejnıni, ni'c na'c gusaantu guinibee bejn la'tu te gac guntu xtzun Dios.

<sup>24</sup> Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

<sup>25</sup> Redxa'p ni gajd guchnaa, di Jesucrist ninibee xhini'c nanab gunrenı. Gule Dios narä te gusule'ä xtiidxni. Naj gulidxärenı sa'csi nanä xtidx Dios, luxh racnäzani narä.

<sup>26</sup> Runä xhigab hueen najc palga di reniguii guchnaa sa'csi siääd yäl'naganuduxh lo guedxli-ujre.

<sup>27</sup> ¿La alabachnaalu, ä? Na'c guro'nlu chäällu. ¿La alabaoro'nlu chäällu, ä? Na'c chaxiilu chäällu.

<sup>28</sup> Palga guchnaalu, xhet dojlđi rujnlu. Palga guchnaa te dxa'p, dizani gun dojl. Niluxh renı ruchnaa sidejdrenı trabajw lo yäl'nabajñre. Ni'cni rniä na'c guchnaatu sa'csi di rlazä tedtu trabajw.

<sup>29</sup> Rebetzä, rlazä guiniä lojtu rediidxre: Guxiiru dxej guibajñnu lo guedxliujre, ni'cni reni abachnaa na'c gunreni xhigab xtentis yäl'ruchnaa, te gac gunreni xtuun Dios.

<sup>30</sup> Luxh reni cayoon, nanab gunreni si'cni xhet cayoodireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni;

<sup>31</sup> Näjza reni rujn recos lo guedxliujre, nanab gunreni si'cni dini gunni, sa'csi recos ni rhuinu lo guedxliujre, alacanitlojreni.

<sup>32</sup> Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios.

<sup>33</sup> Renani abachnaa riureni recos guedxliujre te guspaani lajz chäälni,

<sup>34</sup> tiop najc xhigabni xcuent recos nani gunni. Sigajca najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhrenei näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälni.

<sup>35</sup> Rniä rediidxre par xcäl'nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

<sup>36</sup> Palga yu' chu te nigui lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani.

<sup>37</sup> Palga steeni dini gun xhigab si'c nanab gunni, sajc gunni si'ctis ni rlanjzi palga abejnpacni xhigab nen lastooni di xindxa'pni guchnaa, hueenza najc si'c.

<sup>38</sup> Ni'cni nani rudeed xinda'pni guchnaa, hueen rujñni, sigajcza nani dini gudeed xindxa'pni guchnaa, laacaza rujñni.

<sup>39</sup> Te gunaa ni abachnaa, rajpni por guibanñajni chäälni guideb nabajn chäälni. Palga guet chäälni, jianxtebni stehuält, dxejc sajc guchnaani chutis nigui ni rlanjzi, palga najcni tej ni ahuililajz xtidx Dios.

<sup>40</sup> Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxan xten Dios narä.

## 8

### *Yäl'rajw ni ruzujreni lo rebanäjb*

<sup>1</sup> Rniä lojtu xcuent reyäl'rajw ni ruzujreni lo rebanäjb. Guliini guiraanu rajpnu yäl'najn xcuent recosga. Niluxh yäl'najn rujn rajc bejn guyalajz. Luxh yäl'rinälajz sa'ni, ni'c rujn racnäjnu resa'nu.

<sup>2</sup> Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni.

<sup>3</sup> Palga yu' chu sanälajz Dios, Dios anumbee bejnğa.

<sup>4</sup> Ni'cni, xcuent reyäl'rajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios.

<sup>5</sup> Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" näjza xhidajl lam ni rnibee,

<sup>6</sup> per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajñnu. Rajpnu tejtis Dad ni rnibee loonu, ni'c najc Jesucrist. Xcuent xcäl'rnibeeni guchee guiraa recos loj guedxliuj, luxh nuurnu nabajñnu xcuent Jesucrist.

<sup>7</sup> Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajpñreni rebanäjb, luxh rajwzarenı reyäl'rajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhiñza xcäriejnreni.

<sup>8</sup> Xhet xcuent xhi rdaudinu sajc guibansa'cruno lo xnejz Dios. Xhet najcdi palga guidaunu o palga dinu guidaun.

<sup>9</sup> Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios.

<sup>10</sup> Palga te bejn ni gajd chalilazsa'c xtidx Dios fiini cayajwlu reyäl'rajw ni guzuj lo rebanäjb, luxh luj najclu te beñnajn, sa'csi dee gajd gacbesa'c rextidx Dios, ÷la di lajzni gac nadip te näjza laani chatajwni yäl'rajw ni guzuj lo rebanäjb?

<sup>11</sup> Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijnñni, luxh najcni bejtzlu sa'csi näjza par laani gujt Dad Jesucrist lo cruzj.

<sup>12</sup> Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist.

<sup>13</sup> Ni'cni, palga narä runä riabsac betzä lo dojl xcuent ni rauä, hueenru dirunä gauä yäl'rajw ni gun jiajb betzä lo dojl stehuält.

## 9

### *Xhi sajc gun te apost*



<sup>1</sup> ¿La dina gacá te bejn ni rut lojdi yu'á? ¿La xhet apostdi nará? Ni abahuiá lo Dad Jesucrist, abasule'á rextiidxni lojtu, ni'c huililajztu xtiidxni. La'tu najctu xtzuná ni runá lo Dios.

<sup>2</sup> Yu' reni di gumbeeni nará si'c te apost, niluxh la'tu abiembesa'ctu nará sa'csi ahuilila-  
jztu rextidix Jesucrist ni abasule'á lojtu. Ni'c rululioj guliipac nacá te apost.

<sup>3</sup> Diidix ni rniá scree loj reni di chalilajz nacá apost najc scree:

<sup>4</sup> ¿La di riájl xca'á guiraa ni runiidjtu gauá nájza ni runiidjtu yá'á?

<sup>5</sup> ¿La digacdiza gapá te chälá ni ahuililajz xtidix Dios dxejc chanáázani sigajc rujn guiraa reapost, nájza rebetzhuin xten Dad Jesucrist nájza Pedr?

<sup>6</sup> O ¿la xtebtis Bernabé nájza nará di gacdi cuááz jiennu dzuun te guidaunu lał rusule'nu xtidix Dios?

<sup>7</sup> ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, á? O ¿chuni'c rajp gaii dxib, luxh dini yá le'ch ni ruedeedreni, á?

<sup>8</sup> Na'c guntu xhigab lagajc xcuentá caníá rediidxre lojtu, sa'csi náj loj xleii toMoisés caj diidix xcuent recosre.

<sup>9</sup> Loj reguijtz xten xleii toMoisés caj rediidxre: "Na'c gusällu guijxh ro' gon che cayo'tni yejc triuu." ¿La guniitis Dios rediidxre sa'csi riuni regon, á?

<sup>10</sup> ¿Dini gac! Xcäl'nasa'cnu guniini rediidxga, sa'csi bejn ni rujn dzuun lo niaa nájza nani rusia triuu riájl gunlojni xca'ni te yäl'nasa'c ni rajc lo xniaan.

<sup>11</sup> La'tu najctu si'c te yuj cadro gule'cnu binij sa'csi basule'nu rextidix Dios lojtu, ¿la rujntu xhigab dzunro najc gacnájtu nuurnu tudxene', á?

<sup>12</sup> Palga racnájtu ste'ca bejn ni ruluiitu, nungäjlru gacnájtu nuurnu.

Niluxh gajdnu guini si'c lojtu sa'csi di rlanjz dinu guidxoönnu chalilazsa'ctu rextidix Dios, ni'c chotipnu lajznu guiraa retrabajw ni cadeednu.

<sup>13</sup> La'tu najntu reni rujn dzuun neñ guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, nájza laareni rajwreni rebäälga.

<sup>14</sup> Si'cza gunibee Dad Jesucrist loj reni gusule' xtidix Dios, xca'reni xhi gaureni lagajc loj reni rililajz xtiidxni.

<sup>15</sup> Niluxh gajdpacna guná si'c, xhetza caca'ádi. Dizana gucuuá rediidxre lojtu naj te guniidxtu xhi xca'a. Hueenru guetá te na'c gudzucaj te bejn yäl'rbalajz ni rapá xcuent dzuun ni runá lo Dios.

<sup>16</sup> Nará dina gapá xhicuent guiliá'pá xpala'ná che rusule'á xtidix Dios. Sa'csi si'c nanabpac guná, sa'csi probe'za nará palga dina gusule'á xtidix Dios.

<sup>17</sup> Palga guná dzuunre sa'csi rdxaglazäpac gunáni yu' xhi guniidix Dios loä. Mase runáni con yäl'rigaan, empac Dios agule reni di gusule'á xtiidxni.

<sup>18</sup> ¿Xhini'c najc xcuent ni xca'á, á? Che gusule'á xtidix Dios lo chutis bejn, ligaj gusule'áni, te di gusule'á xtiidxni te guniidix rebejn xhi guniidixreni xcuent xtzuná, mase si'c riájl gunreni.

<sup>19</sup> Rut xmosdi nacá, luxh lagajc nará bená xhigab gacá si'c te mos te guná gaan chalilajz xhidajl bejn xtidix Dios.

<sup>20</sup> Cheni yu'á loj rexpejn Israel, runá si'cni rujnreni te guná gaan chalilajzreni rextidix Dios. Che rlanjza guiniá loj reni nabajn loj xleii toMoisés, dxejc runá si'c rujnreni te guná gaan chalilajzreni rextidix Dios, niluxh diruna guibaná lo leiiiga.

<sup>21</sup> Stee lajt cadro rlanjza guná gaan reni di guibajn lo xleii toMoisés, runá si'c rujnzareni, mase empac nabaná lo xleii Dios sa'csi rusobá diidxni basa'n Crist.

<sup>22</sup> Cheni yu'á loj reni guxii rililajz xtidix Dios, racáza si'c ni najcreni te guná gaan chalilazsa'creni. Nará runá sigajc rujnreni, te si'c guná gaan chalilajz xhidajlreni xtidix Dios.

<sup>23</sup> Runá guira'ti xcuent xtidix Dios ni rusläa bejn lo dojl, te xca'zanu, nará nájza rebejn ni ahuililajz xtidix, yäl'nabajn par tejpas.

<sup>24</sup> Anajntu che ru' te lanj, che ruxuñ reniguii, guiraareni ruxuñ, niluxh tejtis ni rca' ni ruzalajzreni. Colguxunza nez lo Dios te gunzatu gaan.

<sup>25</sup> Guiraa reni rlanj guxuñ rapdareni tiejxhrene te ga'p tiejxhrene yäl'nadip, yäl'nadaan. Luxh laareni ruxuñreni si'c te gunreni gaan te cos ni di gaclaa agunitlojni. Niluxh nuurnu ruxuñnu te guniidix Dios loonu nani dipac nitloj.

<sup>26</sup> Nará dina guxuñ si'cni dina ganá caro cha'á, dizana gucuuá si'c te bejn ni rucuanáj te balaa, o cayäáztisni lo bej.

<sup>27</sup> Niluxh nará runá rajc tiexhä si'c xmosá te na'c gunni si'ctis ni rlanjz, te gunni nani rlanjz Dios te di cheni abasule'á xtidix Dios loj xhidajl bejn, gusanxtujy tiexhä nará.

## 10

<sup>1</sup> Rebetzá, di rlazá jiállajztu ni gusajc retoxtagoldoonu. Gusajreni xpalaa te za gudejdzareni galáii nisdoo ni laa Nisdó Xniáa.

<sup>2</sup> Gudejdreni xpalaa te za nájza gudejdreni galáii nisdoo; ni'c najc si'c te yálrobnis sa'csi sanajlreni toMoisés.

<sup>3</sup> Sigajcza guiraareni gudajw tejtis yálrájw ni baxhał Dios xhaguibaali.

<sup>4</sup> Guiraazareni gu' nis ni badeed Dios, Dios bejn birii nisga cuá' te guilaj. Luxh Xpřit Crist gusanajreni cadrotis sääreni nez lo reyubidzroga. Luxh con xcálrnibeeni birii nis loj guilajga, Crist najc si'c guilaj ni huinäreni.

<sup>5</sup> Dios bidxechnáj xhidajlreni, ni'c xhidajlreni gujt nez lo reyubidzga.

<sup>6</sup> Guiraa rediidxga najc te yárlulijdx loonu, te na'c guichaglaznu jiennu lagajc redojl ni bejn retoxtagoldoonu.

<sup>7</sup> Na'cza gantu rebanájb si'c ni bejn baltireni; acaj lo rexquijt Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisurenı te gusloj caguijtreni."

<sup>8</sup> Na'c chunájnu stee bejn di gac chááltu si'c bejnreni, ni'cni gujt galbichon miłreni tejtis dxej.

<sup>9</sup> Na'cza guche'chnu Dios con rextojłnu si'c bejn balti rebejnğa, ni'cni gujtreni sa'csi gudauya' bálreni.

<sup>10</sup> Na'cza chamojmıtu xcuent ni rujn Dios si'c ni bejn rebejnğa xcuent ni bejn Dios, ni'cni baxhał Dios angl xten yálgujt bagu't xhidajlreni.

<sup>11</sup> Guiraa redee gusajc retoxtagoldoonu te rulijdxni nuurnu, cuajzareni lo guijt te guluii rediidxga nuurnu xho riájl jiennu, nuurnu ni nabajłnu nen redxej naj.

<sup>12</sup> Ni'cni chutis ni rujn xhigab nabańsa'cni nez loj Dios, sudzu'tzni te di jiabsacni.

<sup>13</sup> Xheti te trabajw ni cadejdtu nani gajd ted chutis bejn. Niluxh di Dios cuálaztu, dini gusaan tedrutu dzunduxh nani digacdi guntu huant, suniidx Dios yálnadip yálnadaan lojtu te che tedtu trabajw sidxáltu xho guibicajtu lo dzunduxhga, te gutiplajztu.

<sup>14</sup> Ni'cni rniá lojtu, rebetzá nani sanálazá, colbicaj lo yálrájw xten rebanájb.

<sup>15</sup> Rniá lojtu si'c lo te beń nasin, te beńnajn: colgulatza'c rextidxá don la laaca najczeni.

<sup>16</sup> Che rdaunu xchej xten Dad Jesucrist najcni te seen nabańnáanu Jesucrist. Che rdunnu nen co'p, rnaalajznu gudijx Dad Jesucrist xtiejnıni xcuent xtojłnu lo cruzj. Che rdaunu yátxtiil, sálojni anajcnu tejtis xcuent tiejxhni ni badeedni cuaj lo cruzj xcuentnu.

<sup>17</sup> Sa'csi yu' tejtis yátxtiil, mase najcnu xhidajł, najcnu si'c tejsi tiejxh sa'csi tejsi yátxtiil rdaunu che rauxchejnu xchej xten Dad Jesucrist.

<sup>18</sup> ¡Bahuii xho rujn rexpejn Israel! Rajwreni xpáal reguidxaa ni rıle'czeni lo Dios lo dxan nen guidoo, ni'c najczeni tejsi con guiraa rebejn nani rujn sigajc rujnreni.

<sup>19</sup> ¿Xhixhni'c rlazá guiniá, naj? ¿La caniá yu' xhi sajc gojn nani gule'c bejn lo banájb, á? O ¿la yu' xhi sajc banájbga, á?

<sup>20</sup> Xhet sajcdireni. Nará caniá lojtu dee: Recos nani rbe'c rebenzıjt lo rebanájb, lo rebenđxab cabe'czeni, et lojdi Dios. Luxh nará dina rlazá gactu tejsi con rebejn nani rbe'c lo rebenđxab, te di chachunájzatu rebenđxab.

<sup>21</sup> Sa'csi digacdi yátu co'p ni rusnaj laaznu ni bejn Dad Jesucrist lo cruzj nágajcza co'p nani rudeedreni lo rebenđxab. Digacdi za guidaunu xchej xten Dad Jesucrist nágajcza xchej ni rudeedreni lo rebenđxab.

<sup>22</sup> O ¿la rıajznu guche'chnu Dad Jesucrist, á? ¿Xhixh maazru nadipnu lojni, á? ¡Gurniá lojtu!

### *Colyejn guira'ti te chá'p xpala'n Dios*

<sup>23</sup> Gulıicani, sajc jiennu xhitis ni rıajznu jiennu, niluxh xhet guira'ti ni rıajznu jiennu najc hueen par nuurnu. Guira'ti najc laaca, niluxh yu' reni di gacnáj gustioobnu lo xcálrıilıajz Dios.

<sup>24</sup> Na'c guntu xhigab quıiltıstıu lagajc xcálnasa'ctu; maazru hueen quılzatu xcálnasa'c xpısıntu.

<sup>25</sup> Colıajw xhitis báal ni rdo' lo guıi, na'c guıniabıııdıxtu caro sıáádni te di gacnaj xcáriejntu.

<sup>26</sup> Lo xtıdx Dios caj redııdxre: "Sa'csi guıdeb guedxlııuj nájza guiraa ni tre' lo guedxlııuj najc xten Dios."

<sup>27</sup> Palga jíadgajł te bejn ni di chalııajz xtıdx Dios łuj jíadtaunájłni luxh acuájblu cháálu, hııjza, gudajw xhitis ni cue'cni nez lojlu, na'c guıniabıııdıxlu te di gacnaj xcáriejntu.

<sup>28</sup> Palga yu' chu naa lojlu: "Dee najc báal ni bıle'cnu lo rebanájb", na'c gaulıni, dıdı gunıi gunıjt dade'ga ni gunıi si'c lojlu te di gacnajza xcáriejñ chutis.

<sup>29</sup> Dına guıniá xcáriejntu, dıdı gunıajni xcáriejñ stee dade'ga; mbaj naj, ¿xhicuent riájł gula'tzreni nará sa'csi rajc runá guira'ti porsı racnaj xcáriejñ ste'ca bejn, á?

<sup>30</sup> Palga rıdedá xquıxtıos lo Dios nani runıııdx xhi rauá, ¿xhicuent rııııajreni nará ni rauá, luxh abadedá xquıxtıos lo Dios?

<sup>31</sup> Ni'cni palga gautu, o palga yátu o xhitis ni rujntu, colııujñ guira'ti te chá'p xpala'n Dios.

<sup>32</sup> Na'c guche'chtu nicla rexpejn Israel niclaza rebenzjyt, niclaza rexpejn xquidoo Dios.  
<sup>33</sup> Sigajcza runä narä, runä guira'ti ni ruspaa lajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

## 11

<sup>1</sup> Colyejn si'cni runä narä, sigajcza narä runä si'cni rujn Jesucrist.

*Xho riäjil gun regunaa nen xquidoo Dios*

<sup>2</sup> Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusobtu rediidx sigajcni baluiäreni lojtu.

<sup>3</sup> Narä rlazä gacheepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist.

<sup>4</sup> Chutis te niguii ni yu' xhumbreel yejcnj lałni cabedx-canabni lo Dios o lałni caguluiini xtidx Dios, laani rusanxtujyni yejcnj.

<sup>5</sup> Palga yu' te gunaa ni dini gusaü xpäiini yejcnj che cabedx-canabni loj Dios o che caniini xtidx Dios, rusanxtujyni yejcnj sa'csi najcni sigajc najc te gunaa ni abigaj yejcnj.

<sup>6</sup> Palga di te gunaa gusaü xpäiini yejcnj suguigaj yejcnj. Palga najcni te xtujy guigaj yejcnj, sugusaüni xpäiini yejcnj.

<sup>7</sup> Di guchaag gusaü te niguii yejcnj sa'csi najcni si'c xtuxh Dios, näjza xcäl'rdimbicha' Dios. Niluxh regunaa najc si'c xcäl'rdimbicha' niguii.

<sup>8</sup> Sa'csi di niguii nixixtiej cuä' gunaa; gunaa najc ni birixtiej cuä' niguii.

<sup>9</sup> Xhetza xcuent gunaa di guc-chee niguii; gunaa najc ni guc-chee xcuent niguii.

<sup>10</sup> Ni'cni nanab jäü yejcnj gunaa nen quidoo si'c te seen lo rexangl Dios yu' chu rnibeereni.

<sup>11</sup> Niluxh nez lo Dios nicla niguii niclaza gunaa digacdi guiban xtebrejni.

<sup>12</sup> Sigajc galoo birixtiej gunaa cuä' niguii, sigajcza naj gunaa najc nani ruu bäz; luxh Diostis najc nani runchee guira'ti rebejn.

<sup>13</sup> Colyejn lagajc xhigabtu naj, ĩla laaca najcni cuedx-guiniab te gunaa lo Dios lał ni xhet niäudi yejcnj, ä?

<sup>14</sup> Loj reben guedxliuj guiraa reniguii rgaj yejcnj, sa'csi najcni te xtujy guigaduxh xquidxejcnj.

<sup>15</sup> Niluxh regunaa hueen najc rga' xquidxejcnj te rusäüni yejcnj.

<sup>16</sup> Palga yu' chu tildiidx xcuent rediidx nani canä lojtu, nanab gacheeni si'ctis riennu, si'ctisza rujnreni nen guiraa rexquidoo Dios.

*Xho ruxhinreni xchej Dad Jesucrist*

<sup>17</sup> Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu.

<sup>18</sup> Rnixgaä dee: Abiejn diagä che re'tu lo xquidoo Dios, rliä'tu lo sa'tu rajctu tiop cuaa; luxh riliica lazä rediidxre.

<sup>19</sup> Pet naatu nanab guntu si'c te gacheetu churen'i'c sanälajzpac Dios, churen'i'c sajcrü lo xtzuun Dios.

<sup>20</sup> Ni'cni che rdxagsa'tu, dini gac te cuetu lo xmex xchej Dad Jesucrist,

<sup>21</sup> sa'csi che agule'ceni xchej lo mex, tejga bejn rlazj xcaxgaa xhi gauni, dxejc yu' reni agudxadoo xque'reni, agusojzarenj, lałni yu' stee cuaa bejn calaan, gajdreni gau.

<sup>22</sup> ĩXho mood? ĩLa xheti rolizjtu cadre gac gautu, yätu, ä? O ĩla rbälazlu xquidoo Dios, ni'c rusanxtujylu rebejn ni xhet räjpdi, ä? ĩXhini'c guiniä lojtu naj? ĩLa naatu guiliä'pä xpala'ntu xcuent nani rujntu, ä? ĩGurniälojtu guiliä'pä xpala'ntu!

*Xchej Dad Jesucrist*

(Mt. 26:26-29; Mr. 14:22-25; Lc. 22:14-20)

<sup>23</sup> Baluiloj Dad Jesucrist loä lagajc nani baluiä lojtu xcuent xho bejn ni guxhijn che gudaunäjni rexpejn ni te xchej xten pascw, guxhijn ni gudo'ni. Cua'ni yätxtiil,

<sup>24</sup> dxejc che abadeedni xquixtios lo Dios, gula'ni yätxtiilga, räjpni lojreni: "Colgajw, dee najc tiexhä ni gudedä guet xcuenttu. Scree guntu te gunalajztu narä."

<sup>25</sup> Si'cza bennäjni co'p che gulujx gudajwreni, räjpni lojreni: "Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te gunalajztu narä."

<sup>26</sup> Che gautu yätxtiilga, che yätu nen co'pga, ruluilosactu xhi bejn Jesucrist che gudijxni xcuent rextojlnu lo crujz; si'cza colyujn dxejli ni guibisacni lo guedxliujre.

*Xho riäjil gac xchej Dad Jesucrist*

<sup>27</sup> Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujn ni dojl, najcni si'cni lagajc laani bagu't Jesucrist, baxhe'zani xtieljni.

<sup>28</sup> Niluxh sugula'tz tejgatu lagajc lastooni don la yu' xhi dojl bejnii, dxejcti sajc gauni yätxtiil, yäni co'p xten xchej Dad Jesucrist, sa'csi abaxhobdojlni.

<sup>29</sup> Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnii jiajb xcälnej Dios yejcni.

<sup>30</sup> Ni'cni lacti resa'tu racxhuu, xhet nadaanreni, luxh yu'zareni agujt.

<sup>31</sup> Ni'cni nanab fiinu xho najcnu, guiniabnu lo Dios gudzucajni rextojlnu te didi tednu trabajw.

<sup>32</sup> Niluxh che rdejndu trabajw, rdejnduni te na'c tednu trabajwduxh si'c ted reben guedxliuj che gacreni yälguxhtis xten Dios.

<sup>33</sup> Ni'cni rniä lojtu, rebetzä, che guire'tu te gautu xchej, colcuäjz resa'tu.

<sup>34</sup> Palga yu' chu tejtü ni calaan, sugauni lagajc rolizjni, te di gun Dios yälguxhtis lojtu. Guiraa rexhistee cos, che jialä ro'c fiä don xho gacsacni.

## 12

*Dzuun ni rudeed Sprit Dxan xten Dios lo tejsa ni rililajz*

<sup>1</sup> Rebetzä, rlazä gacheetu xcuent dzuun ni rudeed Sprit Dxan xten Dios lo tejsanu.

<sup>2</sup> La'tu najntu che gajdtu chalilajz xtidx Dios, rajntu chutis banäjb ni di gacbee, ni naatis bejn gantu.

<sup>3</sup> Ni'cni rlazä gacheetu naj, nicla tejtü ni yu' Xsprit Dxan Dios nen lastooni sajc guinii: "Xhet sajcdi Jesucrist." Luxh rut rajcdi rni: "Jesucrist najc Dadbid baxhuaannu", palga di Xsprit Dxan Dios cuääz nen lastooni.

<sup>4</sup> Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga nen lastoo guiragajcnu.

<sup>5</sup> Yu'za balti cuaa dzuun nani riennu, niluxh tejsi najc Xtadbid baxhuaannu.

<sup>6</sup> Yu' xhidajl mood rajc dzuun, niluxh tejsi Dios rujn dzuunga lastoo guiralii bejn.

<sup>7</sup> Tejsa bejn ruluuloj garen-garen xtuun Sprit Dxan xten Dios, niluxh guira'ti redzuunga najc te gacnäjreni guiraanu.

<sup>8</sup> Lo tej bejn rudeed Sprit Dxan yäl'nasiñ, lo steeni rudeed lagajc Sprit Dxanga yäl'najni.

<sup>9</sup> Lagajcza Sprit Dxanga rudeedzani yäl'rililajzro lo tejni, dxejc lo steeni rudeedza lagajc Sprit Dxanga yäl'riabee te ruslajcni yäl'racxhuu.

<sup>10</sup> Loj stee bejn rudeedzani yäl'riabee te gunni milaagwr, loj stee bejn rudeedni yäl'riabee te sajc guinixgaani xcuent recos ni churu gac; lo steeni rudeedni yäl'nasiñ te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl'racbee te rajc rniini loonu xhini'c gunii bejn ni rni garen-garen redidxsaj.

<sup>11</sup> Niluxh tejsi najc Sprit nani rujn guiraa redzuunre, racnäjni rujn tejsanu xtuunni si'ctis ni rlazjni.

*Guiraanu najcnu te la' tejsi tiejxh*

<sup>12</sup> Sigajc ni najc tiejxhnu tejsi, mase yu' xhidajl la' xtenni, tejsareni te la' tejsi tiejxh, sigajcza najc rebejn nani huililajz xtidx Jesucrist.

<sup>13</sup> Guiraanu, mase najcnu rexejn Israel o ben griegw, mase najcnu mos o mast, gurobisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädäljz nen lastoonu.

<sup>14</sup> Sa'csi tiejxhnu dini gac tejsi la', najcni balti la'.

<sup>15</sup> Paru naa ni'nu: "Sa'csi dina gacä te naa, ni'cni dina gacä te la' tiejxhre." ¿Xhixh porsini'c dini gac tla' tiejxhga, ä? ¡Gurniälojlu!

<sup>16</sup> Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsini'c dini gac tla' tiejxhga, ä? ¡Gurniälojlu!

<sup>17</sup> Palga guideb tiejxhni najc te baloj, ¿xhi cojn niejn diajgni? Palga guideb tiejxhni najc te diajgni, ¿xhi cojn chuxhi'ni?

<sup>18</sup> Mbaj naj, ni'c basoob Dios guiraa rela' te guc-chee tiejxhnu si'ctis ni rlazjni gacni.

<sup>19</sup> Paru najc guidebni si'c tejtis la'ni, ¿xho najcpcacni te tiejxhni dxejc?

<sup>20</sup> Niluxh naj ensilaani yu' xhidajl la' te najcni tejsi tiejxhni.

<sup>21</sup> Te balojnu di gac gäbni lo naanu: "Dina guiquinälu", niclaza bitiuwejni di gac gäbni lo ni'ni: "Dina guiquinälu."

<sup>22</sup> Chucala lapacreni rquiinru nani ruzeñ lascanu xhet sajcdireni.

<sup>23</sup> Luxh retla'ga nani rchalonu guxii sajcreni, reni'c maazru saj. Luxh reni rtuinaänu, niguii sigajc gunaa, reni'c riapdarunu.

<sup>24</sup> Biätla sgaai la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru saj.

<sup>25</sup> Bejnii si'c te di chu yäl'rdijl lo retla' tiejxhnu, te guiraa retla'ga gacnäj sa'reni.

<sup>26</sup> Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

<sup>27</sup> Ni'cni guiraanu najcnu si'c tiejxh Jesucrist. Tejganu najc te la' tiejxhni.

<sup>28</sup> Luxh abadeed Dios yälrnibee lo tejganu lo xquidooni te gunnu xtzuum-xtzuumni. Ganidtoo guleni reapost; ni röjgga guleni rebejn ni rniü xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc beñracxhuu, reni racnäj, reni rniü garen-garen redidxsaj.

<sup>29</sup> Et guiraadi rexepejn Jesucrist najc apost. Et guiraadizareni rniüreni xtidx Dios. Et guiraadireni rajc ruseed. Et guiraadizareni rajc rujn remilagwr.

<sup>30</sup> Et guiraadireni rajc rusiajc rebenracxhuu. Etza guiraadireni rajc rniü garen-garen didxsaj, et guiraadireni rajc rniü xhi säloj redidxsajga.

<sup>31</sup> Nanab guideb lastootu rlaiztu guniidx Dios reyälrnibee ni najc maazru hueen lojtu. Niluxh narä gulüä lojtu te nezyuj ni najc hueenru loj guiraareni.

## 13

### *Yälsanälajz*

<sup>1</sup> Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejts xtidxä si'c te tamboor o te platiü.

<sup>2</sup> Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiraliü yäl'nasiñ xten guedxliujre, palga rapä yäl'rilitazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi.

<sup>3</sup> Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

<sup>4</sup> Rebejn ni rajp yälsanälajz cabäjzreni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz.

<sup>5</sup> Direni gun recos ni di guchaag, dini quüil xcäl'nasa'ctisni, dini guidxe'ch, dini jiu redojl ni rujn bejn lojni.

<sup>6</sup> Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn.

<sup>7</sup> Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejndi xhitis trabajw.

<sup>8</sup> Yälsanälajz dipacni nitloj. ¿La rniüreni xtidx Dios xcuent recos ni churu gac, ä? Sidzujn dxej sibäjz rediüdxga. ¿La rajc rniü bejn garen-garen redidxsaj, ä? Sidzujn dxej siacdx redidxsajga. ¿La yu' yäl'najn? Sidzujn dxej sinitlojpacni.

<sup>9</sup> Sa'csi naj guxilii racbeenu, guxilii xtidx Dios xcuent recos ni churu gac rajc rniüni,

<sup>10</sup> niluxh che jiädsac Jesucrist ni rajp guiraliü yäl'najn, sinitloj xcäl'nandxucnu.

<sup>11</sup> Che gucä biuux, guniä si'c biuux, benäza xhigab si'c biuux, niluxh che bidzunä lo yäl'bengol, gunitloj rexhigab biuux ni benä galoo.

<sup>12</sup> Sa'csi naj rhuiüni si'c loj te guihuajn ni nacäy, luxh che guibannänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiüni. Naj racbeenu re'cti rec, niluxh dxejc sacbesa'cnu si'cpacni numbee Dios nuure.

<sup>13</sup> Niluxh naj ria'ni yäl'rilitajz näjza yäl'rbälajz, näjza yälsanälajz. Lo guidxon redee, sajcru yäl'rinälajz.

## 14

### *Renani rniü rediüdx*

<sup>1</sup> Ganidtoo colquüil yäl'rinälajz, colnabza lo Dios te guniidxruni xhi stee dzuun, niluxh coljejnru te xca'tu yäl'rnibesa'c te gusule'tu xtidx Dios.

<sup>2</sup> Che rniü te bejn garenca diüdx ni di rebejn gacbee, rniüni lo Diostis, et lojdi rebejn, sa'csi rut racbeedi xtiüdxni, mase canüni cosro, cosxhiga'tz nani rulüi Sprit Dxan xten Dios guiniüni.

<sup>3</sup> Niluxh bejn ni rusule' xtidx Dios, rustioobni xcäl'rilitajz bejn ni rulijdxni, ruspaani lajz nani rac-huin lajzni.

<sup>4</sup> Che rniü te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustioobni lastoo guiraa rebeñguidoo.

<sup>5</sup> Narä rlazä maläiü rajc rniü guiraatu garen-garen diüdx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rniü garenca diüdx palga di gacdi gusule'ni lo rebejn xhini'c canüni.

<sup>6</sup> Mbaj naj betzä, che jiälä lojtu, palga guiniä garenca diüdx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'rulüi.

<sup>7</sup> Ni ruhuiinu xho najcza reinstrument ni roĴ bejn si'c te bizej, o te harp; palga di bejn golsa'creni, Ĵxho jiennu gacheenu xhi dij cayolreni, ä?

<sup>8</sup> Sigajcza lo guerr, palga direni goĴ cornet dippac, Ĵxho gacheereni agojĴ chatijĴreni, ä?

<sup>9</sup> Sigajcza la'tu, palga ditu guinisa'c didxsaj nani racbee bejn, Ĵxho gunreni gacheereni xhini'c caniiĴu, ä? Xlia'si guiniĴu, lo bejtis sää xtiidxĴu.

<sup>10</sup> Yu' xhidalduxh didxsaj lo guedxliuj, luxh xheti tejni nani xheti xnejzni.

<sup>11</sup> Niluxh palga dina gacheä didxsaj ni rniireni loä, nacä si'c te beñzajt loj nani canii loä, sigajcza sajĴ nani caninäj narä.

<sup>12</sup> Ni'cni la'tu ni rĴajztu xca'tu yäĴrnibee xten Sprit Dxan te guntu xhi redzuun, colgüejs, colnab lojni xhidajĴ dzuun te gacnäjtü tíoobru xcälĴrililajĴ rexpén guidoo.

<sup>13</sup> Ni'cni palga yu' te bejn ni rniü garenca didxsaj, suguiniabni loj Dios yäĴrnibee te gac gusule'ni diidx ni rniüni lo rebejn.

<sup>14</sup> Palga cuedx-guiniabä lo Dios con te didxsaj ni dina gacheä, lastoätis ni calä'p xpala'n Dios, niluxh xcärienä xhet cayacbeedini.

<sup>15</sup> Ĵxho ricajni dxejĴ? Siniab xspritä näjza xcärienä lo Dios; soĴ xspritä näjza xcärienä dij.

<sup>16</sup> Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajĴ di gacdi gacnäjnĴu guiliä'pni xpala'n Dios, sa'csi dini gachee xhini'c rniĴu.

<sup>17</sup> Hueencaza calä'plu xpala'n Dios, per stee bejnĴa dini tíoob loj yäĴrililajĴ.

<sup>18</sup> Rudedä xquixtios lo Dios maazru rajc rniä garen-garen diidx loj guiragajĴtu.

<sup>19</sup> Niluxh neñ guidoo maazru rĴazä guiniä con xcärienä gaiitis diidx nani gacheetu, nani guluii la'tu, loj tzuu miĴ diidx nani guiniä con xspritä ni ditu gachee.

<sup>20</sup> Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool.

<sup>21</sup> Scree caj lo xleii toMoisés: "Mase guiniä lo rebejn con garenca diidx näjza xtidx beñzajt, nicla si'c direni gucuadiajĴ xtidxä", naj Dad baxhuuannu.

<sup>22</sup> Ni'cni regaren-garen didxsaj najc si'c te seen lo renani gajd chalilajĴ xtidx Dios, et lojdi rebejn ni arililajĴ xtidx Dios. Niluxh yäĴrusule' xtidx Dios xcuent recos ni churu gac, ni'c najc te seen loj renani ahuililajĴ xtidx Dios, xhet lojdi renani gajd chalilajĴ xtidx Dios.

<sup>23</sup> Palga re'tu neñ guidoo dxejĴti caniiĴu garen-garen diidx ni rut racbeedi, dxejĴ guidzujĴ tejn ni di gan xtidx Dios, siniüni guiraatu rajc yejĴtu.

<sup>24</sup> Palga re'tu neñ guidoo, dxejĴti guiraatu cagusule'tu xtidx ni baniidx Dios lojtu, che jiu' tejn ni di gan xtidx Dios, sacbeeni xhini'c caniiĴu, sacbeeni yu' xtojĴni,

<sup>25</sup> sienloj rexhigab xhiga'tz ni yu' neñ lastooni, dxejĴti siabroĴjni suzuxhijbni lo Dios, siniabni lo Dios, siniüzani guliipacni suga' Dios galäiitu.

#### *Colyejn guira'ti xnez-xnejzni*

<sup>26</sup> Ĵxho ricajni naj, betzä? Che guire'tu neñ guidoo suxca' tejgatu tebgaj te salm, te xtidx Dios ni guluiüni, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tíoob xcälĴrililajĴ renani ahuililajĴ xtidx Dios.

<sup>27</sup> Palga yu' renani rniü con garenca diidx, suguiniü tío'p-choñ bejn, niluxh tebgajreni, dxejĴti sugusule' steeni xhi säloj ni rniü tejgarenü.

<sup>28</sup> Palga rut rajcdi gusule' rediidxga, na'c guiniireni con garenca diidx neñ guidoo, suguinixtebreni lo Dios.

<sup>29</sup> Si'cza renani rusule' diidx ni ruded Dios lojreni, suguiniü tío'p-choñ bejn, niluxh tebgajreni, te cuadiajĴ stiop xchonreni donnu la laaca caniiireni.

<sup>30</sup> Palga gululoj Dios te cos loj te bejn ni sobga' cacuadiajĴ, sucuedxisijcni, dxejĴcru suguiniüni.

<sup>31</sup> Sa'csi guiraatu sajĴ gusule'tu tebgajtu didx ni baniidx Dios lojtu te gac guisieedu, te tíoob lastoo guiraatu lo yäĴrililajĴ.

<sup>32</sup> Ruded Sprit Dxan xten Dios yäĴnajn loj reni rusule' diidx ni ruded Dios lojreni te acanajnreni che riäjĴ guiniireni o che riäjĴ cuedxireni,

<sup>33</sup> sa'csi Dios najc te Dios ni rujn guira'ti xnejz-xnejzni, dini gun bieyĴ, niluxh rbecdxini lastoo bejn neñ guiraa reguidoo xten rebejn ni ahuililajĴpac xtiidxni.

<sup>34</sup> Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajĴreni xtidx Dios ni rusule' reniguii lojreni.

<sup>35</sup> Palga rĴajzreni gacheerurenü, suguiniabdiidxreni loj chäälni che guibi'reni rolizreni, sa'csi sianxtujĴ gunaaga palga guiniüni neñ guidoo.

<sup>36</sup> Colgachee et la'ditu guläxtiejĴitu rextidx Dios, luxh etza xtebtis lojtu biäädni.

<sup>37</sup> Palga yu' tejtü ni rchalo rajc rniüni diidx ni ruded Dios lojni, o palga rchaloni abadeed Xpirt Dxan xten Dios te dzunro lojni, sugacheepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni.

<sup>38</sup> Palga yu' chu tejtü ni di chalilajz rapä xcäl̄rnibee Jesucrist, rutza jüdi xtiidxni.

<sup>39</sup> Ni'cni, rebetzä, col̄yejnru te gusule'tu diidx ni runiidx Dios lojtu, na'c gudxojnru renani rniiza garenca didxsaj.

<sup>40</sup> Luxh guira'ti nani rujntu, col̄yensa'cni, xnejz-xnejzni.

## 15

### *Gubañsac Jesucrist lo rebengut*

<sup>1</sup> Naj rniä lojtu betzä, col̄gusnaj lajztu xtidx Dios ni basule'ä lojtu, nani huililajztu, loj nani sutijptu,

<sup>2</sup> näjza col̄gusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

<sup>3</sup> Lojtu ganiddoo basule'ä rediidx ni sajru ni bisiedä, basule'ä xho gujt Jesucrist lo cruzj, bixe' xtiejnri te badzucajni rextojl̄nu, sigajc ni caj lo xtidx Dios gac.

<sup>4</sup> Basule'äza xho bigat'zni, dxejc ni rion̄ dxej guläs Diosni, gubañsacni si'cni caj lo xtidx Dios gacni.

<sup>5</sup> Cheni gubañsacni, baluilojni lo Pedr, dxejctiru loj guitzubito'p rexpejn̄pacni,

<sup>6</sup> dxejcti baluilojni lo gabixh gani gayuu bejn ni tre' tejsi lajt. Xhidaj̄reni nabansijc, niluxh yu'za reni agujt.

<sup>7</sup> Dxejcti baluilojni lo Jacoob, dxejctiru loj guiraa reapost.

<sup>8</sup> Dxejcti lultpac baluilojzani loä, luxh alagudejd ruluilojni lo rexpejn̄ni dxejc.

<sup>9</sup> Narä guxiiru sacä loj guiraa reapost, niclaza nungäj̄l cuäl̄ajreni narä apost sa'csi basacsä rexpejn̄ xquidoo Dios.

<sup>10</sup> Balaslazduxh Dios narä, ni'c narä nacä si'c ni nacä naj. Luxh et xlia'di balaslazjni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl̄rulaslazj Dios cayacnäj narä.

<sup>11</sup> ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

### *Xho guibañsac rebengut*

<sup>12</sup> Mbaj naj, palga nuurnu cagusule'nu diidx xcuent ni gubañsac Crist loj rebengut, ¿xhicuent yu'tu ni rni, xheti yäl̄rbansac loj rebengut?

<sup>13</sup> Palga xheti yäl̄rbansac lo rebengut, dxejc nicla Crist di nibansac lo rebengut.

<sup>14</sup> Luxh palga di Crist nibansac loj rebengut, ¡xlia'si najc diidx nani basule'nu! ¡Xlia'siza najc xcäl̄rililajztu!

<sup>15</sup> Luxh et ni'ctis. Biga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibañsac loj rebengut.

<sup>16</sup> Niluxh palga di rebengut chäs, niclaza Crist di nibansa'c lo rebengut.

<sup>17</sup> Luxh palga di Jesucrist nibansac loj rebengut, xhet sajcdi xcäl̄rililajztu, sanuutistu loj xtojltu.

<sup>18</sup> Sigajcza agunijt rebengut nani huililajz xtidx Jesucrist.

<sup>19</sup> Palga naj ni nabajt̄nisnu loj guedxliujre cabäaznu Jesucrist, lo guiraa reben̄ guedxliuj nuurnu najcnu rebejn̄ ni riäj̄l jiaduxhrej guiraa reni ruhuii loonu.

<sup>20</sup> ¡Per dini gac si'c! Guliipacni gubañsac Jesucrist loj rebengut. Laani guc ganiddoo loj guiraa rebengut ni gubañsac, luxh laani dini niejt̄ par tejjas.

<sup>21</sup> Sigajcni biäd yäl̄gujt loonu xcuent tejtis niguii, sigajcza biäd yäl̄rbansac lo rebengut loonu xcuent tejtis niguii.

<sup>22</sup> Sigajc xcuent te niguii ni laa Adán biäd yäl̄gujt, sigajcza xcuent Jesucrist biäd yäl̄rbansac loj rebengut.

<sup>23</sup> Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejn̄ni che jiädsacni lo guedxliujre, guiraareni suspañsacni.

<sup>24</sup> Che agujc ni'c, dxejcti siäd dxe lult che gudedacni yäl̄rnibee lo Dios Xtadni, che abadzuj̄l̄ni guiraa reyäl̄rnibee, guiraa reyäl̄guxhtis, guiraa reyäl̄milagwr.

<sup>25</sup> Nungäj̄l̄pac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni.

<sup>26</sup> Lult̄ ni rdxe'ch lojni ni gunitlojni najc yäl̄gujt.

<sup>27</sup> Lo xquijtz Dios caj: "Agudixhni guira'ti detz ni'ni te guinibeenireni." Che rniini si'c huenliisi gacbee bejn̄ di gacdi guinibee Jesucrist Dios, sa'csi Dios badeed lojni xhini'c guinibeeni.

<sup>28</sup> Che acanibee Jesucrist guiraali recos, dxejcti sudeedni guideb yäl̄rnibee loj Xtadni Dios, te xtebtis Dios guinibee guira'tipac.

<sup>29</sup> Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

<sup>30</sup> ¿Xhicuentza rdxunnu lo casionduhx guira'ti or?

<sup>31</sup> Rniliápac lojtu, rebetzä, calápä xpala'ntu xcuent Jesucrist Xtdanu ni cayun xtzuunni lojtu. Ni'cni guniä lojtu, guira dxej rguilreni narä te ju'treni narä.

<sup>32</sup> Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijt: "Do'o guidau, do'o guidun, sa'csi guixee empac sejtnu."

<sup>33</sup> Na'c gusaantu gusgueereni la'tu, palga sachaaclu lo benguijdx nájza luj sajclu benguijdx.

<sup>34</sup> Basanij xcáriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guituytu ni'c rniä diidre lojtu.

*Xho guibansac rebengut*

<sup>35</sup> Naj yu' reni rniabdiidx: "¿Xho rbanasac bejn loj rebengut? ¿Xhoza gac tiejxhneni?"

<sup>36</sup> ¡Chip nayäällu! Che rbe'clu te binij, di gäjł guiliejn palga di xhobga guet, nalajznu, palga dini guechduu.

<sup>37</sup> Luxh che rbe'clu, dilu cue'c gäjłga si'cni rłajzlu gacni, alga rbe'clu xhob o triuu o ste'ca binij,

<sup>38</sup> niluxh Dios rujn rłiejnni, rustioobni gäjłga, lo teja gäjł rudeedni xpalajgni o tiejxhni, si'ctis ni rłajzni.

<sup>39</sup> Xhet guiraadi retiejxhneni najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjł.

<sup>40</sup> Sigajcza yu' tiejxh rebäjł xhaguibaa, tiejxh rexten guedxliujre. Niluxh yälrdimbicha' xten rebäjł xhaguibaa najc tej, dxejc yälrdimbicha' guedxliuj najc ste'ca.

<sup>41</sup> Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni.

<sup>42</sup> Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajnni par tejpas.

<sup>43</sup> Che rga'tzni, rujn bejn xhigab xhetru gacnäjdı tiejxhga, niluxh che guibansacni, lacti sacru, lacti sajč tiejxhga. Che rga'tzni, xhetru sajčdı gunni, luxh che guibansacni, anadipduxhni.

<sup>44</sup> Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääđ lo guedxliuj, yu'za te tiejxhni ni siääđ xhaguibaa.

<sup>45</sup> Si'cza caj lo xtidx Dios: "Nigui galooğa ni laa Adán, bejn Dios gujnci te beñ nabajn." Niluxh Adán ni biääđ lult, Jesucrist najc Sprit ni runiidx yäl'nabancıob loonu.

<sup>46</sup> Ganid najc yäl'nabajn xten guedxliujre, dxejctiru yu' te yäl'nabancıob xhaguibaali.

<sup>47</sup> Sigajcza niguii galooğa najc beñ guedxliujre, niluxh ni rojp niguii ni biääđ najc beñ xhaguibaali.

<sup>48</sup> Benchee Dios Adán con yuj, najcni beñ guedxliuj. Xhaguibaali biääđ Jesucrist, najcni beñ xhaguibaa.

<sup>49</sup> Sigajcni najcnu si'c beñ guedxliujre, sigajcza sajcnu sigajc najc bejn ni yu' xhaguibaa.

<sup>50</sup> Naj guiniä rediidxre lojtu betzä, di gac ted tiejxhnu ni najc bääł nájza rejn xhaguibaa cadro yu' Dios. Tiejxhnure nani sinitloj di gacđza xca'ni stee tiejxh ni najc par tejpas.

<sup>51</sup> ¡Colhuii! Rłazäza gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu

<sup>52</sup> tera't bázlule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh nájza tiejxhnu sidxaa.

<sup>53</sup> Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacđı guetni, najcni par tejpas.

<sup>54</sup> Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, nájza che tiejxhnu ni sajč guet abidxaa te ga'pnu tiejxhnu ni di gacđı guet, ni najc par tejpas, dxejc sisiojb xtidx Dios ni caj scree: "Yälgujt agunitloj sa'csi bejn Jesucrist gaan lojni.

<sup>55</sup> Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?"

<sup>56</sup> Xcäl'nayan xten yälgujt naj dojl. Xcäl'rnibee dojl najc leiı.

<sup>57</sup> Niluxh rdeednu xquixtios lo Dios, nani runiidx te yäl'rnibee loonu te jiennu gaan lo yälgujt xcuent Dad Jesucrist.

<sup>58</sup> Ni'cni rebetzä ni sanälazduxhä, colčhanuutis, colčsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'dı najc dzuun ni runiidx Dios riennu.



## 16

*Meel ni guire' par rexpejn Dios*

<sup>1</sup> Xcuent meel nani guire' par rebejtznu, colyejnii sigajcni räpä gun rebejn rexquidoo Galacia.

<sup>2</sup> Casob dumingw, nalajznu ganid dxej xmaan, tejgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jiälä.

<sup>3</sup> Te che guidzunä, guxhalä meelga, näjza tiop-chojn guiijt chanä chutis bejn ni cuetu chasa'nni guedx Jerusalén.

<sup>4</sup> Palga laaca cha'aza, sajca chänäreni narä.

*Xhigab ni bejn Pabl chääni biaj*

<sup>5</sup> Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c.

<sup>6</sup> Dxejti pet siannää la'tu, pet saclää, sidedä guiraa rebäi najl ro'c, te gacnäjtu narä che cha'a cadrotis cha'a.

<sup>7</sup> Sa'csi di rlazä jädhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c.

<sup>8</sup> Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxaan xten Dios.

<sup>9</sup> Sa'csi ro'c yu' xhidajl bejn nani rlazj guisieed xtidx Dios, niluxh ro'c yu'za xhidajl reni rdxe'ch loä.

<sup>10</sup> Palga guidzujn Timoteu lojtu, saru colhuiini, te na'c chuni yärsia' laj ni yunäjni la'tu, sa'csi cayujnii xtzuum Dios sigajc runä narä.

<sup>11</sup> Na'c gusaantu chu tej ni cuälazni, colcuedcxi lajzni, dxejcolgusunejzni, te jädhuiini narä ree, sa'csi ree cabääznu laani con rebejtznu.

<sup>12</sup> Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlazjpacni niäädni naj. Per siäädcani dxejtis ni gac jiädni.

*Rextxtios lult ni ruxhaläni*

<sup>13</sup> Colgsusin, colgsudzu'tz lo yälirililajz xten Dios, colyejn dzuun si'c niguii, colyajc bejndaan.

<sup>14</sup> Xhitis ni rujntu colyejnii con yälrinälajz.

<sup>15</sup> La'tu rebetzä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduxhrenei rebejtznu nani huililajz xtidx Dios ro'c. Naj rniabduxhä lojtu,

<sup>16</sup> Colgusoob xtidx rebejnnga, näjza xtidx guiraa rebejn ni racnäj rexpejn Dios, ni rujnza xtzuum Dios.

<sup>17</sup> Rbalazä bidzujn Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu.

<sup>18</sup> Gulecdxireni lazä näjza lajztu, ni'cni, jcoljiu sa' rebejnnga!

<sup>19</sup> Rebejn xquidoo Dios nez reguedx Asia ruxhalä xtixtios lojtu. Aquila näjza chäälni Priscila näjza rebejn ni re' rolijzreni ruxhaläzarenii xtixtios lojtu.

<sup>20</sup> Guiraa rebejtznu ruxhalä xtixtios lojtu. Colguinii tejgatu lo sa'tu: "Xchan, gacnäj Dios la'tu."

<sup>21</sup> Narä Pabl, ruxhalä xtixtios lojtu, lagajc narä benä reletrre.

<sup>22</sup> Palga yu' chu tejtü ni di chanälajz Dad Jesucrist, sunitlojni. ¡Dad Jesucrist, gudaa!

<sup>23</sup> Gacnäj xcäljulaslajz Jesucrist guiraatu.

<sup>24</sup> Yälrinälajz ni rapä xcuent Jesucrist suchunäjni la'tu. Sugacni si'c.

## Stee Guijtz Ni Bacuaa Pabl Lo Guidoo Xten Guedx Corinto

*Ni rojp guijtz ni bacuaa Pabl lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi si'c rlanj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijszre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya.

<sup>2</sup> Rniabnu lo Dios ni najc Xtdnu näjza lo Dad Jesucrist, gacnäjreni la'tu, guscuedxireni lajztu.

*Trabajw ni gudejd Pabl*

<sup>3</sup> Guiliä 'pnu xpala'n Dios Xtd Jesucrist, nani rulaslajz nuurnu, nani rustoolajz nuunu.

<sup>4</sup> Che rdejndu trabajw, rbedcxini laaznu te rajcza rbedcxinu lajz renani cadejd trabajw con lagajc yäl'rbedcxilajz ni baniidx Dios loonu.

<sup>5</sup> Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbedcxiduxh Jesucrist laaznu.

<sup>6</sup> Palga rdeednu trabajw, najcni te gustolajz la'tu, te laatu lo dojl. Palga ruscuedcxni Dios lajznu, si'c rujnni te cuedxilajz te guntu huant che tedtu lagajc trabajw ni cadejdzanu.

<sup>7</sup> Rinudzu'tz yäl'rnu loj ni rajpnu xcuent la'tu, sa'csi nadonnu palga rdejdtu lagajc trabajw ni cadejndu, suscuedcxni Dios lajztu sigajcni ruscuedcxini laaznu.

<sup>8</sup> Rebetzä, rlazä gacheepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu.

<sup>9</sup> Gulicanu, alabiennu xhigab sejtpacnu. Niluxh dee gusajcnu te bisieednu na'c chaliila-jznu lagajc nuurnu, alga chaliilajznu Dios nani ruspañsac rebengut.

<sup>10</sup> Sa'csi Dios basläa nuure lo yäl'gujtgä, luxh sinuutis gusläani nuurnu lo yäl'gujt. Salilaz-duxhnu Diosre suslaaruni nuurnu,

<sup>11</sup> sa'csi cayacnäjt nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcäl'rulaslajz Dios ni baniidxni loonu.

*Xhicuent di Pabl nij guedx Corinto*

<sup>12</sup> Dee najc nani ruspañ laaznu: rbedxi xcäriejnnu, ni'c rului loonu laaca nabajnnu, con yäl'nadolajz riennu si'cni rnibee Dios; xhet sa'csi rajpnu xcäl'najn reben guedxliujdi, alga sa'csi racnäj Dios nuure. Si'cpac nabajnnu lo guedxliujre, luxh maazru che yu'nu lojtu.

<sup>13</sup> Cacuuanu lojtu rediidx ni sajc goltu, ni sajc gacheetu, luxh cabäzä sacbesa'ctu guiragajc rediidx ni gucuää,

<sup>14</sup> lagajc si'cni agucbeetu mase gäi xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu neñ dxej ni jääd Dad Jesucrist.

<sup>15</sup> Ni'cni ganiddoo benä xhigab niädhuiä la'tu te nibalajztu tio'p huält.

<sup>16</sup> Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjt nuurä te nia'a Judea.

<sup>17</sup> Xhaa dina niunsa'cä xhigab che benä xhigabre? La rchalotu runä xhigabä si'c te ben guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä?

<sup>18</sup> Dios guluii lojtu gullica rniä lojtu, dinu guinii tejsi diidx "sia'ä" nägajc "dina cha'a".

<sup>19</sup> Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni".

<sup>20</sup> Si'cza guiraa rediidx ni bia'n Dios loonu xcuent Jesucrist najcreni "sunäpacni"; näjza xcuent laani najcreni "sugacni si'c" par nuurnu, te chä'p xpala'n Dios xcuent nuurnu.

<sup>21</sup> Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni.

<sup>22</sup> Abacuaazani xseenni loonu, ni'cni baniidxni Sprit Dxaan xteni te cuääzni neñ lastoону.

<sup>23</sup> Rbedxä loj Dios gacheeni xhi yu' lastoä, guliipacni te diruna gutalä xcäl'najtu, ni'c dina niälsacä guedx Corinto.

<sup>24</sup> Di rlanjznu guinibeenu xho chalilajztu, alga rlanjznu gacnäanutu lo dzuun te guibaa lajztu; guliipac agusudzu'tztu lo xcäl'rililajztu.

## 2

<sup>1</sup> Niluxh lagajc xcuent xcäl'nasa'cä benä xhigab dina jädhuisacä la'tu che cayac-huin lazä.  
<sup>2</sup> Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni.

<sup>3</sup> Ni'cni lagajc xcuent ni'c bacuaä lojtu, te che jialä lojtu, di rebejn gunhuin lazä nani riälj guspaa lazä. Luxh nancheä palga narä guibaa lazä, nägajc la'tu sibaaza lajztu.

<sup>4</sup> Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yäl'sanälazduxh ni sanälazä la'tu.

*Yäl'rusiälj lajz ni yu' par nani bejn falt*

<sup>5</sup> Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh.

<sup>6</sup> Alabasacsiduxh xhidajl bejn dade'ga, na'cru gusacsituni naj.

<sup>7</sup> Naj colsiälj lajztu xcuent xtojlni, colcuedcxi lajzni didi gac-huinduxhtej lajzni.

<sup>8</sup> Ni'cni rniabä lojtu, colchanälajz bejnre si'c ni huinälajztuni galoo.

<sup>9</sup> Bacuaxgaäza lojtu te gacbeä laa susoobtu xtidxä.

<sup>10</sup> Naj renani jialj lajztu xtojlni, näj narä siälj lazäni. Sigajcza narä, nani basiälj lazä, palga yu' xhi basiälj lazä, benäni xcuent xcäl'nasa'ctu, nez loj Jesucrist,

<sup>11</sup> te di gun bejdxab gaan nuure, sa'csi anajnnu xho najc latsiaj ni rujn bejdxab.

*Guyu' Pabl'yärsia' che bidzujnmi guedx Troas*

<sup>12</sup> Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä,

<sup>13</sup> niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

*Jesucrist rujn riennu gaan*

<sup>14</sup> Xquixtios lo Dios nani con Jesucrist racnäj nuurnu te dipacnu gunij, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejn xtidx Dios.

<sup>15</sup> Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni.

<sup>16</sup> Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yäl'nabañcoob. ¿Chu laa ni racbee sa' recosga?

<sup>17</sup> Sa'csi dinu gac si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäj Jesucrist nez loj Dios ni cahuii xhini'c riennu.

## 3

*Diidx nacoob ni basa'n Dios loonu*

<sup>1</sup> Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rnii najcreni beñsa'c. ¿La rllajzatu guiluiinu lojtu sa' guijtzga, o guiniabnu guntu sa' guijtzga xca'nu, ä?

<sup>2</sup> La'tu najc si'c xquijtznu ni rnii xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu.

<sup>3</sup> Huenliisi rluiloj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajn bacuaa rextidx Diosga, bacuaanireni lastootu.

<sup>4</sup> Nadoncheenu redee, ni'cni xcuent Crist dinu guidxejb nez loj Dios.

<sup>5</sup> Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu.

<sup>6</sup> Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleini biädnä dojl, dxejc gujtnu. Niluxh didxcoobga ni rusule'nu biädnä Sprit Dxan xten Diosni, luxh runiidxni yäl'nabañcoob loonu.

<sup>7</sup> Leii baluii yu' xtojlni bejn, riälj guetreni. Xhidajl seen guyu' che bacuaa Dios rediidxga lo guij. Luxh di niajcdi nuhuii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yäl'rdimbicha'ga.

<sup>8</sup> Palga si'c gujc che biädä leii, aticaxh naj su'ru xcäl'rdimbicha' xleii Sprit Dxan xten Dios, ni najc redidxcoob nani abasule'nu.

<sup>9</sup> Palga xleii toMoisés ni baluiloj yäl'gujt xcuent dojl biädnä yäl'rdimbicha', aticaxh naj yu' xcäl'rdimbicha' xtidxcoob Dios ni rudzucaj dojl.

<sup>10</sup> Naj dirunu fii xcäl'rdimbicha' xleii toMoisés sa'csi xtidxcoob Dios rdimbicha'ru par tejpas.

<sup>11</sup> Palga yälrdimbicha' nani biuii bianisesduxhni tera't, stee yälrdimbicha're ni najc par tejpas sidimbichasesduxhni.

<sup>12</sup> Luxh ni'c runiidx yälrbecdx lajznu, dipacnu guidxejb che rusule'nu xtidxcoob Dios.

<sup>13</sup> Dinu gac si'c toMoisés, ni basäu tla' lajd lojni te di fi rexepejn Israel cayuii yälrdimbicha' ni guyu' lojni.

<sup>14</sup> Niluxh bicäjy xcäriejnreni; lo dxej najli che riel xleii toMoisés, najcni si'cni yu' xhi lajd rusäuu lastooreni, rudxojn gacheereni, te di chalilajzreni, xtidx Jesucristtis rajc rudzucaj lajdga.

<sup>15</sup> Lo dxe najli che roĴreni xleii toMoisés, najcni si'cni ruscäjy te lajd xcäriejnreni.

<sup>16</sup> Lo xtidx Dios rnii scree: "Niluxh che gusiechlajz te bejn, gudzuréni nez loj Dad, sibicaj lajdga", nalajznu sacbeeni xtidx Dios.

<sup>17</sup> Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés.

<sup>18</sup> Niluxh nuure dinu gusäu lajd lojnu, didi guscäjyni xcäriejnnu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxan xtenni.

#### 4

<sup>1</sup> Ni'cni sa'csi agule Dios nuure te gusule'nu xtiidxni, sa'csi balaslajzani nuure, dipacnu jäxhan.

<sup>2</sup> Ni'cni rbälaznu recos ni rajc xhiga'tz, sa'csi rusanxtuyjreni. Dizanu gušguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn rsiaapacnu lo xnezyuj Dios.

<sup>3</sup> Niluxh palga yu' chu dipac gabee rextidx Dios nani rusule'nu, najctisreni rebejn nani ala canitloj par tejpas,

<sup>4</sup> sa'csi abascäjy beñdab ni rnibee guedxliujre xcäriejnreni, si'cni rujni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rnii xcuent xhanij xten Jesucrist, ni najc xtujxh Dios.

<sup>5</sup> Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist.

<sup>6</sup> Che benchee Dios guedxliuj, guniini: "Lo xcäjy sugurii te bajl ni gusanij." Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

*Xho guibanu con yälirililajz*

<sup>7</sup> Nuurnu najcnu si'c te guesyuj, xhet sajcdinu, niluxh guidxanu te yälñasacduxh, ni najc xtidx Dios xcuent Jesucrist, te guiluiloj xcälñasa'c xten xcälrnibee Dios lacuaa xhisi te yälñadipbäz xtenu.

<sup>8</sup> Rdeednu trabajw guira nejz, niluxh dinu gunijt yälrunloj. Mase di jien xho jienu, dinu chu yärsia'.

<sup>9</sup> Rusacsireni nuure, niluxh di Dios cuälaznu, rguijnreni nuure, dizareni ju't nuure.

<sup>10</sup> Cadrotis rionnu rusacsireni nuure si'c basacsireni Jesucrist, te si'c neñ tiejxhnu guluulojzani yälñabansac loj rebengut xten Jesucrist.

<sup>11</sup> Cadrotis rionnu rlanjzreni ju'treni nuure sa'csi rusule'nu xtidx Jesucrist te si'cza neñ tiejxhnu guluulojzani xcälñabajn Jesucrist loj rebeñ guedxliujre.

<sup>12</sup> Ni'cni rujn yälgujt dzuun loonu, per yälñabajn cayujn dzuun lojtu.

<sup>13</sup> Sa'csi rajpnu lagajc xsprit xten yälirililajzga, sigajc ni caj lo xtidx Dios: "Huililazä ni'cni basule'ä diidx." Sigajcza nuure, huililaaznu xtidx Dios, ni'cni rusule'nuni.

<sup>14</sup> Sa'csi nadonnu lagajc nani baspañsac Jesucrist loj rebengut, lagajcza laani gun guibañsacnu con Jesucrist te gunni sunäjnu la'tu nez lojni.

<sup>15</sup> Rsiajcnu guiraa ni rsiajcnu te xcuenti la'tu gudeedru bejn xquixtios lo Dios, te guiliä'pruzareni xpala'nni xcuent yälñulasajz ni sanuutis care'ch lo xhidajl bejn.

<sup>16</sup> Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu.

<sup>17</sup> Retrabajw ni cadeednu lo yälñabajnre rdedgajczeni, niluxh rujnreni ga'pnu te yälrdimbichaduxh ni gajdnu guidon, ni najc par tejpas.

<sup>18</sup> Dinu fiitis renani ruzeñ lo guedxliujre sa'csi sinitloj reni'c, alga cayenloonu renani di guzeñ, sa'csi renani di guzeñ najczeni par tejpas.

#### 5

<sup>1</sup> Arabeenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas.

<sup>2</sup> Guliicani, la<sup>1</sup>ni dxunnu ne<sup>1</sup>n tiejxhre, rbedxne<sup>1</sup>nu rdeednu trabajw, ni'cni rlanjnu maläii agoj<sup>1</sup>l guidxaa tiejxh guedxliujre te xca'nu te tiehxcoob ni siääd xhaguibaa.

<sup>3</sup> Te si'c che acua'nuni, diruni gac si'cni suxhabääl xaimnu, sa'csi abicoob tiehxnu.

<sup>4</sup> La<sup>1</sup>ni dxunnu ne<sup>1</sup>n tiejxhre rbedxne<sup>1</sup>nu, rdeednu trabajw, sa'csi di rlaaznu suxhabääl xaimnu, rlanjznu gacwnu tiehxcoobnu, te tiejxhre nani cayejt, sidebnäjni tiehxcoob ni siääd xhaguibaa.

<sup>5</sup> Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

<sup>6</sup> Ni'cni dinu guidxeeb, sa'csi nadonnu la<sup>1</sup>ni nabaj<sup>1</sup>nu lo guedxliujre, di gacdi guibaj<sup>1</sup>nu xhaguibaa loj Dadga.

<sup>7</sup> Sa'csi nabaj<sup>1</sup>nu xcuent nani rililajznu, xhet xcuentdi nani rajc rhuinu.

<sup>8</sup> Ni'cni rniä nabaj<sup>1</sup>nu dinu guidxeeb, rchaloonu hueenru guisa'nu tiejxhnu lo guedxliujnure, te cholänänu Jesucrist xhaguibaa.

<sup>9</sup> Ni'cni tejtis najc xhigabnu, palga lo guedxliujre o xhaguibaa, rlanjznu jiennu renani gun guibaa lajzni.

<sup>10</sup> Sa'csi guiraanu riäj<sup>1</sup>l suunu nez loj yagxhiil cadro gun Jesucrist yälguxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguidxni.

### *Diidx xcuent yä<sup>1</sup>rbecdx<sup>1</sup> lajzni*

<sup>11</sup> Luxh sa'csi rdxejbnu (nalajznu rucuaadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabaj<sup>1</sup>nu; maläii näjza lo xcäriejntu guluiloj xho nabaj<sup>1</sup>nu.

<sup>12</sup> Dinu guiliä'p lagajc xpala'nu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchaglanjzti ruhuii xho rien bejn, direni gacbee xhi yu' ne<sup>1</sup>n lastooreni.

<sup>13</sup> Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnu, najcnuni par la'tu.

<sup>14</sup> Sa'csi sanälazduxh Jesucrist nuure, ni'c rusobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios.

<sup>15</sup> Luxh Jesucrist gujt xcuent guiraa rebejn, te renani rililajz xtiidxni, na'cru guibaj<sup>1</sup>reni xcuenttis laareni, alga guibaj<sup>1</sup>pacreni xcuenttis Jesucrist nani gujt, nani gubansac xcuent laareni.

<sup>16</sup> Ni'cni nuure dinu fii lo bejn si'cni najcni lo guedxliujre. Galoo biembeenu Jesucrist si'cni gujcti che gubaj<sup>1</sup>ni lo guedxliuj, niluxh naj et si'cti riembeenuni.

<sup>17</sup> Ni'cni chutis bejn, palga rililajzni xtidx Jesucrist, sujnnini te be<sup>1</sup>ncob, diruni guichagljaz gunruni nani rajc lo guedxliuj, alga guichagljazni gunni xtzun Dios.

<sup>18</sup> Guiraa dee siääd lo Dios, nani basiäj<sup>1</sup>l lajzni xcuent Jesucrist, dxejcti baniidxni loonu rediidx xcuent xcäl<sup>1</sup>rusiäj<sup>1</sup>l lajzni te gusule'nu rediidxga,

<sup>19</sup> nalajznu, nanab gusule'nu diidxre: Dios guyunäj Jesucrist, cagusiäj<sup>1</sup>llajzni con reben guedxliuj, te xca'nireni, sa'csi diruni gudzuub xtoj<sup>1</sup>l reni ahuililajz xtiidxni lo xcuentreni. Dxejcti gule Dios nuure te gusule'nu rediidxpacre lo rebejn.

<sup>20</sup> Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäj<sup>1</sup>l lajznu, colyajc tejsi con Dios.

<sup>21</sup> Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujcti Jesucrist si'c te bendoj<sup>1</sup>l che gule'cni guiraa rextoj<sup>1</sup>l guedxliuj yejcti Jesucrist che cuajni lo cruz. Si'c gujcti te sajcti ga'pnu xcäl<sup>1</sup>naya, xcäl<sup>1</sup>nasa'c Dios xcuent Jesucrist.

## 6

<sup>1</sup> Ni'cni rniabnu lojtu, jia'cnu tejsi lo xtzun Dios, na'c cuälaztu xcäl<sup>1</sup>racnäj Dios; palga guntu si'c, xlia'si cua'tuni.

<sup>2</sup> Sa'csi loj xtidx Dios caj scree:

Dxej nani riäj<sup>1</sup>l gunäni, bacuaadiaä xtiidxtu,

dxej che gubicaj xtoj<sup>1</sup>ltu gucnää la'tu.

¡Coljiejn! Naj najc te tiempsa'c,

coljiejnza, naj najc dxej ni guibicaj xtoj<sup>1</sup>ltu.

<sup>3</sup> Na'c jiennu nicla tej ni gun guidxe'ch lajz bejn, didi guiniireni xhet laadi najc xcäl<sup>1</sup>rusule'nu.

<sup>4</sup> Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejdn nu trabajw; che di jien xho jiennu;

<sup>5</sup> che rguijnreni nuure; che rusäureni nuure ne<sup>1</sup>n latzguuib; che rdejdn lo bieiduxh; che dajl xtzuanu; che re'ch bacal yääl; che rucua'nu;

<sup>6</sup> guluiiojza najcnu xmos Dios xcuent xcäl'nabansa'cnu lo Dios; näjza xcäl'nansa'c xtidx Diosnu; näjza yäl'rajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neñ lastoonu; näjza xcuent yäl'rinälajzpac bejn;

<sup>7</sup> näjza xcuent didxguliipac; näjza lo xcäl'rnibeduxh Dios; ca'zanu si'c te madxed xcäl'naya Dios, ca'nuni guopñaanu, ladbee, näjza ladbäjgw.

<sup>8</sup> Ruluiiojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu benrusguee, mase najcnu bejn ni rni didxlii.

<sup>9</sup> Palga rut rlanjdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijnreni nuure, niluxh dinu guet;

<sup>10</sup> najcnu si'c bejn ni yu' xliajs, niluxh rbalaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

<sup>11</sup> Lojtu, beñ Corinto, aguniliinu lojtu guiragajc rediidx ni yu' neñ lastoonu.

<sup>12</sup> Xhetliidi diidxdidi bacua'tznu lojtu, niluxh pet cacuatx lajztu diidx ni nanab guiniitu loonu.

<sup>13</sup> Naj narä rulidxä la'tu si'c ruliidx te Dad rexi'nni: ¡Colguinii loonu rediidx ni yu' neñ lastootu!

#### *Najcnu si'c xquidoo Dios ni nabajn*

<sup>14</sup> Na'c guchaagtu lo rebejn nani di chalilajz xtidx Dios, sa'csi di gacdi gunteblojtu dzuun sa'csi tejni rlanj gun dzunsa'c, steeni rlanj gunni dzunguidx, çxho gac sanäj bajl xcäy, ä?

<sup>15</sup> O çxho gac sanäj Jesucrist bendxab ni laa Satanás, ä? O çxho gac sanäj te bejn nani riililajz xtidx Dios te bejn ni di chalilajz xtidx Dios, ä?

<sup>16</sup> Çxhixh telboj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo:

Cuazä neñ lastooreni, sisiaänääzaren.

Narä sacä Xtiosreni, laareni sajcreni rexpenä.

<sup>17</sup> Ni'cni col'rii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c faltu recosdxuudx.

<sup>18</sup> Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yäl'rnibee.

## 7

<sup>1</sup> Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcäj guiraa rexhigabguiidx, guiraa redojl, te gac sanu lo rexnezuydxan Dios con xcäl'rdxjeb Dios.

#### *Xho basiejch lajz reben Corinto*

<sup>2</sup> ¡Colchanälajz nuunu neñ lastootu! Xhet latsiajdi biennu lojtu. Rut baxhındinu. Rutza basgueddinu.

<sup>3</sup> Dina guiniä rediidxre te cue'cä xquejtu; ni aguniä lojtu galooli, la'tu yu'tu neñ lastoonu palga tejsi guetnu, o palga tejsi guibajnrnu.

<sup>4</sup> La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

<sup>5</sup> Ni'cni che guyu'nu reguedx Macedonia, di niajcedi nusilajznu sa'csi guiralajt cadejdnu trabajw, xcuent yäl'rdijl ni guyu' guideb gabinu, xcuentza yäl'rdxjeb ni guyu' lastoonu.

<sup>6</sup> Niluxh Dios ni racnäjä rebejn ni rac-huin lajzreni, gucnäj nuure, sa'csi che bidzujn Tito guredxi lastoä.

<sup>7</sup> Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjztu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

<sup>8</sup> Acananä guc-huin lajztu che biłtu guijtzi ni bacuaä lojtu, niluxh di lazä niac-huin mase che baxhäläni guc-huin lazä, sa'csi naj nanä mase bejn guijtzi gac-huin lajztu, xhet xchejdi guc-huin lajztu.

<sup>9</sup> Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanjz Dios, te di yu' xhi gunijitu xcuent nuunu.

<sup>10</sup> Sa'csi yäl'rac-huin ni ruxhäł Dios loonu rujn rusiejch lajznu, te rusläa Dios nuurnu lo dojl ni'cni rbaalazä che bejn ni si'c. Niluxh yäl'rac-huin xten guedxliuj dini gun gusiejch lajz rebejn rextojlreni, alga rujnni nitloj bejn tejpas.

<sup>11</sup> La'tu bejntu huant xliajs ni baxhäł Dios si'cni rchaglaiz Dios gac. Naj ¡colhuii gan! ¡Lacti xhi cossa'c bejn ni par la'tu! Bejn ni bahuisa'cpactu xhini'c gujc, te gac gusulegajctu

xcuentni; dxej bejnni bidxe'chtu, näjza bejnni bidxejbtu, ni'cni basaantu dojlga, dxejcti bejnni rlaizpactu nuhuiitu loä, bejnzani guyu'tu yärsia' xcuentä, bejnzani rlaiztu guntu yälguxhtis bejn nani bejn dojlga. Guiraa redee baluiloj et la'ditu bejn dojl.

<sup>12</sup> Ni'cni, che bacuaä guijtza, dina nucuaäni loj bejn ni bejn dojlga, niluxh bacuaä guijtza lojtu te guiluiloj xcälrä'sia'tu ni rajptu xcuent narä nez loj Dios.

<sup>13</sup> Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpritni xcuent guiraatu.

<sup>14</sup> Sa'csi palga yu' xhi didxsa'c ni räpä lojni xcuenttu, ditu nusanxtuju narä nez lojni. Niluxh sigajcni guiniinu ganax didxguli, sigajcza najc guiraa redidxsa'c xcuenttu ni guniä loj Tito, guliipacni.

<sup>15</sup> Ni'cni maazru sanälajzni la'tu, che rnaj lajzni xho basoobtu diidx, xho bejntu cua'tuni che bidzujnu, racejslitu cadxejbtu.

<sup>16</sup> Naj rbaalazä sa'csi loj guira'ti la'tu nadip lazä.

## 8

### *Saru rudeedreni meel*

<sup>1</sup> Naj bejtznu, rlaiznu guiniinu lojtu xho badeed Dios xcäl'rulasajzni lo reben Macedonia ni huililajz xtidx Dios.

<sup>2</sup> Mase gudedduxhrenei trabajw, bibalajzreni, mase xhetliidi gojpreni, badeedreni meel si'c te bejn ni rajp.

<sup>3</sup> Narä caniliä lojtu, badeedreni xmeelreni si'cni gojpreni, luxh badeedrureni loj ni naa bejn sajz gudeedreni.

<sup>4</sup> Gunabduxhzareni loonu guisaannu gudeedreni xmeelreni te gacnäjnrei rexpex Dios.

<sup>5</sup> Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac.

<sup>6</sup> Sa'csi batie' rexpex Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo.

<sup>7</sup> Rujntu xhidajl dzunsa'c. Rililazsa'ctu xtidx Dios; rniäsa'ctu xtidx Dios; rajpju yäl'najni; rchaglaizpactu guntu dzuun; rinälajzju nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

<sup>8</sup> Dina guiniä lojtu colyujnpacni; narä rlaizäti gacheetu xho rbaalajz reni rudeed meel te guluiloj don la guliä sanälajzpaczatu rexpex Dios.

<sup>9</sup> Sa'csi la'tu anumbecheetu rulasajz Dad Jesucrist, te mase najcni ri'cw, rajpni guiraa xhixten Dios, xcuentu gujcnä si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

<sup>10</sup> Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali laiztu rlaizpactu guntuni.

<sup>11</sup> Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu.

<sup>12</sup> Sa'csi palga rlaizduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p.

<sup>13</sup> Dina guiniä gudeedtejtu te tedtu trabajw te gapduxh stee bejn, alga te gacteblojtistu.

<sup>14</sup> Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajz suniidzarenä te gusalojreni nani cayäädxtu te si'c gacni tebloj.

<sup>15</sup> Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojpu yäl'nasa'c, xhet biäädxti."

### *Tito näjza rexcompanieerni*

<sup>16</sup> Xquixtios lo Dios nani ruedeed lo Tito lagajc yärsia' ni rapä narä par la'tu.

<sup>17</sup> Sa'csi cuäjbni gunni nani gunabä lojni gunni. Luxh sa'csi rlaizduxhpacni gunni xtzuun Dios, naj lagajc laani bejnni xhigab jädhuiini lojtu te luux dzuunre.

<sup>18</sup> Caguxhänu xtee bejtznu chanä Tito. Guiraa rebejn guidoo rniä didxsa'c hueen xcuent bejnre sa'csi laaca rusule'ni xtidx Dios.

<sup>19</sup> Ni'ctis aguleza reben guidooni te chunäjni narä te gacnäjnä narä lo xtzuun Dios nani cayennu te guiliä'pni xpala'n Gueb Dad Jesucrist, te guluilojza lacti rlaizpaciä jiennu xtzuunni.

<sup>20</sup> Ni'cni rlaizä jäpadaduxhnu te di chu tej ni guiniyaj nuure xcuent melrore ni chosa'nnu lo rexpex Dios.

<sup>21</sup> Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

<sup>22</sup> Con guiro'p redee, caguxhaɣzanu stee bejtznu, nani agujc balti huält bihuiinu xho rujnni, te bahuiipacnu rɔajzpacni gunsa'cni xhidajl dzuun, luxh naj rɔajzruni gunsa'cni redzuunga sa'csi nadip lajzni la'tu.

<sup>23</sup> Palga yu' chu guiniabdiidx xcuent Tito, colyejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist.

<sup>24</sup> Ni'c na'c guidxejbtu che yu'tu lo rebejn reguidoo guluiipactu loj rebejnga xho sanälajztu, näjza redzuun ni rujntu ni'c rniinu ganax didxsa'c xcuenttu.

## 9

### *Meel par rebejtznu*

<sup>1</sup> Ni'cni dina gucuaäru lojtu xcuent dzuunre, nalajznu, yälracnäj rexepejn Dios,

<sup>2</sup> sa'csi anancheä rɔajzpacu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniih te badeedzareni meel.

<sup>3</sup> Ni'cni abaxhaɣä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgää lojtu.

<sup>4</sup> Didi che jiädnää reben Macedonia jiophuuiinu la'tu, xhet rajpditu, dxejc jianxtuyä narä, näjza la'tu.

<sup>5</sup> Ni'cni benä xhigab, nanabpac jiädxgaa rebejtznu, jiädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rɔajzpacu gudeedtu, xhet sa'csi rniinu riäjlpac gudeedtu.

<sup>6</sup> Rniliä lojtu, nani guxii rbe'c, guxiiza yälناسа'c guiliäsni, niluxh nani rbe'c xhidajl binij, xhidajlza yälناسа'c guiliäsni.

<sup>7</sup> Tejgatu colhuii don lacti sajc gudeedni, dxejc si'c sugudeedni si'cti ni rɔajzni, na'c gun tiopdi lajzni, etza sa'csi riäjlpac gudeedni, sa'csi Dios sanälajz bejn ni rbaali lajzni rudeedni meel lojni.

<sup>8</sup> Luxh Dios sajc guniidxru xcälracnäjni lojlu, te si'c guixe-guixee sajplu xhidajl guiraloj rehxixtenlu, te ga'plu xhitis ni rquiuinu loj guira'ti xtzunsa'clu.

<sup>9</sup> Sa'csi lo xtidx Dios caj scree:

Abadeduxhni loj reben ni xhet rajpdi luxh redzunsa'c ni rujnni, najcreni par tejpas.

<sup>10</sup> Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yälناسа'c xten xtzunsa'ctu.

<sup>11</sup> Te si'c ga'ptu lacti yälناسа'c te gac gudeedzatu xhiroob. Luxh xcuent xtzuunna, meel ni ruxhaɣtu loj rexepejn Dios sujn gudedduxhrene xquixtios lo Dios.

<sup>12</sup> Sa'csi che racnäjtu rebejtznu, dinu guideed ganaxis ni rquiuireni, rujnzanu rudeddrene xquixtios lo Dios.

<sup>13</sup> Che racnäjtu sa'tu si'c, rululojtu lacti rusoobtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtu, nalajznu xcuent meel ni badeedtu lojreni, näjza loj guiraareni.

<sup>14</sup> Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidduxh Dios xcälracnäjni lojtu.

<sup>15</sup> jXquixtiosi Dios sa'csi baniidixni yälناسа'cduxhtej loonu!

## 10

### *Yälrmibee ni rajp Pabl sa'csi najcni apost*

<sup>1</sup> Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac bennadolajz che biälä lojtu, niluxh che suga'a zijt lojtu, dxejc nacä benñialajz).

<sup>2</sup> Narä canabä lojtu, colguibaŋsa'c te che jiädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rniü nabaŋä si'c te benguedxliuj.

<sup>3</sup> Gullieani najcnu benguedxliuj, niluxh dinu gucuanäj sa'nu guiib nani rca' bejn guedxliuj che rcuaareni.

<sup>4</sup> Sa'csi reguiib ni rca'nu te guidiŋsa'nu direni gac sa' guiib ni rca' bejn guedxliuj. Nuunu rucuaanu con xcälrmibee Dios te riennu gaan loj guiraa rexcälrmibee guedxliujre.

<sup>5</sup> Ni'cni cagutzujlŋu guiraa rehxigabguijdxrene, näjza nani rchaloreni najc xhigabro nani rɔajzreni guiniyajreni yälrumbee Dios, luxh caca'nu guiralii rehxigabnu cagutednureni ladzŋaa Jesucrist te gusoobnu rextidx Jesucrist.

<sup>6</sup> Cabääztisnu te gunnu yälguxhtis loj chutis bejn ni dini gusoob xtidx Dios, che abasoob guiragajctu xtidx Dios.



<sup>7</sup> La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fiini xho najc lastoöni, dxejcti sugacbeepacni sigajcni ahuililajzani xtidx Jesucrist, sigajcza nuure ahuililajznanuni.

<sup>8</sup> Sa'csi mase guiliä'päru xpala'nä xcuent yälrnibee ni rapä, ni baniidx Dios te gustiobä xcälrlilajzta, et te guxhñädi la'tu, nicla si'c dina guituä.

<sup>9</sup> Dina rlazä guchalotu rlazä guchebä la'tu con rexquitzä.

<sup>10</sup> Sa'csi rniireni: "Lo rexquitzni caj didxnagajn, didxnialajz, niluxh che suga'ni laapacni, xheti xcälsjudzu'tzni, luxh xho rniaj diidx ni rniini."

<sup>11</sup> Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

<sup>12</sup> Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni.

<sup>13</sup> Nuure dinu gunnarotej lagajc nuurnu, niluxh riennu si'cni nungäj| jiennu, xcuent yälrnibee ni baniidx Dios loonu te jiennu dzuun cadro yu'litu.

<sup>14</sup> Ni'cni dinu nidedcaj xcälrnibeeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu.

<sup>15</sup> Dinu niennaro lagajc nuurnu xcuent xtzuum ste'ca bejn, ascanu lagajc nuunu bien-nuni. Cabääznu tioobru xcälrlilajzta, te gac jienrunu dzuun lojtu, si'ctis gal jiennuni.

<sup>16</sup> Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

<sup>17</sup> Sa'csi nani rlazj gacnaro, suguiliä'pni xpala'n Dad Jesucrist.

<sup>18</sup> Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

## 11

### *Pabl näjza rebejn ni rniisi najcreni apost*

<sup>1</sup> Maläii chanunäsijctü narä la| ni guiniä gaii didxnayäle', niluxh asanunäjtu narä.

<sup>2</sup> Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladzñaä Jesucrist te xca'ni la'tu. Rlazä gactu beñnaya chäätu lojni, si'c te dxa'p che ruchñaani te bi'n, rut bahualdini.

<sup>3</sup> Niluxh rdxebä didi gusguee beñdxab la'tu si'c ni basguee bäl| Eva con xcälñadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastoötu.

<sup>4</sup> Sa'csi la'tu cagutipduxh lajzta che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajzta ste'ca diidx nani najc garenca lo xtidx Dios ni ahuililajzta.

<sup>5</sup> Narä runä xhigab dina gacä bejn ni guxiiru sajç loj guiraa reapost.

<sup>6</sup> Mase di gacdi guinisa'cä, xhet yälñajndiza cayädxä; niluxh ni'c huenliisi rluijoj guiraa rediidx ni abaluä lojtu, guiraa redzuun ni abenä ro'c.

<sup>7</sup> O |la benä te dojl guyu'ä lojtu si'c te beñ nadolajz, te gactu beñroru, sa'csi xhetliidi cua'ädi xcuent ni basule'ä xtidx Dios lojtu?

<sup>8</sup> Cua'ä meel ni baniidx garenca guidoo loä che guyu'ä lojtu, te benä xtzun Dios lojtu.

<sup>9</sup> Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuumtu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuumtu, luxh si'c sinuu gunä.

<sup>10</sup> Guideb didxlii xten Jesucrist ni yu' neñ lastoä, rniiliä rut sajçdi gudzucaj xcuent xho yuä lojtu, ni'cni care'ch didxroga lo guiraa reguedx Acaya.

<sup>11</sup> ¿Xhicuent rniä si'c? ¿Laa sa'csi dina chanälazä la'tu, ä? |Xho gacni si'c! |Dios anajn lacti sanälazä la'tu!

<sup>12</sup> Niluxh nani rungacä, lagajc ni'c sinuu gunä, te gudxonä renani rlazj gacnaro, renani rlazj naa rebejn najcreni si'cpac najcnu, niluxh direni gac.

<sup>13</sup> Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najçdireni.

<sup>14</sup> Luxh xho dini gac si'c, ni lagajc beñdxab ni laa Satanäs ruluiløj si'c te xangl Dios ni rdimbicha' te rusgueeni bejn.

<sup>15</sup> Ni'cni na'c guidxelojtu palga näjza rexmos beñdxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

### *Rdejð Pabl trabajw sa'csi najcni te apost*

<sup>16</sup> Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejçni te guiniäza didxro xcuentä.

<sup>17</sup> Diidx ni rniä dina guiniäni xcuent xcälrnibee Dios, alga rniäni si'c te ni rajc yejcní, lala redidxro ni rniä xcuent lagajc narä.

<sup>18</sup> Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä.

<sup>19</sup> Ni la'tu, sa'csi nasin'duxhtu, sanunäjtu rebejn ni rajc yejcreni.

<sup>20</sup> La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuumni o rliä'preni lagajc xpala'reni, o rga'preni lojtu.

<sup>21</sup> Mase rtuiyä guiniäni, dipac niajcdi niniä diidx lojtu te niacä si'c najc rebejnnga. Niluxh loj xhitis nani runnaroreni, (canisicä si'c te bejnayääl) narä sajcro gunnaröä.

<sup>22</sup> ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä.

<sup>23</sup> ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcní. Abenäru dzuun lojreni, agudijnrurení narä loj ni gudijnrení laareni, abasäururení narä nen latzguiib, nicla gac guigab bal huält gudijnrení narä; baltiza huält ameer nietä.

<sup>24</sup> Gaii huält gudijn rexpejn Israel narä, teja huält batijlreni duguijd detzä galbitzubigaa huält.

<sup>25</sup> Choñ huält bahuajcwrení narä garo't; stee huält bacuaareni guij yecä; choñ huält biäaz barcw cadre sa'a loj nisdo; teb dxej, teb yääl guyu'ä lo nisdo.

<sup>26</sup> Huaduxhä bja, lacti bixun riesgw xcuentä lo gueuu, xcuent regubaan, xcuent rebenladxä, xcuentza rebenzijt. Bixunza riesgw nen reguedxro, näjza nez lo reyubijdz, näjza lo nisdo, näjza xcuent rebejn ni rusguee, rniisireni najcreni bejtznu lo xtidx Jesucrist.

<sup>27</sup> Abenduxhä dzuun, agudedduxhä trabajw, balti yääl dina niesä, balti huält gulanä, biojä, balti huält xheti xhi niauä; agudedäza yäl'nalduxh; guyu' huält xhetiza xhabä.

<sup>28</sup> Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililaj xtidx Dios.

<sup>29</sup> Che rdxajj tejtü, näjza narä rdxagä. Palga tejtü riab lo dojl, narä ruduxhä yärsia' xcuentni.

<sup>30</sup> Palga nanab gunnaröä lagajc narä, sunäni xcuent redidx nani rululoj xcälrdxagä.

<sup>31</sup> Dios ni najc Xtad Jesucrist, nani riäj l guilliä'p xpala'nni par tejpas, ananchee dina gusgueä la'tu.

<sup>32</sup> Che guyu'ä guedx Damasco, gubernadoor nani guyu' ro'c, najcni xpejn reii Aretas, gunibee gojp rexcuxhtisni guejdxga te niniaazrení narä te nisäurení narä nen latzguiib.

<sup>33</sup> Niluxh basiäjtrení narä nen te dximro nez ro' te padeer ni rdejd gabi guejdxga, te si'c gulaä ladznaareni.

## 12

### *Dios baluüloj lo bacal*

<sup>1</sup> Mase riäj l guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluüloj Dios loä.

<sup>2</sup> Numbeä te niguii ni ahuililajj xtidx Jesucrist. Gutzudaj ijz huijni guibaa ni riojnnga, dina ganä laa guideb tiejxhni huijni, o la ganax xspritni huij, Diostis najn.

<sup>3</sup> Diostis najn la guideb tiejxhni, o ganax xpritni, niluxh nanä xho huij niguiiga,

<sup>4</sup> guläs Diosni cadre yu'pac Dios, luxh ro'c biejn diajgni didx-xhiga'tz, didxroduxhrej, nani di gacdi guiniä beñ guedxliuj.

<sup>5</sup> Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni rululoj xcälrdxagä.

<sup>6</sup> Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuüitu runä o nani riejn diajtu rniä.

<sup>7</sup> Baluüloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huäaz tiexhä, ni baxhal beñdxab xten Satanás te gusacsini narä te di gacä te beñnaro.

<sup>8</sup> Choñ huält agunabä lo Jesucrist xcuent ni'c, te guibicajni.

<sup>9</sup> Niluxh laani najni loä: "Yälracnä jni gunidxä salduxh luj, sa'csi ruzensa'cru xcälmlagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä.

<sup>10</sup> Ni'cni rbedxilazä xheti xcälrutiplazä, rbedxizalazä rniyajrení narä, näjza che caquinä guraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yäl'nadip, yäl'nadaan loä.

*Yu' Pablyärsia' xcuent guidoo ni yu' Corinto*

<sup>11</sup> Agucä si'c te beṇṇayääl, lagajc la'tu bejntu nacä si'c. La'tu riäj] niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajrcu mase rut nacädi.

<sup>12</sup> Redzuun ni benä la] ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr.

<sup>13</sup> ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutajä xtzuuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. ¡Colsiäj] lajztu narä dojlre!

<sup>14</sup> Naj cayunä xhigab jiädhuiätu, naj gacni choṇ huält siälä. Di quilä xhixtentu, alga lagajc la'tu rguilä. Di rlazä gotalä xtzuuuntu. Di riäj] cuchee rebiuux meel par xcuzajznreni. Reguzajñ ni riäj] cuchee meel par rexi'nreni.

<sup>15</sup> Xhet najcdi gunitä guiraa nani rapä, näjza lagajc narä sujuuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

<sup>16</sup> Niluxh mase si'c najcni, di narä nutalä xtzuuuntu. Empac yu'reni canii basgueä la'tu sa'csi nadxälazä.

<sup>17</sup> ¿Xhixh naatu cua'ä xhi xtentu sa'csi baxhalä rebejtznu lojtu, ä?

<sup>18</sup> Che baxhalä Tito, räpä lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

<sup>19</sup> La]ni cayoltu guiraa rediidxre, cayujntu xhigab canabnu jiäj] lajztu, niluxh xhet si'cdini. Caniinu rediidxre nez loj Dios, caniišanu con xcälracnäjä Jesucrist te si'c tioobrutu lo xtidx Dios, rebetzä nani rinälazä.

<sup>20</sup> Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rrlajztu gacä. Rdxebä andi yu'tu ni cadij], ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutaj] diidx lo sa'ni; ni cayunnaro lagajc laani, ni cayujnza bieju.

<sup>21</sup> Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanjt, bejntu dojl galoo, luxh gajdtu gusiechljaztu xcuent xtojltu. Yu'tu ni di guibanñaya, resnäjtu bejñ ni di gac chäältu, yu'za balti dojl rujntu.

## 13

### *Lult yälrlujdx xten Pabl*

<sup>1</sup> Naj gac choṇ huält siädhuiä la'tu. Guira'ti quej nanab cue'creni con xtidx tio'p o choṇ bejñ ni najnpac xhi dojl bejñ tejjani.

<sup>2</sup> Mase ruti narä ro'c, arnixgää lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejñ dojl, näjza loj guiraatu, palga jiälsacä, diruna gulaslazätu nicla tejt,

<sup>3</sup> sa'csi rrlajztu fiipactu la guliä runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neṇ lastootu.

<sup>4</sup> Guliicani che cuajni lo crujz, gucni si'c te bejñ nani casis, niluxh naj nabajñni sa'csi rapduxhni xcälrnibee Dios. Näjza nuure rsia'cnu si'c te bejñ nani casisnäjä laani niluxh nabannäjnu laani xcuent xcälrnibee Dios ni baniidxza Dios xcuenttu.

<sup>5</sup> Colninäj lastootu lagajc la'tu, colhuui la guliipac ahuililajztu xtidx Dios; colhuisa'c xho najc lastootu. ¿La ditu gachee rbäjz Jesucrist neṇ lastootu, ä? Palga rutini, rusqueetu lastootu, ditu nililajztu xtidx Dios.

<sup>6</sup> Narä rlazä gacheetu, dinu nusguee lastoonu, ahuililajzpacnu xtidx Dios.

<sup>7</sup> Rniabä loj Dios na'c guntu cosguijdx, xhet te guiniädi bejñ didxsa'c xcuentnu, alga te la'tu guntu recessa'c, mase guiniireni et laadi cayunä narä.

<sup>8</sup> Sa'csi xhetliidi rajcdi riennu te nitloj didxguliä, xcälrnibeeenu najc te gusule'nu didxlii.

<sup>9</sup> Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrililajztu lo xtidx Dios.

<sup>10</sup> Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäj] tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

<sup>11</sup> Ni'cni rbejtznu, colguibalajz, colhuui guisa' xcälrililajztu, colcuedcxi lajztu, colyennäj sa'tu tejsi xhigab, dxitis gubajñ. Dios xten yälrinälajz näjza yälrbecdx lajz chunäj la'tu.

<sup>12</sup> Colñii: "Xchan" lo resa'tu.

<sup>13</sup> Guiraa rebejtznu nani ahuililajz ruxhalä xtixtios lojtu.

<sup>14</sup> Yälracnäjä xten Dad Jesucrist, näjza yälrinälajz xten Dios, näjza yälracnäjä xten Sprit Dxan chu neṇ lastootu. Sugacni si'c.

## Te Guijtz Lo Reben Gálatas

*Pabl rucuaa guijtz loj reben guidoo nez región Galacia*

<sup>1</sup> Narä, Pabl, nacä apost xten Jesucrist. Xhet rebejndi baxhal narä, xhetza bejndi gule narä. Lagajc Jesucrist näjza Xtadni Dios ni yu' xhaguibaa, nani guläs Jesucrist loj rebengut, laareni agulereni narä.

<sup>2</sup> Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia.

<sup>3</sup> Xca' guebju xcälracnäj Dios con xcälrbedxilajz xten Dios xtadnu näjza xten Dad Jesucrist.

<sup>4</sup> Lagajc laani cuäjbnj gujtni te guslaani nuure lo dojl xten guedxliuj guijdxre, si'cni gunibee Xtadnu, Gueb-Dios.

<sup>5</sup> Chä'p xpala'n Dios par tejpas. Sugacni si'c.

*Xhetdi xhi stee didxcoob ni sajg guslaa nuure*

<sup>6</sup> Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx.

<sup>7</sup> Xhetdi stee diidx ni sajg guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist.

<sup>8</sup> Niluxh palga jääd chu jäädluui lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluini lojtu, bejnğa agubibdeni, chutis najcnu, mase naräni, mase te xangl Dios ni jääd xhaguibaali.

<sup>9</sup> Si'c ni guniä lojtu, si'c rnisacä lojtu naj: Pal yu' chu jäädluui lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluini lojtu, bejnğa agubibdeni.

<sup>10</sup> ¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

*Xtzun Pabl*

<sup>11</sup> Colyacbee sa'ä, diidx ni ruslaa bejn lo dojl nani abasule'ä lojtu di diidxga gac xhigab bejn guedxliuj.

<sup>12</sup> Xhet lojdi bejn guedxliujdi cua'äni, rutza baluudini löä, niluxh lagajc Jesucrist baniidx xtiidxni löä.

<sup>13</sup> Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni.

<sup>14</sup> Loj reni rusoob xleii toMoisés narä cagusobäru xtiidxni, nanduxhäru loj guiraareni. Loj rebejn nani sadxagä ladxä, maazru sanälazä xcostumbr retoxtadgoldöä.

<sup>15</sup> Dios gule narä, guleni narä cheni nuuli xnanä narä, gurejdxni narä sa'csi sanälajzni narä.

<sup>16</sup> Dxejc bibalajz Dios baluilojni Xi'nni Jesucrist löä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä.

<sup>17</sup> Niclaza nia'ä guedx Jerusalén loj reni ganid gujc apost löä. Alga hua'a nez reguedx Arabia, dxejcti gubisacä guedx Damasco.

<sup>18</sup> Che agudejd si'cti choñ ijz, dxejcru hua'a guedx Jerusalén te biembeä Pedr, dxejc biannäni tzun-gubijdx.

<sup>19</sup> Niluxh dina nuhiüä loj chu stee apost ro'c. Lojtis Jacob, betzhuin Jesucrist bahuiä.

<sup>20</sup> Rniliä nez lo Dios, dina guiniä didx-xhi, rediidx ni cacuaä najc guliipac.

<sup>21</sup> Dxejcti hua'a reguejdx xten Siria näjza Cilicia.

<sup>22</sup> Resa'nu ni yu' nen xquidoo Crist guideb nez reguedx Judea, direni gumbee narä.

<sup>23</sup> Riejntis diajgreni: "Bejn nani basacsíduxh nuure agujc xchej, abejnğa cagaluini xcuent lagajc xcälrililajz nani galoo rlajzni nunitlojni."

<sup>24</sup> Dxejc rliä'preni xpala'n Dios sa'csi huililazäza xtiidxni.

## 2

*Bidxaag Pabl loj reapost*

<sup>1</sup> Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu.

<sup>2</sup> Gunii Dios löä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun.

<sup>3</sup> Sanää Tito, te bejn griegw ni di gac xpejn Israel. Nicla lojni direni niäj b chuni bee si'c caj lo leii xten Moisés.

<sup>4</sup> Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajñnu Dios. Rdx'chreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlanjreni guxhiidreni nurnu, rlanjreni gusoobnu rextiidxreni.

<sup>5</sup> Dipacnu nicájb nuquadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

<sup>6</sup> Niluxh reni sajc, nalajznu reni rnibee rebeñ guidoo ro'c, xhet te didxcoobdi guniireni loä. (Luxh par narä xhet najcni mase beñsajceni, sa'csi Dios runtebloj guiraa bejn.)

<sup>7</sup> Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojłreni, sigajcni rusule' Pedr xtidx Jesucrist loj rexpem Israel nani rujnpac si'c ni caj lo leii.

<sup>8</sup> Lagajc Dios nani badeed bejn Pedr dzuun xte apost loj rexpem Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

<sup>9</sup> Ni'cni Jacob, Pedr, näjza Juan nani najc beñroru neñ guidoo xten Jesucrist, gucbeereni laa Dios ni cayacnä narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpem Israel.

<sup>10</sup> Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

*Pabl gudilñäj Pedr lo guedx Antioquia*

<sup>11</sup> Che biääd Pedr lo guedx Antioquia, gudilñääni, sa'csi abejnni dojl xhet laadi cayujnni.

<sup>12</sup> Galoo gudaunäjni rebenzijt, luxh che bidzujñ gaii xpejn Israel ni baxhał Jacob, dxejcti gubicajni lo rebenzijt, diruni niaunäjreni sa'csi bidxebñni rexpejn Israel ni ru' bee ni bidzujñ ro'c.

<sup>13</sup> Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c.

<sup>14</sup> Luxh che bahuiä direni gun si'pacni najc xtidx Jesucrist, dxejc räpä loj Pedr nez loj guiraa rebeñ guidoo: "Palga luj najclu te xpejn Israel, luxh nabajñlu si'c rebenzijt ni digac xpejn Israel, xhet si'cni ni caj loj leii, ¿xhicuent rlanjzlu guinibeelu guibajñ rebenzijt si'c rexpejn Israel nani rusooob xleii toMoisés?"

*Nungäjł chalilajz rexpejn Israel, sigajc guiraa bejn, te guibicaj xtojłreni*

<sup>15</sup> Nuure najcnu rexpejn Israel cheni gojllinu; dinu gac beñdojl si'c najc rebenzijt.

<sup>16</sup> Anadonnu rut chu tejtı bejn sajc guibicaj xtojłni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojłnu sa'csi rililajznu, xhet sa'csi riennu si'cni caj loj leii. Di gacdi jia xtojł bejn xcuent yälrusooob xleii toMoisés.

<sup>17</sup> Palga lał ni rlanjznu jia xtojłnu xcuent xcälrililajz xtidx Jesucrist, ruhuiinu cayenrunu dojl, la sajc guiniinu: Jesucrist ruluii rienrunu dojl, ¿ä? ¿xho gacni si'c!

<sup>18</sup> Palga rlazä gunsacä redzuun nani abar'o'nä, lagajc narä rapä dojl nacä beñ dojl.

<sup>19</sup> Niluxh xcuent leii, anacä si'c bengut: digacdiru guinibee leii narä sa'csi naj nabañä lo xnejz Dios. Luxh lagajc leii bejn nacä si'c bengut che gucbeä di gacdi gusobä guiraa ni caj lo leii.

<sup>20</sup> Najcni si'cni gutnää Crist lo cruzj. Naj xhet narädi ni nabañä, laa Crist ni nabajñ neñ lastoä. Yälñabajñ ni nabañä naj lo guedxliujre nabañä sa'csi rililazä xtidx Xi'n Dios nani rinälajz narä luxh gujtni te gudijxni xtojłä.

<sup>21</sup> Dina cuälazä xcälrulasajz Dios. Paru sajc gudzucaj leii xtojł bejn te gacreni beñnaya nez loj Dios, dxejc xlia'si gujt Jesucrist.

### 3

*Yälrililajz rusia dojl*

<sup>1</sup> ¿Chipsa nayäältu beñ Galacia! ¿Chu bascäjyту te di cuadiajgtu xtidx Jesucrist? Ni nez lojpactu bisule'nu diidx xho cuaj Jesucrist lo cruzj.

<sup>2</sup> Tejtı diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu?

<sup>3</sup> Chipsa nayäältu. Acua'tu Sprit Dxan xten Dios dxejcti naj rlanjztu guntu ni rijabtis yejctu guntu.

<sup>4</sup> ¿La xlia'si gudejdtu trabajw? Chugan la gulii xlia'sini.

<sup>5</sup> Che runiidx Dios Sprit Dxan xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

<sup>6</sup> Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni.

<sup>7</sup> Ni'cni colyabee dee: renani rililajz xtiidx Dios najc xi'n toAbram.

<sup>8</sup> Galooli najn Dios xcuent yárlililajz susia Dios lastoo rebenzjijt, ni'c rájpní lo Abram: “Guiralií reben guedxliuj sacle' xcuentlu.” Diidxre cuaj lo guijtz ni gujc galooli, cadro caj xtidx Dios.

<sup>9</sup> Ni'cni reni rililajz naj agucnáj Diosreni sigajc gucnájni toAbram nani huililajz.

<sup>10</sup> Guiraa reni ríajz guibajzreni gunreni si'cni caj lo leii, aguibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.”

<sup>11</sup> Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannájni Dios xcuent xcárlililajzni.

<sup>12</sup> Leii dini naa chalilajz bejn te xca'ni yálnabajn. Scree caj lo leii: “Nani gunpac si'cni caj loj reguijtz xten leii, ni'c nanab guibajn lojpac leiiga.”

<sup>13</sup> Jesucrist badzucuj nuure loj yálrbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.”

<sup>14</sup> Scree gusajc Jesucrist te gusojb diidx ni rájpní Dios loj toAbram, sacnájni guiraa rebenzjijt; nájza te guiraanu ni chalilajznu xtidx Jesucrist xca'nu Sprit Dxan xten Dios.

#### *Leii náj diidx ni bia'n Dios loj toAbram*

<sup>15</sup> Betzá, naj gusá'tá te diidx xcuent bejn guedxliuj. Cheni rujn bejn te guijtz te jia'n diidx lo stee bejn, mase bejntis najcreni, che abacuaani lajni lo guijtzga, rut sajcdi gudzucuj guijtzga. Rutza sajcdi gucuaaru diidx lojni che anajcni.

<sup>16</sup> Luxh anajnu badeed Dios xtiidxni loj toAbram nájza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist.

<sup>17</sup> Diidx ni ríazá guiniá najc scree: Diidx nani bia'npac Dios loj toAbram gunii Diosni che cayáádx tajp gayuu galbitzuu íjz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lajtis sajcní.

<sup>18</sup> Paru naquim leii te xca' bejn erens, dxejc xhet erensdi caul' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

<sup>19</sup> ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlni, laj ni jiáád nani najc xagdo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiájl diidx.

<sup>20</sup> Te ni rusiájl diidx xhet par tejtis bejndi najcni, niluxh Dios tejtis najc.

#### *Xcuent leii*

<sup>21</sup> ¿La garenca najc xleii Moisés lo diidx ni basa'n Dios loj toAbram, á? ¿Xho gacni si'c! Paru nica'nu te leii ni rajc ruedeed yálnabajn, dxejc sii xcuent leiiga nica' bejn yálnabannaya.

<sup>22</sup> Niluxh loj reguijtz xten Dios caj diidx ni rnii: Guiraa bejn níáuu nen dojl, te reni chalilajz xtidx Dios si'c huililajz toAbram, reni'c xca' xcárlililajz diidx xcuent Jesucrist si'cni bia'n Dios diidx loj toAbram.

<sup>23</sup> Che gajd xcárlililajz xcuent Jesucrist jiáád, dxejc basáuu leii nuure nen dojl, cabájtisnu guiricaj xcárlililajz xcuent xtidx Dios.

<sup>24</sup> Ni'cni anajc leii si'c xmastrnu te guluiini nuure nezuy nez lo Dad Jesucrist te gusiani xtojlnu con yárlililajz xtiidxni.

<sup>25</sup> Niluxh naj sa'csi arajpnu yárlililajz xcuent xtiidxni, dirunu guiquiin te mastr, nalajznu leii.

<sup>26</sup> Guiraatu najctu xi'n Dios xcuent yárlililajz xtidx Jesucrist,

<sup>27</sup> sa'csi guiraatu ni gueroobnistu loj xtidx Jesucrist, najctu rexpejn Jesucrist.

<sup>28</sup> Naj rutirru rexpen Israel niclaza rebenzjijt, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist.

<sup>29</sup> Palga najcnu xpejn Jesucrist, dxejc guliipac najcnu xi'n toAbram, dxejc sica'nu yálnasa'c ni abia'n diidx gudeed Dios loj Abram.

## 4

<sup>1</sup> Mbaj naj. Nani xca' yálnasa'c, che najcni biuux, najcni sigajc te mos, mase xtenni gac guiraa xhixten xtdadni.

<sup>2</sup> Yu' chu te bejn ruhuiini, yu'za chu rnibee xhixtenni cheni agurooblini, cheni guidzujn dxej xca'ni ni gudeed xtdadni.

<sup>3</sup> Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jiennu lo guedxliuj.

<sup>4</sup> Niluxh che bisa' dxej ni basoob Dios, baxhał Dios Xi'npacni. Xi'n te gunaa gojlni, loj rexpejn Israelza biádjíajlni, basoobni leii xten toMoisés.

<sup>5</sup> Si'c gujc te xcasacni reni rusoobpac leii, te xca'ni nuure gacnu si'c te xpisiájbní.

<sup>6</sup> Luxh sa'csi anajctu xi'nni, ni'c baxhał Dios Sprit xten Xi'nni te cuáázni nen lastoonu. Laani rniini lo Dios xcuentnu: “Guejblu, Xtdanu.”

<sup>7</sup> Ni'c dirunu gac mos, sa'csi anajcnu xi'n'ni. Luxh palga najcnu xi'n'ni, suniidxza Dios yálnasa'c loonu xcuent Dad Jesucrist.

*Rulijdxni na'c gacsac bejn mos*

<sup>8</sup> Che gajdntu gumbee Dios najctu mos xten rebanäjb ni rajntu si'c Dios luxh dipacreni gac Dios.

<sup>9</sup> Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb.

<sup>10</sup> Cayutistu redxej, rebäii, retieimp, reijz.

<sup>11</sup> Naj rdxebä andi xlia'si gudedä trabajw baluiätu.

<sup>12</sup> Rniabduxhä lojtu betzä, colyajc si'c narä, sa'csi narä ahuuilazä xtidx Jesucrist sigajc la'tu. Xheta xhi dzunguijdxdi bejntu loä che guyu'ä lojtu.

<sup>13</sup> La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä.

<sup>14</sup> Dizatu nuzé' niclaza nibälajzta narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä.

<sup>15</sup> ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu.

<sup>16</sup> Naj çla rdxe'chtu loä sa'csi caniä didxlii lojtu, ä?

<sup>17</sup> Naj yu' gaii bejn nani rujnsi si'cni sanäreni leii rujsireni si'cni rinälajzreni la'tu. Niluxh rrlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni.

<sup>18</sup> Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajzta narä.

<sup>19</sup> Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjpacni Jesucrist nen lastootu.

<sup>20</sup> Maläii gac jialä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

*Diidx xcuent Agar näj Sara*

<sup>21</sup> Colguinii loä, la'tu ni rrlajz gun si'cni caj lo leii, çla ditu gacbee, la di diajgtu jiejn xhini'c caj lo leii, ä?

<sup>22</sup> ¡Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni.

<sup>23</sup> Niluxh xi'n xmosni gojl sa'csi lagajc laani bejn xhigab si'c chu xi'n'ni. Luxh xi'n chäälpacni gojl sa'csi si'c bia'n Dios diidx loj Abram.

<sup>24</sup> Diidx xcuent regunaare najc si'c diidx ni ruluu. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii.

<sup>25</sup> Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c naj cadre re' rexpén Israel con rexi'nreni, sanäreni leii.

<sup>26</sup> Niluxh di guedx Jerusalén ni yu' guibaa gac si'c mos, luxh nuurnu najcnu xi'n'ni.

<sup>27</sup> Scree caj loj xtidx Dios:

Bibalajz, luj gunaa ni gajd xi'nlu chu,

guredxa', bibalajz,

luj ni gajdlu ted trabajw ni rdejd gunaa che rajl xi'n'ni.

Sa'csi su'ru xi'n gunaa nani gulälajz chäälni quela xi'n gunaa ni gudiesnäjb chääl stee gunaaga.

<sup>28</sup> Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram.

<sup>29</sup> Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuent diidx ni bia'n Dios loj Abram. Sigajcza najcni naj.

<sup>30</sup> ¿Xhi caj lo reguijtz? “Barilaagw gunamos näj xi'n'ni, te di xca' xi'n gunamos yálnasa'c xtenlu si'c ni xca' xi'n gunaa nani najc chäälpacu.”

<sup>31</sup> Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc chäälpac toAbram.

## 5

*Colguzutijp lajzta lo yälrlilajz xtidx Dios*

<sup>1</sup> Colguzutijp lajzta lo xtidx Dios nani baniidx Jesucrist loonu sa'csi guliipac gulää Jesucrist nuure ladzñaa leii, badzucajni xtojlnu che huililajznu xtiidxni, ni'cni na'cru gusiejch lajzta te gacsactu mos ladzñaa leii.

<sup>2</sup> Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajzta xtidx Jesucrist.

<sup>3</sup> Rniäza stehuält, guiraa bejn nani rlanjpac chu bee, nanab gunni si'cpac ni caj lo leii.

<sup>4</sup> Palga rlanjtu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzatu lo xcäl'racnäj Dios.

<sup>5</sup> Niluxh nuure xcuentpac Sprit Dhan xten Dios rililajznu gudijx Jesucrist xtojlnu lo cruzj, cayenloonu jjiädsacni te guniidxni yäl'bañsa'c par tejpas loonu.

<sup>6</sup> Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajcdi najc chalilajz bejn xtidx Dios. Yäl'rililajzga rujn guibañsa'cnu te chonälajznu resa'nu.

<sup>7</sup> La'tu laaca sasajtu. ¿Chu badxojn gusoobtu xtidxlii Dios?

<sup>8</sup> Xhet Diosdi ni guletu badxojnditu.

<sup>9</sup> Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii.

<sup>10</sup> Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagugueetu susacsi Diosni, chutis najcni.

<sup>11</sup> Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsi rexpejn Israel narä? Paru si'c caguluiä, dirutu chalilajz gudijx Jesucrist xtojlnu lo cruzj. Luxh si'cpacza rlanjreni.

<sup>12</sup> Rebejn nani cagugueetu caniireni chutu bee, ¡malaiiza gutiuugreni tejpas lagajc tiejxhreni!

<sup>13</sup> La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixgaa na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejcti. Colgacnäj sa'tu con yäl'rinälajz, tejni sigajc steeni.

<sup>14</sup> Sa'csi guiraa diidx ni caj lo leii con tejtis diidxre rsiojbn: "Chanälajztu sa'tu sigajc rinälajztu lagajc la'tu."

<sup>15</sup> Palga rdijltu, rauya'tu sa'tu, rajwtu sa'tu, ¡colnatiro! Andi lagajc la'tu gunijttu sa'tu.

*Nani rchaglajz rebejn näj yäl'nabajn ni rudeed xtidx Dios*

<sup>16</sup> Rniä lojtu, colguibajn si'c ruluii xtidx Dios näjza Sprit Dhan xtenni, te si'c na'c guibajntu si'ctis ni rlanj tiejxhtu, si'c ni najctis xhigabtu.

<sup>17</sup> Sa'csi ni najc xhigab xten bejn rdxe'ch loj xhigab Sprit Dhan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlanjtu guntu.

<sup>18</sup> Luxh palga cagulijdx Sprit Dhan la'tu, dxejc dirutu quiquuin guntu si'c ni caj lo leii.

<sup>19</sup> Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yäl'rusguee cháäl bejn, yäl'rusguee cháäl sa'reni, yäl'rusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa,

<sup>20</sup> yäl'rajn rebanäj, yäl'bidxaa ni rujn daan bejn, yäl'rdxechlajz loj sa'ni, yäl'rchagdijl sa'ni, yäl'nayedx lo sa'ni, yäl'rdxecha', yäl'riu lagajctis laani, yäl'rliä' lo sa'ni, yäl'rchaag lo te cuaa bejn. Najza sa' dzunguijdxre rujnreni:

<sup>21</sup> yäl'rdxe'ch lajz, yäl'rugu't sa'ni, yäl'rsiojz, yäl'rauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojl're direni jiu' loj xcäl'rnibee Dios xhaguibaa.

<sup>22</sup> Niluxh xtzuuun Sprit Dhan xten Dios najc yäl'rinälajz sa'ni, yäl'rbalajz lastooni, yäl'rbedxi lajzni, yäl'rbedxi lajz sa'ni, yäl'najc bensa'c lo chutis bejn, yäl'nagodzajz, yäl'rililajz,

<sup>23</sup> yäl'nadolajz, yäl'rnibee lastooni lo ni rlanj gun tiejxhni. Xheti te leii ni rudxojn gun bejn sa' redzuunre.

<sup>24</sup> Niluxh renani ahuillajz xtidx Jesucrist, abatio'nreni guiraa redolguijdx ni rlanj gun tiejxhreni.

<sup>25</sup> Palga rbäjz Sprit Dhan nen lastoonu, do'o guibajn si'c rnibee Sprit Dhan guibajntu.

<sup>26</sup> Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

## 6

*Colgacnäj sa'tu*

<sup>1</sup> Sa'ä, palga chu tejtü ni abiajb nen dojl, lagajc la'tu nani aracheetu xtidx Dios colgulijdx bejnga, colgacnäjni te guiriini nen dojl. Colnii lojni nadolajz, nasinjajztu lagajc la'tu didi che guidon nägajcza la'tu jiajbtu nen dojl.

<sup>2</sup> Colhuui xhi rquuin resa'tu, colgacnäjreni te si'c gusoobtu guiraa rediidx ni najc leii xten Jesucrist.

<sup>3</sup> Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani.

<sup>4</sup> Tejgatu col'cubee xho najc xtzuuuntu te fiitu la laaca najcni, dxejcti sajcdi guiliä'ptu lagajc xpala'ntu. Dxejc ditu quiquuin chu stee bejn guiliä'p xpala'ntu.



<sup>5</sup> Sa'csi teja bejn susule'ni diidx lo Dios xhini'c bejnii.

<sup>6</sup> Nani casieed xtidx Dios nanab gacnäj bejn nani ruluiini, gudeedni tudxe'n xhixtenni loj nani ruluiini.

<sup>7</sup> Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajca ni'c xca' bejn.

<sup>8</sup> Paru te bejn gun dzuun xcuenttis tiejxhni, dxejc che guidzujn dxej xca'ni yálnasa'c, sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajn par tejpas.

<sup>9</sup> Ni'cni na'c guidxajgnu jiennu dzunsa'c te che guidzujn dxej ni xca'ni yálnasa'c, xca'zanu te yálnasa'cro.

<sup>10</sup> Ni'cni nanab lał ni sajcnı, gacnäjnu chutis bejn, ganiddoo resa'nu ni ahuililajz.

*Yälrulijdx näjza xtixtios*

<sup>11</sup> Colhuilaa lacti reletrduxh cacuaä lojtu con naäpac.

<sup>12</sup> Guiraa reni rdxaglazj gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo crujz.

<sup>13</sup> Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu.

<sup>14</sup> Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo crujz, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre.

<sup>15</sup> Che ahuililajz te bejn xtidx Jesucrist, xhetru sajcdi chu bejn bee, xhetza sajcdi na'c chu bejn bee. Nani sajctis najc gacni si'c te bejncob lo xtidx Jesucrist.

<sup>16</sup> Guiraa renani nabajn si'cni ruluii xtidx Jesucrist sibedxi lajzreni xcuent xcälrulaslazj Dios. Näjza rexpən Israel nani ahuililajz xtidx Jesucrist sibedxi lajzreni.

<sup>17</sup> Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

<sup>18</sup> Rebetzä, gacnäj Dad Jesucrist guiragajctu con Sprit Dxan xtenni. Sugacni si'c.

## Te Guijtz Lo Reben Efesios

*Bacuaa Pabl lo reben guidoo nen guedx Éfeso*

<sup>1</sup> Narä, Pabl, nacä apost xten Jesucrist sa'csi si'c rlazj Dios. Cacuaä guijtzre loj rebejn nani huililajz xtiidxni, loj reni rujn si'cpac rniini nen guedx Éfeso.

<sup>2</sup> Xca'tu yälracnäj, yälrbexi lajz xten Xtadnu Dios, näjza xten Dad Jesucrist.

*Rusule' Pabl xtidx Jesucrist*

<sup>3</sup> Rliä'pnu xpala'n Dios, Dad näj Xtad Jesucrist. Dios racnäj nuure, xcuent Crist runiidxni guiraa reyälracnäj xca' lastoonu, astoo yu'lanu xhaguibaa.

<sup>4</sup> Laani gule nuure, che gajdli guirixtiej guedxliujre, te gacnu xpejn, te guibanmayanun nez lojni con yälrinälajz.

<sup>5</sup> Sigajca anungäj xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi balaslajzni nuure.

<sup>6</sup> Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejn ni nuure tejsi con xi'nni ni sanälajzni.

<sup>7</sup> Laani baslaani nuure nen dojl xcuent xtiejn, laani badzucajni xtojnu xcuent xcälruslasajzni

<sup>8</sup> nani banidduxhni loonu. Guideb yäl'najn, guideb xcäriejn

<sup>9</sup> basule'ni loonu xhigab xhiga'tzni xcuent redzuun ni rlazjzni gunni, xhigabza ni bejn ni galooli.

<sup>10</sup> Luxh sidzujn dxej sisiojbpac xhigab ni bejn Dios. Che guidzujn dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

<sup>11</sup> Arajpnu te xcäl'nasa'c Jesucrist, sa'csi galooli bejn Dios xhigab guniidxni yäl'nasa'cga. Lagajc Dios benchee guira'ti ni yu', luxh rujnpacni nani abejn ni xhigab najc laaca gunni

<sup>12</sup> te guiliä'p bejn xpala'n xcäl'rnibeeni xcuentnu, nani ganiddoo biolilaaaznu xtidx Jesucrist.

<sup>13</sup> Näjza la'tu, che biejn diajgtu redidx gulii, rediidx ni ruslaa bejn lo dojl, dxej huililajztu xtidx Jesucrist, dxej gujczatu tejsi con laani. Dxej cua'tu Sprit Dxaan xten Dios, ni'c najc si'c seen ahuililajztu, si'cni bia'n Dios diidx.

<sup>14</sup> Baniidx Dios Sprit Dxaan xtenni te cuääzni nen lastoonu, te ni'c najc seen xca'nu yäl'nasa'c nani guniidx Dios che abaluuxni xtzuunni, nalajznu guslaani guiraa rexpejn ni te guiliä'preni xpala'nni lo xcäl'rnibeeni.

*Rniab Pabl gudeed Dios yäl'najn loj renani ahuililajz*

<sup>15</sup> Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexpejn Jesucrist,

<sup>16</sup> dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios.

<sup>17</sup> Rniabä lo Xtios Dad Jesucrist, xtadni ni rnibee xhaguibaa, guniidxni lojtu te yäl'nanduxh, te yäl'ruluioj recos xhiga'tz te gacbeduxhrutu xcuent Gueb Dios.

<sup>18</sup> Rniabäza lo Dios jianij xcäriejntu te gacbeetu xhini'c najc speranz xten yäl'racrejdxtu lo xtiidxni, te gacbeetu lacti saru, lacti sajz yäl'nasa'c ni gudeed Dios lo Jesucrist näjza loj rexpejn ni,

<sup>19</sup> te gacbeezatu lacti gurobduxh najc yäl'rnibee nani rajpni nez loonu nani ahuililajz xtiidxni. Guiraa redee ruluu lacti nadip najc yäl'rnibee xten Dios.

<sup>20</sup> Lagajc yäl'rnibeere bejn dzuun par Jesucrist. Con yäl'rnibeere baspajn Dios Jesucrist lo rebengut, te gurejni xladbee Dios cadro rnibeeni xhaguibaa.

<sup>21</sup> Maazru sajcn lo chutis gubier, lo chutis yäl'rnibee, lo xhitis yäl'nadip, lo chutis ni rnibee; maazru sajcn lo chutis nani abibee te guinibee, sigajc naj, sigajc nen redxj ni churu jääd.

<sup>22</sup> Niluxh badeed Dios guira'tini ladznaa Jesucrist, laazani bejn bibee Jesucrist gunibeeni lo guiraa xhixten xquidooni.

<sup>23</sup> Reben guidooore najc si'c tiejx xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

## 2

*Ruslaa Dios nurnu sa'csi rinälajzni nurnu*

<sup>1</sup> Laani baniidxni yäl'nabajn lojtu che najctu si'c bengut nez loj Dios sa'csi rujntu dojl.

<sup>2</sup> Galoo gubajntu lo dojl, entis lo xnez guedxliujre guzajtu, biutu xtidx bendxab nani rnibee guedxliujre. Sprit xtenni rujn dzuun nen lastoo rexi'nni nani di gucuadijag xtidx Dios.

<sup>3</sup> Luxh galoo, naj nuure nadxaagnu lojreni, biennu si'c ni rlanj tiejxhnu. Dxejc biennu si'ctisni rlanj tiejxhnu, si'ctisni biajb xhigabnu. Nungäjl guidxe'ch Dios loonu, sigajc bidxe'chni loj guiraa reben guedxliuj.

<sup>4</sup> Niluxh balaslajz Dios nuure. Con xcäl'sanälazduxhni huinälajzni nuure.

<sup>5</sup> Mase anajcnu bengut lo dojl, laani baniidxni yäl'nabajn loonu. Rajpnu yäl'nabajnre con Jesucrist. Sa'csi balaslajzni nuure baslaani nuure nen dojl.

<sup>6</sup> Baspañsacni nuure con Jesucrist; sigajcza bejnni cuenäjnu Jesucrist xhaguibaa, <sup>7</sup> te nen redxey ni churu jääd, guluilojni lacti sajc xcäl'nasa'c xten yäl'rulasajzni, ni'c sanälajzni nuure, najcni huenduxh loonu por Jesucrist.

<sup>8</sup> Sa'csi rulasajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu.

<sup>9</sup> Xhet xcuent xhi dzunsa'c di ni biennu, te di chu tejtu gac nayedxlanjdi.

<sup>10</sup> Dios najc ni benchee nuure. Sigajcza con Jesucrist bejnni gacnu bejn ni rujn dzunsa'c nani galooli agunibee Dios jienpacnu.

#### *Yäl'rbedxilajz ni rajpnu por Jesucrist*

<sup>11</sup> Ni'c col'snaj lajztu xho gujctu galoo. Ditu njac rexpejn Israel. Rniireni la'tu 'benzijt' sa'csi ditu chu bee si'c ru' rexpejn Israel. Sa'csi lagajc con naareni rusäl'reni bee.

<sup>12</sup> Dxejc suga'tu ditu gumbee Jesucrist. Zijt yu'tu loj rexpejn Israel, najctu benzijt. Nicla gumbeetu rediidx ni bia'n Dios loj rexpejn Israel. Ditu niunloj guslaa Dios la'tu lo dojl, dizatu niembee Gueb Dios lo guedxliujre.

<sup>13</sup> Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist.

<sup>14</sup> Jesucrist najc ni rbedcxi lajznu. Laani bejn gujc rexpejn Israel tejsi con rebenzijt. Laani badzucajni redzuun xten leii te gujc rexpejn Israel tejsi con rebenzijt.

<sup>15</sup> Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzijt. Lagajc laani bejnni bidxagsa'reni te gujcreni tejsi che huililajzreni xtiidxni, gujcreni te ben'coob. Dxejc gulecdxini lajznireni.

<sup>16</sup> Con yäl'gujt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdxechnej sa'reni.

<sup>17</sup> Cajza lo guijtz rediidxre:

Biäädni te basule'ni xho ga'p rebejn yäl'rbedxi lajz rebejn ni suga' zijt lo Dios najza reni suga' gajxh lo Dios.

<sup>18</sup> Laani bejn sajc jitu' guiro'p cuaa bejn lo Dios con tejsi xhigab, najza tejsi Sprit.

<sup>19</sup> Ni'cni dirutu gac benzijt, bejn ni rut numbeedi. Anajctu tejsi con rexpejnni, najczatu sa' rexpejn Dios.

<sup>20</sup> La'tu najctu si'c te yuro. La'tu najctu si'c padeer xten yu'ga. Reapost najza reprove't najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajcru, sa'csi Jesucrist rnibee.

<sup>21</sup> Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist.

<sup>22</sup> Sigajcza la'tu najza rexpejn Israel ni huililajz najctu tejsi con Jesucrist. Cagustioobtu guidooga te nenni cuääz Sprit Dxan xten Dios.

### 3

#### *Pabl nungälj chanä xtidx Dios lo rebenzijt*

<sup>1</sup> Ni'cni yu'ä nen latzguuib, narä, Pabl sa'csi cagusule'ä Jesucrist, te jäädnää xtiidxni lojtu, najctu benzijt.

<sup>2</sup> Pet abiejn diajgtu lacti hueen najc Dios baniidxni dzuunre loä, jäädnää xtiidxni lojtu.

<sup>3</sup> Dios baluiini xhigab-xhiga'tzni loä (si'cni bacuaä lojtu galoo).

<sup>4</sup> Che gojtu guijtzga, sacheetu cati ananä rexhigabxhiga'tz xten Jesucrist.

<sup>5</sup> Xhigab-xhiga'tzre di bejn niembee galoo, niluxh naj Sprit Dxan xten Dios abaluiinini loj reapost najza loj reprove't.

<sup>6</sup> Dee najc xhigab-xhiga'tzga: por rediidx xcuent Jesucrist ni ruslaa bejn nen dojl rujn Dios gac reni najc benzijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yäl'nasa'c si'c bia'n Dios diidx.

<sup>7</sup> Narä nacä te apost xten dzuun ni baniidxni, por xcäl'rulasajz Dios ni cuaxlia'ä. Dios baniidx dzuunre loä con xcäl'rnibeduxhni.

<sup>8</sup> Luxh masä guxiiru sacä lo guiraa rexpejnni, loä baniidxni xcäl'racnäjni te lo rebenzijt gusule'ä xtiidxni, nalajznu redidxcoob xcuent xcäl'nasa'c Jesucrist,

<sup>9</sup> te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'.

<sup>10</sup> Si'c gujc te naj jien guiralii yäl'nanduxh xten Dios. Reni najc xpejnpacni neñ xquidooni guluii yäl'najnre lo rexangl Dios, loj reni rnibee xhaguibaa.

<sup>11</sup> Galooli bejn Dios xhigabre par tejpas, ni'cni biääd xtadnu Jesucrist te guzobj xhigab ni bejn Dios.

<sup>12</sup> Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni.

<sup>13</sup> Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

#### *Xcäl'sanälajz Jesucrist*

<sup>14</sup> Ni'cni ruzuxhibä nez loj Xtad Dad Jesucrist

<sup>15</sup> nani badeed lajni lo guiraa reni yu' xhaguibaa näjza reni yu' lo guedxliuj,

<sup>16</sup> rniabä loj Dad xhaguibaa gutijpni lastootu con yäl'rnibee xcuent Sprit Dyan xtenni, sa'csi yuduxh xcäl'nasa'cni lo xcä'rdimbicha'ni xhaguibaa.

<sup>17</sup> Rniabäza lo Dios te jädläjz Jesucrist neñ lastootu sa'csi ahuililajztu. Te che agusudzu'tztu, agusutijpntu lo yäl'rinälajz

<sup>18</sup> dxejc sajc gacheetu sigajc guiraa rexpejnpacni lacti gulajg, lactiza siool, lacti jäät, lactiza jiaa najc yäl'sanälajz xten Jesucrist.

<sup>19</sup> Te gumbeezatu xcäl'sanälajz Jesucrist ni najc gurobduxhrej, digacdi guichalonuni. Te chaza lastootu, näjza xcä'riejntu con guiraa rexcäl'nasa'c Dios.

<sup>20</sup> Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dyan ni rujn dzuun neñ lastoonu suniidxni reyäl'nasa'c.

<sup>21</sup> Loj Diosre coldeed xquixtios. Colguiliä'p xpala'nni neñ guidoo xcuent Dad Jesucrist guira dxej, par tejpas. Sugacni si'c.

## 4

### *Por Sprit Dyan nadxaag sa'nu*

<sup>1</sup> Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnzatu xhigab cheni gurejdxni la'tu.

<sup>2</sup> Colguibajn con yäl'nalasajz, näjza yäl'nadolajz, colcuecdxi lajztu. Colyujn huant resa'tu con yäl'rinälajz sa'ni.

<sup>3</sup> Colhuui te guidxaag sa'tu gactu tejsi con Sprit Dyan ni ruscuecdxi lajztu.

<sup>4</sup> Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl'runloj ni rajptu xcuent diidx nani gurejdxtu.

<sup>5</sup> Rajptu tejsi Dad, tejsi yäl'rilihajz, tejsi yäl'robnis,

<sup>6</sup> tejsi Dios, tejsi Xtad guiraanu nani rnibee guira'ti lo guiraanu.

<sup>7</sup> Lo tejganu abaniidxni dzuun si'ctis bejn Jesucrist xhigab guniidxni lo tejganu.

<sup>8</sup> Ni'cni caj lo reguijtz:

Che huä'pni xhaguibaa, cadro rnibeeni,

abejnni gaan loj guiraa yäl'rnibee,

dxejcti badeedni dzuun lo rexpejnni lo guedxliuj.

<sup>9</sup> ¿Xhi säloj cadro caj, "huä'pni"? Dee säloj ganid biäjtni maazru jäät lo guedxliuj.

<sup>10</sup> Lagajc nani biäjtgä, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj.

<sup>11</sup> Lagajc laani badeedni xtzuum tejgareni. Yu'reni badeedni gac apost, yu'reni badeedni gac profe't, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejnni.

<sup>12</sup> Guiraa redee badeedni te guluiireni rexpejn Jesucrist, te gunreni dzuun te gustaj'reni rebejn ni gac xquidoo Jesucrist.

<sup>13</sup> Nungäj, gac dzuunre che guidzujnli dxej ni nadxaag-sa'nu guiraanu loj yäl'rilihajz, che guidzujnli dxej riembesa'cnu Xi'n Dios, dxejc anajcnu benguyajl lo xtiidxni, si'c te ni aguroob loj xcäl'rnibee Jesucrist.

<sup>14</sup> Dirunu gac si'c rebiuux ni tera'tsi rusiejch lajzni, rucudiajgreni xtidx chutis bejn, mase xhitis diidx ruluuini. Dxejc riabreni lo redidx-xhii xten bejn nani rusguee, nani cabäjztis gusguee bejn.

<sup>15</sup> Maazru hueen chonuunu loj redidxlii xten Jesucrist con yäl'rinälajz te tiobnu lo guiraa recos xten nani rnibee, lagajc Jesucrist.

<sup>16</sup> Loj Jesucrist nazdu'tz guiraa rexpejnni, te si'cni nazdu'tzsa'reni sääreni, najczeni tejsi loj tiejxh Jesucrist, racnäjä sa'reni segun xhi dzuun rujn tejgareni, casieedrueni te cayajc xhidajlru rebejnğa con yäl'sanälajz.

### *Te yäl'nabancoob con Jesucrist*

<sup>17</sup> Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riabj yejcreni.

<sup>18</sup> Nayääl xcäriejnreni, direni ga'p xcäl'nabajn Dios sa'csi nadduxh lastooreni.

<sup>19</sup> Redee che gucnajd xcäriejnreni gusloj bejnreni guiraloj yäl'rtujy, guiraa redojl ni di nungäjl gunreni.

<sup>20</sup> Niluxh la'tu xhet si'c di bisieedtu loj Jesucrist.

<sup>21</sup> Palga abiejn diajgtu xtiidxni, niluxh abaluiini lojtu didxlii ni siädnä Jesucrist,

<sup>22</sup> colgusaan yäl'nabanyujxh ni gojptu: Lo yäl'nabanyujxhga rujn bejn si'ctis ni rlanjni. Dxejcti si'c runijtni la'tu lo Dios.

<sup>23</sup> Colgusiejch lajztu, colgusia xcäriejntu,

<sup>24</sup> te gactu beñcoob nani bejn Dios, colchanuu te yäl'nabansa'c, te yäl'nabanya xten xtidxliini.

<sup>25</sup> Colguro'n diidx-xhii, colnii didxlii lo resa'tu sa'csi tejsi najcnu guiraanu.

<sup>26</sup> Che guidxe'chtu, na'c guntu dojl. Na'c gusaantu chu xcäl'rdxe'chtu guideb dxej che chääzli gubijdx.

<sup>27</sup> Na'c gusaantu jiu' beñdxab neñ lastootu.

<sup>28</sup> Nani rilajn, na'cru cuanni. Laaca gunni dzuun con ñaani te gunni te dzunsa'c nani gudeed meel lojni te gac gacnäzani rebejn nani xhet rajpdi.

<sup>29</sup> Na'c gusaantu guirii nicla tej didxgujdx ro'tu. Colnii ganax didxsa'c te gacnäjni guisieed reni rucudiajg xtiidxtu.

<sup>30</sup> Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjzani neñ lastootu che guidzujnli dxej ni chäätu lo Dios.

<sup>31</sup> Colguro'n yäl'nabandxuudx xtentu, näj yäl'rdxe'ch, näj yäl'rdxagdijl sa'ni, näj yäl'rbedxa', näj yäl'rgue. Colguibicaj lo guiraa redojlg, na'c gactu bengujdx.

<sup>32</sup> Nungäjl gactu huen loj resa'tu, colgulasajz resa'tu, colsäijl lajztu con resa'tu ni rujn dojl lojtu si'c rsäijl Dios lajzni rextojltu xcuent Dad Jesucrist.

## 5

### *Xho nanab guibajn rexi'n Dios*

<sup>1</sup> Colguibajn si'c nabajn Dios, sa'csi najctu xi'nni nani sanälajzni.

<sup>2</sup> Colchasanäj yäl'sanälajz sigajcni huinälajz Jesucrist nuure cheni badeedni lagajc laani lo Dios, cuajni lo cruzj, gujtni. Laani gujcnii si'c gojn, gujczani yäl'rbibyaal ni bidxagljaz Dios.

<sup>3</sup> Nicla gusä'ttu yäl'rusguee chäääl bejn, nicla redol dxuudx, niclaza yäl'sanälaztej xhixtentisni. Nicla gusä'ttumi lo sa'tu, sa'csi xhet si'c di nungäjl gun bejn ni naban-naya.

<sup>4</sup> Sigajcza colcuälaz diidx ni rujn xtujy, näjza didxnajd, näjza didxñaj nani digac laaca. Colgudeedtis xquixtios lo Dios.

<sup>5</sup> La'tu anajntu nicla tej ni rusguee chälbejn, nicla tej beñdxuudx, nicla tej ni sanälaztej xhixtentisni, nicla renani rajñ rebanäj, nicla tej reni'c di xca' yäl'nasa'c loj Jesucrist, dizareni jiu' lo xcäl'rnibee Jesucrist, xcäl'rnibee Dios.

<sup>6</sup> Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääd xcäl'rdxe'ch Dios loj rebejn ni di gusoob xtiidxni.

<sup>7</sup> Na'c guntu sigajc rujnreni.

<sup>8</sup> Galoo nacäjytis xcäriejntu gubajntu, luxh naj abasanij Jesucrist xcäriejntu. Colguibajn si'c nungäjl guibajn nani abianij xcäriejnii.

<sup>9</sup> Sa'csi nani abianij xcäriejnii rujn dzunsa'c, rniini didxgulii.

<sup>10</sup> Colguisieed xhini'c rchagljaz Dios.

<sup>11</sup> Na'c guntu redzunduudx nani rujn reni nacäjy xcäriejnreni, coltilnäj reni rujn sa' dzungujdxga.

<sup>12</sup> Sa'csi te xtujyli najc jieinu diidx xcuent xtzunreni ni runxhiga'tzreni.

<sup>13</sup> Niluxh guiraa sa' redzuunre ni rdilnäjnu, huenliisi sien xhi najcreni, suzenni lo xpianij Jesucrist. Sa'csi guira'ti ni ružen najc nianij.

<sup>14</sup> Ni'cni caj loj regujtz, räjp Dios:

Gubajn, huistie luj ni rejslu.

¡Huistie lo dojl, luj ni naga'lu lo dojl si'c bengut,

te gusanij Jesucrist xcäriejnli!

<sup>15</sup> Colhuui, colsin, na'c guibajntu si'c te bejn nani di gacbee, colguibajn si'c bejn nani yu' xcäriejnii.

<sup>16</sup> Coltedsa'c redxej sa'csi neñ redxejre ganax cosgujdx rujn bejn.

<sup>17</sup> Ni'cni na'c guibajntu si'c rebejn nani di gacbee, colyacnasiñ, te gacbeetu xhini'c najc ni rlanj Dad xhaguibaa guntu.

<sup>18</sup> Lacuaa yätu nejñ nani runij bejn, colgapchee Sprit Dxan xten Dios neñ lastootu.

<sup>19</sup> Colnii loj resa'tu rediidx nani gunii rebejn tiemp gulá'preni xpala'n Dios, colyelza redij xten Dios, con reyälrirel colguiliá'p xpala'n Dios nen lastootu.

<sup>20</sup> Di jiäl lajztu gudeedtu xquixtios lo Dios xtadnu con laj Dad Jesucrist.

*Xho guibannäj sa' rexepejn Jesucrist*

<sup>21</sup> Sa'csi rajntu Jesucrist, colgusoob xtidx sa'tu.

<sup>22</sup> Lojtu, regunaa ni abachnaa, rniä scree: Colgusoob xtidx chäälту si'c rusoobzatu xtidx Dad Jesucrist.

<sup>23</sup> Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexepejn guidooni lo redojl, najcreni si'c tiejxhni.

<sup>24</sup> Ni'cni, sigajc rusoob reben guidooga nani rnibee Jesucrist gunreni, sigajcza nungäjlgusoob regunaa ni abachnaa nani guinibeetis chäälreni gunreni.

<sup>25</sup> Lojtu, reniguii ni abachnaa rniä scree: Colchanälajz chäälту sigajc ni huinälajz Jesucrist rexepejn guidooni, badeedni lagajc tiejxhni loj Dios cheni cuajni lo cruzj por laareni

<sup>26</sup> te basiani xtojl rexepejn guidooni, te gujcreni te beñcoob, abidiib lastooreni con xtiidxni si'c rdiib te cos con nis

<sup>27</sup> te che xca'ni rexepejn guidooni, najcreni te guidoo ni sajcru, te guidoo nani xheti xtojl,ni, te guidoo nani sugadzu'tz, te guidoo xhet xhi riäädxd, najcni te guidoya, xheti xhi xtojldini.

<sup>28</sup> Sigajcza, te niguii nani abachnaa nungäjlg chänälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani.

<sup>29</sup> Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexepejn guidooni.

<sup>30</sup> Najczanu tejsi loj tiejxh Jesucrist, loj xpäälni, loj rextzujtni.

<sup>31</sup> "Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c tejsi bääł, si'c tejsi bejn."

<sup>32</sup> Dee najc te diidx xhiga'tzduxh; li te "¿chuj?" najcni. Niluxh narä rniä xcuent Jesucrist con rexepejnguidooni.

<sup>33</sup> Niluxh nanabpac chanälajz tejgatu chäälту sigajc sanälajztu tiejxhtu. Dxejcti gunaa ga'pzani xpala'n chäälni.

## 6

<sup>1</sup> Lojtu biuux, rniä scree: Colgucuaiajg xtidx Jesucrist, colgusoob xtidx xtadtu sa'csi ni'c sajcz nez loj Dios.

<sup>2</sup> Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga;

<sup>3</sup> "Te saruduxh guibajntu xchero lo guedxliujre."

<sup>4</sup> La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälnej, colgulijdxreni con xtidx Jesucrist.

<sup>5</sup> La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu nen lastootu. Colejejn xtzuumni si'cni najc xtzuum Jesucrist.

<sup>6</sup> Colejejn xtzuumni, niluxh xhet che suga'tisreni, cahuiireni, parsj jiansa'ctu lojreni. Maazru hueen guntu dzuun si'c xmos Jesucrist; colejejn guira'ti si'cni rujntu xtzuumnactu; si'cni rlaiz Dios.

<sup>7</sup> Coleyujn xtzuumni guideb lastootu si'c xmos Jesucrist, et si'cni dxi xmos beñ guedxliuj.

<sup>8</sup> Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

<sup>9</sup> Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

*Nani gacw rexepejn Jesucrist lo guerr*

<sup>10</sup> Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälradip xcälrnibeeni.

<sup>11</sup> Colgajcw xhabguuib xten Dios te gac sudzu'tzту lo reyälrusguee xten beñdxab.

<sup>12</sup> Sa'csi xhet beñ guedxliujtis cadilnäjnu. Cadilnäjzanu reguxhtis xte yälcäjy, näjza reyälrnibee, rebejn nani rnibee loj reyälcäjy, näjza rexangl beñdxab nani rnibee bej xten guedxliujre.

<sup>13</sup> Ni'cni colca' guideb lad-guiib xten Dios nani runiidxni loonu te gac sudzu'tznu nen dxej ni guideednu trabajwduxh, te che agudejdni, laltis sisiudzu'tznu.

<sup>14</sup> Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu.

<sup>15</sup> Colcucaa gurach-guiib ni'tu (ni'c najc xtidx Jesucrist ni ruscuedcxj lajztu).

<sup>16</sup> Colca' escud-guiib ni najc yälirililajz te con yälirililajz xtidx Dios di beñdxab gun gaan gusguee la'tu con rextidx-xhiini.

<sup>17</sup> Colca' yälruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxiän xten Dios ni najc xtidx Dios.

<sup>18</sup> Colnab lo Dios guiraa dxej; colnab lojni con Sprit Dxiän xtenni; colsusintis; na'c jieedu guiniabtu lo Dios xcuent guiraa xpejnä.

<sup>19</sup> Colnabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälruslaa bejn lo dojl.

<sup>20</sup> Xcuent rediidxga ni yu'ä neñ latzguiib, caduä con caden. Ni'cni colnab lo Dios te na'c guidxebä guiniä rediidxga si'cpacni säbyäj guiniäni.

*Lult xtixtios*

<sup>21</sup> Niluxh te gacbeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siäd lojtu te gusule'ni diidx.

<sup>22</sup> Laapacni ruxhalä lojtu, te gacbeetu xho yu'nu, te si'c guscuecdxini lajztu.

<sup>23</sup> Rniabä yälrbexilajz par resa'nu, näjza yälrililajz con yäl'sanälajz xten Dios Xtadnu näjza xten Dad Jesucrist.

<sup>24</sup> Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

## Te Guijtz Lo Reben Filipos

*Latzguiib yu' Pabl bacuaani loj rebenguidoo xten guedx Filipos*

<sup>1</sup> Pabl nájza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbájz guedx Filipos, loj rebejn nani ruluu xtidx Dios neñ reguidoo nájza loj rediaconos.

<sup>2</sup> Gacnáj Dios la'tu con yälrbedxi-lajz xten Xtradnu nájza xten Dad Jesucrist.

*Rniab Pabl lo Dios xcuent rebejn nani rililajz*

<sup>3</sup> Che rnaj lazä la'tu, rudedä xquixtios lo Dios.

<sup>4</sup> Che rniabä lo Dios, rbaa lazä rniabä lo Dios xcuent la'tu,

<sup>5</sup> sa'csi abidxaag sa'nu lo xtidx Jesucrist che guslojli huililajzta hasta najli.

<sup>6</sup> Anancheä Dios nani gusloj cayunsa'c dzuun neñ lastootu, lagajc laani suluxsa'c dzuunga dxejli ni jiääd Jesucrist.

<sup>7</sup> ¿Xhiru xhigab nungäj] gunä? Ni rapä la'tu neñ lastoä sa'csi cayacnäjtu narä neñ latzguiib luxh rsudzu'tztu riye'tztu lo bejn, gulli najc rediidx nani rusule'ä xcuent Jesucrist nájza la'tu rusule'tu rediidxga.

<sup>8</sup> Dios nanchee xho rbannäätu, xho sanälazä guiraatu lo xcälsanälajz Jesucrist.

<sup>9</sup> Rniabä lo Dios te tioobru xcälrinälajzta naj xcälnejntu nägajc churu xcäriejn guiraatu,

<sup>10</sup> te cuetu nani najc dzunsa'c te si'c guibañ nayatu, te na'c ga'ptu nicla tej dojl cheni jiääd Jesucrist.

<sup>11</sup> Te guidxa lastootu yäl'nasa'c xten te yäl'nabañsa'c ni runiidx Jesucrist, te guspaa lajzta Dios, guiliä'ptu xpala'nni.

*Jesucrist najc xcäl'nabañä*

<sup>12</sup> Rlazä gacheetu betzä: guiraa nani gusacä ni'c cayacnäj guire'chru xtidx Jesucrist.

<sup>13</sup> Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist.

<sup>14</sup> Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxej, guniirureni xtidx Dios.

<sup>15</sup> Gullica yu' reni rusule' xtidx Jesucrist sa'csi rdxe'ch lajzreni, rdxe'chzareni loä. Yu'za reni rusule' xtidx Jesucrist sa'csi laaca najc xhigabreni.

<sup>16</sup> Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä neñ latzguiib.

<sup>17</sup> Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist.

<sup>18</sup> Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxnä niluxh sibaaru lazä.

<sup>19</sup> Ananä laaca guiriä loj guiraa recosre sa'csi canabtu lo Dios xcuentä. Luxh xcälracnäj Sprit xten Jesucrist

<sup>20</sup> rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibañä o palga guetä.

<sup>21</sup> Sa'csi palga guibañä, su'ä lo Jesucrist; luxh palga guetä sunäru gaan.

<sup>22</sup> Palga guibañäru lo guedxliujre, sajru gunä xtzuan Dad Jesucrist, ni'cni dina gacbeä xhinc cueä xca'ä.

<sup>23</sup> Nagajn najcni par narä cueä lo guiro'preni. Te lajt runä xhigab: malaii guetä te cha'ca cadro yu' Jesucrist sa'csi ni'c najc hueenru par narä.

<sup>24</sup> Niluxh stee lajt nancheä nungäj] guibañäru lo guedxliujre xcuent la'tu.

<sup>25</sup> Niluxh narä racbeäpac siannäaru la'tu, su'äru lojtu te chanuurutu lo xtidx Jesucrist, te guibalajzta lo yälrililajz,

<sup>26</sup> te guibalajzrutu xcuentä loj Jesucrist che guibisacä lojtu stehuält.

<sup>27</sup> Colhuiitis guibajntu si'cpac ni rni xtidx Jesucrist, te palga jiädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yälrililajz xten xtidx Jesucrist.

<sup>28</sup> Na'c guidxejbditu renani rdxe'ch lojtu. Laareni huenliisi ruseñ agunijtreni ni'c rdxe'chreni, ni'cni la'tu huenliisi ruseñ agulaatu neñ dojl si'c baniidx Dios, ni'cni ditu guidxe'ch.

<sup>29</sup> Sa'csi lojtu abaniidx Jesucrist chalilajzta xtiidxnä. Niluxh xhet ni'ctis; nägajcza tedtu trabajw xcuent laani.

<sup>30</sup> Cadejdtu lagajc trabajw ni cahuiitu gudedä luxh naj riejn diajgtu cadedsicä trabajwga.



## 2

*Xcälñalaslajz näjza xcälguobduxh Jesucrist*

<sup>1</sup> ¿La ruspaä Jesucrist lajztu? ¿La racnäj xcälñinälajztu la'tu? ¿La yu' Sprit Dxa xtenni con la'tu? ¿La yu' xcälñanälajzni näj xcälñulasajzni lastootu?

<sup>2</sup> Palga yu'ni, colguspaa lazä, colyejn tejsi xhigab con narä, colga'p lagajc yälñanälajzga, colguidxaa sa'tu, colyejn tejsi xhigab.

<sup>3</sup> Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuumtu con yälñalaslajz, colhuii loj sa'tu si'c beñroru lojtu.

<sup>4</sup> Na'c jiu chu tejtü lagajctis xhixtenni, coljiu tejgatu xhixten sa'ni.

<sup>5</sup> Colga'p lagajc sa' xhigab nani gojzpa Jesucrist

<sup>6</sup> nani mase najcni sigajc Dios, dini niniazdzu'tz xcälñabee Dios,

<sup>7</sup> alga basa'nni te laad yälñabee nani rajpni con Xtradni Dios te gujcní mos cheni gojlni lo guedxliujre. Gujcní si'ctis te bejn.

<sup>8</sup> Che gujcní si'ctis beñ guedxliuj, gujcní beñ nadolajz, beñ nasobdiidx. Basoobni xtidx Dios, gujtni lo cruzj, luxh yälñejt lo cruzj najc te yälñtuiduxh.

<sup>9</sup> Ni'cni baspañsac Diosni, gule'cni Crist te lajt ni najc jiaaru, badeedza Dios sajzru lajni lo laj guiraa relaj ni rusä't bejn.

<sup>10</sup> Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez neñ yuj.

<sup>11</sup> Te guiraa reni gacbeepac, guiniizarení: "Jesucrist najc Dad", te si'c chä'pduxh xpala'ñ Xtradnu Dios.

*Rexpejn Jesucrist najc si'c bajl ni rusani lo guedxliuj*

<sup>12</sup> Ni'cni, resa'ä ni sanälazä, sigajcni rusoohtu xtidxä cheni suganää la'tu, sigajzca colgusoob xtidxä naj ni yu'ä zijt, colhuii tejgatu xho gac laatu neñ dojl, colyajc bejn ni rusooob diidx con yälñdxejb.

<sup>13</sup> Sa'csi Dios najc ni rujn dzuun neñ lastootu te rajc rujntu xhigabsa'c, dxejc racnäjzani la'tu te rajc rujntu si'cni rlanjni.

<sup>14</sup> Loj guira'ti ni rujntu, na'c gusmojmütu, na'cza gun tiop lajztu,

<sup>15</sup> te rut gucuajquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' la' ni tre'tu loj rebenguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy,

<sup>16</sup> sa'csi arapdzu'tztu xtidx yälñabajn ni runiidx Crist neñ lastootu te guspaaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj.

<sup>17</sup> Mase lagajc xtienä guixe' te guiza' te gojn ni xca' Dios xcuent xcälñirilajztu, rbaa lazä, sibalaznääza la'tu.

<sup>18</sup> Sigajzca colguibaa lajztu, colguibalaznäj narä.

*Timoteu con Epafrodito*

<sup>19</sup> Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebä xho yu'tu nejzga.

<sup>20</sup> Sa'csi rutru rapädi nani rujn tejsi xhigab, tej ni guliipac gun dzuun, jupacni la'tu.

<sup>21</sup> Guiraa rebejnre rujntis xtzuumcareni, ðireni jiu gunreni xtzuum Jesucrist.

<sup>22</sup> Niluxh la'tu anajntu xho rujn Timoteu; si'c racnäj te bi'n xtradni, si'cza racnäjni narä lo xtidx Jesucrist.

<sup>23</sup> Ni'cni rlazä guxhaläni te jäädhuiini la'tu, fixgaäsi don xho sasaj xcuentä ree.

<sup>24</sup> Cabäzäza nez lo Dad Jesucrist don la näjza narä sajl jäädhuiigacätu.

<sup>25</sup> Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaltuni te jiuni narä, fiini xhini'c rquinä.

<sup>26</sup> Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni.

<sup>27</sup> Guliica gucxhuuni cuentro, ameer nejtni, niluxh Dios balaslajzni laani, luxh xhet laatisni, balaslajzani narä te di nidedäru loj yälñahuinlajz ni yu'ä ree.

<sup>28</sup> Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu.

<sup>29</sup> Colca'ni con yälñbalajz si'c bejztu lo xtidx Dios, sigajzca colyejn reni najc sigajc laani.

<sup>30</sup> Xcuent xtzuum Jesucrist ameer nejtni, dini niu xcälñabajntisni te bejnni redzuun nani di niajcdi niujntu lagajc la'tu xcuentä.

## 3

*Te yälñabañsa'cpac*

<sup>1</sup> Naj rebetzä, colguibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu.

<sup>2</sup> Colnati renani najc si'c hä'cw. Colnatiza rebejn nani rujn dzun guijdx. Colnatiza reni ru' bee tiejxhtisreni luxh xlia'si rujnreni si'c.

<sup>3</sup> Renani guliipac yu' bee najc nuure nani ahuililajz xtidx Dios, rienzanu xtuunni si'cni rlanjni sa'csi ayu' Sprit Dxan xtenni neñ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu.

<sup>4</sup> Narä sajcaz guibalazä xcuent ni rujn tiexhä. Palga yu' chu tej ni rbalajz, narä rbalazäru

<sup>5</sup> sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamin, nacä te hebreo, luxh xtadä najc te beñ hebreo; xcuent leii nacä te farisee.

<sup>6</sup> Basobduxhä guiralii rextidx Dios ni caj lo leii ni'cni basacsiduxhä rexpeñ Jesucrist; xcuent yäl'nabansa'c xten leii, xhetliidi xtolä yu'; basobdzu'tzä xtidx leii.

<sup>7</sup> Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist.

<sup>8</sup> Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembeee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist,

<sup>9</sup> te chu'ä lojni, xhet xcuentdi xcäl'nabansa'cä ni najc xcuent leii, alga xcuent yäl'nabansa'c ni najc xcuent xcäl'rillilajz Jesucrist, yäl'nabansa'c ni najc xten Dios xcuent yäl'rillilajz.

<sup>10</sup> Ni'cni rlazä gumbleäru Jesucrist loj yäl'nibee ni rajpni sa'csi huistie gubansa'cni sacni loj rebeñgut, te gumbleäru retrabajwduxh ni gudejdni, te ganä xho gunä ni rlanj Dios si'c guchee Jesucrist, bejnznani ni rlanj Dios che gujtni.

<sup>11</sup> Te gac guidzunä lo yälguibañsac loj rebeñgut te xca'ä yäl'nabajñ par tejpas lo Dios.

<sup>12</sup> Dizana guiniä "abenä gaan" o "anacä beñsa'c", alga sanuätis te gunä gaan yäl'nabajñ nani cua'ä lo Jesucrist.

<sup>13</sup> La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää naä si'cni guiniäzä nani churu gac.

<sup>14</sup> Si'cni sanuutis ruxuñ bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

<sup>15</sup> Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

<sup>16</sup> Naj, cadrotis abidzunnu lo nani abiembeenu, sigajcza nanab guibañsijcnu, chanuutis gusoobnu rediidxga; nungäjñl guibajñnu loj rediidxre, jiennu tejsi xhigab.

<sup>17</sup> Rebetzä, coltanajñ narä, colyejn si'c runä narä, colhuiiza rebejn nani nabajñ si'c nabañä. <sup>18</sup> Xhidajñ huält aguniä lojtu, naj ronäli rnisacä lojtu, yu' xhidajñ reni rdxe'ch lojtu, rniyajreni nani bejn Jesucrist che gudijxni xtojñnu lo cruzj.

<sup>19</sup> Redee che luxh xnezyujreni sinitojreni, sa'csi xtioozreni najc yäl'rausa'c; luxh rbaali lajzreni rujnreni dzun xtuujy; luxh riutisreni xcäl'nasa'c guedxliujre.

<sup>20</sup> Niluxh nuure, xhaguibaali najc laadxnu, luxh ro'cli cabääznu jiaäd nani ruslaanu neñ dojl, nalaaaznu lagajc Dad Jesucrist.

<sup>21</sup> Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl'nibeeni. Sujnni dee con yäl'nibeduxh ni rajpni te rnibeeni loj guirali'ti, guiraa nejz.

## 4

### *Colguibalajztis xcuent Dad Jesucrist*

<sup>1</sup> Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl'nasa'c xtenä, colsudzu'tz loj xtidx Jesucrist.

<sup>2</sup> Rniabduxhä lo Evodia näjza lo Sintique, rulidxäreni gunreni tejsi xhigab xcuent Dad Jesucrist.

<sup>3</sup> Sigajcza rniabä lojlu betzä, ni runnä narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj neñ reguijtz xten yäl'nabajñ par tejpas.

<sup>4</sup> Colguibalaznäjtis Dad Jesucrist; stehuält rniä: colguibalajz.

<sup>5</sup> Sugacbee guiraa rebejn xho najc xcäl'nabajñtu lo xtidx Dios. Asiäddzungajxh dxej xten Dad Jesucrist.

<sup>6</sup> Na'c guidxiejbtu, colnabtis lo Dad guira'ti, colgudeedza xquixtios lojni lañ ni cabedxcanabtu lojni.

<sup>7</sup> Dios guniidx xcäl'rbedxilazduxhni, nicla guntu xhigab lacti najc yäl'rbedxilajzga. Yäl'rbedxilajzga ga'p lastootu näjza xcäriejntu loj Dad Jesucrist.

*Colyejn xhigabsa'c*

<sup>8</sup> Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsac xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab.

<sup>9</sup> Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jiannäjni la'tu.

*Gojn xten reflipenses ni xca' Pabl*

<sup>10</sup> Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaajztu niacnäjtu narä, luxh di niacjdi.

<sup>11</sup> Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä.

<sup>12</sup> Sajc guibanä che guxi rapä; sajc guibanä che xhidaj rapä; abisiedä guibanä xhotis; sajc gauduxhä, sajcza guilianä; sajc gapä xhidajl xhixtenä, sajcza tedä trabajw.

<sup>13</sup> Guira'tini sajc gunä sa'csi Jesucrist racnäj narä.

<sup>14</sup> Niluxh xhet najc di; laaca dzuun bejntu che bejntu xhigab gacnäjtu narä la' ni cadedä trabajw.

<sup>15</sup> Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä.

<sup>16</sup> Cheni yu'äli guedx Tesalónica, baxha'ltu meel loä tej-tio'p huält.

<sup>17</sup> Niluxh narä di rlazä xca'ätis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxha'ltu meel loä.

<sup>18</sup> Naj acua'ä guiraa ni baxha'ltu, arapä xhidajl, arapduxhä sa'csi acua'ä nani biädnä Epafra dito baxha'ltu loä, te gojn ni rlianejxh si'c guxhyaal, te dzunsa'c ni rchaglajz Dios.

<sup>19</sup> Dios xtenä guniidx lojtu guiraa nani riäädx xca'tu, si'ctisni rajpni reyäl'nasa'cduxh xhaguibaa con Dad Jesucrist.

<sup>20</sup> Colguiliä'p xpala'n Dios xtadnu guixe-guixee par tejpas. Si'c gacni.

*Lult xtixtios*

<sup>21</sup> Coldeed xtixtios lo guiraa rebejn ni abia lastooni nez loj Dad Jesucrist. Rebejztu ni yu' ree näj narä ruxha'ltu xtixtios lojtu.

<sup>22</sup> Guiraa rebejree ni abia lastooni nez loj Dad Jesucrist ruxha'ltu xtixtios, niluxh ruxha'ltu resä' César xtixtios lojtu.

<sup>23</sup> Suga'p xcäl'racnäj Dad Jesucrist lastootu. Sugacni si'c.

## Te Guijtz Lo Rebeņ Colosas

*Bacuaa Pabl loj rebeņ guidoo ni yu' guedx Colosas*

<sup>1</sup> Narā, Pabl nacā te apost xten Jesucrist. Dios gule narā. Narā nājza bejtznu Timoteu  
<sup>2</sup> cagucuaanu reguijtzre loj rebeņ Colosas nani nabannaya rujnreni si'cpacni rlažz Dios, nājza reni najc bejtznu lo xtidz Jesucrist. Xca'tu yālracnāj nājza yālrbexilajz xten Dios xtradnu.

*Rniab Pabl gudeed Dios yālnajņ xtenni*

<sup>3</sup> Rdeednu xquixtios lo Dios xtrad Dad Jesucrist rniabnu lojni xcuenttu guixe-guixee.  
<sup>4</sup> Abiejņ diajgnu xho rililajztu xtidz Dad Jesucrist, nājza xho sanāljaztu rebejņ ni ahuililajz xtidz Jesucrist,

<sup>5</sup> sa'csi cabājztu xca'tu reyālnasa'c ni yuchee xhaguibaa par la'tu. Laa xcuent reni'c ni biejņ diajgtu cheni bacuadiajgtu xtidzlii Jesucrist xcuent yālruslaa lo dojl.

<sup>6</sup> Laa rediidxga ni abiāād lojtu sigajc ni bire'chni guideb lo guedxliuj, luxh cayac xhidajlru rebejņ ni cayabee diidxre, asalilajzreni diidxga, sigajc guzajctu la'tu. Cheni biejņ diajgtu xtidz Jesucrist, dxejc biembeezatu guliipac najc xcālrulasajz Dios.

<sup>7</sup> Sigajcza bisieedtuni lo Epafra, ni sanuutis cayacnājni nuure lo dzuun. Laani najc te bensa'c, yu'ni lojtu cayujņpacni xtzuum Jesucrist lacuaa nuure.

<sup>8</sup> Laani abasule'ni diidx loonu xho sanāljaz sa'tu sa'csi nabajņ Sprit Dxaņ xten Dios neņ lastootu.

<sup>9</sup> Laa ni'cni dxejli nani biejņ diajgnu diidxre xcuenttu, di cuāāz cabedx-canabnu lo Dios, canabnu gacheduxhtu xho rlažz Dios guntu, guniidxni guiraa yālnajņ nājza gusanijņi xcāriejntu

<sup>10</sup> te guibajntu si'cni nungājļ guibajņ bejņ ni sanajļ Dad Jesucrist, te guspaatu lažzni lo guiraa redzuun. Chanuuzatu gunrutu guiraa redzunsac nājza jianijru xcāriejntu xcuent yālrimebe Dios.

<sup>11</sup> Tioobrutu loj xcālnadip, xcālrimebe Dios te guibaa lažztu gustuplajztu, cue'cdxilajztu loj xhitis ni sajctu.

<sup>12</sup> Guibalajznu guideednu xquixtios loj xtradnu Dios nani basudzu'tz nuure te xca'nu yālnabajņ par tejpas sigajc guiraa rebejņ nani ahuililajz xtiidxni yu'reni lo xpianijņi.

<sup>13</sup> Laani abaslaani nuure loj xcālrimebe yālnacājy, abateedni nuure lo xcālrimebe xi'nni ni sanāljazni.

<sup>14</sup> Laa xi'nni ni baslaa nuure neņ dojl cheni baxhe'ni xtiejņni, gujtni lo crujz, dxejc gudijxni rextojļnu.

*Gubisacnu loj Dios xcuent xcālgujt Jesucrist*

<sup>15</sup> Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujņ lojni. Laani guyu'ni galodoo luxh rniweeni lo guiralii ni yu' lo guedxliuj.

<sup>16</sup> Por laani benchee Dios guiralii ni yu' xhaguibaa ni yu'za lo guedxliuj, renani ruzeņ sigajc renani di guzen: rereii, nājza reni rniween loj rexangļ Dios, nājza reni rniween loj rexangļ bendxab, nāgajcza reyālrimebe xten reguixhajg, sigajczani loj regubier, lo reguxhtis ni rajp yālrimebe, guiraani guc-chee por laani, nājza par laani.

<sup>17</sup> Alanabajņ Jesucrist galooli, che gajdli guirixtiej guedxliuj. Por laani yu' guira'ti ni yu'.

<sup>18</sup> Laani najc nani rniween guidoo, nalajznu rebejņ nani ahuililajz xtiidxni. Laani najc ni gulāxtiej guira'ti. Ganiddoo laani huājs lo rebeņgut te rniweeni. Loj guira'ti ni yu' laatisni najc nani sajc guinimebe.

<sup>19</sup> Sa'csi bidxagļajz Dad Dios ga'p Jesucrist guiralii yālrimebe nani najc xten Dios,

<sup>20</sup> por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiājļ-lajzni, aguredxi lažzni sa'csi bixe' xtiejņ Jesucrist lo crujz.

<sup>21</sup> Luxh la'tu gujctu si'c beņzijt lo Dios sa'csi galoo rdxe'chtu lo Dios neņ lastootu xcuent redzungujdx nani bejntu.

<sup>22</sup> Niluxh ņaj abiājļ-lajz Dios abadzu' Jesucrist la'tu, agucnayatu gubi'tu lo Dios xcuent xtiejņ Jesucrist ni baxhe'ni lo crujz cheni gujtni. Ni'c bejņni te che suutu nez lojni, xhetiru xtojļtu, xhet xhi guiniidi Dios lojtu sa'csi anayapactu.

<sup>23</sup> Niluxh riājļ chanuu sudzu'tztu, cuedxitu lo yālrililajz. Na'c gusaantu chu gusiejch-lajztu te cuālaztu xtidz Jesucrist nani abiejņ diajgtu. Rediidxga abasule'zanu loj guiraa rebejņ ni re' lo guedxliujre. Luxh lagajc narā, Pabl rusule'ā diidxga sa'csi parpac ni'c gule Dios narā.

*Dzuun guidoo najc xcuent Pabl*

<sup>24</sup> Naj rbalazä cadedä trabajw xcuentu sa'csi retribajw ni cadedä lagajc narä cagusa' nani xayäädx lo retribajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist.

<sup>25</sup> Ni'c nacä te bejn ni rusule' diidx nen guidooga. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios,

<sup>26</sup> te gabeenu rexhigabxhigat'z nani najc xhigat'z galododuxh niluxh naj abaluiini redidx-xhiga'tzre loj rexpejñni.

<sup>27</sup> Lojreni bejn Dios xhigab guluiini reyäl'nasa'c xten yäl'rdbimicha' xten redidx-xhiga'tz ni cagusule'ni loj rebenzjiz. Yäl'xhiga'tzre säloj Jesucrist rbäjz nen lastootu ni'c runlojtu chaläjztu lo yäl'rdbimicha' xten Dios.

<sup>28</sup> Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujñreni nez loj Jesucrist.

<sup>29</sup> Xcuent dzuunre guideb xtipä runä dzuun con guiraa yäl'rnibee nani runiidx Jesucrist narä.

## 2

<sup>1</sup> Rlazä gabeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä.

<sup>2</sup> Te tioob lastoo guiraatu sa'csi abidxagsa' lastootu lo yäl'sanälajz, näjza te ga'ptu guiraa reyäl'nasa'c ni rajp bejn che rachesa'creni xtidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist.

<sup>3</sup> Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'numbee.

<sup>4</sup> Dee rniä lojtu te di gusguee chu gusgueetu con rediidx-xhii.

<sup>5</sup> Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yäl'rtililajz xten Jesucrist.

<sup>6</sup> Ni'cni sigajc ni huililajztu xtidx Jesucrist, sigajcza col'chasanäj Jesucrist.

<sup>7</sup> Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yäl'rtililajz xten Jesucrist si'c ni abisieedu. Col'gudedduxhru xquixtios lo Dios.

### *Yäl'nabanc'coob ni rudeed Jesucrist*

<sup>8</sup> Colhuui, na'c gusaantu guxhiid bejn xcäl'rtililajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rrlajz Jesucrist.

<sup>9</sup> Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist.

<sup>10</sup> Xhet cayäädxdil lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt.

<sup>11</sup> Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtoj] bejn sa'csi rusaan bejn redzunguijdx, rujñreni tejsi xhigab con Jesucrist. Si'c najc xpee Jesucrist.

<sup>12</sup> Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl'rnibee nani gulässac Jesucrist lo rebengut.

<sup>13</sup> Che najctu si'c bengut lo dojl, näjza sa'csi di bee niu' tiejxhtu, dxejcli baniidx Dios yäl'nabajn par tejpas lojtu con Jesucrist, badzucajni guiraa rextoj]nu.

<sup>14</sup> Dios badzucaj guiraa releii nani basäuu nuure nen dojl, badzucajni lojni, sa'csi bacuaanini lo crujz, cadre gudijx Jesucrist guiralii rextoj]nu.

<sup>15</sup> Cheni gujt Jesucrist lo crujz bejnni gaan loj reyäl'guxhtis näjza guiraa reyäl'rnibee xten bendxab näjza rexspritni. Basanxtujñniren nez loj guiraa rebejn. Laani bejnni gaanreni cheni cuajni lo crujz.

### *Col'quuil recos ni najc xten xhaguibaa*

<sup>16</sup> Nicla tejtü na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzni.

<sup>17</sup> Guiraa redee najc si'csi te balaa xten nani churu jiaäd, te guluiireni ni rujn balaaga, nalajznu ni'c najc Jesucrist.

<sup>18</sup> Na'c gusaantu gudzucaj bejn xcäl'nasa'ctu te gunreni gactu nadolajz, te gantu reangl. Sa' bejn ga richu' loj nani gajdreni fii; rchaloreni najczeni benro xcuent lagajc xhigabreni.

<sup>19</sup> Laareni direni chanajl Jesucrist nani rnibee, nani rujn roobru tiejxhni, nalajznu rexpejñni, sa'csi lojni rca'reni ni rquiin lastooreni, te ruchaagni sa' tejjgareni si'c nadxaquiiid bääl cuä' dzujt lo tiejxh bejn, te gacreni tejsi con Dios.

<sup>20</sup> La'tu agujttu con Jesucrist, abiriitu lo rexhigab xten guedxliujre. Naj çxhicuent guibajntu sigajctis nabajn rebejn nani di gumbee xtidx Jesucrist, ä? çXhicuent rusooobtu rediidx ni caj lo releii? Loj releii caj sa' diidxre:

<sup>21</sup> “Di chahuaŋlu dee, di gaulu ni’c, di caŋlu dec.”

<sup>22</sup> Luxh guiraa redee rnitloj che runnājnini dzuun. Luxh guiraa sa’ leiiga najc diidxtis nani ruluii bejn.

<sup>23</sup> Guluiicani sa’ releiiga rien asdoo ruluiireni yālnanduxh, luxh che rusoob bejn releiiga rchaloreni rajnreni Dios, rchaloreni rac nadolajzreni, rusacsireni lagajc tiejxhreni. Niluxh xlai’si rujnreni guiraa redzuunga, sa’csi sanuutis rujnreni si’ctisni rlajz tiejxhreni.

### 3

<sup>1</sup> Palga anabansactu con Jesucrist, colquuil reyālnasa’c ni yu’ xhaguibaa cadro sobga’ Jesucrist xladbee Dios.

<sup>2</sup> Colyeyn xhigab xcuenttis reyālnasa’c ni yu’ xhaguibaa, na’c guntu xhigabtis xcuent reni yu’ lo guedxliuj.

<sup>3</sup> La’tu anajctu si’c bengut loj reyālnasa’c ni yu’ lo guedxliuj, luxh yālnabajn ni rajptu naj, yālnabajnga naga’tz con Dios xcuent Jesucrist.

<sup>4</sup> Che guluiilosac Jesucrist ni najc xcālnabajntu, dxejc nājza la’tu suluiilojtu con laani lo xcālrđimbicha’ni.

*Yālnabanbiejw con yālnabancoob*

<sup>5</sup> Colcuālaz redzunguijdx xten guedxliuj nani rujntu, yālruguee gunaxteb, yālrujn recosdxuudx, recos ni rdxaglazj tiejxhtu, rexhigab-guijdx, yālršiāb-lajz xhi xten bejn, guiraa redee rujn runijt bejn lo Dios sigajc rujn bejn che rajn bejn rebanājb.

<sup>6</sup> Guiraa redzuunga rujn riāād xcālrđxe’ch Dios yejc renani rujn sa’ redzuunga.

<sup>7</sup> Nājza la’tu bejntu sa’ redzunguijdxga galoo cheni guyu’tu lo sa’ yālnabajnga.

<sup>8</sup> Niluxh naj nājza la’tu colgusaan recosre; nalajznu yālrđxe’ch, yālruche’ch sa’ni, yālrujn latzsiyaj sa’ni, yālrniyaj sa’ni, nājza rediidx-dxuudx ni rniitu.

<sup>9</sup> Na’c gusgueetu resa’tu, sa’csi nanab gusaantu nani bejntu cheni guyu’tu loj redzunguijdx.

<sup>10</sup> Colyajc te beŋcoob, ni guixe-guixee cayanijru xcāriejnini, te gumbesa’ctu Dios, te gactu sigajc najc Dios ni benchee benguedxliuj.

<sup>11</sup> Lo yālnabancoobre rutiru benzijit, ni claza xpeŋ Israel, rutiza rebejn ni ru’ bee, ni claza bejn ni di chu bee; rutiza benzijit, ni claza bejn ni siāād zitduxh; rutiza mos, ni claza bejn nani di chu lo bejn, sa’csi che rililajz te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

<sup>12</sup> Naj agule Dios la’tu te gactu xpejnini nani gac naya, nani sanālazjni, colguibajn con yālrulaslazj, na’c guidxe’chtu, colyacnadoo con yālnadolajz, colniiza nadolajz.

<sup>13</sup> Colyujn huant, na’c guidxe’chtu loj sa’tu, palga yu’ chu sa’tu rdx’e’ch loj sa’ni, colgusiāj-lajztu sigajcni basiāj-lajz Dad Jesucrist lojnu xcuent rextojlnu.

<sup>14</sup> Che abejntu guiraa recosre, colguuilru yālsanālazj nani rusa’ loj guiraa recosre.

<sup>15</sup> Xcālrbedxilajz Dios guinibee nen lastootu, sa’csi parpac ni’c gurejdxni la’tu, te gaczatu tejsi con rexpelj Jesucrist. Colgudeed xquixtios loj Dios.

<sup>16</sup> Xtidx Jesucrist chuduxh nen lastootu con guiraa yālnajn, te guluiitu, te gulijdxtu tejsa resa’tu con redij nani gulā’p toDavid xpala’n Dios, nājza redij nani roltu, nājza redij nani rliā’p xpala’n Dios. Redijga golnu te guideednu xquixtios lo Dios nen lastoonu.

<sup>17</sup> Guira’ti nani guntu, sigajc rediidx ni rniitu, sigajcza redzuun ni rujntu, colyeyn guiraani con laj Dad Jesucrist, coldeed xquixtios lo Dios xtadnu con laj Jesucrist.

*Xho nanab guibajn te fami’l ni najc xpejn Jesucrist*

<sup>18</sup> Regunaa nani abachnaa, colgusoob xtidx chāāltu sa’csi si’c rlajz Dad Jesucrist.

<sup>19</sup> Reniguii nani abachnaa, colchanālazj chāāltu, na’c guidxechñajturen.

<sup>20</sup> Reni najc biuux, colgusoob xtidx xtadtu loj guira’ti, sa’csi si’c rchaglazj Dad Jesucrist.

<sup>21</sup> Reni najc Dad, na’c guche’chtu rexi’ntu, didi gac-huin lajzreni.

<sup>22</sup> Reni najc mos, colgucudiajg xtidx xlamtu lo guedxliujre loj guira’ti xtzuumni. Na’c gunga’ctu dzuun che cahuiitisreni si’c rujn renani ruspaa lajz bejntis. Con yālnadolajz colyeyn dzuun sa’csi sanālazjtuo Dios.

<sup>23</sup> Guira’ti nani guntu, colyeyjnini guideb lastootu si’c xtzuumni Dios, et si’c xtzuumni rebejntis.

<sup>24</sup> Anajntu lo Dad Jesucrist sica’tu yālnasa’c ni najc yālnabajn par tejpas, sa’csi loj Dad Jesucrist rujntu dzuun.

<sup>25</sup> Niluxh nani rujn recosguijdx, lagajc xcuent recosguijdxga gudeed Dios lojni, sa’csi tebloj rujn Dios guiraa rebenguijdx.

### 4

<sup>1</sup> Renani najc lam, coldeed loj rexmostu nani riāj xca’reni sa’csi anantu nājza la’tu rajptu xlamtu xhaguibaa.

<sup>2</sup> Colchanuu colnab lo Dios, colsusin che rniabtu lo Dios. Colgudeed xquixtios lo Dios.

<sup>3</sup> Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neñ latzguiib.

<sup>4</sup> Colnab lo Dios te guyasi gusule'ä rediidxga si'cni riäj guiniä.

<sup>5</sup> Colguibansin loj rebejn nani di gumbee xtidx Jesucrist, colgusule' diidx cheni riäj guiniitu lojreni.

<sup>6</sup> Rextiidxtu nanab gacni si'c rchaglajz Dios, saruduxhza gac xtiidxtu te gabeetu xho riäj gudzu'tu diidx loj tejpgareni.

*Lult xtixtios*

<sup>7</sup> Tíquico, bejtznü ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä.

<sup>8</sup> Ruxhaläni lojtu te gacbeepactu xho yu'ä, te guspaani lajztu.

<sup>9</sup> Laani jädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

<sup>10</sup> Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jädhuiini la'tu, sacru colhuiini).

<sup>11</sup> Näjza Jesús nani laaza Justo, ruxhal xtixtios lojtu. Laatisreni najc rexepejn Israel nani cayacnäj loj dzuun xten xcälrnibee Dios. Laareni ruspaä lazä.

<sup>12</sup> Epafras, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlajz Dios guntu.

<sup>13</sup> Narä rniliä xho rdzuun Epafras xcuent la'tu, näjza xcuent rebejn ni yu' guedx Laodicea, näjza guedx Hierápolis.

<sup>14</sup> Lucas, doctoor ni sanälajznu, näjza Demas ruxhalzareni xtixtios lojtu.

<sup>15</sup> Coldeed xtixtios loj rebejtznü nani yu' guedx Laodicea, näjza loj Ninfas, näjza lo rebejn nani re' rolizni.

<sup>16</sup> Cheni agulujx biltu guijtzre, colguxhalni te jielni neñ guidoo xten guedx Laodicea, dxejcti colyelza guijtz nani baxhalä lo rebejn guedx Laodicea.

<sup>17</sup> Colye'tz loj Arquipo: "Bahuisa'c xtzüun Dad Jesucrist nani cua'lu lojni. Bensa'c dzuunga."

<sup>18</sup> Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

## Guijtz Ganid Lo Reben Tesalónica

*Bacuaa Pabl con rexamigwni lo guidoo guedx Tesalónica*

<sup>1</sup> Narä, Pabl, näjza Silvan, näjza Timoteu cacuaanu guijtzre lojtu, resa'nu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. Guspaa Dios näjza Jesucrist lajztu, guscuecdxizareni lajztu.

*Xho huililajz beñ Tesalónica xtidx Dios*

<sup>2</sup> Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios.

<sup>3</sup> Ruzä'tnu lo Dios xtadnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj.

<sup>4</sup> Bejtznu, racbeenu sanälajz Dios la'tu, laani aguleni la'tu.

<sup>5</sup> Sa'csi che basule'nu xtidx Dios lojtu, et ganax diidxtis gujcní, niluxh xcälrnibee Sprit Dxan xten Dios neñ lastootu bejn gucheepactu diidx ni najc didxlii. Nanchesa'ctu xho gujcnu che guyu'nu lojtu. Si'c baluiinu la'tu te guibansa'ctu.

<sup>6</sup> Sigajcni nabannäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxni lojtu, mase gudejdtu trabajw.

<sup>7</sup> Si'c gujc te baluiitu loj guiraa reni rililajz nez Macedonia näjza nez Acaya xho nungäjlgac.

<sup>8</sup> Ni'c abire'ch xtidx Dios, xhet nejzdi Macedonia näjza Acayatis, bire'chza diidx guiranejz. Ro'c najnreni xho sanälajztu Dios, ni'c xhetru nanabti guiniinu lojreni.

<sup>9</sup> Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäjb te rajntu Dios ni nabajnpac ni najc guliipac.

<sup>10</sup> Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni rusläa nuurnu lo xcälrdxe'ch Dios ni churu siääd.

## 2

*Xhi bejn Pabl neñ guedx Tesalónica*

<sup>1</sup> Naj lagajc la'tu najntu, bejtznu, et xlia'di bio'pnu lojtu.

<sup>2</sup> Et najntu xho gudéreni loonu, basacsíreni nuurnu guedx Filipos. Niluxh mase gudejdnu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdnu trabajwduxh.

<sup>3</sup> Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee.

<sup>4</sup> Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinií diidx te jiansa'cnu lo bejn, rniinu diidx te jiansa'cnu lo Dios ni ruhuii lastoону.

<sup>5</sup> Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni niennu.

<sup>6</sup> Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäjlg niennu niacbeetu rajpnu yälrnibee sa'csi baxhal Jesucrist nuurnu.

<sup>7</sup> Niluxh guc nadolajznu che guyu'nu lojtu, cuanäjnu la'tu si'c rcanäj te nan rexpäzni.

<sup>8</sup> Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guiniidxnu te guseednu la'tu xtidx Dios sa'csi sanälazduxhnu la'tu.

<sup>9</sup> Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtu nuurnu la' ni basule'nu xtidx Dios lojtu.

<sup>10</sup> Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu beñdxojn, gujcnu bensa'c.

<sup>11</sup> Anajntu xho baliidxnu la'tu, xho bascuedcxinu lajztu si'c runnäj te dad rexingaanni.

<sup>12</sup> Guiraa dee biennu, te guibansa'ctu si'c nungäjlgun reni najc xi'n Dios, lagajc Dios ni gurejdx la'tu te chunäjntuni lo xcälrnibeeni näjza lo xcälrdimbicha'ni.

<sup>13</sup> Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi beñ guedxliuj. Niluxh gulii xtidx Diosni, sa'csi rusiani lastoo renani rililajz.

<sup>14</sup> Bejtznu, dxejcti bejntu lagajc si'c rujn rebejn xquidoo Dios neñ reguedx Judea reni najc xpen Jesucrist; luxh gusajctu lagajc ni gusajczeni, basacsí reben lajdxtu la'tu. Sigajcza birinajl rexpene Israelreni.



<sup>15</sup> Rexpen Israel bagu't Dad Jesucrist, si'cza bagu'treni lagajc rexpofe'treni, renani bacuaa xtidx Dios, barilaagwzarenì nuurnu. Direni chanälajz Dios, dizarenì gusaan chanajl rebejn Jesucrist.

<sup>16</sup> Che rlanjnu gulijdxnu reni digac rexpèn Israel, te näjza laareni laareni lo dojl, direni gusaan, si'ctis cagutajlreni xtojreni. Niluxh naj abiäädpac yälrdxe'ch xten Dios yejcreni.

*Rlajz Pabl nihuisacni ro'c*

<sup>17</sup> Bejtznu, mase biriinu ro'c, naj dirunu guihui lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu.

<sup>18</sup> Rlajznu nio'pnu, narä, Pabl xhidal huält rlazä niälä, niluxh beñdxab di nusaan.

<sup>19</sup> ¿Xhini'c najc xcälrbääznu, xcälrbalajznu, xcälracnaronu? Lagajc la'tu gactuni che suunu nez loj Jesucrist che jiädsac Dad Jesucrist.

<sup>20</sup> La'tu najc ni ruspaa lajznu ni rliä'pza xpala'nnu nez lo Dios.

### 3

<sup>1</sup> Dxejc, che dirunu nutijp lajznu, biennu xhigab bianxtebä guedx Atenas.

<sup>2</sup> Dxejc baxhalä Timoteu, bejtznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajztu, guzudzu'tzni xcälrlilajztu.

<sup>3</sup> Te nicla tejtü di guidxejb che jiääd reyälhuin sa'csi la'tu anajntu agule Dios nuurnu ni'c sidejdnu trabajw.

<sup>4</sup> Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxca naj.

<sup>5</sup> Ni'cni diruna nutiplazä, baxhalä chu jiädnä diidx xho najc xcälrlilajztu, sa'csi cadxebä andi abasguee beñdxab la'tu, luxh xliä'si biennu dzuun guyu'nu lojtu.

<sup>6</sup> Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu.

<sup>7</sup> Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios.

<sup>8</sup> Naj laaca rdxunnu sa'csi racheenu sudzu'tztu nez loj xtidx Dad Jesucrist.

<sup>9</sup> Xhocha gac guideednu xquixtios lo Dios xcuent guiraatu naj xcuent yälrbalajz ni yu' lastoonu xcuent la'tu nez lo Dios.

<sup>10</sup> Dxej-yääl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacheetu xcuent xcälrlilajztu.

<sup>11</sup> Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiophuiinu la'tu.

<sup>12</sup> Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu näjza loj guiraa rebejn, si'cni rinälajznu la'tu,

<sup>13</sup> te gunni sudzu'tz lastootu, na'c ga'ptu dojl nez lo Xtadnu Dios, che jiääd Jesucrist näjza guiraa rexejnni xhaguibaali.

### 4

*Guibajnnu si'c rchaglajz Dios*

<sup>1</sup> Naj, rebejtznu, rniabduxhnu lojtu, ruliidxnu la'tu con laj Dad Jesucrist, guibajntu si'cni baluiinu la'tu nungäjl guibajntu te guspaatu lajz Dios, te si'c chanuutis guiba'nsa'ctu nez lo Dios.

<sup>2</sup> La'tu, anajntu rediidx ni baluiinu lojtu con xcälrnibee Dad Jesucrist.

<sup>3</sup> Lagajc Dios rlanj nayatis guiba'nsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni.

<sup>4</sup> Tejgatu gantu xho guiba'nnäjtü chäältu nayatis näjza xpala'nni.

<sup>5</sup> Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios.

<sup>6</sup> Rut chutejditu gusguee bejtzni lo redzunguiidxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu.

<sup>7</sup> Sa'csi Dios gurejdxni nuurnu te guibajnnu lo yäl'naba'nnaya xtenni, xhet lo yäl'naba'ndxuudxdi.

<sup>8</sup> Ni'cni bejn ni di gucudiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

<sup>9</sup> Ditu guiquiini gucuaäru diidx xho chanälajztu resa'tu, sa'csi lagajc Dios abaluiitu xho chanälajztu resa'tu.

<sup>10</sup> Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtznu, chä'pru xcälrinälajztu.

<sup>11</sup> Colgutijp lajztu, dxitis colguibajñ, coljiu xtzuuncatu, lagajc naatu colyejn dzuun si'cni agunibeenu guntu.

<sup>12</sup> Te fii rebejn ni di chalilajz laaca nabañsa'ctu, nãgajcza te xhet jiããdxdx xhi rquiintu.

*Xho gac che jiãdsac Jesucrist lo guedxliuj*

<sup>13</sup> Bejtznu, rlanjnu gacheetu xcuent rebengut te di gac-huin lajztu si'c rujñ rebejn ni di chalilajz xtidx Dios.

<sup>14</sup> Si'c ni rililajznu gujt Jesucrist, dxejc gubañsacni, sigajcza rililajznu suspansac Dios guiraa reni nagayejs neñ baa, renani huililajz xtidx Jesucrist. Luxh che guibi' Jesucrist, siãdnãnireni.

<sup>15</sup> Xcuent xcãrñibee Jesucrist rniã lojtu, nuurnu ni nabajñnu che jiãdsac Jesucrist, dinu nid loj reni nagayejs neñ baa.

<sup>16</sup> Sa'csi lagajc Dad Jesucrist siãjt lo guedxliujre, sibedxa'ni, siejnza xse' guixhajg ni rñibee, sibedxa'za trompet xten Dios. Dxejc sibañxga reni nagayejs neñ baa, reni huililajz xtidx Crist.

<sup>17</sup> Dxejc nuure ni nabañsijcnu sidxaagnureni neñ rebãj te lo bej chachagloonu Dad. Si'c chonnu cholaznãjnuni par tejpas.

<sup>18</sup> Ni'cni rniã lojtu, colcuedcxilajz sa'tu con rediidxre.

## 5

<sup>1</sup> Niluxh xcuent redxejga, reijzga, xhet riquiinditu gucuaãni lojtu,

<sup>2</sup> sa'csi la'tu anansa'ctu sidzujñ dxej ni jiãã Jesucrist cheni rut cayunlojdini, sigajc che riããd te gubaan yããl.

<sup>3</sup> Che canii bejn: "laaca dxunnu, dxunsa'cnu", chela gachebereni acadiejdreni trabajw si'c che rdzujñ yãlnayan te gunaa che rajl xi'nni, luxh digacdi guxunreni lojni.

<sup>4</sup> Niluxh bejtznu, di gac nayaãlto te di che xhet cayunlojditu dxej xten Jesucrist, guidzuxhiga'tz dxejga si'c gubaan.

<sup>5</sup> Sa'csi guiraa tu najctu beñsa'c nabajñtu lo bianij, lo rdxee, dinu gac benguijdx, dinu guibajñ lo yããl, lo yãrcãjy.

<sup>6</sup> Ni'cni di nungãjl guidiesnu si'c rejs stecuaa bejn, ni'cni nungãjl sunasiñnu na'cza jiennu redojl ni rlanj tiejxhnu.

<sup>7</sup> Reni rejs, rejsreni yããl, reni rsiojz, rsiojzreni yããl.

<sup>8</sup> Niluxh nuure nabajñnu lo rdxee, ni'cni nanab na'c jiennu si'c, riãjl xca'nu yãrlililajz nãjza yãlrinãlajz si'c rca' soldaad gamangw guiib ni rajcwni, ni rusãuu lastooni. Riãjlza guilãzdzu'tznu sa'csi yãlrusãaa lo dojl najc si'c xhumbrel-guiib ni ru' yejc soldaad ni rusãuu yejçni.

<sup>9</sup> Sa'csi di Dios nibe nuurnu te chonnu gabijl, alga guleni nuurnu te xca'nu yãlnabajñ ni rudeed xi'nni, Jesucrist.

<sup>10</sup> Sa'csi gujt Jesucrist lacuaa nuurnu, te guibañnãjnuni masã nabajñnu lo guedxliujre o nagayejsnu neñ baa che guibi'ni.

<sup>11</sup> Ni'cni, colguspaa lajz sa'tu, tejtú sigajcza steetu, sigajcni cayujntu naj.

*Rulijdx Pabl resa'ni*

<sup>12</sup> Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu.

<sup>13</sup> Riãjlza chanãlazduxhtureni xcuent dzuun ni rujñreni. Colcuedxi con resa'tu.

<sup>14</sup> Rulijdxnu la'tu, bejtznu, colgulijdx reni najc beñlatsiaj; colsudzu'tz lajz reni guxii rbalajz lo xnez Dios; colgacnãj reni di gumbesa'c xtidx Dios, colcuedcxdi lajz guiraasi bejn.

<sup>15</sup> Colhuii di chu tejtú gunza dolguijdx lo rebejn ni rujñ dolguijdx. Laaca guntu ganax dzunsa'c lo sa'tu, sigajcza lo chutis bejn.

<sup>16</sup> Colguibalajztis guideb nabajñtu.

<sup>17</sup> Na'c cuããz guiniitu lo Dios.

<sup>18</sup> Mase xhitis rsiajctu, coldeed xquixtios lo Dios, sa'csi si'c rlanj Dios gun reni rililajz Jesucrist.

<sup>19</sup> Di cuãlaztu xtidx Sprit Dxan xten Dios ni rniini neñ lastootu.

<sup>20</sup> Na'c cuãlaztu xtidx reni rniã xtidx Dios xcuent nani churu gac.

<sup>21</sup> Colquiil guiraa rediidx, coljiannãjtis rediidx ni najc didxsa'c.

<sup>22</sup> Colbicaj lo guiralii dolguijdx.

<sup>23</sup> Lagajc Dios, Dios ni rbecdxi lajztu, gusiapac lastootu, te cucheeni xaimtu, nãj lastootu, nãjza tiejxhtu, te na'c guntu dojl ni di riãjl guntu te cuããztu dxej ni guibisac Dad Jesucrist.

<sup>24</sup> Dad ni gurejdx la'tu rujñza guiraa ni rniini, ni'c sujñzani guiraa redzuunre.

*Ruzadiidxnireni*

<sup>25</sup> Bejtznu, colnab lo Dios xcuent nuurnu.

<sup>26</sup> Colgudeed xtixtios lo rebejtznu ni yu' ro'c.

<sup>27</sup> Con laj Dad Jesucrist rnibeä, goltu guiitzre loj guiraa rebejtznu.

<sup>28</sup> Gacnäj Dad Jesucrist la'tu. Sugacni si'c.

## Guijtz Ni Rojp Lo Reben Tesalónica

*Rucuaanu guiτζzre lojtu, rexpen Jesucrist ni rbájz guedx Tesalónica*

<sup>1</sup> Nará Pabl, nájza Silvan nájza Timoteu, cacuaanu guiτζzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu nájza lo Dad Jesucrist.

<sup>2</sup> Gacnáj Dios Xtadnu náj Dad Jesucrist la'tu, guscuecdxizareni lajztu.

*Gun Dios yálguxhtis loj rebenđojl che guibi' Jesucrist lo guedxliuj*

<sup>3</sup> Bejtznu, ruedeenu xquixhtios lo Dios xcuenttu, si'c riájł jiennuni, sa'csi xcáłriliłajztu siádroobru, nájza yáłrináłajz ni rajp tejgatu nájza sa'tu siádroobruni.

<sup>4</sup> Ni'cni rliá'pnu xpala'ntu neņ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdu trabajw, rusacsı bejntu.

<sup>5</sup> Dee ruluiipac xcálguxhtis Dios najc laaca, ni'c rniı Dios riájł jiu'tu lo xcáłrnibeeni sa'csi cadejdu trabajw xcuent yáłrnibeega.

<sup>6</sup> Sa'csi rujn Dios xhigab riájłza quiix reni bateedtu trabajw xtojłreni, ni'c suteedzani reni'c trabajw.

<sup>7</sup> Niluxh la'tu ni cadejdu trabajw, sujn Dios gusilaznájtu nuure che guluiioł Jesucrist, siriini xhaguibaa siádnájni rexangłni ni sajc, ni rnibeduxh.

<sup>8</sup> Lo te balduxh siáadni, dxejc guisloj susacsıduxhni reni di gaņ Dios, dizareni gusoob xtidx Dad Jesucrist nani rudzucaj dojl.

<sup>9</sup> Guiraareni sidejređni trabajw, par tejpas agunijtreni, zijt chureni lo Dios, lo yáłrdimbicha' xten xcáłrnibeeni.

<sup>10</sup> Che jiáad Dad guiriini xhaguibaa, dxejga siliá'p rexpejnni xpala'nni, sidxelojza renani huililajz laani nájza la'tu, sa'csi huililajztu diıdx ni basule'nu che guyu'nu lojtu.

<sup>11</sup> Ni'c rniabtsınu lo Dios por la'tu, rniabnu lo Dios guinaj lajzni nabajntu si'c riájł guibajni reni guleni. Rniabzanu guniıdx Dios lojtu guntu guiraa redzınsa'c ni rchagłajz Dios guntu, gacnájzani la'tu con xcáłrnibeeni te guntu redzuun ni rujntu sa'csi rililajztu.

<sup>12</sup> Te chá'p xpala'n laj Dad Jesucrist si'cni nabajntu, te laani guiliá'pzeni xpala'ntu, xcuent yáłrináłajz xten Dios nájza Dad Jesucrist.

## 2

*Benđojduxh*

<sup>1</sup> Naj, rniabduxhnu lojtu bejtznu, xcuent dxej ni jiáad Jesucrist, dxej ni guidojzanu lojni,

<sup>2</sup> na'c chugajtu yarsia'. Na'cza gusaantu guchejbreni la'tu con diıdx ni ruluii te bejņ ni najc profe't, nicla con diıdx ni rniı stee bejņ lojtu, nicłza con diıdx ni naareni lojtu caj loj te guiτζz ni naareni baxhalnu lojtu, cadro caj "dxej ni guibi' Jesucrist abidzujņ".

<sup>3</sup> Na'c gusaantu gusguee bejņ la'tu xcuent rediıdxre. Che gajd dxejga guidzujņ, su' bejņ ni sibáłaz xtidx Dios, dxejc suluiioł beņłatsıaduxh, xi'n nani sinitloj par tejpas.

<sup>4</sup> Bejņre siliá'p lagajc xpala'nni, sidxe'chni lo guiraa ni saná laj Dios, nájza xhitis ni rajņ bejņ, te cueni neņ xquidoo Dios, guluiiołni si'c lagajc Gueb Dios.

<sup>5</sup> ŁLa di lajztu guisaj cheni guyusıcá lojtu, rniá rediıdxre lojtu, á?

<sup>6</sup> Naj la'tu anajntu xhini'c ruscuááznı, te na'c guiricajni ansde guisa' redxej xtıeni.

<sup>7</sup> Te yáłxhiga'tz najc dzunłatsıaj ni alacayajc lo guedxliuj, cayáadxtis guibicaj nani caguscuááznı galáıni.

<sup>8</sup> Dxejc suluiioł beņłatsıaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni.

<sup>9</sup> Beņłatsıaduxhre najc si'cpac najc beņdxab. Che guidzujņni, guidzujņni si'c te bejņ nani rnıbee, sujņni seen, sujnzani milagrw ni rusguee.

<sup>10</sup> Con xcáłłatsıaj bejņre susgueeni guiraa renani alagunijł lo Dios sa'csi direni nicájb nináłajzreni didxlii ni nusłareni neņ dojl.

<sup>11</sup> Ni'cni susaan Dios jiáad te yáłrusgueduxh te chalilajzreni didx-xhiı.

<sup>12</sup> Te gabijł jii guiraa renani di nicájb nililajz didxlii, alga bidxagłajzreni yáłłatsıaj.

*Reni gule Dios guirii neņ dojl*

<sup>13</sup> Niluxh nuurnu riájł gudeedtsınu xquixhtios lo Dios por la'tu, bejtznu, ni sanáłajz Dad Jesucrist. Ruedeenu xquixhtios sa'csi galooli gule Dios la'tu te gusłaa ni la'tu lo dojl, xcuent Xsprıt Dxanni ni rusıa lastootu, nájza redıdxlii ni huililajztu.

<sup>14</sup> Ni'cni che biejn diajgtu diıdx ni basule'nu lojtu, gurejdx Dios la'tu, te xca'zatu xcáłrdimbicha' Jesucrist.

<sup>15</sup> Naj bejtznu, colchanuu, colsudzu'tz, na'cza jiälajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijtz ni baxhalnu lojtu.

<sup>16</sup> Lagajc Dad Jesucrist, näj Dios Xtadnu, ni sanälajz nuurnu, ni ruscäjñ lajznu par tejpas, ni baniidx xcälrbääznu racnäjni nuunu,

<sup>17</sup> guspaani lajztu, gusudzu'tzni la'tu lo guiraa redidxs'a'c ni guiniitu näjza redzuunsa'c ni guntu.

### 3

#### *Colnab lo Dios xcuent nuurnu*

<sup>1</sup> Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujñni con la'tu.

<sup>2</sup> Colnabza lo Dios xcanäjni nuurnu te di tednu ladznaa rebenlatsiaj, rebenguijdx, sa'csi xhet guiraadi bejn rajp yälrililajz.

<sup>3</sup> Dios rusoob xtiidxni, susudzu'tzni la'tu, sacnäjzani la'tu te di sactu dolguijdx.

<sup>4</sup> Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu.

<sup>5</sup> Canabä lo Dad Jesucrist guniidxni gacbeerutu xcälsanälajz Dios, canabäza colcuedxi lajztu si'cni bejn Crist che gudejdni trabajw.

#### *Nanab jienu dzuun*

<sup>6</sup> Bejtznu, con laj Xtad Jesucristnu, rnibeenu guibicajtu lo chutis te sa'nu ni ricanzajtis, ni di rlanj gunni dzuun. Guibicajzatu loj reni di guibajñ si'cni baluiinu riäjñ guibajntu.

<sup>7</sup> La'tu anajntu xho riäjñ guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun.

<sup>8</sup> Dizanu nidauxlia' xcu'n chu tejtu; guiraani bidiixnu, biennu dzuun dxej-yääl, te di nutaalnu xtzuum chu tejtu.

<sup>9</sup> Masä nungäjñ niniabnu niacnäjtu nuurnu, dinu niniabni; alga biennu dzuun te baluiinu xho chanuutu.

<sup>10</sup> Cheni guyu'nu lojtu, gunibeenu scree guntu: Chutis ni di rlanj gun dzuun di riäjñ xca'ni xhi gauni.

<sup>11</sup> Aguniireni loonu baltitu rcanzajtis, direni gun dzuun, alga rihuiireni xhi cayujñ rebejñ.

<sup>12</sup> Rulijdxnu rebejñre, rnibeenureni con laj Xtad Jesucristnu: colcuedxi, colyejñ dzuun te gautu.

<sup>13</sup> Bejtznu, na'c guidxajgtu guntu dzunsa'c.

<sup>14</sup> Palga yu' chu tejtu di gucuadiajg xtiidxnu ni caj lo guijtzre, colhuii chuni'cni te na'c guchaagtuni, te guitujyñi.

<sup>15</sup> Niluxh na'c ga'ptuni si'c ni rdxe'ch lojtu, colguliidxni si'c bejtztu.

#### *Rusadiidxnireni*

<sup>16</sup> Gueb Dios xten yälrbexi, guscuedxi lajztu guixe-guixee, masä xhitis sajctu. Jiannäj Dad Jesucrist guiraatu.

<sup>17</sup> Narä, Pabl cacuaä xtixiosre con naäpac si'c runä lo guiraa rexquitzä, scree rucuaä.

<sup>18</sup> Gacnäj Xtad Jesucrist guiragajctu. Sugacni si'c.

## Guijtz Ganid Lo Timoteu

*Pabl rucuaa te guijtz lo Timoteu*

<sup>1</sup> Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani choläaznu.

<sup>2</sup> Timoteu, luj najclu si'cpac xinganä lo yäl'r'ililajz. Xtdanu Dios näjza Xtda Jesucristnu gacnäjlu, gulaslajzreni luj, guscuecdxireni lastoolu.

*Pabl rulijdx xcuent reni ruluii diidx-xhii*

<sup>3</sup> Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx,

<sup>4</sup> te na'c jiutejreni rexcent rebentemp, te na'cza jiuduxhrene chu gujc rexpengoldooreni, sa'csi di rediidxre gacnäj guiroobru lastooreni si'c rustioob yäl'r'ililajz lastoonu. Naj rnibeä si'c chanuu gulijdxlu rebejn.

<sup>5</sup> Rulijdxnu bejn te ga'preni yäl'rinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni.

<sup>6</sup> Yu'reni abaro'n rediidxre, riejytis ro'reni saniduxhrene diidx ni xhet sajcdi.

<sup>7</sup> Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

<sup>8</sup> Anajnnu leii xten Dios najc sacduxhni, palga jiennu si'cni rniipacni.

<sup>9</sup> Najnnu di leii gac par beñsa'c, najcni par reni najc beñlatsiaj ni di jiu leii xten Dios, näjza reni di gusoob diidx; par reben guiidx, näjza rebendojl; par reni di jiu Dios, näjza reni rusguee; par reni rugu't xtdani, xnanni, näjza guiraa reni rugu't bejn;

<sup>10</sup> par reni resnäj te gunaa ni digac chäälreni, näjza reni resnäj lagajc saniguiireni; par reni rbajñ bejn; reni rniid didx-xhii; reni rniid didx-xhii si'c didxle' parsi rusguee sa'reni; näjza bejn ni rujñ xhitis xhi xtee dzuun ni digac dzunsa'c,

<sup>11</sup> nalajznu sa' redzunsa'c ni rulijdx xtdix Dios-le', diidx ni ruslaa lo dojl. Narä biannä diidxre.

*Rudeedni xquixtios lo Dios sa'csi rulaslajznini*

<sup>12</sup> Rdedä xquixtios lo Dad Jesucrist ni runiidx yäl'r'nibee narä sa'csi najnni nasobdidxä, ni'cni guleni narä gunä xtzuunni.

<sup>13</sup> Luxh galoo guniyaäni, birinalä xpejñni, basacsiäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä.

<sup>14</sup> Niluxh lacti guroob gujc yäl'racnäj xte Xtdanu, guideb yäl'r'ililajz, näj yäl'sanälajz ni rajp Jesucrist.

<sup>15</sup> Diidxre najc guliduxh, nanab chalilajzpacuni: Jesucrist biäd lo guedxliujre te guslaani reben dojl; lo reben dojl narä nacäru beñdolduxh.

<sup>16</sup> Ni'cni balaslajz Dios narä, mase nacä beñdolduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl'nabajñ par tejpas.

<sup>17</sup> Dios najc reii, reii ni di guet, reii ni di guzeñ, laatisni najc Gueb Dios ni nanduxh, ni'cni colguiliä'p xpala'nini, colgajñni guideb guibajntu näjza par tejpas. Si'c gacni.

<sup>18</sup> Xi'nä, Timoteu, dee najc yäl'rulijdx ni runidxä lojlu te gucuaa'clu si'c te soldaad ni abiseed, sigajc ni gunii reprofet xcuentlu galoo.

<sup>19</sup> Di gunijtlu yäl'r'ililajz, bejnza xhigabsa'c, sa'csi yu'reni abaro'n xtdix Dios, ni'c abanijtreni yäl'r'ililajz.

<sup>20</sup> Si'c gusajc Himeneo näj Alejandro, luxh abatedäreni ladzñaa beñdxab te guisieedreni na'c guiniya'reni Dios.

## 2

*Ruluini xho guiniabreni lo Dios*

<sup>1</sup> Rulidxälu ganiddoo cueddxlu, guiniablu lo Dios, gudeedlu xquixtios lo Dios xcuent guiraa rebejn.

<sup>2</sup> Guiniabzalu xcuent reireii näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajnnu.

<sup>3</sup> Sa' yäl'rniabga najc laaca, luxh si'c rdxaglajz Dios ni ruslaa nurnu lo dojl guiniabnu lojni.

<sup>4</sup> Dios rlajz laa guiraa bejn lo dojl, rlajzani gacbeepacreni xtdixliini.

<sup>5</sup> Yu' tejtis Dios, näjza tejtisza nani rusiäj diidx lo Dios näjza loj reben guedxliuj. Laani najc Jesucrist ni gujca niguii.

<sup>6</sup> Jesucrist gujt lo cruzj te gudijxni redojl xten guiraanu ni tre' lo guedxliuj. Dee gujc che gojl dxej ni gule Dios.

<sup>7</sup> Dios gule narä te gacä apost te gusule'ä xtiidxni, yäl'rililajz näjza didxlii lo reni di gac xpejn Israel. Si'c ni rlanj Jesucrist rniä didxlii, dina guiniä diidx ni rusguee.

<sup>8</sup> Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yäl'rdxe'ch, na'c gunreni biejj.

<sup>9</sup> Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'c di regunaa ni entis rsuucheduxh con oor o perl o ladsajc, rajc guichniil yejcnj te guidxeloj bejreni.

<sup>10</sup> Masru ruchaag gunreni si'cni rchalglajz Dios, si'c riäj] gun guiraa regunaa ni yu' lo Dios.

<sup>11</sup> Riäj] dxitis gucuadiajg regunaa xtidx Dios ni rusule' reniguii.

<sup>12</sup> Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni gacucadiajg diidx nani gacusule'ni.

<sup>13</sup> Sa'csi ganid benchee Dios Adän, dxejctiru bencheeni Eva.

<sup>14</sup> Luxh et Adandi basguee beñdxab, beñdxab basguee gunaaga, dxejc biajbni nen dojl.

<sup>15</sup> Niluxh siliaa regunaa, palga jüreni xtzuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

### 3

#### *Xho riäj] gac reni rnibee*

<sup>1</sup> Dee najc didx gulii: palga rlanj te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlanjni gunni.

<sup>2</sup> Ni'cni, ni rlanj gac nani rnibee, riäj] guibañsa'cni te na'c chu xhicuent guiniyaj rebejn. Riäj] gacni chääl tejtis gunaa, riäj] susinni, gacni te beñsa'c, cuedxini, te guibañsa'cni. Riäj]za di gudxojnri rolijzni guidzujñ bejn, nägajc riäj] gacni te bejn ni nansa'c te guluini.

<sup>3</sup> Na'c gacni te beñgu, nicla te ni rdxagdij] bejn, na'cza gacni te nani rsia' lajzni ga'pni xhidajl meel, riäj] cuedxi lajzni, na'c chanälajzni meel.

<sup>4</sup> Riäj] guinibesa'cni rolijzni, saru gunni te gusoob rexi'nni xtiidxni.

<sup>5</sup> Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios.

<sup>6</sup> Di riäj] guinibee te beñcoob nani entis huililajz, te di guschä'pni xpala'nni sas jiajbni lo lagajc xcäl]naj Dios ni biajb beñdxab.

<sup>7</sup> Luxh riäj]za guini reni di chalilajz xtidx Dios laaca najcni, te na'c jianxtujyni, te na'cza jiajbni ladzñaa beñdxab.

#### *Xho riäj] gac reni rcanäj nen guidoo*

<sup>8</sup> Si'cza rediaconos riäj] gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan.

<sup>9</sup> Riäj] gapdzu'tzni rediidx nagajn xten yäl'rililajz, ni'c nanab gac naya lastooreni.

<sup>10</sup> Riäj] fixgaatu xho nabajñreni. Palga nabañsa'creni, rutza gacdi gucuaquijdireni, sajg gacreni diacono.

<sup>11</sup> Regunaa ni rlanj gac diaconas riäj]za chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun.

<sup>12</sup> Riäj] gac rediacono chääl tejtis gunaa. Riäj] guinibesa'cni rexi'nni näj guiraa reni yu' rolijzni.

<sup>13</sup> Sa'csi rediaconos ni runsa'c xtzuunni, sanälajz bejñreni, dizareni guidxejb rsiudzu'tz lastooreni lo xcäl]rililajz xtidx Jesucrist.

#### *Gurobduxh najc yäl]xhiga'tz xten Jesucrist*

<sup>14</sup> Caculaä diidxre lojlu, niluxh rlazä jiädhuigaä la'tu.

<sup>15</sup> Luxh palga gaclaä, anajnlu xho riäj] guibajn bejn rolijz Dios, nalajznu xquidoo Gueb Dios ni nabajñ par tejpas. Guidoore rniaszdu'tz näjza ruluiuru didxlii xten Dios.

<sup>16</sup> Rdxeloyaduxh guiralii bejn yäl]xhiga'tz xten xcäl]najn Dios:

Dios biäd lo guedxliuj si'c te benguedxliuj,

Sprit Dxan xten Dios gunii beñdxanni;

bahuii rexangl Dios lojni;

basule'reni xtiidxni lo rebejn ni di gac xpejn Israel;

guira lajt huililajz bejn xtiidxni;

huäjsni lo xcäl]rdimbicha' Dios xhaguibaa.

## 4

*Reni rbicaj lo xnezyuj Dios*

<sup>1</sup> Aguniipac Sprit Dxan siääd redxey che chu reni guro'n yälrlilajz, sucuadiajgreni xtidx rebejn ni rusguee näj xtidx rebendxab,

<sup>2</sup> nicla jurenü rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxuy te guiblaa: xhetru racbeedini.

<sup>3</sup> Suluii rebejnre na'c guchnaa bejn, suluiizareni na'c gau bejn guiralaj, niluxh Dios bejnpac redee te xca' rebejn ni rlilajz, ni racbeeza didxlii, te gudeedreni xquixtios lo Dios.

<sup>4</sup> Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios.

<sup>5</sup> Sa'csi xtidx Dios näj yälrbedx-rniab lo Dios runsa'c guira'ti.

*Te ni runsa'c xtzuun Jesucrist*

<sup>6</sup> Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälrlilajz, näj yälrluisa'c ni sanuulu.

<sup>7</sup> Na'c julu ni rniü regunaroyeii ni xheti xtzuunni. Bisieed sudzu'tz lastoolu lo xtidx Dios.

<sup>8</sup> Guxii sajz guinibduxh bejn te gusutijpni tiejxhni. Niluxh sacduxhru cucheeni xtidx Dios nen lastooni, sa'csi racnäjni bejn lo yäl'nabajñre näjza lo yäl'nabajñ ni najc par tejpas.

<sup>9</sup> Dee najc didxlii, riäjł chalilajz guiraatuni.

<sup>10</sup> Ni'c riennu dzuun, rdeednu trabajw, sa'csi cabäjznu Gueb Dios ni nabajñ, ni ruslaa bejn lo dojl, ganiddoo renani rililajz xtiidxni.

<sup>11</sup> Sajplu guinibeelu soob rediidxre, näjza guluiulu rediidxre.

<sup>12</sup> Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniulu, xho nabajñlu, xho sanälajzlu sa'lu, xho rililajzlu, näjza xho rajplu xhigabsa'c.

<sup>13</sup> Lał ni guidzuna' ro'c, bil xtidx Dios lo rebejn, balijdxreni, baluiiza xtidx Dios lojreni.

<sup>14</sup> Di gusaanlu reyäl'najñ ni baniidx Dios lojlu cheni basuj rebenqool naareni yejclu por xtidx Dios, guniireni diidx xcuent nani churu gac.

<sup>15</sup> Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios.

<sup>16</sup> Gopdzu'tz lagajc luj näjza rediidx ni ruluuulu; guzudzu'tz lo guiraa rediidxre, te si'c laalu lo dojl, te laaza reni rucua diajz xtiidxlu.

## 5

*Xho guibanäjnu reni rlilajz*

<sup>1</sup> Na'c quidxa'lu loj te benqool; guninäjni si'c xtdadlu, balijdx rebi'n si'c bejtzlu,

<sup>2</sup> balijdx renanbenqool si'c xnanlu, balijdx redxap steeb si'c rebisiajnlu con rexhigabsa'c.

<sup>3</sup> Gucnäj rebiuud ni guliipac rquiin chu gacnäjreni te chu xhi gaureni.

<sup>4</sup> Niluxh palga yu' chu biuud yu' xi'nni o xajgni, suguisiedxgaareni guibanäyayreni lo xnez Dios, te quiixreni di'n ni nasääbreni lo xtadreni, näj xnanreni ni baslaareni, sa'csi ni'c najc laaca, rdxaglaajza Diosni.

<sup>5</sup> Gunaan ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios.

<sup>6</sup> Niluxh biuud ni nabajñ cadedgustisni najc si'c te ni agujt nen dojl.

<sup>7</sup> Basule' rediidxre lojreni te rut gucuaquijdireni.

<sup>8</sup> Palga yu' chutej ni di gacnäj resa'ni, lagajc reni rbäjz rolizjni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

<sup>9</sup> Di gucuaalu laj rebiuud lo guijt te gacnäjtuni palga gajdni chu gayojñ ijz. Riäjłza gac biuudga te gunaan ni gubanäsa'c chäälni.

<sup>10</sup> Riäjłza gumbec bejnñi xcuent redzunsac ni rujñni; palga baslaani rexi'nñi, palga badedlaani rolizjni gues ben zijt, palga gudiibni ni' rexpejn Dios te si'c guzen xcäl'nadolajzni, palga racnäjni reni rdejđ trabajw, palgaza riuni rujñni guira'ti redzunsac.

<sup>11</sup> Niluxh na'c gucuaalu laj biuud ni yu' guxiiru ijz sa'csi che guichaglaajzreni te niguii, siälajzreni diidx ni bia'nreni lo Jesucrist, te rlazjni guchnasacreni.

<sup>12</sup> Dxejx siu'reni nen dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios.

<sup>13</sup> Dxejx sia' lojreni xhet gundireni, rijreni rolizj bejn ricuereeni. Luxh malaii ni'ctis gunreni. Niluxh rliászareni didxhii, richu'reni lo xhitis, rniizareni diidx ni di guchaag guiniireni.

<sup>14</sup> Ni'cni rlazä rebiuud ni najc dxa'pru guchnaareni stehuält, chu xi'nreni, fisa'ceni rolizjreni te na'c guiniyajreni rebejn ni rdxe'ch lojnu.

<sup>15</sup> Sa'csi yu' gaii biuud ni alagubicaj lo xnez Dios sanajlreni bendxab.



<sup>16</sup> Pal yu' tej resa'nu ni najc sa'ni te biuud, riäjł gacnäjnini, na'c gusaanni gutajłni xtuuun guidoo, te si'c guidoo sajç gacnäj rebiuud ni rquiinpac chu gacnäjreni.

<sup>17</sup> Rebeŋgool ni rnibesa'c guidoo, riäjł chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxxsa'creni la'tu con xtidx Dios.

<sup>18</sup> Sa'csi lo xtidx Dios caj scree: "Na'c gusałlu guiixh ro' gon che rusiani triuu"; si'cza caj stee diidx: "Riäjł gax bejn ni rujn dzuun."

<sup>19</sup> Na'c cucuadiajglu xtidx tej ni rucuaquij te beŋgool palga ruti tio'p, choŋ testiigw.

<sup>20</sup> Niluxh reni sanuu rujntis dojl, riäjł gulijdxlureni nez loj reben guidoo, te näjza laareni guidxeybreni.

<sup>21</sup> Nez loj Dios, nez loj Dad Jesucrist, nez lojza reangl ni gule Dios, rulidxduxhälu chanuulu lo rediidxre, na'c jiuurulu tej bejn lo sa'ni. Bejn tebloj loj guiraa rebejn.

<sup>22</sup> Na'c gusiojb lajzlu gusuju lu naalu yejç te bejn, te gacni ben guidoo palga gajdni guisieed guibansa'cni lo xnez Dios sa'csi lagajç yejçlu jiajb rextojłni. Gubicaj lo guiraa dolguijdx.

<sup>23</sup> Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexçälracxhuulu.

<sup>24</sup> Yu' bejn ruzeŋgajç rextojłni ni'c rajcni castiigw, niluxh yu' bejn ni di xtojłni guzeŋgajç.

<sup>25</sup> Sigajçsa redzuns'a'c ni rujn bejn; yu'reni ruzeŋgajç, niluxh mase dini guzeŋgajç, digacdi jianxhiga'tzni, sidzujł dxej suzeŋni.

## 6

<sup>1</sup> Reni najc mos riäjł cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu.

<sup>2</sup> Palga yu' remos ni najc xlamni te nani rililajz, na'c cuälazreni rextiidxni sa'csi najcni bejtzni lo xcälrililajz Jesucrist. Riäjł gunsa'crueni xtuuunni, sa'csi najcni sa'ni loj yälrililajz xten Dios, luxh sanälajzarenini. Rediidxre baluii, basule'.

### *Yäl'nabaŋsa'c näjza te lastoo ni rbedxi*

<sup>3</sup> Palga yu' chu ruluii garenca diidx, diidx ni digac didxxsa'c, si'c najc xtidx Jesucrist, näjza xhet si'c diidxdi ni ruluii xho guibansa'c bejn,

<sup>4</sup> bejnga rlanj guiliä'p lagajç xpala'nni, niluxh xhet najndini. Si'c te yälguijdx yu'tis yejçni yälguiniab diidx, yälrdildiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni.

<sup>5</sup> Rujnzani rdlnäj bejn sa'ni. Guiraa redee gun bejn ni aguxhijn xcäriejnni, bejn ni diru ga'p didxlii. Rchaloreni sujnneni ganduxh xcuent rediidx ni ruluiireni. Gubicaj lo sa' bejnre.

<sup>6</sup> Niluxh yäl'nabaŋsa'c näjza te lastoo ni rbedxi, redee sa'cduxh.

<sup>7</sup> Sa'csi xhet biopnädinu lo guedxliujre, luxh sigajçza xhet sajçdi choŋanu che guetnu.

<sup>8</sup> Niluxh palga rajpnu xhi gaunu, xhi gajçwnu, con ni'c riäjł guibalaaznu.

<sup>9</sup> Niluxh reni rlanj ga'p xhidalduxh meel, riajbreni lo xhigab guijdx, rujnzareni xhidajł dzuun ni xhet sajçdi, ni rujn daan, ni rusiääz bejn lo yälruhxin, lo yälrnitloj.

<sup>10</sup> Sa'csi yälrinälajzni meel najc xlobaa guiraa redzunguijdx. Yu'za bejn ni rladuxh ga'pni meel, rusaanreni xcälrililajz Dios, dxejç lagajç laareni rujn rdedduxhrenei trabajw.

### *Dzun-huen xten yälrililajz*

<sup>11</sup> Niluxh luj, bejn xten Dios, baxu'ŋ lo guiraa dee, te chanuulu lo xcälxhigabsa'clu näjza yäl'nabaŋsa'clu; te chanajllu yälrililajz näjza yäl'sanälajz; te chanuulu lo yäl'rbeçdxi lajz näjza yäl'nadolajz.

<sup>12</sup> Benduxh dzuun xcuent yälrililajz Jesucrist, gunazdzu'tz yäl'nabajł ni najc par tejpas. Ni'cni gurejdx Dioslu, luxh aguniulu rililajzlu xtidx Dios nez loj xhidajł bejn, te anancheereni.

<sup>13</sup> Naj rulidxälu nez loj Dios ni rudeed yäl'nabajł lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't,

<sup>14</sup> rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiaäd Xtađ Jesucristnu.

<sup>15</sup> Sidzujł dxejga nani agunii Dios guidzujłni. Dios ni najc le' sujł scree sa'csi laatisni najc Dios, najcni reii xten reerei, rnibeezani reni rnibee.

<sup>16</sup> Laatisni dini guet, nabajłni lo bianij cadro rut rajçdi rbig. Niçla te bejn gajd fii lojni, niçlaza gac fireni lojni. Xtebtis laani riäjł ga'p rebejn xpala'nni. Laani rajp yäl'rnibee par tejpas. Sugacni si'c.

<sup>17</sup> Balijdx reni rajp xhidajł xhixtenni lo guedxliujre, na'c guschä'preni xpala'nreni, niçlaza chanälajzreni xhixtentisreni. Huenru chanälajzreni Dios ni nabajł, ni runiidx loonu guraliı xhixtennu ni rquiinnu te guibalajznu.

<sup>18</sup> Baliidxreni gunreni dzunsa'c, gundajnreni dzunsa'c, gacnäjreni reni xhet rajpdi, cuenäsa'creni sa'reni.

<sup>19</sup> Si'c ga'preni yäl'nasa'c ni guzudzu'tzreni che jiääd Jesucrist, te guiniaztzu'tzreni yäl'nabajn par tejpas.

*Rulijdxni Timoteu*

<sup>20</sup> Timoteu, cuanäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl'najn'.

<sup>21</sup> Sa'csi yu' reni sanuu yäl'najnre ni'c banijtreni lo Dios xcuent yäl'riliłajz. Gacnäj Dios luj. Sugacni si'c.

## Guijtz Ni Rojp Lo Timoteu

*Stee guijtz ni baxhal Pabl loj Timoteu*

<sup>1</sup> Narä Pabl, nacä apost xten Jesucrist. Dios gule narä, xcuent yäl<sup>1</sup>nabajñ ni gudeed Dios loj reni yunäj Jesucrist, si'c ni bia'n diidx.

<sup>2</sup> Cacuaä guijtzre lojlu, Timoteu, xi'nä lo yäl<sup>1</sup>rilitajz. Rinälazä luj. Rniabä lo Xtadnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

*Rusule'ni xcuent Jesucrist*

<sup>3</sup> Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuumni si'c bejnza rextadgoldoä.

<sup>4</sup> Rnaj lazä xho biinlu, naj rlazä fiä lojlu te guibalazä.

<sup>5</sup> Rnaj lazäza yu'pac yäl<sup>1</sup>rilitajz lastoolu si'cni guyu'ni galoo lastoo xmam<sup>1</sup>lu Loida dxejcru lastoo xnanlu Eunice si'cza yu' yäl<sup>1</sup>rilitajzga lastoolu naj.

<sup>6</sup> Ni'cni rniä lojlu naj, si'cni rcanäj bejn rodäj te di juini, si'cza cuanäduxh reyäl<sup>1</sup>najñ ni baniidx Dios lojlu cheni basuä nää yejclu.

<sup>7</sup> Sa'csi di Dios numiidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnnu.

<sup>8</sup> Na'c guitujyulu guiniulu rediidx xten Xtad Jesucristnu, na'cza guituinäjlu narä sa'csi yu'ä neñ latzguib xcuent Jesucrist. Näj luj gudejd trabajw ni siääd xcuent yäl<sup>1</sup>rusule' xtidx Dios si'ctis gacnäj Dios luj.

<sup>9</sup> Dios ni guläa nurnu neñ dojl, gurejdx nurnu te guiba<sup>1</sup>sa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c rlanjni laani, sa'csi balaslajzni nuurnu xcuent Jesucrist galooli che gajdli guncheeni guedxliuj.

<sup>10</sup> Niluxh cheni biääd Jesucrist ni badzucaj rextoj<sup>1</sup>nu lo guedxliujre, baluiloj yäl<sup>1</sup>rulaslajzga. Jesucrist banitloj yäl<sup>1</sup>rnibee xten yäl<sup>1</sup>gujt. Xtiidxni, ni rusule' xho rbicaj dojl, baluui yäl<sup>1</sup>nabajñ, näjza yäl<sup>1</sup>nabajñ par tejpas.

<sup>11</sup> Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel.

<sup>12</sup> Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajg gapdzu'tzni dzuun ni baniidxni loä dxejli cheni guibi'ni.

<sup>13</sup> Chanuu guluiulu redidxa'c ni banidxä lojlu. Gubajnzä lo yäl<sup>1</sup>rilitajz näj lo yäl<sup>1</sup>sanälajz ni rajpnu sa'csi yu'nu lo Jesucrist.

<sup>14</sup> Cuanädzut'z reyäl<sup>1</sup>najñ ni baniidx Dios lojlu näj Sprit Dxan xtenni ni rbäjz neñ lastoonu.

<sup>15</sup> Anajnlü guiraa reni siääd reguedx Asia gulälaz narä; lo redee nadxaag Figelo näj Hermógenes.

<sup>16</sup> Dad Jesucrist gacnäj reni yu' rolijz Onesíforo sa'csi balti huält biädspaani lazä, dini nitujy sa'csi yu'ä neñ latzguib.

<sup>17</sup> Che bidzujñni guedx Roma, gudiilpacni narä te bidxälni narä.

<sup>18</sup> Dad Jesucrist gulaslajz laani che guidzujñ dxej ni guibi' Jesucrist. Luj anajnlü balti dzunsa'c bejnni che guyu'ni guedx Éfeso.

## 2

*Te ni runsa'c xtzuum Jesucrist*

<sup>1</sup> Ni'cni xi'nä, guzutijp sa'csi rulaslajz Jesucrist luj, racnäjnlu.

<sup>2</sup> Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajg guluiiza diidxga lo stecuaa bejn.

<sup>3</sup> Batijp lajzlu tednäjlü narä trabajw si'c te soldadsa'c xten Jesucrist.

<sup>4</sup> Di te soldaad gun dzuun ni bejnni che gajdni gac soldaad. Rujñni xtzuum bejn ni guleni gacni soldaad, te si'c guspaani lajz bejnğa.

<sup>5</sup> Sigajzca, ni rguijt digacdi xca'ni yäl<sup>1</sup>nasa'c palga dini quitsa'c si'c riäj<sup>1</sup>l quitni.

<sup>6</sup> Bejn ni rujn dzuun loniaa nanab xca'ni xcäl<sup>1</sup>nasa'cni ganidoo.

<sup>7</sup> Bejn xhigab xcuent ni rniä lojlu, dxejc sujñ Dios gacbeelu guiraani.

<sup>8</sup> Basnaj lajzlu Jesucrist, te xagdoo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu.

<sup>9</sup> Ni'cni cagutipä lazä cadedä trabajw, caduä caden si'c te bejn ni bagu't sabejnñi. Niluxh digacdi xcaduu xtidx Dios.

<sup>10</sup> Ni'cni cadedä trabajwre te gacnäa reni agule Dios te näjza reni'c chalilajz xtiidxni te guibajñreni lo bianij xten Jesucrist par tejpas.

11 Guliiduxh najc diidxre;

palga agujtnu con laani, sibannājzanu laani.

12 Palga rdejndu trabajw, sinibenājzanu laani.

Palga dinu guicā'p numbeenuni, dizani guicāj'p numbeeni nuurnu loj Xtdadni Dios.

13 Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

*Te bejn nani abia xtzuunni*

14 Basnaj lajz rebejn xcuent rediidxre, gunibee lojreni nez lo Dad Jesucrist na'c tiidixreni sa'csi sa' diidxga xhet sajcdini, ruxhiñtisi reni riendiajgni.

15 Batijp lajzlu te guidzujñlu lo Dios si'c te bejn ni runsa'c dzuun, xheti xhicuent guitujyulu, sa'csi ruluisa'cpaclu xtidxliitis Dios.

16 Gulälaz yäl'riñiyaj nājza xhidalduxh diidx ni xhet sajcdi, sa'csi renani rucua diajg rediidxga riabruereni lo redolguijdx.

17 Luxh diidx ni ruluireni suxhiñgajcni lastoo bejn si'c rxhiñlajz tiejxh bejn. Ni'c casiajg Himeneo nāj Fileto.

18 Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rilajz.

19 Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejñni"; nājza "Nanab guibicajreni lo redolguijdx, guiraa reni ahuililajz xtidx Jesucrist."

20 Neñ te yuro, xhet ganaxdi cos or nājza cos plat yu'. Yu'za cos yajg nāj cos bajñ; yu'reni najc parsi te laniro, yu'za reni rquññ guixe-guixee.

21 Sigajcza te bejn ni rrajz gun dzuunro xten Dios, riäjñ guibicajni loj redolguijdx ni xhet sajcdi. Dxejcti Dad Jesucrist sacñajni te gunni redzunro xtenni.

22 Gubicaj lo redzunguijdx ni rujn rebejn, huinuu yäl'nabansa'c, yäl'rililajz, yäl'sanälajz, gulecdixa lajzlu nāj reni rujn xtzuum Dios, naya lastooreni rbedx-rniabreni lo Dios.

23 Na'c jiulu rediidx ni ruluui rebejn guedxliuj. Anajñlu rediidxga rujn rdññaj rebejn sa'ni.

24 Niluxh te xmos Dad guibaa di riäjñ guchaagni reni rdijñ; riäjñ gacni beñsa'c loj guiraatis bejn. Riäjñza guluisa'cni; riäjñza gutip lajzni che xhet laadi rujn bejn lojni.

25 Guideb yäl'nadolajz guluiulu reni rdxe'ch loj rediidx ni ruluulu. Cuääzlu gaxäjsi gusiejch lajzreni gun Dios gacheereni didxgulii,

26 te jianij xcäriejnreni te guiriireni ladzñaa bendxab, te gunreni ni rrajzti Dios.

### 3

*Xho gac rebejn neñ redxelult*

1 Nanab gacheelu neñ redxelult sidzujñ dxej tedtu trabajw.

2 Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglañz chä'p xpala'ntisni, bejn ni rniyaj Dios; su' bejn ni di gusoob xtidx xtdadreni, su' bejn ni di gudeed xquixtios lo Dios, su' bejn ni najc benguijdxctis.

3 Neñ redxelultga su'za bejn ni di chanälajz sa'ni, bejn ni di lajzni jiäjñ, bejn ni rusgueduxh; bejn ni digacdi guscuaäz dolguijdx ni rujnreni; bejn ni gualazduxh; bejn nani ruğ'o'n guira'ti dzunsa'c.

4 Neñ redxelultga su' bejn ni ruto' sa'reni; bejn ni di guidxejb gunreni ni riabjtis yejcreni, bejn ni rchalosi najcreni beñsacduxh; bejn ni rchaglañzru gun nani rchaglañz tiejxhreni lacuaa chanälajzreni Dios.

5 Neñ redxelult su' bejn ni najc si'c benguidoo, ascanu rusoobreni xtidx Dios, niluxh naadireni xca'reni yäl'nadip nāj yäl'rnibee xten Jesucrist ni ruchaa lastoo bejn.

Na'c guchaaglu rebejnğa,

6 sa'csi loj sa' bejnre yu' reni richu' rolijz bejn, sasgueereni regunanayääl ni rujn dojl. Regunaare rinuu rujreni ni rrajzti tiejxhreni, rujnreni guiraloj.

7 Rebejnre rsiedduxh didxcoob, niluxh di didxlii xten Jesucrist jiu' yejcreni.

8 Sigajcni gujc Janes nājza Jambres ni bidxe'ch loj Moisés, sigajcza najc rebejnre, cadxechnājreni didxlii xten Jesucrist, najcreni bejn ni aguxhiññ xcäriejnreni, luxh direni gacbee xtidx Dios, direni ga'p yäl'rililajz.

9 Niluxh direni chanuu xchej, sa'csi huenliisi suhuui guiraa rebejn najcreni benguijdx. Si'cza gusajc guiro'p reni bidxe'ch loj Moisés.

*Pabl rnibee sudzu'tz Timoteu*

10 Luj sanuutislu lo nani rusule'ä, nāj xho nabanä, nāj xhicuent runä dzuunre, lo xcäl'rililazä, lo xcäl'nadolazä, lo xcäl'sanälazä, nājza xho batip lazä.

<sup>11</sup> Najnlu xho basacsireni narä gudedäza trabajw ladzṇaa rebejn neṇ reguejdx xten Antioquia, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga.

<sup>12</sup> Guliduxh guiraa reni rlaiz chutis loj Jesucrist sidejdpacreni trabajw.

<sup>13</sup> Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh susgueeza bejn laareni.

<sup>14</sup> Luj huinuu guzudzu'tz loj ni abisieedlu, nani ahuililajzalu, luj anajnlu chuni'c baluiini lojlu.

<sup>15</sup> Cheni biuuxlilu racheelu xtidx Dios, ni ruluiilu xho guiriilu neṇ dojl te xca'lu yälṇabajn par tejpas sa'csi rililajzlu xtidx Jesucrist.

<sup>16</sup> Guiraa rediidx xten Dios ni caj lo guijtz, lagajc Dios baniidxni te xcajni lo guijtz.

Guiralii xtidx Dios najc laaca te guluii nuurnu xhini'c najc didxlii,

te gacheenu xhi najc didx-xhii,

te gacheezanu xho riäjl guibansa'cnu.

<sup>17</sup> Te susiṇ niguii ni najc xpejn Dios,

te gac gunni guiraa redzunsac'c ni riäjl gunni.

#### 4

<sup>1</sup> Rulidxälu nez lo Dios näjza nez lo Dad Jesucrist ni jiäd si'c rei te gunni yälguختis loj reni nabajn näjza loj reni agujt; rniäza dee lojlu:

<sup>2</sup> basule' xtidx Dios, gususiṇ lo Dios mase xhitis or. Baluii rebejn dojl, gudiṇäj reni di rlaiz guzobdiidx xtidx Dios, balidxnäj resa'tu xtidx Dios.

<sup>3</sup> Sa'csi sidzujṇ dxej di rebejn guidxaglaiz gucuadiajg yälrluisa'c; alga diidx ni najc lagajc si'c najc xhigabreni rlaizreni jiendaigreni, ni'cni siguilreni xhidajl bejn ni ruluii te gusieedreni ganax ni rlaizreni gucuadiajgreni.

<sup>4</sup> Susäuureni diajreni te di jiendaigreni xtidxlii Dios; alga xhitis diidx gucuadiajgreni.

<sup>5</sup> Niluxh luj huinuutis lo xtidx Dios, batiplajz yälhuin, guniitis xho rudzucaj Dios rextojreni, bensac'c xtzunulu.

<sup>6</sup> Sa'csi narä suga'ä ree te ju'treni narä, asiäddzungajxh dxej ni guetä.

<sup>7</sup> Agulujx bacuaä si'c te soldaad ni huicuasa'c lo guer, agulujx xnezyuä, gopdzutzä yälrlilajz.

<sup>8</sup> Naj cabäzä xca'a yälṇasa'c ni guniidx Dad xhaguibaa, suniidxni yälṇabansa'c. Dad najc juejz ni runsa'c yälguختis. Niluxh xhet loätis guniidxni yälṇabansa'c. Sudeednini loj guiraa rebejn ni catiplajz cabäzreni dxej cheni guibisac Jesucrist.

#### *Rediidx ni räjpni lojtis Timoteu*

<sup>9</sup> Basaaga lajzlu jiädhuigajlu narä;

<sup>10</sup> sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Crescent sää lo reguejdx ni re' nez Galacia. Baxhalä Tito sää guedx Dalmacia.

<sup>11</sup> Xtebtis Lucas suganäj narä. Gudiil Marcw te jiädṇäluni sa'csi sajg gacnäjni narä lo xtzun Dios.

<sup>12</sup> Ti'quico baxhalä sää guedx Éfeso.

<sup>13</sup> Cheni jiädṇlu, jiädṇalu ca'p ni basa'nä guedx Troas rolijz Carpo, näj rexlibrä; di jiälza lajzlu rexquitzä.

<sup>14</sup> Alejandro, ni najc gubetzguiib, basacsiduxhni narä. Dios quixni sigajcni bejnini.

<sup>15</sup> Luj bahuii te di gunni xhi gunni luj sa'csi rdxecheduxhni lo xtidx Dios ni rusule'nu.

<sup>16</sup> Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni.

<sup>17</sup> Niluxh Dad ni yu' xhaguibaa gucnäj narä, baniidxni yälṇadip te gujc guniä guiraa xtidx Dios te biejn diajg reni digac xpeṇ Israel xtidx Dios. Luxh gucnäj Dios narä guläani narä ladzṇaareni, si'c ro' te beedz.

<sup>18</sup> Susṇaani narä loj guiraa redolguijdx, saptzu'tzni narä, sigucheezani narä te chunäani lo xcälṇmibeeni xhaguibaa. Lojni coldeed xquixtios, colganṇduxhni par tejpas. Sugacni si'c.

#### *Rudeedni xtixtios lo reexamigwni*

<sup>19</sup> Badeed xtixtios lo Prisca näjza lo Aquila näjza loj resa' Onesíforo.

<sup>20</sup> Erasto bia'n guedx Corinto, niluxh basa'nä Tróximo guedx Mileto sa'csi cayacxhuuni.

<sup>21</sup> Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhalṇreni xtixtios lojlu.

<sup>22</sup> Dad Jesucrist chunäj xaimlu. Dios gacnäj guiraatu. Sugacni si'c.

## Te Guijtz Lo Tito

### *Bacuaa Pabl lo Tito*

<sup>1</sup> Narä Pabl, nacä xmos Dios, apost xten Jesucrist, te gacnäã guiroobru xcäl\_rililajz reni agule Dios, te gacbeezareni didxlii ni rusia xcäl\_nabaj\_nnu.

<sup>2</sup> Cayunlojzanu yäl\_nabaj\_n par tejjpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtij.

<sup>3</sup> Niluxh che bidzuj\_n dxej ni agulexгаа Dios, laani baluiini xtiidxni. Si'cza baniidxni xtiidxni loã te gusule'äni si'c gunibee Xtiosnu ni ruslaa nurnu ne\_n dojl.

<sup>4</sup> Cacuää guijtze lojlu, Tito, xi'nä lo yäl\_rililajz ni ria'pnu xcuent Jesucrist. Rniabä lo Dios Xtdnu näj lo Dad Jesucrist ni rbää nuurnu ne\_n dojl, gacnä\_jreni luj, gulaslajzreni luj, guscuedxzizareni lajzlu.

### *Dzuun ni rujn Tito guedx Creta*

<sup>5</sup> Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di najldi nuluxä ro'c, näjza te cuelu rebengool loj reguidoo ne\_n tejga reguejdx si'cni gunibeä gunlu.

<sup>6</sup> Gule bengool ni nabansa'c, te na'c guiniyaj bejnreni, nanab gacni chääl tejtis gunaa, riäjza challajz rexi'nni, na'c guibajnreni si'ctisni rlajz tiejxhreni, jiureni xtidx xtdareni.

<sup>7</sup> Niguii ni rnibee guidoo rcanäj rexhixten Dios, ni'cni riäj\_l ga'pni te yäl\_nabanya. Na'c gacni te be\_nnajd, na'c gacni te be\_nnadxecha', na'c gacni bengu, na'c gacni te bejn ni rdxagdij\_l bejn, na'cza xca'ni meel ni dini niunsa'c gaan.

<sup>8</sup> Nanab gacni te bejn ni rudedlaa rolijzni jia'n be\_n biooz, riäjza chanälajzni dzunsa'c, gac nasi\_nni, chu xcäriejnni; guiba\_nsa'cni nez lo Dios, sigajcza nez lo rebejn, guiba\_nnayani nez lo Dios, na'c gunni nani rlajztis tiejxhni.

<sup>9</sup> Riäj\_l chanuutisni lo didxlii ni bisieedni te gac gulidxnäjzani bejn xtidx Dios, te guzejcni diidx lo rebejn ni rniyaj xtidx Dios.

<sup>10</sup> Yu' xhidaj\_l benguijdx, bejn ni rni diidx ni xhet sajcdi, näjza xhidaj\_l bejn ni rni diidx-xhii ni rusguee. Näjza lo rexp\_e Israel ni riuduxh lei\_i yu' sa' bejnre.

<sup>11</sup> Sa' redee ni nanab jiäu ro'ni, sa'csi rusgueerene xhidalo sa'reni, ruluiireni ni di riäj\_l guluiireni te gunreni gaan meel.

<sup>12</sup> Te niguii ni siäd lagajc lajdxreni guniini xcuent lagajc rebe\_n lajdxni: "Rebejn ni najc cretenses rniuduxhrene didx-xhii, niälajzareni. Rlajzreni gausa'cni niluxh di rlajzreni gunreni dzuun."

<sup>13</sup> Niluxh guliini, ni'cni gudil\_näjreni, te chalizasa'cni xtidx Jesucrist,

<sup>14</sup> te na'cruza gucudaijgreni rediidx ni rdxäl\_lajz rexp\_e Israel, niclaza rediidx ni rnibee bejn ni gulälaz didxlii.

<sup>15</sup> Loj renani rujn xhigabya, guira'ti najc naya, niluxh loj reni di chalizajz, ni xhet nayadi najc xhigabreni, guira'ti nacdxuudx, xcäriejnlireni nacdxuudx.

<sup>16</sup> Naj rujsireni si'cni numbeerene Dios, niluxh ni rujnreni huenliisi ruze\_n direni nililajz, najcni benguijdx, direni jiu xtidx Dios, digacdi gunreni nicla tej dzunsa'c.

## 2

### *Rulijdx Pabl Tito guluisa'cni rebejn*

<sup>1</sup> Niluxh luj guniitis rediidx ni ruluisa'c.

<sup>2</sup> Baluii rebengool gac benya, bejn ni yu' xcäriejnni, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yäl\_rililajz, yäl\_sanälajz, näjza ni rbecdxi lajzni.

<sup>3</sup> Sigajcza, regunagool, nanab guibajnreni si'c te ni yusa'c lo Dios, na'c guiniireni diidx ni di riäj\_l guiniireni, na'cza soozreni. Riäj\_l guluiireni redidxsa'c

<sup>4</sup> te guluiireni regunaa dxa'p chu xcäriejnreni, chanälajzreni chäälreni näj rexi'nreni.

<sup>5</sup> Gacreni nasi\_n, guiba\_nnayareni, xcanäsa'cni rolijzreni, gacreni be\_nsa'c gusoobreni xtidx chäälreni, te rut guiniyajdi xtidx Dios.

<sup>6</sup> Sigajcza gojz lo reb\_i'n riäj\_l chu xcäriejnreni.

<sup>7</sup> Luj guzuj te fiireni xho riäj\_l gun bejn dzunsa'c. Che guluiilureni, saru baluii guiraa reni riäj\_l guluiilu.

<sup>8</sup> Didxsa'c gunii te rut gacdi guiniyaj diidxga, te si'c guitujy chutis ni rlajz guidxe'ch lojtu te xhet xhi didxguijdxdi gac guiniireni xcuentlu.

<sup>9</sup> Balijdx remos te gusoobreni xtidx xlamreni, te gunsa'cni dzuun, na'c guzejcni diidx lo rexlamreni.

<sup>10</sup> Na'c cuanreni alga guibaŋsa'creni te guluii xcäl'nabajŋreni lacti sacduxh xtidx Dios ni baslaa nuurnu neŋ dojl.

<sup>11</sup> Sa'csi abiääd xcäl'racnäj Dios, abiädnäni yälruslaa neŋ dojl lo guiraa rebejŋ.

<sup>12</sup> La xcäl'racnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibaŋsa'cnu, te chonälajznu Dios lo guedxliujre.

<sup>13</sup> Ruluiizani nuurnu cuääznu guidzujŋ dxej ni soob xtiidxni ni basa'nni loonu xcuent dxej che jiaäd Gueb Dios näj Xtađ Jesucristnu ni ruslaa nuurnu lo dojl.

<sup>14</sup> Laani gujtŋni te guslaani nuurnu lo guiraa redolguijdx, te basiani nuurnu te gacnu xpejŋni, gaczanu te bejŋ ni rdxaglaiz rujn dzunsa'c.

<sup>15</sup> Diidxre gunii, balijdx, basule' si'c te beŋnajŋ. Di gusaanlu cuälazreni luj.

### 3

#### *Ni riäjł gun reni rilajł*

<sup>1</sup> Basnaj laiz rebejŋ gusoobreni xtiidx rebejŋ ni rnibee näjza reguxhtis, gusoobreni xtiidxreni, xcäjbzareneni gunreni xhtis dzunsa'c.

<sup>2</sup> Na'c guiniyajreni bejŋ, cuedxireni, gaczareneni bensa'c, saru gac nadolajzreni loj chutis bejŋ.

<sup>3</sup> Sa'csi galoo sigajcza xheti xcäriejŋnu, dizanu gusoob xtidx Dios; basguee bejŋ nuurnu, yu'tisnu lo guiraasi dolguijdx näjza lo ni rchaglaiztis rujn tiejxhnu, nabajŋtisnu lo dolguijdx, rudxonlajznu, rdxe'ch bejŋ loonu, rdxe'chzanu lo sa'nu.

<sup>4</sup> Niluxh che baluiloj xcäl'rulaslajz näjza xcäl'rinälajz Dios ni ruslaa nuurnu näjza reben guedxliuj lo dojl.

<sup>5</sup> dxej baslaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Baslaa Dios nuurnu lo dojl sa'csi bidiib lastoonu, te biäjł xtojłnu te najcnu beŋcoob, sa'csi bascoobza Xsprit Dxan xten Dios xcäriejŋnu.

<sup>6</sup> Baniidx Dios cuääzpac Xsprit Dxanni neŋ lastoonu xcuent ni bejŋ Jesucrist ni baslaa nuurnu,

<sup>7</sup> te sa'csi rujn Dios cuent najcnu beŋsa'c sa'csi abadzucajni xtojłnu, naj sica'nu xcäl'nasa'cnu ni cabääznu, nalaaznu yäl'nabajŋ par tejpas.

<sup>8</sup> Dee ni najc guliipac, ni'cni rlazä chanuutislu guiniilu rediidxre loj rebejŋ, te rebejŋ ni rililajł xtidx Dios gunduxhreneni ganax dzunsa'c. Rediidxre najc laaca, sacduxhreneni loonu.

<sup>9</sup> Naj basaan rediidx ni najc xlia'si, rediidx ni gunii reben galoo, yäl'rdilididx xcuent xleii to Moisés sa'csi guiraa rebiejyga xhet sajcdini, xhetza huendi rujnreneni.

<sup>10</sup> Palga yu' te bejŋ ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu.

<sup>11</sup> Sa'csi anajntu sa' bejŋga abaro'nni, agulälazni didxlii, lagajc xtojłni sujŋ nitni.

#### *Diidx ni bacuaani lojtis Tito*

<sup>12</sup> Che guxhalä Artemas o Tíquico lojlu, gudahuipac narä lo guedx Nicópolis. Ro'c abená xhigab tedä rebäinajł.

<sup>13</sup> Gucnäduxh licenciaad Zenas näjza Apolos, badeed guiraa ni rquinnreneni te chanuureneni xpiajreneni, te xhet jiaädxdireni.

<sup>14</sup> Suguisieedza resa'nu gunreneni dzunsa'c te gacnäjreneni che guiquinnureneni, te na'c guibajŋreneni xlia'si.

#### *Ruxhalni xtixtios*

<sup>15</sup> Guiraa reni yunäj narä ruxhal xtixtios lojlu. Badeedza xtixtios loj resa'nu lo yäl'rililajł. Dios gacnäj guiraatu. Sugacni si'c.

## Te Guijtz Lo Filemón

### *Rucuaa Pabl guijtz lo Filemón*

<sup>1</sup> Narä, Pabl, yu'ä nen latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios.

<sup>2</sup> Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu.

<sup>3</sup> Dios Xtdanu näj Dad Jesucrist gacnäj la'tu, guscuedxireni lajztu.

### *Xcälsanälajz näj xcälirililajz Filemón*

<sup>4</sup> Rudedä xquixtios lo Dios xcuent luj che rniä lo Dios.

<sup>5</sup> Abiejn diagä xcuent yälirinälajz näj yälirililajz ni rajplu lo Dad Jesucrist, näjza reni yu' lo Dios.

<sup>6</sup> Rniabä lo Dios tioobru xcälirililajzlu laļ ni rusule'luni, te gabesa'creni xcuent guiraa reyäl'nasa'c ni rajplu, ni runiidx Dad Jesucrist lojlu.

<sup>7</sup> Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

### *Pabl rniabni lo Filemón xcasacni Onésimo*

<sup>8</sup> Mase rapä xcäl'rnibee Jesucrist sajz guiniä gunlu xhitis ni riäjļ gunlu,

<sup>9</sup> rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist.

<sup>10</sup> Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

<sup>11</sup> Galoo, dini niäj beḅsa'c lojlu, niluxh naj sacnäduxhni guiro'pnu.

<sup>12</sup> Ruxhaļsacäni lojlu, te xcasacluni stehuält si'c ni najräni xca'lu, sa'csi siädnäni lojlu ascanu lagajc lastoa.

<sup>13</sup> Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios.

<sup>14</sup> Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi rlazjpaclu gacni si'c.

<sup>15</sup> Pet gubicaj Onésimo lojlu tio'p-choḅ dxejsi. Niluxh naj xca'luni te chuni lojlu par tejpas.

<sup>16</sup> Naj xhetru si'cdi te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäjļ chanälajzruluni, xhet si'c chutis te bejn, alga si'c te bejtzlu lo Dad Jesucrist.

<sup>17</sup> Naj palga rumbeelu narä si'c te sa'lu, cua'ni sigajc narä.

<sup>18</sup> Palga yu' xhi bejnni lojlu o palga yu' xhi nazääbni lojlu, basa'nni lo xcuentä.

<sup>19</sup> Lagajc narä, Pabl abacuaä guijtzre con ḅaä con xleträ, narä siguixäni. (Te na'c guiniä nazääbzalu lagajc luj loä.)

<sup>20</sup> Betzä, benļaa hueenre narä si'c te ni sanälajz Dios te guspaalu lazä nez loj Dad Jesucrist.

<sup>21</sup> Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu.

<sup>22</sup> Sigajcza basuchee te lajt cadro jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

### *Ruxhaļni xtixtios lojni*

<sup>23</sup> Epafraḅ ruxhaļ xtixtios lojlu. Laani yunäjni narä latzguiib, sa'csi guniizani xtidx Jesucrist.

<sup>24</sup> Marcw, Aristarco, Demas, näj Lucas, ni racnäj narä lo dzuunre, ruxhaļzareni xtixtios lojlu.

<sup>25</sup> Dad Jesucrist gacnäj la'tu. Sugacni si'c.



## Te Guijtz Nani Biääd Loj Reben Hebree

*Agunii Xi'n Dios xtidx Xtadni*

<sup>1</sup> Neñ redxe galoo garen-garen mood guninä; Dios retoxtadgoldoonu. Xhidajlza huält guniini por reniguii ni bacuaa xtiidxni.

<sup>2</sup> Neñ redxere aguniini loonu por Xi'nni, lojzani badeed Dios yäl̄rnibee guncheeni guedxliujre, badeedzani guira'ti lojni.

<sup>3</sup> Laani najc xtuxh xten xcäl̄rdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj̄l̄nu, gurejni xladbee Gueb Dios xhaguibaa te canibeeni.

*Sacduxhru Xi'n Dios loj rexangl Dios*

<sup>4</sup> Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl̄rnibee si'c te bejn ni riannä; xhixten Xtadni. Lajzani sajcru lo relaj rexangl Dios.

<sup>5</sup> Sa'csi Dios di niäjb loj nicla tej rexangl̄ni:  
Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl̄ni:

Narä gacä xtadni, laani gacni xi'nä.

<sup>6</sup> Niluxh che biädñäni Xi'n xtebni lo guedxliuj, guniini:

Guiraa rexangl xten Dios, ¡Colgan Xi'nä!

<sup>7</sup> Che gunii Dios xcuent rexangl̄ni räjpni:

Rujjni ruxhuñ rexangl̄ni si'c bej, rujjni rbeba; rexmosni.

<sup>8</sup> Niluxh xcuent Xi'nni guniini:

Luj najc Dios.

Nabaj̄nlu par tejpas;

xcäl̄rnibeelu par tejpas najc te yäl̄rnibesa'c.

<sup>9</sup> Ahuinälajzlu xhigabsa'c, dipaclu nichagljaj xhigabguijdx,

ni'cni Dios ni najc Xtioslu, baniidxru yäl̄rbalajz lojlu quela loj resa'lu.

<sup>10</sup> Rniizani:

Luj, Dad, che guslojli bencheelu guira'ti,

bencheelu cad soob guedxliuj, ñaazalu bencheelu reguibaa.

<sup>11</sup> Laareni sinitlojreni, niluxh luj nabaj̄nlu par tejpas.

Guiraareni siujx si'c riuix te lajd.

<sup>12</sup> Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabaj̄nlu, di rexijzlu ted.

<sup>13</sup> ¿Gucxha räjp Dios lo te xangl̄ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

<sup>14</sup> Guiraa rexangl Dios najc sprit, ruxhal̄ Diosreni te chayacñajreni rebejn ni xca' yäl̄nabaj̄n par tejpas.

## 2

*Na'c gusaanni diidx ni ruslaani lo dojl*

<sup>1</sup> Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni.

<sup>2</sup> Anajntu aguzojb diidx ni gunii rexangl Dios neñ redxe galoo. Luxh reni di nusooob diidxga bejnreni dojl, dxejc bateed Diosreni trabajw.

<sup>3</sup> ¿Xho gac guibicaj xcäl̄naj Dios yejcnu palga dinu jiu rextidx Dios xcuent yäl̄ruslaa lo dojl, ä? Ni Dad, Jesucrist basa'n diidxga lo rexpejn̄pacni, dxejc laareni basule'reni rediidxre loonu.

<sup>4</sup> Niluxh Dios baluii najc diidxga guliipac sa'csi bejn̄ni reseem, näjza yäl̄rdxeloduxh, näjza xhidajl remilagrw. Badeedzani Sprit Dxan xtenni loj renani ahuililajz xtiidxni te gun tejjareni garen-garen xtzunreni si'ctis ni rla;z Dios gunreni.

*Nani guläxtiej yäl̄ruslaa bejn lo dojl*

<sup>5</sup> Di Dios gudeed yäl̄rnibee lo rexangl̄ni te guinibereeni guedxliucoob ni cagusä'tnu naj.

<sup>6</sup> Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jädhuiizaluni?

<sup>7</sup> Nagabsi dxej xuxiuru sajcn̄i lo reangl̄ xhaguibaa, dxejcti badeedsaclu xcäl̄nasa'cni,

badeedsaclu xpala'nni,

badeedzalu yälrmibee lojni te guinibeeni guira'ti ni bencheelu.

<sup>8</sup> Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c.

<sup>9</sup> Alga rhuiinu Jesucrist, ni bejn Dios guxiiru sajcnj lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

<sup>10</sup> Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rlanj chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxtiejni yälruslaa bejn lo dojl che gudejdni trabajwduxh lo cruju.

<sup>11</sup> Sa'csi Jesucrist, ni rujn chasanäj bejn te yäl'nabanya, näjza reni risanäj yäl'nabanya, tejtis najc xtadreni. Ni'cni di Xi'n Dios guitujy guiniini lojreni: "betzä".

<sup>12</sup> Scree caj lo xtidx Dios:

Chasule'ä lo rebetzä xho najclu,

siliä'päza xpala'nluj lojreni.

<sup>13</sup> Räjpzani:

Sibäzä gacnäjä Dios narä.

Ste lajt guiniini:

Bahuii loä näjza rexi'nä ni baniidx Dios loä.

<sup>14</sup> Te famıl najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnni si'c benguedxliuj, gujtzani te gujc bejn ni gunijt nani rnibee yälgujt, nalajznu, bendxab.

<sup>15</sup> Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajnreni, lacti rdxejbreni yälgujt.

<sup>16</sup> Guliini dini niääd te gacnäjni reangl xten Dios, biäädni te gacnäjni guiralii rexajg toAbram.

<sup>17</sup> Ni'cni gujcnj si'cpac te bejtznu, te gac gacni te bixhojz xten Dios ni rulasajz, te bixhozsa'cza xten Dios, si'cni rlanj Dios gacni te guslaani rebejn lo dojl.

<sup>18</sup> Sa'csi lagajc laani gudejdni trabajw, luxh baquiiilza bendxabni niujnni dojl, ni'c naj sajc gacnäjni renani ruquiiil bendxab gun dojl.

### 3

#### *Jesucrist sajcru loj Moisés*

<sup>1</sup> Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhojz ni sajcru, rusule'zani xtidx Dios xcuenti nani ahuililajznu.

<sup>2</sup> Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuum Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj.

<sup>3</sup> Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés.

<sup>4</sup> Yu' xtad guiraa refamıl lo guedxliuj, niluxh gule'c Dios guiralii bejn, bencheezani guedxliuj.

<sup>5</sup> Basoob Moisés diidx si'c te mos, cuanäjni rexpejn Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga.

<sup>6</sup> Niluxh Jesucrist basoob diidx si'c xi'npac Dios. Cuanäjni xfamıl Dios. Nurnu najcnu xfamıl Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

#### *Yälrusilajz xten rexpejn Dios*

<sup>7</sup> Ni'cni, si'cpac rniı Sprit Dxan xten Dios:

Naj, palga jıendıajgtu xse'ni,

<sup>8</sup> na'c gun-najdtnu lastootu si'c bejn rebejn ni bidxehnäj Dios che cuansajreni lo reyubıjdz.

<sup>9</sup> Ro'c bidxehnäj retoxtadgoldootu Dios sa'csi direni nıllıajz Dios sıädna'reni, niluxh bahuiireni redzunduxh ni bejn Dios nez lojreni tiuu ijz.

<sup>10</sup> Ni'cni lal ni cadxe'ch Dios loj rebejnğa, bejn Dios xhıgab:

Sujiannäjreni xhıgabguijdxreni,  
dına gusanä jıu'reni xcäl'rusilazä.

<sup>11</sup> Ni'cni bidxe'ch Dios lojreni,

bejn Dios te xhıgabduxh,

di rebejn̄ga jiu' te gusilazn̄ajni.

<sup>12</sup> Bejtznu, colnatiro andi chu tejtū rujn̄ xhigabguijdx, r̄lajz guibicaj lo Dios, ni nabaj̄n par tejp̄as, sa'csi dini chalilajz xtiid̄xni.

<sup>13</sup> Ni'cni colgulijdx resa'tu guixe-guixee, laga najcni nadxej; te di chu tejtū gacnajd lastooni xcuent reyāl̄rusguee xten redojl̄.

<sup>14</sup> Sa'csi palga chanuunu sudzu'tznu lo xtid̄x Dios ni huililajznu che biembeenui, dxejc yu' xhi rajpnu con Jesucrist.

<sup>15</sup> Si'c caj lo guijtz:

Nadxej, palga j̄iendiajgtu xse' Dios,

na'c gunnajd̄tu lastootu si'c bejn̄ rebejn̄ ni bidxechn̄aj Dios lo reyubijdz.

<sup>16</sup> ¿Chu reni'cni bidxechn̄aj Dios che biendiajḡreni xtiid̄xni? ¿La et laadi guiraa rebejn̄ ni gulāā Moisés gued̄x Egipto, ā?

<sup>17</sup> ¿Chuxh loj bidxe'ch Dios tiuu ijz lo reyubijdz, ā? ¿La et laadi reni b̄iajb lo dojl̄, dxejc gujt̄reni, huij̄iajbreni nez loj reyubijdz, ā?

<sup>18</sup> ¿Chu loj r̄aj̄pni dipacreni jiu' lo xcāl̄rusilajz̄ni? Loj reni di nusoob xtiid̄xni.

<sup>19</sup> Ni'c ruhuūinu di n̄iajcdi niu'reni lo yāl̄rusilajz sa'csi direni nililajz xtid̄x Dios.

## 4

<sup>1</sup> Ni'cni palga bia'n diid̄x siu'pacnu lo yāl̄rusilajz con Dios, nanab j̄ia'pnu lagajc nuure didi yu' chu tejtū di gun gaan jiu' lo yāl̄rusilajzga.

<sup>2</sup> Sa'csi nuure abiejn̄ diaagzanu diid̄x ni rusia dojl̄, sigajc biejn̄ diajg rebejn̄ga; niluxh xlia'si biejn̄ diajḡreni diid̄xga sa'csi bacuadiajḡrenini niluxh direni nililajz̄ni.

<sup>3</sup> Luxh nuure ni ahuililaaaznu siu'nu lo yāl̄rusilajzga; caj lo guijtz gunii Dios rediidxre:

Ni'cni bidxe'chā lojreni, benā te xhigabduxh,

di rebejn̄ga jiu' te gusilazn̄ajreni narā.

Mase abaluuxni xtzuumni cheni birixtiejli gued̄xliuj̄.

<sup>4</sup> Sa'csi loj stee guijtz caj diid̄x ni guniini xcuent dxej ni rusilajz bejn̄:

Xho'p dxej bejn̄ Dios xtzuumni, dxejcti basilajz̄ni tebdxej.

Xhet bej̄ndini dxejga.

<sup>5</sup> Stehuālt guniini:

Di rebejn̄ga jiu' te gusilazn̄ajreni narā.

<sup>6</sup> Niluxh yu' reni gajd jiu' loj yāl̄rusilajzga, luxh reni biejn̄ diajḡni diid̄x ni rusia dojl̄ di niu' sa'csi direni nusoob xtiid̄xni.

<sup>7</sup> Ni'cni basoob Dios ste dxej gac "nadxej". Gudejd̄ xhidajl̄ ijz che gunisac Dios xcuent yāl̄rusilajz. Badeed Dios gunii toDavid rediidxre:

Nadxej, palga j̄iendiajgtu xse'ni, na'c gunnajd̄tu lastootu.

<sup>8</sup> Paru nūdeed Josué yāl̄rusilajzga loj rexpen Israel, diru Dios ninisac xcuent stee dxejre.

<sup>9</sup> Naj̄ ria'nza te yāl̄rusilajz par rexpejn̄ Dios,

<sup>10</sup> sa'csi nani riu' lo xcāl̄rusilazn̄aj Dios, rusilajz̄zani lo xtzuumni sigajc basilajz Dios lo xtzuumni.

<sup>11</sup> Nanab chanu gusoobnu xtiid̄xni te jiu'nu lo yāl̄rusilajzga, te di chu tejtū ni gacnajd̄ lajz̄ni si'c ni gucnajd̄ lajz̄ renani di nililajz.

<sup>12</sup> Sa'csi nasesduxh xtid̄x Dios, yuduxhza xcāl̄rnibee xtid̄x Dios. Najcni si'c te guchiil̄ ni caduxh ro'ni, rāāz̄ni nez neñ redzujt̄ n̄aj yojb. Sigajcza xtid̄x Dios rāāz̄ nez cadro rlia' sa' xp̄srit n̄ajza xaim bejn̄. Rulūiiza xtid̄x Dios rexhigab ni yu' lastoo bejn̄, n̄ajza redzuun ni r̄lajz lastoo bejn̄ gun.

<sup>13</sup> Xheti xhi bencheedi Dios ni naga'tz nez loj̄ni. Guiralii guyasi ruhuūi Dios. Sajpnu gudeednu cuent lo Dios.

### *Bixhojz ni sajcrū najc Jesucrist*

<sup>14</sup> Jesucrist, Xi'n Dios, najc xp̄ixhojzpacnu ni sajcrū, nani abiu' loj Dios. Ni'cni nanab chanu sudzu'tznu chalilaaznu xtid̄x Dios.

<sup>15</sup> Xp̄ixhojz̄ni ni sajcrū saj̄c gulaslajz̄ni nuure te di j̄iajbnu lo dojl̄, sa'csi laani sigajcza gudejd̄ni trabajw, baquūil̄ beñdxabni te niuj̄j̄ni dojl̄, niluxh dini niuj̄j̄n dojl̄.

<sup>16</sup> Riāj̄lpac na'c guidxeebnu cued̄x-guiniabnu lo Xtiosnu ni sanālj̄z nuure. Na'cza guituj̄ȳnu, te gulaslajz̄ni nuure, guideb xcāl̄racn̄aj̄ni gacn̄aj̄zani nuure.

## 5

<sup>1</sup> Galooli guiraa rebixhojz ni sajcrū nabee lo rebejn̄. Bixhojz ni sajcrū rniab lo Dios xcuent rebejn̄. Luxh loj̄ni r̄udeed rebejn̄ regon n̄ajza reguidxaa ni gudeedni lo Dios te j̄iāu lo xtoj̄l̄reni nez lo Dios.

<sup>2</sup> Rdejzda bixhojz trabajw sigajc benguedxliuj, ni'c sajc ga'pni yäl'nadolajz loj rebejn nani nayääl näjza reni abanijt lo Dios.

<sup>3</sup> Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

<sup>4</sup> Rut sajcdi gac bixhojz xcuentceni. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón.

<sup>5</sup> Si'cza di Jesucrist niajc bixhojz ni sajcru xcuentceni. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

<sup>6</sup> Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

<sup>7</sup> Cheni gubajñ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujt; Dios bacuadiajg xtiidxni sa'csi huinälajz Jesucrist Dios.

<sup>8</sup> Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdnj trabajw.

<sup>9</sup> Che bidzujñ dxej baluuxni guiraa redzuun ni rlanj Dios gunni, laani gujcni nani rudeed laa bejn nani rusoob xtiidxni lo dojl par tejpas

<sup>10</sup> sa'csi Dios gulälajni bixhojz ni sajcru, gujcni bixhojz sigajc gujc Melquisedec.

*Rxhurniezgw gusa'nni xcärlilajzni*

<sup>11</sup> Rlajznu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gacbee.

<sup>12</sup> Agujc xchej huililajztu rediidx xcuent Jesucrist. Ariäjlni gusule'tu rediidxre naj, niluxh alga rquinnrutu chu gusule' rediidxre lojtu stehuält, luxh rediidxre najc rediidx guyasi xten Dios. Agusactu si'c báz. Rlajztu yäsactu le'ch lacuaa gautu yäj, bää; nalajznu, redidxnagajn xten Dios.

<sup>13</sup> Reni najc si'c báz, rä' le'chtis, direni gumbesa'c redidxxsa'c xten Dios.

<sup>14</sup> Niluxh reben guyajl rajw yäj. Sigajcza redidxnagajn xten Dios najc par rebejn ni aguyajl lo xtidx Dios, renani ayu' xcäriejnni, arumbeereni nani najc dzunsa'c, nani najcza dzungujdx.

## 6

<sup>1</sup> Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechljaz, xcuent redzuun ni rujn rejt bejn, näj yälrlilajz xtidx Dios.

<sup>2</sup> Na'c guluiitisnu xcuent yälrobnis, näj yälrudzubnaa yejc bejn, näj xcuent yälrbajnsac rebeñgut, näj xcuent yälguhxtis par tejpas.

<sup>3</sup> Alga do'o guisieedru xtidx Dios te churu xcäriejnnu, palga si'c guniidx Dios jiennu.

<sup>4</sup> Yu' bejn ni abianij xcäriejnni, ni acua' reyäl'nasa'c ni rudeed Dios, ni rbäjz Sprit Dxañ xten Dios neñ lastooreni,

<sup>5</sup> luxh bidxagljazreni xtidx Dios näj yäl'rnibee xten Dios ni churu jiääd.

<sup>6</sup> Palga laareni guibisacreni lo sa' yäl'nabajn ni gojpreni galoo, diru gacdi guidxaa xmodreni stehuält, sa'csi dxejc sajcnj si'c ni lagajc laareni gucusacreni Xi'n Dios lo crujz, nalajznu susanxtujyreni Jesucrist nez loj rebejn.

<sup>7</sup> Beñ guedxliuj ni biejn diajgnj najc si'c najc yuj ni rä' nis che rjajbtis nisguj. Palga yujga gudeed yäl'nasa'c loj reni rujn dzuun lojni, sunle' Dios yujga.

<sup>8</sup> Niluxh palga gudeed yujga ganax yaguejch näjza cuaan ni xhet sajcdi, xlia'sini, sujñ rebejn gac nadeni te checni.

*Diidx ni rusudzu'tz lastoonu*

<sup>9</sup> Mase rniinu scree lojtu, anajnnu huililajztu xtidx Jesucrist näjza xtiidxni ni ruslaa lo dojl.

<sup>10</sup> Sa'csi Dios najc ni rujñ yäl'guxhtissa'c, diza lajzni jiäl' ni rujntu la'tu näj yäl'sanälajz ni rajptu par laani che racnäjtu rebejtznu lo yälrlilajz, luxh guixe-guixee si'c rujntu.

<sup>11</sup> Naj rlanjnu tejjatu chanuu ga'p lagajc yäl'rbalajzre dxe lultli, te gac guiraa ni cabäjztu.

<sup>12</sup> Rlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yälrlilajz ni batipduxh lajzreni, gulälajzreni te cua'reni reyäl'nasa'c ni bia'n diidx gudeed Dios lojreni.

<sup>13</sup> Luxh che bia'n Dios diidx loj toxtadgooloon Abram, guniini por lagajc laani sa'csi ruti stee ni sajcru lojni.

<sup>14</sup> Scree gunii Dios: "Guliä sacnää luj, sunidxäza xhidajl xi'nlu."

<sup>15</sup> Cheni agulälz Abram xchej, gusojb diidx, cua'ni nani gunii Dios lojni.

<sup>16</sup> Sa'csi cheni rniliipac bejn te diidx, rniireni diidxga por laj ste'ca bejn ni sajcro lojreni, sas che rusà'treni laj bejnga xhetru yu'di xhi gunreni bieju.

<sup>17</sup> Rlajz Dios gacbeepac rexagdo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga.

<sup>18</sup> Ni'cni naj yu' tiop diidx ni digacdi guichaa sa'csi digacdi guinii Dios didx-xhii, ru-soobpacni xtiidxni, ruedeazani yälrbexilajz loj renani gubig-guxuñ lojni, loj reni sanuu loj yälrlililajz xtiidxni nani abaniidxni loonu por lagajc lajni.

<sup>19</sup> Laa ni'cni cabääznu ni rusudzu'tz lajznu si'c duu-guiib con ancl ni rniadzdu'tz te barcw. Si'c rusudzu'tzni lastoonu te jionnu cadro yu'ni detz ladró.

<sup>20</sup> Lagajc ro'c biu' Jesucrist xcuent nuure, te galooli baxhalni xnez Dios loonu, te gujnci bixhojzro par tejpas si'c gujzca bixhojz nani laa Melquisedec.

## 7

### *Jesucrist najc bixhojzro si'c najc Melquisedec*

<sup>1</sup> Galoo che gujc Melquisedec rei xten guedx Salem, gujnci bixhojzro xten Gueb Dios. Che gubi' Abram che gulujx guer cadro bagu'tni rerei ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram.

<sup>2</sup> Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj "reii ni runsa'c yälguhxhtis", dxejctiru rei xten guedx Salem sälojzani "reii xten yälrbexilajz".

<sup>3</sup> Baluiiloini lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujnci si'c najc Xi'n Dios. Najctiszani bixhojzro par tejpas.

<sup>4</sup> Naj colhui, lacti te bens'a'c, te beņro najc Melquisedec. Lojni badeed toxtadgoldoonu Abram tejga ni sajcro lo tejga tzuu ni bejnni gaan. Luxh Abram najc bejn ni sajcro lo rexpejnni.

<sup>5</sup> Leii xten Moisés, rnibee xca' rebixhojz ni najc xfamil Levi te cuaa lo sa'reni si'c ni badeed toAbram loj Melquisedec, mase najcreni rexagdo Abram.

<sup>6</sup> Niluxh di Melquisedec gac xfamil Levi. Niluxh badeed Abram te cuaa xhixtenni loj Melquisedec. Dxejcti benle'ni Abram ni biannäj xtidx Dios.

<sup>7</sup> Naj rut sajcdi guinii garenca, sa'csi nani sajcro runle' yejc nani guxiiru sajcd.

<sup>8</sup> Naj rebixhojz ni rca' tejga lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas.

<sup>9</sup> Ni'cni sajcd guiniinu xcuent Levi nani rca' te cuaa, lagajc laani agudijx te cuaaga che badeed Abram tejga yejc tzuuga lo Melquisedec.

<sup>10</sup> Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

<sup>11</sup> Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujreni nibansa'c rebejn ni huisanäj leiiga, dirureni niqiuin niäd stee bixhojz ni di gac si'c Aarón, alga si'c najc bixhojz Melquisedec najcni.

<sup>12</sup> Sa'csi cheni rdxaa te cuaa bixhojz nanab näjza leiiga guidxaa.

<sup>13</sup> Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga.

<sup>14</sup> Huenliisi najnno najc Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

<sup>15</sup> Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec.

<sup>16</sup> Luxh dini niajc bixhojz si'c rnii releii ni guyu' dxejc. Laani gujnci bixhojz xcuent yälrnibee ni najc par tejpas, ni rut gacdi gutzujl.

<sup>17</sup> Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

<sup>18</sup> Dxejcti gunijt leii sa'csi xlia'si gujnci, di najcdi niujn bejn si'cni rniinu.

<sup>19</sup> Di xleii toMoisés niujn gaan nibansa'c bejn. Naj lacuaa leiiga rajpnu te xcälrlililazsa'c; ni'c rujn rbignu lo Dios.

<sup>20</sup> Dios bejn gacni bixhojz con xtidxliini, ni guniini con lagajc lajni.

<sup>21</sup> Stecuaa rebixhojz gujcreni bixhojz niluxh et con didxliidire, con laj te beņro, niluxh bixhojzre gac bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajzni, räjpni:

"Luj najclu te bixhojzro par tejpas,

lagajc si'c gujc Melquisedec."

22 Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés.

23 Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz.

24 Niluxh Jesucrist rajpni yäl'nabajn par tejpas, naj najczani bixhojz par tejpas.

25 Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajni par tejpas te canabni lo Dios xcuent laareni.

26 Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäszani jiaaru xhaguibaa.

27 Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojlni rebejn. Niluxh Jesucrist tejtis huält gudejdni trabajw, bejnnini cheni cuajni lo cruzj, baxhe'ni xtiejni xcuent nuure, gujtni. Si'c gudijxni xtojlnu par tejpas.

28 Leii xten Moisés rusaan gac bixhojzro te bejn nani rej, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

## 8

### *Jesucrist najc nani rusiälj diidx*

1 Diidx ni sajcru loj rediidx ni caniiinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa.

2 Neñ yu' ni najc dxan, neñ guidoo ni benchee Dios yu' bixhojzre, xhet neñdi guidoo ni runchee reben lo guedxliuj.

3 Guiraa rebixhojz rajc ruedeireni gojn lo Dios, rajcza ju'treni guidxaa te gusejcreni lo Dios xcuent xtojlni, ni'cni nanab ga'p Jesucrist xhi gudeedni lo Dios.

4 Paru suga'ni lo guedxliujre, nicla bixhojz dini najc, sa'csi yu' bixhojz ni ruedeed regojn si'c ni rribee xleii Moisés.

5 Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni xquidoo Dios, räjp Dios lojn: "Bahuii te gunlu guira'ti si'cpac ni baluä lojlu lo dan Sinai."

6 Niluxh xpixhojznu Jesucrist rujn dzuun ni sajcru, sa'csi najcni nani suga' galäii xnezyuj Dios loj reben guedxliuj, gusule'ni diidx ni gunii Dios cheni bejn ni xhigabcoob, basa'nni didxcoob loj reben guedxliuj. Luxh didxcoobre sacduxhruni.

7 Paru najc nusiejch leii ni badeed Dios galooli lo Moisés lajz rebejn, di niqiiin niujn Dios ste xhigabcoob.

8 Niluxh bahuii Dios xhet cayunsa'c di reben guedxliuj, dxejc räjpni:

Naj rnilä sidzujn redxej che gunä stee xhigab,

jia'n stee diidx loj rexpejn Israel najza loj rexpejn Judä te xca'reni didxcoob.

9 Xhet si'c di xhigab ni benä che bia'nä diidx loj rextotadgoldoreni neñ redxej ni gunazä naareni te gulääreni lajdx reben Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

10 Niluxh diidx nani runä xhigab rlazä jia'n diidx loj rexpejn Israel neñ redxejre gac scree, räjp Dad:

Sunä chu rexleä lo xcäriejnreni, sucuaäza xtidxä neñ lastooreni.

Dxejcti narä gacä Xtiosreni, laareni gac rexpenä.

11 Rut chu tejdi gului sa'ni,

nicla bejtzni, nicla chu stee bejn gäbrene, "colyembee Dad",

sa'csi alanumbee guiraareni narä, rebäz sigajc rebenool.

12 Narä sulaslazäreni susiä redzundxuudx ni bejnreni, diru lazä guizaj rextojlni, nicla latzsiäj ni bejnreni.

13 Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

## 9

### *Xquidoo guedxliujre näjza guidoo xhaguibaa*

1 Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guedxliujre.

2 Guc-chee guidoo dxejcti gojl te ladro galäiini te gujcnitio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le'

3 Ni rojpp yu'ga najc dejt ladro, ro'c najc yudxanduxh.

4 Ro'c suga' te guiib cadro ru' yaal. Najcni ganax oor. Ro'c yu'za te guijn ni laa "arco de pacto", najcwni ganax oor, sigajc dejtzn, sigajcza neñni. Nenga yu' te bo't ganax oor. Neñ

bo'tga, yu' yätxtiil ni laa mana. Lagajcza neñ guijnga yu' bar xten toAarón nani biga', guyu' bid lojni, nájza guij cadro bacuaa Dios xleii toMoisés.

<sup>5</sup> Yejc guijnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusáuu con rexhigareni cadro ruxhe' bixhojzro xtiejn guidxaa xcuent xtojł rebejn. Ro'cti di gacdiru guiniirunu xcuentreni naj.

<sup>6</sup> Che gulujx gusucheereni, riu' rebixhojz si'csi si'c neñ guidoo, neñ yudxan te rajñreni Dios si'c gunibee Dios.

<sup>7</sup> Niluxh neñ stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält neñ teb ijz, te chanáni xtiejn reguidxaa ni gudeedni te jia xtojłni nájza te jia xtojł rebejn ni najc xpejn Israel.

<sup>8</sup> Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajñreni Dios.

<sup>9</sup> Guiraa ni gujc galoo najc si'c te balaa, baluiini xho gacni naj. Regon nájza reman ni rudeedreni lo Dios direni nusansa'c xcáriejn reni rudeed gojn lo Dios, sa'csi xtiejn reman rusáutisni lo xtojł rebejn.

<sup>10</sup> Dee najc ganaxtis xhi rajwni, ni rá'ni, con yäl'robnis, o xhi stee dzuun ni rujn bejn te ria ganaxtis tiejxhrene che guidzujł dxej cheni guchaa Dios guira'ti.

<sup>11</sup> Niluxh abiääd Jesucrist, naj laani najc bixhojzro xcuent redidxcoob ni sajcro naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre.

<sup>12</sup> Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn ni ca'ni biu'ni yudxanduxh tejtis huält, te si'c baslaani nuure lo dojl par tejpas.

<sup>13</sup> Reni basia xtojł bejn galoo najc redee: xtiejn regon nájza redxib, naj cobdäj xten reguidxaa ni rejc neñ guidodxanga; bastiojbni guiro'preni yejc reni yu' xtojłni.

<sup>14</sup> Palga basia redee xtojł bejn, aticaxh xtiejn Jesucrist sajc gusia dojl, sa'csi rajpni yäl'nabajn par tejpas. Lagajc laani badeedni xtiejn ni lo Dios. Niluxh najcni renya sa'csi dini niujn dojl, rusiazani xcáriejn nu xcuent retzuun ni xhet sajcdi, te chunu loj Dios ni nabajn par tejpas.

<sup>15</sup> Ni'cni Jesucrist najc nani suga' galäi: nez lo Dios nájza nez loj reben guedxliuj xcuent didxcoob. Yälgujt xten Jesucrist najc te gudzucajni xtojł reben nájza xtojł renani bejn si'cni caj lo leii, te xca' guiraa reni agurejdx Dios yäl'nabajn par tejpas, si'c bia'n diidx galooli.

<sup>16</sup> Didxcoobre najc si'c che rlanjz tej bejn guinibee xho guidis xhixtenni che agojl guetni, nanab gucuua bejnga lo te guijtz xho guidisni, dxejcti gucuuaani lajni. Niluxh xhet sajcdi guijtzga che gajd bejnga guet.

<sup>17</sup> Xhet sajcdi guijtzga che nabansijc nani bejn ni. Sajcni che agujt bejnga.

<sup>18</sup> Ni'cni che bia'n Dios diidx loj rexpejn Israel galoo, gujt te man te bixe' rejn.

<sup>19</sup> Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga nájza nis, bahuajdxni guid-xiil xnäa nájza te la' yajg balagbáz, hysop, dxejcti bastiojbni rejn yejc guijtz cadro caj leii, nájza yejc rebejn.

<sup>20</sup> Dxejc guniini lojreni: "Rejre najc seen sile'pac diidx ni abaxhal Dios lojtu."

<sup>21</sup> Sigajcza bastiojb Moisés rejn guidoo naj guiraa renani rquiin rebixhojz che rajñreni Dios.

<sup>22</sup> Leii xten Moisés rnibee jia guiralii con rejn, palga di rejn guixe', di xtojł bejn jia.

### *Xtiejn Jesucrist rudzucaj dojl*

<sup>23</sup> Ni'cni biquinpac gujt remanre, bixe' xtiejn ni te basiani reni najc xpälaa reni yu' xhaguibaa, niluxh reni yu' xhaguibaa rquiin guixe' xtiejn te ni sajcro.

<sup>24</sup> Di Jesucrist niu' neñ guidoo ni benchee rebejn, ni najc xpälaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios.

<sup>25</sup> Bixhojzro xten xpen Israel biu' neñ yu' ni laa dxanduxh tejtis huält neñ teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn ni. Di guiquiin jiu' rquiin balti huält.

<sup>26</sup> Palga nanab gunni si'cni rujn rebixhojz, sajpnä por niejtni te chinaduxh huält cheli birixtiej guedxliuj. Luxh naj, cheni bidzujł dxej, baluiloj Jesucrist tejtis huält, lagajc laani badeedzani xtiejn ni lo Dios cheni gujtni, cuajni lo cruzj te si'c badzucajni par tejpas xtojł rebejn.

<sup>27</sup> Guiraa bejn nanabpac guetreni tejtis huält, dxejctiru sidejdreni yälguxhtis xten Dios.

<sup>28</sup> Sigajcza tejtis huält badeed Jesucrist xtiejn ni bixe' lo cruzj te badzucajni xtojł xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälrusläa renani cabäjzni.

## 10

<sup>1</sup> Sa'csi leii xten toMoisés najtis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gunsa'cni rebejn nani guibig lo Dios, sa'csi di xtiejn man gudzucajpac rextojlreni.

<sup>2</sup> Paru niajc nibicajpac xtojł reni ruedeed xtiejn guidxaa, aguläjz rudeedreni xtiejn guidxaa, sa'csi che gubicaj xtojłreni, diru xcäriejnreni gumbec dojl.

<sup>3</sup> Niluxh yälrejnt man näj yälruedeedreni rejn casob ijz rusnajtisreni lajzreni xcuent dojl.

<sup>4</sup> Sa'csi digacdi gudzucajpac regon näjza xtiejn redxib xtojł bejn.

<sup>5</sup> Ni'cni che biääd Jesucrist lo guedxliuj räjpni lo Dios:

Di rlajzlu xtiejn guidxaa niclaza regon niluxh abejnlu gacä nigui-guedxliuj.

<sup>6</sup> Dilu nichaglaiz yälrejnt xten guidxaa niclaza yälruedeed rejn, niclaza gojn ni ruedeed rebejn te gusiani xtojłreni.

<sup>7</sup> Dxejc räpä: "Narä basiälä te gunä si'cni rlajzlu Dad, Dios, (si'cni caj neñ reguijtz xcuent ni sacä)."

<sup>8</sup> Che guluxh gunii Jesucrist diidxga: "Di rlajzlu, dizalu guidxaglaiz xcälrejnt guidxaa näjza regon niclaza xcälrejnt guidxaa, niclaza yälruedeed rejn xcuent xtojł bejn si'cni caj lo leii gun bejn."

<sup>9</sup> Dxejcti räjpni: "Narä siälä, te gunä si'cpac ni rlajzlu, Dad Dios." Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj.

<sup>10</sup> Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn ni lo cruzj tejtis huält par tejpas.

<sup>11</sup> Guiraa rexpixhojz Israel rujnreni dzuun guixe-guixee te rudeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl.

<sup>12</sup> Niluxh Jesucrist tejtis huält baxhe' xtiejn ni lo cruzj te badzucajni xtojł rebejn par tejpas. Naj agurejni xladbee Dios cadro rnibeeni.

<sup>13</sup> Ro'c cabäjzni guiraa ni rdxe'ch lojni te cuereni ladzni'ni.

<sup>14</sup> Ni'cni tejtis huält cuajni lo cruzj te basiani par tejpas guiraa renani ahuililajz xtiidxni.

<sup>15</sup> Sigajcza rni Sprit Dxan xten Dios loonu; najni:

<sup>16</sup> Diidx nani jiannääreni neñ redxejre gac scree,

naj Dad Dios: sucuaä rextidxä lo xcäriejnreni,

susäläza xtidxä neñ lastooreni.

Dxejcti räjpni:

<sup>17</sup> Diru lazä guizaj rextojłreni nicla rextolguixdxreni.

<sup>18</sup> Ni'cni, cheni abia xtojł bejn, diru quiquiin gudeedreni guidxaa te jia rextojłreni.

*Nanab guibignu lo Dios*

<sup>19</sup> Ni'cni resa'nu, na'c guidxejbtu, sajc jiu'nu yudxanduxh cadro bixe' xtiejn Dad Jesucrist nani abadeedni lo Dios.

<sup>20</sup> Naj yu' te nezyuj, nezsiucoob, nezyuj xten xcäl'nabanc'oobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajc xtiejn ni lo Dios.

<sup>21</sup> Jesucrist najc xpixhojzronu nani rnibee rexpejn Dios.

<sup>22</sup> Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujyd-inu. Con yäl'rillilajzpac abia lastoonu xcuent rexhigabguixdx, abidiibza tiejxhnu lo nis-ya.

<sup>23</sup> Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu.

<sup>24</sup> Naj do'o guihuii xho jiennu te gacnä j sa'nu te si'c chonälajznu sa'nu nägajcza te jiennu ganax dzunsa'c.

<sup>25</sup> Na'c jiennu si'c rujn rebejn nani diru jiääd che rdxagsa'nu. Nanab guiliidxnu resa'nu sa'csi naj asiäddzun'gajxh dxej ni guibi' Dad Jesucrist.

<sup>26</sup> Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc.

<sup>27</sup> Dxejcsii guidxeebtisnu guilääznu yäl'guxhtisduxh xten Dios näj guiboo ni guze'c renani rdxe'ch loj Dios.

<sup>28</sup> Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o chon ni nancheepac, räjpreni dini nusoob leii, gujt bejn'ga, rut balaslajzdini.

<sup>29</sup> Maazru yäl'rusacsä'duxh nanab ted renani ruläj yejc Xi'n Dios cheni direni gusobdiajg xtiidxni. Alga ruro'nreni xtiejn ni baxhe'ni lo cruzj te basianini. Rusanxtujzani Sprit Dxan xten Dios nani badeed didxcoob lojni.

<sup>30</sup> Anancheenu gunii Dios: "Narä susquixä bejn; loä siguijx bejn", räjp Dios. Stehuält guini: "Dad sujn yäl'guxhtis rexpejn'ni."

<sup>31</sup> jCosduxh gac bejn ni jiajb ladzñaa Dios nani nabajn par tejpas!



<sup>32</sup> Niluxh cołsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios.

<sup>33</sup> Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw.

<sup>34</sup> La'tu banaj lajztu renani yu' latzguiib, guideb yálrbalajz batip lajztu che cua' reni guiraa xhixtentu, sa'csi gucheetu xhaguibaa rajptu reyálnasa'c ni sajrcu, niluxh yu'ni par tejpas.

<sup>35</sup> Na'c gunijttu xcálrililajz xtidx Jesucrist, sa'csi yálrililajzga gun xca'tu yálnabajn par tejpas.

<sup>36</sup> La'tu nanab cuedxitu te che abejntu ni rlanj Dios, dxejc xca'tu nani aguniini guniidxni.

<sup>37</sup> Sa'csi xtidx Dios ni bia'n rni:

Asiáddzungajxhpc dxej ni jiáadni,

asiáddzungajxhpc dxej ni jiáad nani siáad, dipacni gaclaa.

<sup>38</sup> Renani nabańsa'c sibannáj yálrililajz, niluxh palga yu' chutej ni guidxejb chalilajz, dini'c gun guibaa lazá.

<sup>39</sup> Niluxh nuure dinu gac si'c reni rusaan yálrililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

## 11

### Yálrililajz

<sup>1</sup> ¿Xhini'c najc yálrililajz? Yálrililajz sáloj cabááznu sajcpac tejni gajd gac, yu'pacza ni mase dinu fiini, najcni si'cni abahuiinuni.

<sup>2</sup> Dios huinálajz retoxtadgooloonu sa'csi huililajzreni xtiidxni.

<sup>3</sup> Sa'csi rililajznu, najnno benchee Dios reguedxliuj, bencheeni guibaa, bencheezani guiraa nani rhuinu. Con xtiidxtisni bencheeni nani dinu guihui.

<sup>4</sup> Gojpza toAbel yálrililajz badzubyaalni rexquidxaani lo Dios. Yálrbijbyaal xtenni sajrcu loj yálrbijbyaal xten toCaín. Ni'cni gunii Dios najc toAbel bensa'c. Naj mase agujt Abel, sanuutis racbeenu xcuent yálrililajz ni gojpní.

<sup>5</sup> Sigajcza gojp Enoc yálrililajz, ni'c siná Dios Enoc xhaguibaa, guideb nabajni, te na'c niejtni. Diru rebejn niđxalni sa'csi asiná Diosni xhaguibaa. Luxh rájp Dios xcuentni che gajd Dios jináni, gubańsa'cni, baspaani lajz Dios.

<sup>6</sup> Rut chu tejdi sajg guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzeni sudeed Dios xcálnasa'cni loj renani rguilni, nalajznu renani rlanj gumbeepac Dios.

<sup>7</sup> Gojpza toNoé yálrililajz. Che rájp Dios lojni siajbpac nisguij ni gajdreni fii, huililajzni. Bejnni si'c ni rájp Dios. Bidxejbni sa'csi najni rusooob Dios xtiidxni, ni'c bencheeni te canuduxh te di niejt rexi'nni. Sa'csi gojpní yálrililajzga, bejnni gubibde rebejn guedxliuj, gunijtreni sa'csi direni niłlajz xtiidxni. Dxejcti cua'ni yálnabańsa'c ni siáad xcuent yálrililajz.

<sup>8</sup> Sa'csi gojp toAbram yálrililajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuáázni ro'c. Biriini lajdxni, mase dini gan caro chááni.

<sup>9</sup> Gojp toAbram yálrililajz, ni'c huilájzni si'c benzijt loj reyuj ni rájp Dios gudeedni lojreni. Ro'c gulájzreni si'c lajdx benzijt. Gulájzni nen reyuguijd, sigajcza bejn toIsaac nájza toJacob, sa'csi nájza lojreni rájp Dios gudeedni yujga.

<sup>10</sup> Niluxh toAbram cayunloj te guejdx nani sudzu'tz, te guejdx nani cuáxtiej Dios, nani gunche lagajc Dios.

<sup>11</sup> Sigajcza gojp toSara yálrililajz te mase anajcni bengool niluxh agudejd chu xi'nni, cua'ni yálrnibee xten Dios te gujcní nan, guyu' te xi'nni, sa'csi huililajzni susooob Dios xtiidxni.

<sup>12</sup> Ni'cni mase siáddzungajxhpc dxej ni guet toAbram, guyu' xhidalduxh xajgni. Si'c rebalxhaguibaa náj si'c reguibázlule' xten yujxh ni tre' ro' nisdo, si'c najczeni xhidalduxh, ničla gac guigabreni.

<sup>13</sup> Guiraa rebejnre gujt, direni nica' yuj nani rájp Dios gudeedni lojreni; niluxh sa'csi rajpreni yálrililajz, bahuireni lo yujga zitro, ni'c bibalajzreni, sa'csi anajreni najczeni benzijt, cansajisireni lo guedxliuj.

<sup>14</sup> Reni rni si'c, rniłliireni caguilsijczeni cadro gac lajdxreni.

<sup>15</sup> Paru niujnreni xhigab lajdxreni najc guejdx cadro biriireni, pet niajc nibisacreni ro'c.

<sup>16</sup> Niluxh laareni rlanjreni te lajdxreni ni sajrcu, nalajznu lajdx Dios xhaguibaa, ni'c rguilreni. Ni'cni di Dios guitujy gábreni najcni Dios xtenreni, luxh alabencheeni guejdx cadro cuáázreni xhaguibaa.

<sup>17</sup> Gojpza toAbram yálrililajz ni'cni cheni bateed Diosni preeb, rájpní loj Abram gudeedni Isaac lojni lacuaa gudeedni xhiil, cuájbní gugu'tni xi'nni lacuaa xhiil, luxh Dios ni najc tejtis arájp lojni galooli:

<sup>18</sup> "Isaac guniidx chu xhidajl xajglu, xagdoolu."

<sup>19</sup> Sa'csi nanchee toAbram rajp Dios yäl'ribee te guspajñni rebengut. Luxh si'cza cuasacni xi'n'ni, ascanu loj rebengut cuasacni xi'n'ni.

<sup>20</sup> Näjza toIsaac gojp yäl'rillilajz benle'ni toJacooob näjza toEsaü, räjpni xhini'c gun tejgareni.

<sup>21</sup> Gojpa toJacooob yäl'rillilajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojñni Dios.

<sup>22</sup> ToJosé gojp yäl'rillilajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzujtni.

<sup>23</sup> Gojp rexcuzajn Moisés yäl'rillilajz, ni'c cheni gojl Moisés, bacua'tzrenini choñ bäii, sa'csi bahuiireni bäzdaanni. Direni niu xtdx reii ni gunibeeni, räjpni ju'treni bäz niguii.

<sup>24</sup> ToMoisés gojp yäl'rillilajz, ni'cni che aguroobni di rlanjz ni ririlajni xi'n xindxa'p reii xten Egipto.

<sup>25</sup> Bejnii xhigab tednäjñi trabajw rexpejn Dios lacuaa niujñni redzuun ni rchagljaz rujn reben Egipto, sa'csi najc reni'c dojl, luxh tera'tsi ruspaareni lajz bejn.

<sup>26</sup> Par laani maazru sajz tedni lagajc trabajw ni gudejz Jesucrist lacuaa niapjñi reyäl'nasa'c xten Egipto sa'csi laani cabäjtisni reyäl'nasa'c nani churu gudeed Dios lojni.

<sup>27</sup> Gojp toMoisés yäl'rillilajz biriini lajdx reEgipto, dini nidxejb yäl'rdxe'ch xten reii, huinutis gusudzu'tzni si'cni najc xhigabni, ruhuiini loj nani di guzen, nalajznu Dios.

<sup>28</sup> Gojp Moisés yäl'rillilajz bejnii lanij xten pascw. Gunibeeni baroobreni rejn ro' xpuert rexpejn Israel te che ted angl xten yäl'gujt nicla te xingan galoo xten rexpejn Israel di guet.

<sup>29</sup> Gojp rexpejn Israel yäl'rillilajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanjz rebejn Egipto nidejd, gubi' nis, dxejc gulo'reni neñ nis.

<sup>30</sup> Xcuent yäl'rillilajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga.

<sup>31</sup> ToRahab, te gunaguijdx, gojpszani yäl'rillilajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

<sup>32</sup> ¿Xhiruxh guiniä? Di galäi guiniä xcuent toGedeón, xcuent toBarac, xcuent toSansón, xcuent toJefte, xcuent toDavid, xcuent toSamuel, näjza xcuent retoprofe't.

<sup>33</sup> Guiraareni gojp yäl'rillilajz ni'c bejnreni gaan xhidajl reguejdx, bensa'creni yäl'guxhtis, cua'reni xcäl'racnäj Dios ni bia'n diidx xca'reni, basäuren ro' rebeedz.

<sup>34</sup> Guyu'reni neñ te balduxh luxh xhet gujcdireni, gojl baxunreni te di niejtreni con espaad. Reni gujc benrdxajg, guzutzu'tzreni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni.

<sup>35</sup> Guyu' regunaa ni cuasac rextogoolreni, gubañsacreni lo rebengut.

Sgaireni gujt xcuent yäl'rusacsi lacuaa nicäjbreni nusiech lajzreni te nuslaa bejnreni sa'csi rlanjzreni xca'reni stee yäl'nabajñ ni sajcru.

<sup>36</sup> Sgaireni gudejd trabajw guniyaj bejnreni, gudinnäj bejnreni chiir, cuaduuzareni caden, guyu'zareni latzguuib.

<sup>37</sup> Guyu'za reni gujt che bacuaa bejn guj yejcreni o che gujcreni tio'p la' con sier. Guyu'za reni basacsi bejn te guro'nreni yäl'rillilajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejdreni trabajw rusacsi bejnreni.

<sup>38</sup> Sa' rebejnğa di nungäjl reben guedxliuj niääd rebejnğa lojreni. Cuanzaj rebejnğa nez lo reyubijdz cad xhet yu'di xhi gauren nicla nis te yäreni; cuanzajreni nez neñ redajñ, nez neñ rebiliää näj nez neñ guedduxh ni yu' neñ yuj.

<sup>39</sup> Guiraa rebejnğa gojp yäl'rillilajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni.

<sup>40</sup> sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laareni nani bia'n diidx guniidx Dios.

## 12

### *Guihuiitisnu lo Jesucrist*

<sup>1</sup> Ni'c najcni si'cni suga'nu galäii guiraa rebejnre luxh cahuiireni xcäl'rillilaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl'nabajñnu, te di jieednu chosaanu nez lo nezuy ni sasanäanu nez cadro chonnu.

<sup>2</sup> Do'o guihuidzu'tz nez loj Dad Jesucrist nani guläxtiej, nani guluuxza xcäl'rillilajznu. Jesucrist gudejd trabajw lo crujz, dini nitujy gujtni lo sa' yäl'gujtga, sa'csi najñni cheni agudejdn trabajw, sica'ni yäl'rbalajz; naj agurejni xladbee Dios cadro rnibeeni.

<sup>3</sup> Coluyjñ xhigab la'tu xho gudejd Jesucrist ladzñaa reben dojl, te na'c guidxajgtu, na'cza jieedtu la'l ni cabäjtuni.

<sup>4</sup> La'tu gajd xtiejntu guixe' lo yäl'rucuanäj dojl.

<sup>5</sup> ¿La abiäl lajztu xho baliidx Dios la'tu si'c xi'nni, ä? Scree caj xtiidxni lo reguijtz; räjpni: Xinä, na'c cuälazlu xcälñaj Dad niclaza jieedlu che tilñajni luj.

<sup>6</sup> Sa'csi si'c runnaj Dad renani sanälajzni, rujnni ríaa guíraa renani rca'ni si'c xi'nni.

<sup>7</sup> Palga gatijp lajzlu lo xcälñaj Dios, sica'ni luj si'c xi'nni, sa'csi ¿chu dad di gunnaj xi'nni?

<sup>8</sup> Niluxh palga di Dios gunnaj la'tu si'cni runnajni guíraa rexi'nni, ditu gac xi'npacni, najctu xi'n redolguidx.

<sup>9</sup> Anajntu cheni gucnu biuux lo guedxliujre, bennaj xtdadnu nuure te rsoobnu xtiidxni, te runsa'czanu si'cni ríajzni. ¿Xhicuent dinu cuadiajg xtidx xtdadnu ni yu' xhaguibaa te si'c jia'pnu yälñabajn, ä?

<sup>10</sup> Xtdadnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yälñabanya, te gac nayazanu sigajc najcni laani.

<sup>11</sup> Guliini xhet xhi yälñajdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guíraa renani agudejd loj yälñajga rusoob xtiidxni, rca'reni te yälñabanya ni rbecdxilajzreni.

### *Riez guze'ni xtidx Dios*

<sup>12</sup> Ni'cni colsudzu'tz reñaatu ni abadxajg, colsudzu'tz yecxhijbtu ni abadxajg,

<sup>13</sup> te colquuil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

<sup>14</sup> Colquuil xho cuedxinäjtu guíraa rebejn. Colchanä te yälñabanya, sa'csi renani di guibanyadi, digacdi fiireni loj Dad Jesucrist.

<sup>15</sup> Colhuisa'c te di gunijt chutejtu lo xcälracnäj Dios, colñatiro gac chu tejtú si'c te cuanlaa ni rujn daan, sa'csi sa' bejnga suxhiñni guíraa renani ahuililajz.

<sup>16</sup> Nicla tejtú na'c ga'p stee gunaa te laad, nungäjil cuäznäjni chäältisni. Na'cza gactu bejn ni di jiu xtidx Dios, si'c gujc toEsaü cheni bato'ni xcälñasa'cni ni najc xtenni sa'csi najcni xingan galoo xtdadni. Bato'nini te cua'ni yälrajwtis.

<sup>17</sup> Anajntu, cheni ríajzni niunle' xtdadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

<sup>18</sup> Colñatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäjy, nacäiboo, cayajcza bedonduxh.

<sup>19</sup> Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgteni rediidxga, direni nutiplajz, gunabduxhrenei na'cru guiniini lojreni.

<sup>20</sup> (Sa'csi direni nutiplajz diidx ni caniini, räjpni: "Palga ted te mantis guläj xhuj dajnga, colju'tni con guij.")

<sup>21</sup> Te yälñadxebduxh najc nani guzen ro'c, lagajc toMoisés räjp: "Cayacditä yälrdxejb."

<sup>22</sup> Niluxh la'tu agubigtu lo dajn xten Sión, cad najc lajdx Dios ni nabajnpac, nalajznu guedx Jerusalén ni yu' xhaguibaa cadro yu' xhidalduxh xangl Dios,

<sup>23</sup> cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respriit xten rebejn nani abasia Dios te anajcreni beñnasa'c.

<sup>24</sup> Agubigzanu loj Jesucrist nani suga' galäii nez loj Dios näj beñguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jiajñ lajz Dios, luxh ni'c sajcrú loj nani rniab xtiejn toAbel. Xtiejn toAbel rniab quix nani bagu'tni.

<sup>25</sup> Ni'c colñatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siääd guedxliujre, ¿xho jiennu tedbianu palga guilälaznu nani ruluii nani siääd xhaguibaali?

<sup>26</sup> Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa."

<sup>27</sup> Che gunii "ste huält", ni'c säloj guibicaj renani benchee Dios ni rac rniib, e jia'n renani digacdi guiniib.

<sup>28</sup> Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälrdxejb näjza yälñadolajz,

<sup>29</sup> sa'csi Xtiosnu najc si'c te balduxh ni ruse'c, ni runitlojza.

## 13

### *Xho guspaa bejn lajz Dios*

<sup>1</sup> Colchanuu lo yälñalajz sa'ni.

<sup>2</sup> Di gusaantu gudeedtu roliztú guidzujñ biooz, sa'csi loj reni bejn si'c, yu'reni badeed rolizjreni bidzujñ xangl Dios rolizjreni, niluxh direni niacbee chu najceni.

<sup>3</sup> Colŝnaj lajztu reni yu' nen latzguiib, ascanu la la'tu ni yunäreni latzguiib. Colŝnajza lajztu renani basacsi bejn, ascanu la la'tu ni cagusacsíreni sa'csi nájza la'tu najctu benguedxliuj si'c najcreni.

<sup>4</sup> Colga'p xpala'n yálguchnaa te guiban-nayatu con cháálu sa'csi sujn Dios yálguxhtis rebejn ni resnáj cháál bejn nájza reni rusguee rebenxteb.

<sup>5</sup> Na'c chanälajztu meel, colguibalaznáj ni rajptu, sa'csi Dios agunii: "Dipacna gusanálu, dizana cuälazálu."

<sup>6</sup> Ni'c dinu guidxeb guiniinu:

Dad ni yu' xhaguibaa najc ni rcanáj narä;

dina guidxebä xhitis ni gunnáj bejn narä.

<sup>7</sup> Colŝnaj lajztu renani baluui guibansa'ctu, ni basule'za xtidx Dios lojtu; colhuii xho nabajnreni te sigajcza colchanä xcälrlililajzreni.

<sup>8</sup> Sigajc gujc Jesucrist nái, sigajcza najcni nadxej, sigajcza sajcní par tejpas.

<sup>9</sup> Na'c gusaantu gusiejchreni lajztu xcuent ste'ca yálrulúui ni digac si'c najc xtidx Jesucrist. Sacduxh sudzu'tz lastoonu lo yálracnáj ni rulúui xtidx Dios, xhet lojdi yálrájwts. Xhet sajcdi rebejn nani rujntis xhigab xcuent yálrájw.

<sup>10</sup> Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo.

<sup>11</sup> Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga.

<sup>12</sup> Si'cza gujt Jesucrist te laad, dejtz guejdx, te basiani xtoj rebejn xcuent lagajc xtiejnni.

<sup>13</sup> Naj colcho' chonnu loj Jesucrist te laad dejtz guejdx te guideednu trabajw nájza yálxtojuy si'cni gudejd Jesucrist.

<sup>14</sup> Sa'csi lo guedxliujre dxunlaasinu, niluxh caguilnu laadxnu ni chu jiädru, te ro'c guidxunnu par tejpas.

<sup>15</sup> Guideb xcälracnáj Jesucrist do'o guideedtisnu xquixtios lo Dios si'c te gojn ni guideednu lojni, guiliä'pnu xpala'nni náj jieľnu redij.

<sup>16</sup> Na'cza jiälajztu guntu huen, gacnáj sa'tu, sa'csi reni'cni najc redzuun ni rdxaglaiz Dios.

<sup>17</sup> Colcuadiajg xtidx reni rnibee la'tu, sa'csi laareni rcanájreni lastoonu, si'cza laareni sudeedreni cuent lo Dios. Colyujn guibalajzreni gunreni txzuunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

<sup>18</sup> Colnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun.

<sup>19</sup> Rniä lojtu, guiniabrutu loj Dios, te gun Dios jiojb guibi'ä jiälä lojtu.

*Te didxle' náj lult xtixtios*

<sup>20</sup> Dios xten yálrbedxilajz ni baspajn Dad Jesucrist lo rebengut, Jesucrist najc baxtorduxh xten rexiił xcuent rejn ni bejn gusojb didxcoob xtenni ni najc par tejpas.

<sup>21</sup> Dios gun gactu beŝsa'c, bendxojn loj xhitis te guntu ni rłajzni, náj gunni loj guiraa nuure si'c ni rłajzni xcuent Jesucrist. ¡Colspaa lajz Jesucrist par tejpas! ¡Sugacni si'c!

<sup>22</sup> Resa'nu, rniabä lojtu, colcuedcxi lajztu, colcuadiajg rediidx ni rulijdxre, sa'csi riojbgacacuaä te labäz guijzre lojtu.

<sup>23</sup> Colyacbee abiriü bejznu Timoteu latzguiib. Palga guidzungajni ree, siädnaäni jiädhuiä la'tu.

<sup>24</sup> Colguedeed xtixtios loj guiraa renani rulúui la'tu náj loj guiraa rebejznu ni rililajz. Reben Italia ruxhal xtixtios lojtu.

<sup>25</sup> Gacnáj Dios guiraatu. Sugacni si'c.

## Guijtz Nani Bacuaa Santiaag

*Santiaag rucuaa guijtz loj renani nare'ch lo guedxliuj*

<sup>1</sup> Narä Santiaag, xmos Dios näjza xten Dad Jesucrist, ruxhalä xtixtios loj guitzubutio'p cuaa rexpejn Israel ni nare'ch lo guedxliujre.

*Yäl'najn nani runiidx Dios loonu*

<sup>2</sup> Rebetzä lo xtidx Dios, colguibalazduxhtis che rsiajcturecos nani ruquiiltu cuälaztu xnezyuj Dios,

<sup>3</sup> sa'csi che rsiajctureni reni'c, rsiajctureni te don la guliipac ahuillilajztu xtidx Dios, dxejcsieedrutu yäl'rbecdxi lajz.

<sup>4</sup> Dxejcti yäl'rbecdxilajz sajc gunni xtzuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxd xcäl'najnni.

<sup>5</sup> Palga yu' tejtü ni cayääd xcäl'najnni, suguiniabnini lo Dios, sa'csi Dios rudeedduxhni yäl'najn loj guira'ti bejn, luxh dini guinii didxlaa lojni. Palga guiniab bejnni, sudeedza Diosni.

<sup>6</sup> Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäj ni sanä bej, nezree-nezre'c sääbni.

<sup>7</sup> Nani najc si'c, na'c gunni xhigab yu' xhi xca'ni lo Dad Jesucrist.

<sup>8</sup> Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

<sup>9</sup> Te sa'nu ni najc nadolajz, suguibalajzni sa'csi najcni beñro sa'csi guläs Diosni,

<sup>10</sup> sigajcza bejtznu ni yu' xhixtenni, suguibalajzni sa'csi abaluii Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa.

<sup>11</sup> Sa'csi che rliejn gubijdz näjza te belaa, li rgoj recuaanga, li riuii reguii ni caj lojni, dxejcs rtejbreni, dxejcti agunijt xcäl'sacruni. Si'cza sinitloj te bejn ni yuduxh xhixtenni laj ni yu'ni lo xnezyujni.

*Xhi xca'ni che tedni trabajw*

<sup>12</sup> Chichaa niguii ni rsiudzu'tz laj ni cadejndi trabajw, sa'csi che agunii Dios didxsa'c xcuent nani bejnni sica'ni coron xten yäl'nabajn par tejpas ni bia'n Dios diidx gudeedni loj rebejn ni sanälajz Dios.

<sup>13</sup> Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquii Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl.

<sup>14</sup> Niluxh tejtatu runijt che rcäjy xcäriejntu sa'csi riabj yejctü guntu cosguijdx.

<sup>15</sup> Che riabj yejctü guntu cosguijdx, runijttu rujntu dojl, luxh dojl che abejntuni, riädnäni yäl'gujt.

<sup>16</sup> Sa'ä ni sanälazä, na'c gusaantu gusgueereni la'tu.

<sup>17</sup> Guiraa recoshueen, guiraa recossa'c xhaguibaali siäädreni loonu; Dios ruxhal'reni, lagajc Dios ni benchee rebajl xhaguibaa, Dios nani di guchaa, sigajctis najcni.

<sup>18</sup> Lagajc xcuentni bejn Dios gacnu xpejnni sa'csi huililajznu xtidxliipacni, te gacnu rebeñ galoo loj rexpejnni.

*Xho nanab jiennu*

<sup>19</sup> Acanajntu recosre, sa'ä ni sanälazä. Niluxh tejtatu nanab gusquejnni te gucudiajgni, per gaclaani te guiniini, gaclaazani te guidxe'chni,

<sup>20</sup> sa'csi xcäl'rdxe'ch bejn dini gun xcäl'nasa'c Dios.

<sup>21</sup> Ni'cni colcuälaz guiraa recosguijdx, guiraa recoslatsiaj ni ria'n. Guideb yäl'nadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajc gusläa xaimtu lo dojl.

<sup>22</sup> Niluxh baluii lo guira'ti bejn najctü bejn ni rusoobpactu xtidx Dios, xhet bejndi ni rucudiajgtis xtiidxni, ni rusgueeni lagajc laani.

<sup>23</sup> Sa'csi palga najc te bejn te nani rucudiajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuajn.

<sup>24</sup> Sa'csi che ruhuiini xho najcni, sägajcni, riallazgajcni xho najcni.

<sup>25</sup> Niluxh nani ruhuidzu'tz lo leisa'c, nalajznu lei ni nani rusläa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnga najc ni sajp yäl'rbalajzpac lo xhitis ni rujnni.

<sup>26</sup> Palga yu' tejtü ni rujn xhigab najcni te bejn ni randuxh Dios, niluxh di gacdi gusäuni ro'ni, guiraloj rniini, bejnga rusguee lagajc laani, luxh xhet sajcdi yäl'rajn Dios xtinni.

<sup>27</sup> Yälrajn Dios ni najc guliipac, ni xhet nu'chdi lojni najc scree: chahuini rebisiäjb, näjza regunaa ni agujt cháäläni che yu' xhi rquinnreni, näjza na'c säblajztu guntu nani rujn reben guedxliuj ni di chalilajz xtidx Dios.

## 2

### *Nanab tebloj jiennänu guira'ti bejn*

<sup>1</sup> Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajrcu tej bejn lo sabejnäni.

<sup>2</sup> Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed,

<sup>3</sup> dxejcti la'tu jiuuritu nani najcw ladsa'cga, naatu: "Ree gurej lo yagxhilsa'cre", dxejcti gäblu lo bejn ni xhet rajpdi: "Rec gusulii o gurej lo yujre",

<sup>4</sup> ¿la xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

<sup>5</sup> ¡Colgucuaadijg, betzä ni sanälazä! Agule Dios bejn nani xhet rajpdi lo guedxliujre te ga'preni yälirililazduxh, te lo xcälrmibee Dios xca'reni xcäl'nasa'c ni bia'n diidx gudeed Dios loj renani sanälajzni.

<sup>6</sup> Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsítu, li rgobxhaxhreni la'tu, rinäreni la'tu loj reguxhtis, ä?

<sup>7</sup> ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

<sup>8</sup> Palga guliitu cagusoobtu leii xten xreinu Dios, si'cni caj lo xquijtz Dios scree: "Colchanälajz sa'tu sigajc rinälajztu lagajc la'tu", laaca rujntu.

<sup>9</sup> Niluxh palga rinälajzrtu tej cuaa bejn lo stee cuaa bejn, cayujntu dojl, luxh xleii Dios rniij najctu bej dojl, bejn ni rbälaz leii.

<sup>10</sup> Palga yu' te bejn ni rusooob guiraa ni caj lo xleii Moisés, niluxh runijtni lo tejtis diidx ni caj lo leii, abanijt pacni, najcni si'cni dini nusoob nicla tej diidx lo guideb leiga.

<sup>11</sup> Sa'csi lagajc Dios ni gunii: "Na'c guesnäjlü bejn ni di gac cháällu", lagajc laani guniizani: "Na'c ju'tlu." Palga dilu guesnäj bejn ni di gac cháällu, niluxh rugu'tlu te bejn, abanijtlu xcuent guralii releii.

<sup>12</sup> La'tu colguini, colguibajn si'c rebejn ni gun Dios yäl'guxhtis con xtiidxni ni rusläa bejn lo dojl.

<sup>13</sup> Sa'csi renani di gulaslajz bejn, che gun Dios yäl'guxhtisreni, dizani gulaslajz laareni. Sajrcu yäl'rulaslajz lo yäl'guxhtis.

### *Yäl'irililajz näj dzuun ni rujn bejn*

<sup>14</sup> Resa'ä, ¿xhi sajz palga guini te bejn: "Ahuililazä xtidx Dios", niluxh dini gun dzuun ni riäj] gunni, ä? Sa' yäl'irililajzre, ¿la suslaanini lo dojl, ä?

<sup>15</sup> Palga yu' te bejtznu o te bisiajnno ni dini ga'p xhajbni, luxh xhetiza xhi gauni, xhi yäni,

<sup>16</sup> luxh gäb tejtü lojni: "Sucuedxi lajzlu jiiu, suguidxa' lajzlu, suguidxaj xque'lu", niluxh dini gudeed nani caquiinni, ¿xhi sajz rediidx ni räjpni lojni, ä?

<sup>17</sup> Sigajcza yäl'irililajz nani di guquiil bejn gunreni xtzuum Dios najc si'c te ni agujt, sa'csi dini guquiil bejn gunreni dzuun.

<sup>18</sup> Yu'za reni naa: "Luj rajplu yäl'irililajz, narä runä xtzuum Dios; baluii narä xcäl'irililajzlu xhet näjdi xtzuum Dios, dxejcti narä suluiä xcäl'irililazä xcuent rextzuum Dios ni runä."

<sup>19</sup> La'tu rililajztu yu' tejtis Dios. Laaca rujnlu, niluxh näjza rebejdxab rililajz yu' tejtis Dios, racdijtlireni, rdxebduxhreni.

<sup>20</sup> ¿La di rlanjtu gacheetu, bejnyääl? ¿La ditu gan, yäl'irililajz ni di guichagnäj xtzuum Dios najc te yäl'irililazgut?

<sup>21</sup> Dios badzucaj xtoj] toxtadgoldoonu Abram sa'csi bejnäni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios.

<sup>22</sup> Colhüii xho tejsi junt sadxaag xcäl'irililajz toAbram dzuun ni bejnäni, dxejcti sa'csi bejnäni nani gunibee Dios gunni, bejn Dios gujc xcäl'irililajzäni sa' yäl'irililajz nani rlanj Dios ga'p rexejpnäni.

<sup>23</sup> Dxejcti huile' xtidx Dios cadro caj scree: "Abram huililajz ni räjp Dios lojni, ni'cni badzucaj Dios xtoj]ni, cua' Dios Abram si'c te bejnaya." Birilajzani "xamiigw Dios."

<sup>24</sup> Ni'cni ruhüitu rca' Dios te bejn si'c bejnaya nez lojni xcuent xtzuum Dios ni rujnzani, xhet ganaxtis xcuent xcäl'irililajz bejnäni.

<sup>25</sup> Sigajcza gusajc toRahab, ni gujc te gunadxab. Dios badzucajza xtoj]ni, bejn Dios xhigab najcni te bejnaya sa'csi bejnäni xtzuum Dios che badeedni rolizni bacua'tzloj tio'p xpejn Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj.

<sup>26</sup> Sigajc ni di gacdi guibajn tiejxh bejn palga xheti sprit, sigajcza di gacdi guibajn yäl'irililajz palga dini gun dzuun ni rñibee Dios gunni.

## 3

*Rediidx nani rnii luudxnu*

<sup>1</sup> Resa'ä, na'c gac xhidajltu bejn ni ruluui xtidx Dios, sa'csi anajnnu rac yälguxhtisoru rebejn nani ruluui xtiidxni.

<sup>2</sup> Sa'csi guiragajcnu riennu xhidajl cuaa dojl. Palga yu' te bejn ni di gunijl to diidx ni rniini, laani najcni te bejnsa'c, rajcza rnibeeni guideb tiejxhni.

<sup>3</sup> Palga rusälnu guiib ni ru' ro' cabaii te chääni cadro rlanjnu jiini, rnibeezanu guideb xtiejxhni.

<sup>4</sup> Colhuii rebarcwro, mase siolduxhreni, luxh rebeduxh rulanaareni, niluxh capitán ni rusaj barcw lo nisdoo, te guibbáz ni caj xhajn barcw neñ nis, con ni'ctis rinánini cadrotis rlanjni.

<sup>5</sup> Sigajcza najc luudxnu, najcni te labáz tiejxhnu, luxh colhuii lacti didxro rniini. Najcni si'c te balbáz ni rajc ruze'c guiragajc reyajg ni yu' dajn.

<sup>6</sup> Luxh luudxnu najc si'c te bajl. Rnii luudxnu guiraa redidxdxuudx ni rnii rebeñ guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguoj con xquiboo gabijl.

<sup>7</sup> Rebejn sajz gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejnreni,

<sup>8</sup> per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn.

<sup>9</sup> Lagajc luudxnu rliä'pnu xpala'n Dios Xtadnu, lagajc laani rniyajnu sabejnnu ni benchee Dios sigajc najcni.

<sup>10</sup> Tejsi ro'nu rnile' lo Dios nägajcza rgue lo bejn. Rebetzá, jxhet si'c di nungäjldi gacni!

<sup>11</sup> ¿La rbää bejn nisnejxh näjza nisrop lo tejsi bisie, ä?

<sup>12</sup> Betzá, ¿la caxajsi sajz xcax aceitun loj te yagiigw, ä? ¿O la sajz xcax iigw lo te yaguub, ä? Sigajcza digacdi gurii nisnejxh näjza nisrop lo tejsi bisie.

*Yälajn ni siääd xhaguibaa*

<sup>13</sup> ¿Chuni'c lo guiraatu yu' xcäriejnni, nanduxhni, ä? Suguluini xho najcni xcuent xcäl'nabansa'cni, sugunni xtzuunni guideb yäl'nadolajz ni ruedeñ xcäriejnni.

<sup>14</sup> Niluxh palga yu' yälrdxe'ch lo sa'lu ni runnanlaa lastoolu, näjza rujnu guira'ti parsi xcäl'nasa'c lagajc luj, na'c gaclu guyalajz, sa'csi ni'c najc si'c ni caniilu didxrusguee xcuent xtidxlii Dios.

<sup>15</sup> Sa'csi sa' yäl'najnre, xhet xhaguibaadi siäädni, alga najcni yäl'najn xten guedxliujre, xten rebeñ guedxliuj, xtenza rebedxab.

<sup>16</sup> Sa'csi cadro yu' yälrdxe'ch lo sa'ni, näj cadro rujn bejn guira'ti parsi xcäl'nasa'c lagajc laani, ro'c yu' biejy, yu' guiraloj latsaj.

<sup>17</sup> Niluxh yäl'najn ni ruxhal Dios, ganidoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'ru, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdil'näjtu sa'tu. Ditu ga'p nani rlanjtu sa'csi ditu guiniabni loj Dios.

<sup>18</sup> Renani rguuil yäl'rbedxi, yäl'rbedxi rbe'creni te xca'reni te yäl'nabannaya nez loj Dios si'c xcäl'nasa'creni.

## 4

*Ni nabannäj guedxliuj*

<sup>1</sup> ¿Casiääd rebiejy, reyälrdxe'ch lo sa'ni ni casiajctu? ¿La direni jiaäd xcuent lagajc xhigab ni yu' lastootu, ä? Lagajc rexhigabga rujn biejy neñ lastootu, ruscäjyreni xcäriejntu.

<sup>2</sup> La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdil'näjtu sa'tu. Ditu ga'p nani rlanjtu sa'csi ditu guiniabni loj Dios.

<sup>3</sup> Rniabtuni, niluxh dini guniidxni sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu.

<sup>4</sup> ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn rebeñ guedxliuj, bejnga rdxe'chreni lo Dios, ä? Ni'cni palga yu' chu tejtuni ni rlanj chanuu lo ni rajc lo guedxliujre, bejnga rdxe'ch lo Dios.

<sup>5</sup> O ¿la rchalotu xlia'si caj lo xtidx Dios rediidxre: "Sprit ni baxhal Dios te cuääzni neñ lastoonu, randzu'ni nuurnu sa'csi rlanjni guinibeeni nuurnu"?

<sup>6</sup> Niluxh runiidxru Dios xcäl'racnäjni loonu. Ni'cni rnii xtiidxni scree: "Dios rdxechnäj renani runnaro lagajc laareni, niluxh rudeedruni xcäl'racnäjni lo rebeñnadolajz."

<sup>7</sup> Coljiu'pac lo xnezuyuj Dios. Coljudzu'tzpac te di guntu ni rlanj beñdxab, te guxunni lojtu.

<sup>8</sup> Colguibigru lo Dios te guibigzani lojtu. Beñdoj], colquiib ñaatu, nalajznu na'cru guntu latsiaj; colgusia lastootu, la'tu ni runtio'p lajztu.

<sup>9</sup> Sugacnaj lajztu, suchuti xliajs, colyonduxh. Colguchaa xcäl'ruxijstu, colca' yäl'huin, colguchaa xcäl'rbalajztu, colca' yäl'roon.

<sup>10</sup> Colyajc si'c bejn ni xhetliidi sajz nez loj Dad Jesucrist, te laani guiliäśni la'tu gunni la'tu beñro.

#### *Na'c guiniyajtu sa'tu*

<sup>11</sup> Rebetzä, na'c guiniyajtu resa'tu. Sa'csi renani rniyaj sa'ni o rujnni yälguxhtis sa'ni, reni'c rniyaj xleii Dios, rujnreni yälguxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii.

<sup>12</sup> Tejtis najc nani runiidx leii loonu, tejtis najc juejz; najcni nani rajc rusläa bejn lo dojl, nani sajza gunitloj bejn. La'tu, çchuxh najctu te guntu yälguxhtis lo sa'tu, ä?

#### *Dinu gan xhi gac guixee*

<sup>13</sup> Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel.

<sup>14</sup> Luxh nicla gantu xho gac xcäl'nabajntu guixee. Xcäl'nabajntu najc si'csi te za nani rienloj ter'a'tbäz, dxejcti rnitlojni.

<sup>15</sup> Hueenru guiniitu scree: "Palga rlanj Dios sibaannu, te jiennu dee o dec."

<sup>16</sup> Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojl.

<sup>17</sup> Ni'cni ni najn xho riälj gunni, palga dini gun si'c, rujnni dojl.

## 5

#### *Rulijdxni rebejn ni yu' xhidajl xhixtenni*

<sup>1</sup> Colgucuaadiajg xtidxä, bejn ni yu' xhidajl xhixtentu. Colyoon, colcuexa' xcuent recasion-duxh ni sactu.

<sup>2</sup> Guiraa rexhixtentu nani rajptu aguxhijn, luxh rexhajbtu agudajw rebaguiidni.

<sup>3</sup> Oor näjza pla't xtentu agubibtejnni, aguxhijnni. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. çXlia'si batiedajntu xhixtentu neñ redxej lultga!

<sup>4</sup> çCol'huui! Ditu niguixsa'c loj reni bejn xtzuumtu, ni'cni laareni cayujnreni yälquij lo Dios xcuenttu. Luxh xhadiajgli Dios xten reangl ni yu' xhaguibaa abidzujn yälquij xtentu ni cabe'c renani batie'c xcäl'nasa'tu.

<sup>5</sup> Agubansa'cpactu lo guedxliujre, bejntu lanij si'ctis ni rlanjtu, abastio'tu lastootu neñ redxej xten yäl'rugut.

<sup>6</sup> Gudiiltu xho bagu'ttu rebeñsa'c luxh laareni dxiitis gusujreni, xhet bejndireni te na'c nugu'ttureni.

#### *Colcuääz jädxhi Diostu*

<sup>7</sup> Resa'ä, dxitis colcuääz guidzujn dxej cheni jääd Dad Jesucrist. Colhuui xho rujn bejn ni rbe'c binij, dxitis rbäjzni gac xcäjlni la] ni riabj nisguigaloo näjza nisguij ni riabj lult.

<sup>8</sup> Si'cza la'tu colcuääzdx, colgustioob lastootu sa'csi asiäddzũngajxh dxej ni jääd Dad Jesucrist.

<sup>9</sup> Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzũngajxh dxej che guidzujn Dios ni najc Juejz.

<sup>10</sup> Rebetzbidä, colhuui xho gudejd reniguii nani bacuaa xtidx Dios trabajw galoo, xho guläjjzarenii.

<sup>11</sup> Colhuui xho rniinu chicbaa renani guläzdxii lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yäl'rulasajz.

<sup>12</sup> Rebetzä, che ria'ntu diidx lo te bejn, gunatiro palga gusa'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguxhtis la'tu.

<sup>13</sup> çLa yu' tejtü ni cadejd trabajw, ä? Suguiniabni lo Dios. çLa yu' chu tejtü ni cabalajz, ä? Sugolni dij te guiliä'pni xpala'n Dios.

<sup>14</sup> çLa yu' chu tejtü ni cayacxhuu, ä? Sucueedxni rebengool ni rnibee neñ guidoo, te guiniabreni lo Dios xcuentni la] ni cagusälzarenii se't lo cuajni con laj Jesucrist.

<sup>15</sup> Luxh palga rililajzpacreni che canabreni, siajz benracxhuuga, siliäs Jesucrist bejnğa. Luxh palga bejnii dojl, sibicaj xtojlni.

<sup>16</sup> Ni'cni colguxhobdojl lo sa'tu, colnab lo Dios xcuent sa'tu te jiajctu. Che rniabduxh te beñ naya lo Dios, dzunroza rujn Dios.



<sup>17</sup> Elías, te bejn ni gunii xtidx Dios agujc xchero, gujca te bejn sigajc najcnu. Gunabdipli loj Dios te na'c jiajb nisguij, luxh di nisguij niajb lo guedxliuj choñ ijz garol.

<sup>18</sup> Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyálnasa'c xtenreni lo guedxliuj.

<sup>19</sup> Rebetzá, palga yu' chu tejtú ni guibicaj lo xtidx Dios, luxh yu' chu gacnáj guibisacni lo xtidx Dios,

<sup>20</sup> sugacbee bejn nani racnáj guirii bendojl lo xnezyuguidxni te guibisacni lo Dios, bejn ga agucnájni te gułaa xaimni lo yálgujt, te gubicajza guiraa xtojłni, mase xhidalduxh najc xtojłni.

## Guijtz Ganid Nani Bacuaa Pedr

*Pedr cacuaa guijtz loj reni rililajz ni nare'ch*

<sup>1</sup> Narä Pedr, te apost xten Jesucrist, cacuaä guijtzre loj renani agule Dios gac rexpejnni nani rbäjz si'c benzijz lo reguedx Ponto, Galacia, Capadocia, Asia, näjza Bitinia.

<sup>2</sup> Xtdnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenni xtzuumni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuecdxini lastootu lo guiraliti.

*Te yäl'nabajn ni cabäaznu*

<sup>3</sup> Colguiliä'p xpala'n Dios ni najc Xtd Jesucrist, Dios nani xcuent xcäl'rulaslazduxhni bejnni gojpnu te yäl'nabancoob sa'csi baspañsacni Jesucrist loj rebengut. Sa'csi rajpnu yäl'nabancoob, ni'c nadippac lajznu.

<sup>4</sup> Ni'cni laani suniidxni te yäl'rusalajz ni di nitloj, ni di xhin, ni di jiuii si'c riuii rebalajg. Yäl'rusalajzga aguluchedzu'tzni xhaguibaa par la'tu,

<sup>5</sup> nani cayapdzu'tz xcäl'milaagwr xten Dios sa'csi rililajztu xtiidxni, te guluii Dios guira'ti ni rajpni par la'tu, ni arapcheeni te guluiinireni lojtu che luux guedxliujre.

<sup>6</sup> Ni'cni rbalazduxhtu, mase nanab tedtu balti trabajw gaie'si dxej lo guedxliujre,

<sup>7</sup> te guzen xho rililajztu. Xcäl'rililajztu sajcru lo oor nani rnitloj, niluxh xcäl'rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl'milaagwrni, näjza xcäl'rindimbicha'ni.

<sup>8</sup> Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl'rbalajz ni rut rajcdi rusule', sa'ni yu' xhaguibaatis,

<sup>9</sup> sa'csi xcäl'rililajztu suslaa xaimtu lo dojl, sica'tu yäl'nabajn par tejpas.

<sup>10</sup> Luxh xcuent yäl'ruslaa dojlre, rebejn nani gunii xtidx Dios agujc xchero, laareni abasulexgaareni xcuent xcäl'racnäjä Diosre nani siääd lojtu. Luxh bisiedduxhrene, gunabdiidxzareni,

<sup>11</sup> te rrajzrene gachebereni chu bejn o gucpac gac nani cagusä't Sprit xten Crist ni yu' neñ lastooreni che gunixgaani xho nungäjł ted Jesucrist trabajw, dxejcru xcasacni yäl'rnibee.

<sup>12</sup> Baluii Dios lojrene, di rediidxga soob neñ redxej ni nabajnrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhał Dios Sprit Dxan xtenni te cuäazni neñ lastooreni. Näjza rexangl Dios ni rbäjz xhaguibaa rrajz gacheerureni rediidxga.

*Xcäl'nabatnayanu nez loj Dios*

<sup>13</sup> Ni'cni, colsanij xcäriejntu, colgusudzu'tz lastootu, guideb lastootu colyenloj yäl'racnäjä xten Dios ni abia'n diidx xca'nu che guibisac Jesucrist lo guedxliuj.

<sup>14</sup> Gactu si'c biuux nani rusoo xtidx xtdani. Na'cru xcäjbtu guntu redzunguidx ni bejntu galoo che gajdtu gumbee Dios.

<sup>15</sup> Dios ni gule la'tu najc dxan. Sigajcza la'tu, loj guiralii ni rujntu colyajc bendxan.

<sup>16</sup> Sa'csi lo xtidx Dios caj scree: "Sajctu bendxan sa'csi narä nacä dxan."

<sup>17</sup> Palga la'tu rniitu "Dad" lo Dios nani tebloj rujn yäl'guxhtis loj guiraa bejn xcuent dzuun ni bejnni, la'tu riäjł guidxejbtuni guiraa dxej ni nabansijctu lo guedxliujre.

<sup>18</sup> Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu,

<sup>19</sup> badeedni rejn ni sacduxh te baslaani la'tu loj xtojłtu. Rejn si'c xtiejn te xiil ni naya, xhetpac najcdini, xtiejn lagajc Jesucrist.

<sup>20</sup> Gullipacni che gajdł guirixtiej guedxliujre, gule Dios Jesucrist, niluxh najru, neñ redxelult che gajd guedxliujre nitloj, biädluilojni par xcäl'nasa'ctu,

<sup>21</sup> la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl'rnibee lojni, ni'cni ahuililajztu xtidx Dios, luxh Diostis cayenlojtu naj.

<sup>22</sup> Naj sa'csi abasooxtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu.

<sup>23</sup> Sa'csi acua'tu xcäl'nabancoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj.

<sup>24</sup> Galooli gunii Dios scree:

Guiraa rebeñ guedxliuj najc si'c recuaan,  
guiraa xcäl'nasa'creni najc si'c reguii ni rcaj lo cuaan,  
recuaan rgol, lirtejbza reguii xtenni,

<sup>25</sup> niluxh xtidx xtdad Jesucristnu rsiudzu'tzni tejpas.  
Luxh diidxre najc diidx ni basule'reni lojtu.

## 2

<sup>1</sup> Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntioj lajztu, na'c chuguij lajztu xhixten sa'tu, na'c guiniyaj sa'tu.

<sup>2</sup> Si'c riojl rebäznite' le'ch, si'cza colquuil xtidx Dios par sprittu. Coljiojl xtidx Dios te gustioobruni la'tu lo yälruslaa lo dojl,

<sup>3</sup> palga agucebeetu lacti hueen najc xcälracnäj Jesucrist.

### *Crist najc si'c te guij ni nabajn*

<sup>4</sup> Colguibig loj Jesucrist ni najc si'c te guij ni nabajn. Laani suniidx yäl nabajn par tejpas loonu. Rebejn badzucaj guijga, niluxh Dios gulenini sa'csi sacduxhni.

<sup>5</sup> Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl nasac'tu con xpri xtenntu. Dee najc nani rchaglajz Dios.

<sup>6</sup> Sa'csi galooli gunii Dios scree:

Agule'cä te bejn nen guedx Sión, nalajznu Jerusalén,

ni gac si'c te guisa'c, te guiro ni rsiuj squiin te yuro.

Chutis bejn ni chalilajz xtiidxni, dini jianxtujy.

<sup>7</sup> Lojtu ni ahuillilajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',

lagajc guijga gujc guijpac ni baliib squiin xten yu'ga

<sup>8</sup> näjza:

Te guij ni rliaj ni' bejn, ni ruzälta'reni,

laareni riajbreni sa'csi direni gusoob xtidx Dios,

luxh agunibexгаа Dios nitlojreni.

### *Renani gule Dios*

<sup>9</sup> La'tu najctu te cuaa bejn ni agule Dios, tejgatu najctu rebixhojz ni najc si'c reii xten Dios. La'tu najctu te bejnaya, te bejnsa'c, rexpejnpacni. Aguleni la'tu te gusule'tu reyäl nasacduxh ni bejn Dios ni gurejdxte che guyu'tu lo nezyunacäjy xten guedxliujre te biu'tu lo nezyuj ni rdimbichasejz xten Dios.

<sup>10</sup> La'tu galoo rut najcditu, niluxh naj najctu rexpejnpac Dios. Galoo gajd Dios gulaslajztu, luxh naj abalaslajz Dios la'tu.

### *Colguibajn lo xnezyuj Dios*

<sup>11</sup> Rebetzä ni sanälazä, nabajnntu lo guedxliujre si'c benzijt, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijl nen lastoo bejn te cuälazreni xnezyuj Dios.

<sup>12</sup> Colguibansa'c la' ni yu'tu loj rebenzijt ni di gac xpejn Israel te palga guiniyajreni la'tu gäbreni najctu bejlatsiaj, che füreni redzunsac'c ni rujntu, siliä'ppacreni xpala'n Dios che jädsac Jesucrist te gunni yälguxhtis.

<sup>13</sup> Ni'cni, sa'csi huillilajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro,

<sup>14</sup> regubernadoor nani ruxhāl ni te rujnreni yälguxhtis reben DOJl näjza te guiliä'pni xpala'n reben nani laaca rujnreni.

<sup>15</sup> Sa'csi Dios rlajz guntu recossa'c te cuedcxitu rextidxnayääl ni nrii reni di rlajz gumbee didxlii xcuent Jesucrist.

<sup>16</sup> Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios.

<sup>17</sup> Ga'ptu yäl nadolajz loj guiraasi bejn. Colchanälajz sa'tu ni rililajz. Colguidxej Dios, colguiliä'p xpala'n presidentro.

### *Gudejd Jesucrist trabajw te baluüni xho jiennu*

<sup>18</sup> La'tu ni najc mos, guideb yäl nadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam ni najc benguijdx.

<sup>19</sup> Sa'csi rchaglajz ruhuü Dios te bejn palga sa'csi rililajz te bejn xtidx Dios rujn bejn huant che rdejdn trabajw luxh xhet bejndini.

<sup>20</sup> Palga la'tu rujntu latsiaj ni'cni rusacsini la'tu, xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac'c, luxh rujntu huant, ni'c najc laaca nez loj Dios.

<sup>21</sup> Te guntu si'c gurejdx Diostu, sa'csi gudejdza Jesucrist trabajw xcuenttu te guluiini xho guntu che chanuutu lo xnezyujni.

<sup>22</sup> Laani dini niujn nicla tej dojl, laani dini nusguee nicla tej bejn con didx-xhii.

<sup>23</sup> Che guniyajreni lojni, dini nudzu' yälrmiyajga. Che cadejdni trabajw, dini nudzu' diidx niluxh bateedni lagajc laani ladsnaa Dios ni rujn yälguxhtissa'c.

<sup>24</sup> Gudeed Jesucrist trabajw si'c te bendolduxh, bacuaarenini lo crujz te ro'c gusacsíduxh tiejxhni xcuent xtojlnu, te na'c gunrunu dojl, te guibańsa'cnu lo xnezyuj Dios. Gudilguijdxreni tiejxhni te basiajčni la'tu.

<sup>25</sup> Sa'csi galoo gujctu si'c rexiil ni rut rajpdi, rijreni nezree-nezrec. Niluxh ńaj agubisactu lo xpaxtoortu ńajza nani randzu' xaimtu, Jesucrist.

### 3

#### *Xho nanab guibańńjtu chäältu*

<sup>1</sup> Sigajcza la'tu, regunaa ni abachńaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu.

<sup>2</sup> Sa'csi fiini xho riulu xtiidxni ńajza xho rniilu nadolajz lojni, ńajza xho nabańńasa'cluni.

<sup>3</sup> Na'c gusucheetu ganax lo jiaatis, si'c najc guichniil yejctu, ńajza biaoor ni rcaj diajgtu, guejntu, naatu, ńajza ladsa'c ni najc sacru.

<sup>4</sup> Colgusuchenāj lastootu yälńadolajz, yälńbecdxi lajz, ńajza yälńanalajz, sa'csi direni nitloj, luxh sacduxhreni nez loj Dios.

<sup>5</sup> Galoo si'cza bejn regunaa ni gujc xpejn Dios ni huililajz xtidx Dios, basucheereni lastooreni, basoobreni xtidx chääłreni.

<sup>6</sup> Si'c gujc toSara, basobdiajgni xtidx toAbram, guniizani lo toAbram, Dad. ńaj najctu si'c laani palga rujntu redzunsac, ńajza na'c guidxejbditu.

<sup>7</sup> Sigajcza la'tu, niguii ni abachńaa, colguibańńasa'c chäältu. Colgapdani sa'csi dini gacnadip si'c te niguii; nanab guntu si'c sa'csi ńajza lojreni badeed Dios yälńabajn par tejpas. Coleyejn si'c, te gucua diajg Dios che cuedx-guiniabtu lojni.

#### *Renani rdejđ trabajw che laaca rujnreni*

<sup>8</sup> Dee najc ni cania lo guiraatu, saru colguibańńaj sa'tu. Colgulasajz sa'tu, colńchanälajz sa'tu si'c rinälajz te niguii bejtzni. Gactu bensa'c, bennadolajz.

<sup>9</sup> Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacńajniireni, sa'csi ni'cni gule Dios la'tu, te sica'zatu reyälńasa'c ni guniidxni lojtu.

<sup>10</sup> Sa'csi scree caj lo xtidx Dios:

Nani rchaglajz guibajni,

luxh rlajzani saru tedni redxej lo guedxliujre,

sugudxojnmi guinii ro'ni didxnaj ńajza didx-xhii.

<sup>11</sup> Guibicajni loj redzunguijdx, sugunni redzunsac'tis.

Suquiiłni yälńbedxi te ni'c chanuuni.

<sup>12</sup> Sa'csi ruhuıi Dios rebejn ni rujn dzunsac,

rucuadiajgzani xtiidxreni che rniabreni lojni.

Niluxh rudzuréni lojni, rbälazzani renani rujn latsiaj.

<sup>13</sup> ǂChu laa ni gun latsiaj la'tu, palga la'tu rbaali lajztu rujntu dzunsac'?

<sup>14</sup> Palga caxäjsi tedtu trabajw che guntu redzunsac. ¡Chicbaatu! Na'c guntu xhigab, niclaza guidxejbtu xcälńruchejbreni.

<sup>15</sup> Colgusaan guinıbee Dad Jesucrist neń lastootu, gususıń te gudzu'tu diidx loj reni rniabdi-idx lojtu xhicuent runlojtu guibi' Jesucrist. Guideb yälńadolajz saru gudzu'tu diidx.

<sup>16</sup> Colguibańsa'c te cuedxı xcälńriejntu te che guiniyajreni la'tu sa'csi nabańsa'ctu loj Crist, jianxtujy reni rniyaj la'tu.

<sup>17</sup> Sa'csi hueenru tedtu trabajw che cayuntu te dzunsac, palga si'c rlajz Dios, lacuaa tedtu trabajw sa'csi cayujntu dojl.

<sup>18</sup> Sa'csi sigajcza tejtis gujt Jesucrist xcuent rextojlnu. Xhetliidi xtojlni guyu' nez loj Dios, niluxh gudejdni trabajwduxh xcuent rebendojl. Bejnmi si'c te gac guibignu lo Dios sa'csi gujt tiejxh Jesucrist, luxh guyusac sprit xteni lo tiejxhni te gubańsacni.

<sup>19</sup> Che gajđ xpřitni guibisac lo tiejxhni, huij spritni basule'ni diidx loj resprit ni yu' latzguiib.

<sup>20</sup> Respritga najc renani di nusoob xtidx Noé che basule'ni xtidx Dios lojreni. Guläjz Dios rebejnga guıraa redxej ni cayujn Noé barcwro agujc xchero. Basılaa Dios xcälńabajn xhujntis bejn, xhet gujcdireni gudejdreni lo nisguıro ni biajb guideb guedxliujre.

<sup>21</sup> Che robnisnu naj, rusnaalajznu rebejnnga; yälrobnisga ruluiloj xho ruslaa Diosnu lo dojl. Et sa'csi riäjt beed lo tiejxhnu nen nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubansac Jesucrist lo rebengut.

<sup>22</sup> Che birii Jesucrist loj rebengut, biu'ni xhaguibaa cadre gurejni xladbee Dios te ro'c rnibeeni loj rexangl Dios, näjza loj guiraa resprit ni rajc rniabee, ni yu' lo guedxliuj näjza xhaguibaa.

## 4

### *Colyejn xtzuum Dios*

<sup>1</sup> Ni'cni sa'csi agudejd Jesucrist trabajw cuajni lo cruzj xcuentnu, sigajcza la'tu riäj] guntu xhigab sidejdtu trabajw lo guedxliujre sa'csi nani agudejd trabajw, diruni gun dojl.

<sup>2</sup> te guideb nabajnni lo guedxliuj, guibajnni si'c rrajz Dios, diruni guibajnni te gunni rdzungujdx xten guedxliujre.

<sup>3</sup> Sa'csi bejntu si'ctis ni rrajztu galoo, bejntu si'c rujn rebejn ni di gumbee Dios, bejntu si'cni rrajz tiejxhtu, bejntu latsiaj, gusojztu, bejntu relaniro, gudedcaj gusojztu, luxh bejntu cosxtuiduxh bazuxhijbzatu loj rebanäbdxab.

<sup>4</sup> Dxejcti rebejn ni rujn recosga naj, rdxelorejreni sa'csi dirutu gun ni rrajzreni, ni'c rniyajreni la'tu.

<sup>5</sup> Niluxh laareni suureni nez loj Jesucrist ni agojl gun yälguxhtis loj guiraa rebejn, rebejn ni nabajnni näjza renani agujt, te gusule'reni xcuent nani bejnreni.

<sup>6</sup> Ni'cni basule' Jesucrist xtidx Dios loj reni agujt, te mase che gubajnni lo guedxliuj gujcreni yälguxhtis si'ctis ni rajc bejn, dxejc gujtreni, naj sprit xtenreni sinuu guibajnni si'c ni rrajz Dios.

<sup>7</sup> Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiñ xcäriejntu te saru cuedx-guiniabtu lo Dios.

<sup>8</sup> Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtojl sa'tu.

<sup>9</sup> Saru gurenäj bejn ni rdzujn rolizlzu, na'c jiejytu.

<sup>10</sup> Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu.

<sup>11</sup> Palga tejtü najc xtzuumni guluiini xtidx Dios, suguiniini ascanu najcni xtiidxpac Dios. Palga tejtü najc xtzuumni gacnäjni sa'ni, sugunnini, guideb yäl'nadip yäl'nadaan ni ruedeed Dios lojni, te guira'tis ni rajc sujñ guiliä'p xpala'n Dios xcuent Jesucrist. Sa'csi laatisni riäj] chä'p xpala'nini, laatisni riäj] guinibeeni tejpas. Sugacni si'c.

### *Xho nanab tednu trabajw*

<sup>12</sup> Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab xhichani'c casiajctu.

<sup>13</sup> Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist.

<sup>14</sup> Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xprit Dxan xten Dios guideb xcälrdimbicha'ni nen lastootu.

<sup>15</sup> Gunatiro, andi gusaantu ted tejtü trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäj]di gacbeeni.

<sup>16</sup> Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

<sup>17</sup> Abidzujñ dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaunu xtiidxni, xhocha gun rebejn nani di chälilajz xtidx Dios xcuent Jesucrist!

<sup>18</sup> Lo xtidx Dios caj scree:

Lacti naganlajz rliaa rebejnaya lo dojl,

xhocha gunäjni rebejn nani di chälilajz xtidx Dios näjza rebendojl?

<sup>19</sup> Ni'cni, guiraatu nani cadejd trabajw xcuent xtidx Dios si'cni rrajz Dios, colguedeed xprittu lo Dios ni di gusuee, ni bencheetu, te chanuutis guntu ni riäj] guntu.

## 5

### *Yäl'rulijdx loj renani ahuililajz xtidx Dios*

<sup>1</sup> Narä nacä te bengool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool,

<sup>2</sup> Colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiiil, colyejnni guideb yejc, guideb lajztu. Colyejn si'c sa'csi si'c rlaiz Dios guntu, na'c gunlojtu meel. Colguibalajz cayajptu rexpejn Dios.

<sup>3</sup> Na'c guinibeetu lojreni si'c rnibee te lam loj reni rujn xtzuunni, colguluiireni xho gunreni con xcäl'nabansa'clu.

<sup>4</sup> Che guibisac Jesucrist, ni rajp nuure, laani suniidxni xcuentnu, te yäl'nasacduxh nani dipac nitloj.

<sup>5</sup> Sigajcza la'tu ni najc bi'n, colgusobiajg xtidx rebengool. Guiraatu coljju xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni, niluxh racnäjni rebejn ni najc nadolajz.

<sup>6</sup> Ni'cni guideb yäl'nadolajz coljju lo Dios sa'csi rajpni yäl'rnibeduxh, te guiliä'pni xpala'ntu che gal dxej ni guibisacni.

<sup>7</sup> Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

<sup>8</sup> Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguiilni chu guxhinni.

<sup>9</sup> Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznü ni nabajn lo guedxliujre.

<sup>10</sup> Che agudejdtu trabajw tiop-chon dxej, Dios nani rajp guiraa yäl'racnäj, nani gurejdx la'tu te näjza la'tu xca'tu xcalrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb.

<sup>11</sup> Laani rajpni yäl'rnibeduxh par tejpas, guiliä'pnu xpala'nni par tejpas. Sugacni si'c.

<sup>12</sup> Siädnä Silvan guijtzre lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcäl'racnäjpac Dios. Colsudzu'tz xcuent yäl'racnäjre.

<sup>13</sup> Rexpejn Dios ni re' lo guedx Babilonia ruxhał xtiitios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhałza xtiitios lojtu.

<sup>14</sup> Colguinii "xchan" lo tejsa sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

## Guijtz Ni Rojp Ni Bacuaa Pedr

*Pedr rucuaa te guijtz loj reni ahuililajz*

<sup>1</sup> Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuii Dios loonu si'c beñnaya xcuent Xtiosnu Jesucrist nani baslaa nuurnu lo dojl.

<sup>2</sup> Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

*Xho riäjł gac rexpejn Crist*

<sup>3</sup> Sa'csi xcälrnibee Dios baniidx guira'ti ni rquiinnu te guibañsa'cnu, te gacnu beñnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni.

<sup>4</sup> Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnni, sajcnu beñsa'c si'c najcni sa'csi abiriinu loj redzunguijdx ni chagljaz rujn rebejn ni ruħiñ guedxliujre.

<sup>5</sup> Ni'cni nanab gacbeenu xho nabañnu lo guedxliujre. Siroobru xcäl'rililajztu sacnäjni la'tu te guibañsa'cnu lo Dios; luxh sa'csi nabañsa'ctu, siroobru xcäl'najntu xcuent dzunsa'c näjza dzunguijdx.

<sup>6</sup> Luxh palga guroob xcäl'najntu xcuent dzunsa'c näjza dzunguijdx sajç guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yäl'rbedxilajz, sajctu beñsa'c, beñdxan.

<sup>7</sup> Che anajctu beñsa'c, beñdxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist.

<sup>8</sup> Palga la'tu rusoohtu guiraa rediidxre, luxh chanuutis caroobreni neñ lastootu, ditu guibañxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist.

<sup>9</sup> Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälłajzni xho basia Dios rextojłni nani bejnni galoo.

<sup>10</sup> Ni'cni rniä lojtu rebetzä, colsejs, colguisied xtidx Dios te gacbeepactu, guluilojzatu lo bejn xho gurejdx, xho gule Dios la'tu, sa'csi lał ni chanuu gucua diajgtu rediidxga, dipactu gunijł lo Dios.

<sup>11</sup> Palga guibajntu si'c lo guedxliujre, siu'pactu xhaguibaa cadro rnibee Dad Jesucrist par tejpas.

<sup>12</sup> Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yäl'rililajz xten didxlii ni yu' neñ lastootu.

<sup>13</sup> Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre.

<sup>14</sup> Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä.

<sup>15</sup> Ni'cni cayunduxhä dzuun naj, te che quiquiinni sinaj lajztu xtidxä che agu'tä.

*Renani bahuii loj yäl'nasa'c xten Crist*

<sup>16</sup> Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisi, dizanu nusguee la'tu, sa'csi abahuiloonu xcälrdimbicha'ni.

<sup>17</sup> Sa'csi che badeed Dios xtadnu yälrnibee, yälrdimbicha' lojni, dxejç biejn diajgnu gunii Dios, birii xse'ni neñ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni."

<sup>18</sup> Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

<sup>19</sup> Ni'cni naj guliiru rediidx ni gunii reprof'e't. Ni'cni sujntu laaca palga gusobdiajglu rediidxga, sa'csi najcreni si'c te bajł ni rusanij te lajt ni nacäy, susanijreni xcäriejntu dxejłli ni jiaäd bajł xhaguibaa. Dxejç lagajc laani susanij lastoonu.

<sup>20</sup> Niluxh ganiddoo nanab gacbeetu dee: nicla tej bejn sajç guinii laatisni sajç guinii xhi säloj xtidx Dios,

<sup>21</sup> sa'csi nicla tej diidx ni bacuaa reprof'e't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpřit Dxan Dios lojreni gucuaareni.

## 2

*Rebejn nani rusguee  
(Judas 4-13)*

<sup>1</sup> Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälrlilajzreni, sibälazreni lagajc Dad Jesucrist nani gudijx xcuent xtojlrëni. Niluxh renani rusguee, siojb nitlojreni par tejpas.

<sup>2</sup> Xhidajlza bejn sinajlreni lo xcäl'nabanguijdxreni, dxejcti ni'c gun siniyaj xhidajl bejn xnezyuj xtidxlii Dios.

<sup>3</sup> Sa'csi ruguilajzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'mitlojreni cabäzgjajreni agujc xchero.

<sup>4</sup> Najcni si'c sa'csi di Dios niäl'lajz rextojlrë rexangl'ni nani bejn dojl, niluxh baxhal'nireni gabijl, basäunireni neñ reguednacäy cadro cabäzjreni dxej ni gun Dios xcäl'guxhtisni.

<sup>5</sup> Sigajcza rebejn ni guyu' galoo, banitloj Diosreni, baslaa Dios xcäl'nabajn Noétis näjza sgajdzreni, sa'csi basule' Noé xtidx guluu Dios. Luxh baxhal'ni nisguiro te biädnitlojni guiraa rebejn nani di nucuadijg xtidx Dios.

<sup>6</sup> Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gachee bejn xho runnäj Dios rebejn ni di gusoob xtidx Dios.

<sup>7</sup> Gulää Dios Lo't ni gujc te bensa'c lo reguejdxga, sa'csi guc-huin lajzni xcuent relatsiaj ni bejn rebendojlgä.

<sup>8</sup> Guideb ni guläjs Lo't, te bensa'c, lo guejdxga, dxej, yääl guc-huin lastooni xcuent nani bahuüini, nani biejn diajgni, xcuentza latsiaj ni bejnreni, sa'csi bensa'cni.

<sup>9</sup> Anajn Dios xho racnäjni rebensa'c te rbäänireni lo retrabajw ni cadejdreni, anajnza Dios xho gusacsäni rebendojlrë cheni guidzujnli dxej ni gunni xcäl'guxhtisreni.

<sup>10</sup> Guliduxhni, sujnrü Dios yäl'guxhtis loj rebejn nani rlajz gun si'ctisni rlajz tiejxhreni, näjza renani rbälaz xcäl'rnibee Dios. Najcni bejn ni di guidxejb, rujnreni ni riabtbis yejcreni, direni guidxejb guiniyajreni rexangl' Dios ni rdimbicha'.

<sup>11</sup> Niluxh nicla tej rexangl' Dios ni rajpru yäl'rnibee lo rebejnre, direni guiniyaj, cue'cni xquejreni lo Dios.

<sup>12</sup> Luxh, rebejn'ga najc si'c reguidxaa nani xheti xcäriejnreni, cabäjztisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni.

<sup>13</sup> Bejnreni dojl, ni'c sinitlojreni, sidejdreni yäl'rusacsiduxh xcuent rextojlrëni. Laareni rchaglajzreni guntisreni laniro rdxee. Laareni najcni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu la'l ni cayajc lanij cayunäjreni la'tu.

<sup>14</sup> Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzarenı dojl, rulüireni lastooreni te säblajzreni meel, najcni bejn nani batzubde Dios,

<sup>15</sup> agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yäl'latsiaj.

<sup>16</sup> Niluxh gudil'näj Diosni xcuent xtojlrëni, bejn Dios gunii te mandip si'c xse' bejn, te bascuääzni profe'tga, dini nusaan niujjni nani cayujjni, cayujjni si'c te bejn ni rajc yejcnı.

<sup>17</sup> Rebejn latsiajre najc si'c te bisie cadro xheti nis, najczarenı si'c rexcäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yäl'guxhtis.

<sup>18</sup> Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn ni rlajztis tiejxhreni, con yäl'latsiaj rusgueereni rebejn nani entis birii loj reni rujn sa' dzunguijdxga.

<sup>19</sup> Rusgueereni, rniireni rut gudxojdini palga jääd'najl'nireni, niluxh lagajc laareni nahreni mos, sa'csi rnibee latsiajreni. Xhitis ni rnibee te bejn, ni'c rusäuni neñ latzguuıb.

<sup>20</sup> Sa'csi palga agubicaj te bejn loj redzunguijdx xten guedxliuj sa'csi huililajzreni xtidx Dad Jesucrist nani ruslaa rebejn lo guiraa dojl, dxejctiru gubisacni loj xtojlrëni, abixhid-sacreni lo xtojlrëni, nalajz najcni si'c che gajdreni gumbee xtidx Dios.

<sup>21</sup> Huenru direni niembee xnezyuj Dios, quela che abiembeereni nezyujga, cuälazreni didx dxan, xtidx Dios ni basule'reni lojreni.

<sup>22</sup> Dxejcsii rsiojb diidx ni najc scree: "Rbisac te bä'cw loj xcäl'rdzujbni. Cuch ni entis gojz richusacni lo xpajjni."

### 3

#### *Xho gac che guibisac Jesucrist*

<sup>1</sup> Rebetzä, dee najc ni rojp guijtz ni caguxhalä lojtu; lo guiro'p guijtzre cagusnibä la'tu xcuent reyäl'rulijdx ni gusnaj lajztu.

<sup>2</sup> Colgusnaj lajztu rediidx ni gunii reprofe't agujc xchero, näjza rediidx ni gunii Dad Jesucrist nani basule' reapost.



<sup>3</sup> Ganiddoo, colgabee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlajz tiejxhreni.

<sup>4</sup> Siniabdiidxreni: “¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn cheni guc-cheeli guedxliujre.”

<sup>5</sup> Niluxh che rniireni si'c, rlajzpac jiaällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini neñ nis, naj tre'ni loj nisga.

<sup>6</sup> Dxejcti gunitloj guira'ti ni yu' lo guedxliujga che biajb te nisguiro, gunitlojni.

<sup>7</sup> Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni reben DOJL.

<sup>8</sup> Rebetzä, na'c jiaällajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej.

<sup>9</sup> Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlajzni nitloj nicla tejtü.

<sup>10</sup> Niluxh sidzujn dxej che guibisac Jesucrist lo guedxliujre si'c rdzujn te gubaan, rut gabeedi siäädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

<sup>11</sup> Sa'csi sinitloj guiraa redee, ni'c nanab guibanñayatu lo guedxliujre, na'c guntu DOJL.

<sup>12</sup> Colcuajz dxejtis ni jiaäd Dios lo guedxliuj. Dxejcti sejc xhaguibaa, sinitlojni, luxh guralii ni yu' sialni lo guiboro.

<sup>13</sup> Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru DOJL.

<sup>14</sup> Ni'cni rebetzä ni sanälazä, sa'csi cabäaznu guiraa ni gac, colyejn huant te che guibisac Dios, sidxälni la'tu dxitis nabajntu, nabanñayatu, xhetiru xtojltu.

<sup>15</sup> Colhuii xhi dzuun bejn Dad Jesucrist ni'c rajpnu yälrusläa lo DOJL. Sigajcza bacuaa bejtznu Pabl ni sanälajznu. Bacuaani sa'csi badeed Dios yälñajn lojni.

<sup>16</sup> Neñ guiraa rexquijztni bacuaani xcuent rediidxre. Yu' gaii guijtz ni bacuaani ni najc naganduxh. Luxh bejn ni guxii rachee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

<sup>17</sup> Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladzñaan renani gusgueetu, te na'c gunijttu xcälrsiudzu'tztu lo xtidx Dios.

<sup>18</sup> Colgustioob xcäriejntu con yälracnäjä näjza yälñajn xten Dad Jesucrist nani rusläa nuure lo DOJL. Suguiliä'pnu xpala'n Dad Jesucrist, naj näjza par tejpas. Sugacni si'c.

## Guijtz Ganid Ni Bacuaa Juan

### *Xtidx Dios ni runiidx yäl nabajñ par tejpas loonu*

<sup>1</sup> Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä ñaani. Laani najc Diidx ni runiidx yäl nabajñ par tejpas loonu.

<sup>2</sup> Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabannäj Jesucrist Dios. Baluii Dios Jesucrist loonu.

<sup>3</sup> Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtennu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäanu resa'nu.

<sup>4</sup> Cagucuaä rediidxre lojtu te guibalazduxhtu.

### *Dios najc Bajl*

<sup>5</sup> Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäyji yu' lo Dios.

<sup>6</sup> Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios.

<sup>7</sup> Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

<sup>8</sup> Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu.

<sup>9</sup> Palga guicäjpnü lo Dios guiraa redojl ni cayennu, siäl lajzni xtojñnu, sudzucajni rextojñnu, sa'csi laaca rujñni luxh guli najc rextiidxni.

<sup>10</sup> Palga guinuunu dinu niujñ dojl, rniinu najc Dios si'c te bejn ni rniü didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

## 2

### *Racnäj Jesucrist nuunu nez loj Dios*

<sup>1</sup> Guejbtu, resa'ä nani huililajz xtidx Dios, cagucuaä rediidxre lojtu lo guiijtz te na'c guntu dojl. Niluxh palga jiennu dojl, racnäj Jesucrist nuunu, rniini xcuentnu lo Dios, sa'csi xheti xtojñni.

<sup>2</sup> Gujt Jesucrist xcuentnu lo crujz. Gudijxni rextojñnu lo crujz. Luxh et rextojltisnu gudijxni. Gudijxni rextojñ guiraa rebejn ni re' lo guideb guedxliuj.

<sup>3</sup> Palga rusooobnu rextidx Dios, huenliisi rluii riembeenu Dios.

<sup>4</sup> Cheni rniü te bejn, "narä rumbeäni", niluxh dini gusooob rextiidxni, rusgueeni resabejn. Di lajzni nilii xtidx Dios.

<sup>5</sup> Palga rusooobnu xtidx Dios, guliipac rinälaaznu Dios, ni'c najñnu nabaññajñni.

<sup>6</sup> Cheni rniinu nabaññajnu Jesucrist, nanabpac guibañsa'cnu si'c gubajñ Jesucrist lo guedxliuj.

### *Rediidxcoob*

<sup>7</sup> Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli.

<sup>8</sup> Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yäl nacäy. Baluii Jesucrist rediidxcoobga loonu. Guliipac najc Dios si'c bajl. Dini guibajñ lo nacäy.

<sup>9</sup> Palga chutis tejnu rniü, "nabañä lo nianij xten Dios", niluxh rdxe'chni lo resa'ni, lo yäl nacäy yu'ni.

<sup>10</sup> Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljaz gunni dojl.

<sup>11</sup> Niluxh palga rdxe'chnu lo resa'nu, nabajñnu lo yäl nacäy sa'csi riennu dojl, sasaanu lo yäl nacäy. Nicla gacbeenu canejz chonnu, sa'csi ruscäy bendxab balojnu.

<sup>12</sup> Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo crujz gudijx Jesucrist rextojñnu.

<sup>13</sup> Cagucuaä rediidxre lo guejbtu, redad bengool, sa'csi huililajztu rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, rebñ sa'csi dirutu jiu xtidx bendxab.

Cagucuaä rediidxre lojtu rexi'nä, sa'csi rumbeetu Dios.

<sup>14</sup> Abacuaä rediidxre lo guejbtu, redad bengool, sa'csi numbeetu Jesucrist nani nabajn galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx beñdxab.

<sup>15</sup> Na'c guichagljaztu guntu renani rujn rebejn nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejnu rehxixtenti ni ra'pnu lo guedxliuj, dxejc dinu chanälajz Dios.

<sup>16</sup> Rebeñ guedxliuj ni di chalilajz xtidx Dios rchagljazreni rujnreni redzunguijdxre: rujnreni dzunguijdx nani rchagljaz tiejxhrene; rujnreni dzunguijdx nani rchagljaz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac.

<sup>17</sup> Luxh rnitlojpac guedxliuj. Sinitlojza guiraa reni rchagljaz rujn rebeñ guedxliuj ni di chalilajz xtidx Dios. Niluxh palga gusoobtisnu xtidx Xadnu Dios, sibannäjnni par tejpas.

#### *Didx guli näjza didx-xhii*

<sup>18</sup> Guejbtu resa'ä ni rillilajz xtidx Dios, asiäddzungajxh dxejc che gululoj niguii nani rdxe'ch loj Jesucrist. Abiejn diajgtu siääd niguiiga. Naj yu' xhidajl reniguii nani rdxechlajz lo Crist. Ni'c alaracheenu asiäddzungajxh dxejga che gululoj niguiiga.

<sup>19</sup> Yu' xhidajl rebejn ni rdxechlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huillilaznu nuure xtidx Jesucrist, direni niri lo resa'nu. Biriireni lo resa'nu, ni'c racbeenu direni gac xpejn Jesucrist.

<sup>20</sup> Gule Dios Jesucrist. Jesucristre baniidx Sprit Dxan xten Dios loonu te gacheenu xhini'c najc redidxiipac.

<sup>21</sup> Et sa'csi ditu gan xhi diidx najc didx guli bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guli, anajntu dina gusgaeä la'tu.

<sup>22</sup> Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios.

<sup>23</sup> Chutis reni rnii di Jesucrist gac Xi'n Dios, di reni'c gumbee xadnu Dios. Niluxh renani rnii Jesucrist najc Xi'n Dios, huillilajzreni xtidx Dios, numbeezareni Dios.

<sup>24</sup> Colgusoob rediidx ni biejn diajgtu galooli che huillilajztu rextidx Dios. Palga rusoobtu rediidxga, nabannäjtu Dios näj xi'nni Jesucrist.

<sup>25</sup> Abia'n Jesucrist diidx guniidxni yäl'nabancuob loonu. Naj ara'pnu yäl'nabajnre, ra'pnuni par tejpas.

<sup>26</sup> Abacuaä rediidxre lojtu xcuent rebejn ni rlanj chalilajztu rediidx ni xhet guliidi.

<sup>27</sup> Baxhajl Jesucrist Sprit Dxan xten Dios loonu. Rbäjzni neñ lastoonu. Dinu guiquiin chu stee bejn guluii loonu xhi diidx najc guli, sa'csi lagajc Sprit Dxan xten Dios ruluii xtiidxni loonu. Naj ruluiini la'tu guiraa ni najc guli, dini gusgae la'tu. Colguibanäj Jesucrist; colgusoob xtidx Jesucrist si'cni ruluii Sprit Dxan xten Dios lojtu.

<sup>28</sup> Naj guejbtu resa'ä, colguibanäj Jesucrist, te che jiädsacni lo guedxliuj sisiutzu'tznu nejz lojni, dinu guitujy nejz lojni.

<sup>29</sup> Anajntu laaca najc Dios. Anajntu renani rusoob xtidx Dios sasanäjreni Dios, ni'c najceni xi'n Dios.

### 3

#### *Rexi'n Dios*

<sup>1</sup> Bahuii xho huinälazduxh Dios nuure, ni'c anaj Dios nuure najcnu rexi'nni. Luxh guli najcnu rexi'n Dios. Rebeñ guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xadnu.

<sup>2</sup> Resa'ä ni rinälazä, nuunu riolilaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani.

<sup>3</sup> Che rnej laaznu sidzujn dxejc gac tejganu si'c ni najc Jesucrist, dxejc rbañsa'cnu si'c ni gubajn Jesucrist lo guedxliuj.

<sup>4</sup> Di rebejn ni rujn dojl gusoob leii xten Dios. Che riennu dojl, runijntu lo leii xten Dios.

<sup>5</sup> Racbeenu Jesucrist biääd lo guedxliuj, gujcniguii te gujc badzucajni rextojlnu. Laani dini niujn dojl.

<sup>6</sup> Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni.

<sup>7</sup> Resa'ä, na'c chalilajztu didx-xhii ni rnii bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist.

<sup>8</sup> Rebejn nani rujn dojl najc xi'n beñdxab. Galodooli rujn beñdxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent beñdxab.

<sup>9</sup> Rebejn nani najc xi'n Dios direni guichaglazj gunreni dojl, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl, sa'csi najcreni xi'n Dios.

<sup>10</sup> Si'c riebeneu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

*Nungäjil chanälajznu resa'nu*

<sup>11</sup> Lagajc rediidxre biejn diajgtu galooli che huililajztu rextidx Dios: colchanälajz resa'tu.

<sup>12</sup> Xhet si'cdi toCain nani gujc xi'n bendxab. Bejnni dojl, bagu'tni bejtzni. ¿Xhicult bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx.

<sup>13</sup> Na'c guidxelojtu che guidxechlazj rebejn lojtu.

<sup>14</sup> Racheenu dirunu sa lo xnezyuj yälgujt, sa'csi dinu guidxechlazj loj resa'nu. Rajpnu yäl nabajn par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni.

<sup>15</sup> Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yäl nabajn par tejpas.

<sup>16</sup> Racheenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäjil gacnäjnu resa'nu, mase guetnu lacuaa guetreni.

<sup>17</sup> Chutis tejnu ni rajp xhidajl xhixtenni, luxh dini gacnäj nicla tejnu ni xhet rajpdi, di bejnga chanälajz Dios.

<sup>18</sup> Guejbtu resa'ä, na'c chanälaaznu resa'nu con rextiidxtisnu, na'c guiniitistnu rionälaaznu resa'nu. Palga rionälaazpacnu resa'nu, sacnäjnu resa'nu.

*Sisiutzu'tznu nez loj Dios*

<sup>19-20</sup> Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac beñsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexi'nni.

<sup>21</sup> Rniä lo guejbtu nani rinälazä, palga lagajc lastoonu rniiloonu, "cagusooblu xtidx Dios", sisiutjtp lastoonu che rbedx-rniabnu lo Dios.

<sup>22</sup> Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaalajz Dios.

<sup>23</sup> Dee najc rediidx ni gunibee Dios gusoobnu: chalilaaaznu xtidx Dios, diidx ni rniil xho gujt Jesucrist lacuaa nuunu, chonälaazzanu resa'nu si'cni gunibee Dios.

<sup>24</sup> Palga rusoobnu guiraa nani gunibeeni, nabañnjuni, si'cza nabañnjuni nuunu. Nancheenu nabañnj Dios nuunu, sa'csi baniidxni Sprit Dxan xtenni te cuääz neñ lastoonu.

## 4

*Scree gacheenu xhi didx najc guliipac*

<sup>1</sup> Guejbtu renani rinälazä, na'c chalilajztu rextidx chutis bejn nani naa, "rniä rextidx Dios lojtu". Ganiddoo colgula'tz rextiidxni te gacheetu don chu xtidx caniiini, sa'csi xhidajl bejn sinii lojtu, "nuunu rniinu rextidx Dios", niluxh caniisireni si'c.

<sup>2</sup> Scree gacheenu xhi diidx najc guliipac. Guiraa rebejn nani guinii "Jesucrist, Xi'n Dios, ni biääd lo guedxliuj si'c niguii", reni'c cayacnäj Sprit Dxan xten Dios, reni'c canii xtidx Dios.

<sup>3</sup> Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxe'chduxh loj Jesucrist, luxh naj abidzujn rextzuun niguiiga lo guedxliuj.

<sup>4</sup> Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neñ lastoonu abejnni gaan lo bendxab ni nabajn lo guedxliuj.

<sup>5</sup> Rebejn ni rniil xhet guliidi xtidx Dios, rililajztsireni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi.

<sup>6</sup> Nuunu najcnu xi'n Dios. Rebejn nani riebbee Dios riu xtiidxnu. Rebejn nani di gac xi'n Dios direni jiu xtiidxnu. Scree gacheenu chu rebejn rniil didxliipac. Scree gacheezanu chu rebejn rniil diidx ni xhet guliidi.

*Rinälaajz Dios rebejn*

<sup>7</sup> Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäj nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh guliil riebeneu Dios.

<sup>8</sup> Palga chutis tejnu di chanälajz resa'ni, dizani gumbee Dios, sa'csi lagajc Dios racnäj chanälaaznu Dios, racnäjzani chanälaaznu resa'nu.

<sup>9</sup> Abasule' Dios loonu lacti rinälajzni nuunu. Yu' tejtis Xi'n Dios. Abaxhañni Xi'nni lo guedxliuj te gudijxni rextojlñu lo cruzj te si'c guibañnjuni par tejpas.

<sup>10</sup> Si'c racheenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhañni Xi'nni lo guedxliuj te gudijxni xtojñu lo cruzj.

<sup>11</sup> Rniä lo guejbtu nani rinälazä, si'cni rinälajz Dios nuunu, sigajcza rlanjz ni chanälaaznu resa'nu.

<sup>12</sup> Nicla tej bejn gajd fii lo Dios. Niluxh palga chanälaaznu resa'nu, Dios nabajn nen lastoonu, dxejc guli rinälaazpacnu Dios.

<sup>13</sup> Nancheenu nabañajnu Dios, sigajcza nabañajpac Dios nuunu, sa'csi abaxhañni Sprit Dxan xtenti cuääz nen lastoonu.

<sup>14</sup> Narä näjza reapost abahuiinu loj Jesucrist. Caniä lojtu abaxhañ Xtadnu Dios Xi'n ni lo guedxliuj te guslaani rebejn lo xtojlrani.

<sup>15</sup> Chutis tejnu ni rniä "Jesucrist najc Xi'n Dios", nabañajni Dios, nabañajza Dios bejn ga.

<sup>16</sup> Racbeenu, rililaaznu rinälajz Dios nuure. Guliduxh rinälajz Dios nuunu. Palga rinälaaznu Dios, nabañajnu Dios, nabañajza Dios nuunu.

<sup>17</sup> Naj sanälaaznu Dios si'cni rlanjz ni luxh palga chanälaaznu ni guidebtis ni guibajnu, dinu guidxejb che guidzujn dxej ni gun Jesucrist yälguxhtis lo guedxliuj. Dinu guidxejb sa'csi guideb nabajnu lo guedxliuj, nabañajnu Dios si'c nabañaj Jesucrist Dios.

<sup>18</sup> Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejndi trabajw, gajd bejn ga chanälazsa'c Dios.

<sup>19</sup> Rinälaaznu Dios sa'csi ganiddoo Dios huinälajz nuunu.

<sup>20</sup> Palga chutis tejnu naa "rinälazä Dios" niluxh rdxechlajz ni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajch chanälaaznu Dios nani gajdnu fii.

<sup>21</sup> Agunibee Dios, nani rinälajz Dios chanälajz ni resa'ni sigajc rinälajz ni Dios.

## 5

### *Riennu gaan lo guiraa redolgujdx lo guedxliuj*

<sup>1</sup> Chutis ni rililajz Jesús najc Crist nani baxhañ Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios.

<sup>2</sup> Palga rinälaaznu Dios, palga rusoobzanu xtiidxni, dxejc najjnu rinälaaznu resa'nu nani najc Xi'n Dios.

<sup>3</sup> Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni.

<sup>4</sup> Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist.

<sup>5</sup> ¿Chumi'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

### *Rediidx ni baluii Dios loonu xcuent Jesucrist*

<sup>6</sup> Biääd Jesucrist lo guedxliujre. Birobnis Jesucrist, baxhe'zani xtiejnni lo cruju. Xhet ganaxdi te guirobnisni biäädni, näjza te guxhe'ni xtiejnni lo cruju che biäädni. Sprit Dxan xten Dios canii rediidxre. Guliipac rextiidxni.

<sup>7</sup> Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios.

<sup>8</sup> Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruju che gujtni.

<sup>9</sup> Palga rililaaznu xtidx rebejn ni rbäjz lo guedxliuj, nungäjñ chalilaazrunu xtidx Dios. Rediidx nani rniä jion reni baluiloj tejsi diidx najcreni con nani rniä Dios xcuent Jesucrist Xi'n Dios.

<sup>10</sup> Palga rililaaznu xtidx Jesucrist Xi'n Dios, rniä Dios xcuent Jesucrist nen lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniäni xcuent Jesucrist.

<sup>11</sup> Scree najc rediidx ni rniä Dios. Abaniidx Dios loonu yälñabajn par tejpas. Yälñabajnga biädñä Xi'n ni, Jesucrist.

<sup>12</sup> Palga nabañajnu Xi'n ni, rajpnu yälñabajn par tejpas. Palga dinu guibañaj Xi'n ni, dinu ga'p yälñabajn par tejpas.

### *Xtixtios con diidx ni ruliidx*

<sup>13</sup> Abacuaä rediidxre lojtu ni rililajz rextidx Jesucrist te gacheepactu rajptu yälñabajn par tejpas.

<sup>14</sup> Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni.

<sup>15</sup> Luxh palga najjnu riu Dios nuunu che rniinu lojni, sigajcza najjnu suniidxni nani rniabnu lojni.

<sup>16</sup> Palga tejnu fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl'nabajn lojni. Niluxh yu' te dol'roduxh. Chutis te bejn ni gun dojlgä, di Dios gudeed lo bejnga yäl'nabajn par tejpas. Dizana guiniä guiniabtu lo Dios xcuent bejn ni rujn dolroga.

<sup>17</sup> Guiraa redzunguidx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

<sup>18</sup> Racbeenu guiraanu nani najc xi'n Dios di rlaaznu jienu dojl. Racnäj Jesucrist nuunu te di bejndxab gun gaan nuunu, te dizanu gusoob xtidx bejndxab.

<sup>19</sup> Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx bejndxab.

<sup>20</sup> Najnu biääd Jesucrist Xi'n Dios lo guedxliuj. Baluini nuunu rextidx Dios te jiembeenu Dios, nani najcpac Dios gulii. Nabannäjnu Dios ni najc gulii, sa'csi nabannäjnu Jesucrist. Laani najc Dios ni najc gulii. Caguniidxni loonu yäl'nabajn par tejpas.

<sup>21</sup> Resa'ä, na'c guzuxhijbtu lo rebanäjb ni xhet guliidi. Sugacni si'c.

## Guijtz Ni Rojp Ni Bacuaa Juan

*Diidx guli nájza yálrinálaaznu resa'nu*

<sup>1</sup> Narä nacä bengool. Cagucuaä guiijtze lojlu nane' nani agule Dios, nájza loj rexi'nlu. Rinälazäpac la'tu luxh xhet xtebädi; nájza guiraa reni rililajz xtidx Dios sanälajztu.

<sup>2</sup> Nuure rinálaaznu la'tu sa'csi yuchee neñ lastoonu rediidx nani najc guli, luxh dilajznu jiäl rediidxre.

<sup>3</sup> Xtadnu Dios, nájza Jesucrist Xi'nni, gacnäj nuunu, jiareni nuunu, guscuecdxi lajznu con xcälñaj didxlii nájza yálrinälajz.

<sup>4</sup> Bibalazduxhä che gucheä ya' rexi'nlu ni rusooob xtidx Dios si'c gunibee Dios loonu gusoobnuni.

<sup>5</sup> Nane' ni gule Dios, diidx nani rniabä gusoob guejblu naj dini gac didxcoob, niluxh lagajc diidx ni bejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanálaaznu resa'nu.

<sup>6</sup> Sinálaaznu resa'nu palga cagusoobnu xtidx Dios. Dee najc xtidx Dios ni bejn diaagnu galooli, che huililaazlinu xtidx Jesucrist: chanálaaznu resa'nu.

*Rebejn ni rnii garenca diidx ni xhet guliidi*

<sup>7</sup> Balti bejn birii loonu, naj cagugueereni xhidajl bejn ni re' lo guedxliuj. Caniireni di Jesucrist niajc niguii che biäädni lo guedxliuj. Sa' bejnre najc beñrusguee. Sa' bejnre rdxe'chreni loj Jesucrist.

<sup>8</sup> Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

<sup>9</sup> Chutis bejn ni rrajz gugu'ch xtiidxpacni lo xtidx Jesucrist, di bejnğa gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios.

<sup>10</sup> Palga jiääd te bejn roliztu ni di chasanäj xtidx Jesucrist, na'c xcäjbtu jiu'ni roliztu, na'cza guiniitu lojni, "Xchan. Biu'."

<sup>11</sup> Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäzani redzunguijdx ni rujn bejnğa.

*Rudeedni xtixtios*

<sup>12</sup> Xhidalduxhru diidx rlazä guiniä lojtu, niluxh di rlazä gucuaäreni lo guiijtze. Cabäzä jiädhuiä lojtu ro'c te guiniä rediidxre lojpacktu, te guibaalajztu.

<sup>13</sup> Rexi'n bäjllu, nani aguleza Dios, ruxhał xtixtios lojlu. Ni'ctis najc ni rucuaä lojtu. Sugacni si'c.

## Guijtz Ni Riojn Ni Bacuaa Juan

### *Cagucuaani didxa'c lo Gayo*

<sup>1</sup> Narä nacä te bengool. Caguxhalä guiitzre lojlu, dad Gayo. Rinälazduxhälu sa'csi huililajzlu rextidx Dios.

<sup>2</sup> Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu.

<sup>3</sup> Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist.

<sup>4</sup> Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

<sup>5</sup> Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riäädreni lojlu.

<sup>6</sup> Aräjpreni lo resa'nu ni rdxagsa' ree xho huinäajzlureni näjza xho gucnäjlureni. Laaca bejnlu gucnäjlu resa'nu, badeedlu xhi biqiuinreni lo nejz che biriireni rolizlu. Si'cza nanab jiennu lo guiraa resa'nu, nalajznu rebejn ni ruluii xtidx Dios.

<sup>7</sup> Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist.

<sup>8</sup> Si'cza nanab gacnäjnu rebejn ni riluii xtidx Jesucrist nen garen-garen guejdx, te si'c jiennänu xtzuum Dios guiraa renani ruluii xtidx Dios.

### *Di Diótrefes niujn redzunsä'c*

<sup>9</sup> Abaxhalä te guiitz lo rexpejn Jesucrist ro'c. Niluxh Diótrefes rlanj guinibeeni lo resa'nu ro'c. Dini jiu xtidxä.

<sup>10</sup> Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riääd ro'c, mase rlanj chu tejtü fiireni. Luxh rlanjni gudxojni guidxagnäjtü rebejn nani ruhuii resa'nu ni ruluii xtidx Jesucrist.

<sup>11</sup> Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

### *Rniireni didxa'c xcuent Demetrio*

<sup>12</sup> Guiraa rebejn ganax didxa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxa'c xcuentni. Najnlu guliipac rediidx ni rniä.

### *Rudeedni xtixtios*

<sup>13</sup> Rlazä guiniä xhidalduxhru diidx lojlu, niluxh di rlazä gucuää rediidxga lo guiitzre.

<sup>14</sup> Runä xhigab di gaclaa jiädhuiä lojlu, dxejcti jieinu diidx.

<sup>15</sup> Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejsa rexamigwä ro'c.



## Guijtz Ni Bacuaa Judas

### *Judas cagucuaa loj renani agule Dios*

<sup>1</sup> Narä nacä Judas, ni rujn xtzuun Jesucrist. Narä nacäza betz Jacob. Cagucuaä guijtzre loj renani agule xtdadnu Dios, renani sanälazduxhni, nani cayapcheeni par Jesucrist.

<sup>2</sup> Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yäl'sanälajz.

### *Renani rului yäl'rusguee*

(2 Pedro 2:1-17)

<sup>3</sup> Rebetzä nani sanälazä, che cayunduxhä xhigab gucuaä lojtu xcuent yäl'ruslaa lo rextoljnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yäl'rilitajz ni basule'reni par tejjas loj rexpejn Dios.

<sup>4</sup> Sa'csi abixhigat'z gaii bejn, renani galooli gunii siädreni, niluxh sinitlojreni. Najczeni bejn ni di chalilajz xtdix Dios, najczeni benguidxduxh, rutzur'éreni xcäl'racnäj Dios, rujnreni xtujy, sanäreni te yäl'nabandxuudx. Rbälazzareni xpaxhuaannu nani rnibee loonu, Dad Jesucrist.

<sup>5</sup> Mase anajntu guira'ti rediidxga tejjas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni.

<sup>6</sup> Rexangl Dios nani di nucuaadiag diidx, ni birii cadro rlazj Dios chureni, reni'c basäu Diosreni cadro nacäboo te cabäjzreni gun Dios xcäl'guxhtisni lojreni.

<sup>7</sup> Si'c bejni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii biräax, regunaa guyunäjzreni regunabiräax. Dxejc gudejdreni trabawduxh huejcreni neñ guiboo par tejjas xcuent xtojreni, ni'c najc te yäl'rulijdx loonu.

<sup>8</sup> Rebejn ni riu' lojtu najc sa'c reben galoo ni bejn dojl. Nabajreni si'c ni bisieedreni lo guiraa nani rului yäl'rnixca, ruxhinreni tiejxhreni, rbälazreni xcäl'rnibee Dios, rniyajzreni rexangl Dios.

<sup>9</sup> Miguejl ni rnibeeru loj rexangl Dios, che gudildiidxni bendxab yejc tiejxh to Moisés, dini niniyaj bendxab, alga räjpni: "Sugun Dad Jesucrist yäl'guxhtis lojlu."

<sup>10</sup> Niluxh rebejnğa rniyajreni nicla ganreni xhini'c rniireni. Niluxh nani racbeepac rebejnğa najc yäl'naj nani nicla ni quini nisieedreni, lala sa' nani rujnza reguidxaa, ni xheti xcäriejnni, reni'c sujn nitlojreni.

<sup>11</sup> ¡Aii! ¡Riazanureni! Sanajlreni xnezyuj Caín, luxh te gunreni gaan meel ruxhujlreni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni.

<sup>12</sup> Laareni najczeni te xtuiduxh lo rexchej ni rajc guidoo, direni guidxejb gauxchenäjreni la'tu, sa'csi xque'tisreni riureni. Najczeni si'c te xcäy ni xhet nisguij siädnäni, nani sanä bej nezree nezrec; najczareni si'c te yagbigool nani di ninejxh xcaj lojni, tio'p huält agujtreni, najczeni si'c te yajg ni abiliäädx.

<sup>13</sup> Laareni najc si'c nis ni räjs lo nisdoo, che cayajc te bidonduxh, säa, siädni, carii xtujyreni si'c räjs nis lo nisdoo. Najczeni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejjas.

<sup>14</sup> Xcuentza redee agunixgaaza Enoc ni najc xagdodoo Adán, räjpni: "Bahui, siädnä Dios xhidalduxh xanglni

<sup>15</sup> te gunni yäl'guxhtis loj guiraa bejn te gusacsiduxhni guiraa rebejn ni di gumbee Dios xcuent redolduxh ni bejnreni, xcuentza redidxnaj ni guniyaj rebendolduxhre Dios."

<sup>16</sup> Rebejnre laa reni rmojm, runduxhrene quej, rujnreni si'ctis ni rlazj tiejxhreni, rniireni guiraloj didxnaj, rniisireni didxsa'c loj rebejn te gun rebejnğa si'c ni rlazjreni gunreni.

### *Rulijdxni rebejn nani ahuililajz xtdix Dios*

<sup>17</sup> La'tu, betzä ni sanälazä, riäl' guinaj lajztu rediidx nani gunii reapost xten Dad Jesucrist,

<sup>18</sup> sa'csi guniireni lojtu: "Neñ redxelult che guibisac Jesucrist, su' bejn ni suxhiznäjnreni rextidx Dios, sujnreni si'ctis guisia' lajzreni."

<sup>19</sup> Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xpirt Dxan xten Dios cuää neñ lastooren.

<sup>20</sup> Niluxh la'tu rebetzä nani sanälazä, coltiob loj xcäl'rilitajztu ni siäd lo Diostis, colnab lo Dios xcuent yäl'rnibee xten Xpirt Dxan xtenni.

<sup>21</sup> Colguibajntis lo yäl'sanälajz xten Dios, colsusintis la' ni cayunlojtu yäl'rulasajz xten Dad Jesucrist ni guniidx yäl'nabajn par tejjas.

<sup>22</sup> Colgacnäj renani di chalilazsa'c te chalilajzpacreni xtdix Dios.

<sup>23</sup> Colyacnäj sgaii te guibicajreni lo dojl, gudobxhaxjreni, colyejn xhigab lo guiboo cayejcreni. Colyacnäj sgaii bejn, colgulasajzreni con yälrđxjeb, niluxh colnatiru te di guntu lagajc dojl ni rujnreni. Gulälaz nani rujnreni, nani ruxhinreni.

*Redix lult*

<sup>24</sup> Colguiliä'p xpala'n Dios nani racnäj la'tu didi jiajbtu lo dojl, nani rujn sajc suutu lo xcälrđimbicha' Dios, nayadujtu, rbaduxh lajztu.

<sup>25</sup> Yu' tejtis Dios. Laatisni rajpni yälnajn te guslaani nuurnu lo dojl xcuent ni bejn xtdnu Jesucrist. Colguiliä'p xpala'nni, rajpni guirali yälrđmibee, yälrđimbicha', galooli, näj naj, näjza par tejpas. Sugacni si'c.

## Rediidx Nani Bacuaa Juan Xcuent Recos Ni Churu Gac

### *Baluiloj Jesucrist lo Juan*

<sup>1</sup> Dee najc rediidx ni badeed Dios loj Jesucrist te gululojnini loj rexmosni, xcuent recos nani di gacaa gac. Jesucrist baxhaĵ xanglni lo Juan, te baluini guiraa recosga lojni.

<sup>2</sup> Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

<sup>3</sup> Chicbaa renani rol guijtze xcuent recos ni churu gac, renani riua rediidxga, renani rguchee rediidxga neĵ lastooni sa'csi siäddzungajxh redxej che soob rediidxga.

### *Juan cagucuaa guijtze lo gajdz guidoo*

<sup>4</sup> Narä nacä Juan. Cagucuaa guijtze loj guigajdz reguidoo ni tre' lo región Asia. Dios guspajdz la'tu, guscuedxini lajtzu, lagajc Dios ni sigajc najc nadxej, sigajcza gujčni naii, sigajcza sajčni par tejjas. Xca'zatu xcälruspalajz näj xcälrbedxilajz guigajdz respřit ni suga' guideb gabi cadro rnibeeeni,

<sup>5</sup> näj xcälruspalajz, xcälrbedxilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa reĝeii loj guedxliujre. Laani sanälzduxhni nuure, laani rudzucajni xtojĵnu con xtiejnni.

<sup>6</sup> Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejjas. Sugacni si'c.

<sup>7</sup> ĵColgacbee! Laani sibusacni lo rexcäy, luxh guiragajc rebejn suhuii lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

<sup>8</sup> —Narä nacä ganid, nacäza lult, si'c najc reletr A con Z —rnii Dad Dios—. Nabaĵä nadxej, sigajcza gubaĵä naii, sigajcza sibanä par tejjas, dipacna gacä ste'ca. Rapä yälrnibeduxhru lo chutis.

### *Bahuiä loj Jesucrist lo xcälrdimbicha'ni*

<sup>9</sup> Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhaĵreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre.

<sup>10</sup> Te dumingw, laĵ ni cayunäa Dios, guzacä astoo canixcaĵä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet,

<sup>11</sup> najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhaĵ guijtze loj guigajdz guidoo ni yu' nez Asia, neĵ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

<sup>12</sup> Dxejc gubireä te bahuiä chuni'c canii loä. Che gubireä bahuiä lo gajdz gandilier oor.

<sup>13</sup> Galäii guigajdz recandlieerga, suga' te ni najc Xi'n Dios nani gujc Xi'n Niguii, najcwni te lajd ni rdzujn lo ni'lini, lastoozani naliib te cinturon gulajg ni najc ganaxduj oor.

<sup>14</sup> Yejčni näjza xquidxejčni najczareni nolbäj si'c xquichlajd xiiil, nolbäj si'c yejg. Dxejcru rbebajl lojni.

<sup>15</sup> Ni'ni rdimbicha' si'c guiib ni laa bronz che cayejčni lo guiboo. Xse'ni riejn nadipduxh astoo che riäjt nisro neĵ regueuu.

<sup>16</sup> Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

<sup>17</sup> Che bahuiä lojni, biabrlöä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxejbli, narä nacä ni gubajn galooli, narä nacäza ni guibajn lult.

<sup>18</sup> Narä nacä ni nabajnpac; gutä, niluxh näj nabaĵä par tejjas. Rapä yälrnibee lo yälgujt näjza lo gabijl.

<sup>19</sup> Ni'cni bacuaa recos ni abahuilu, nani cayajc näj, näjza nani churu gac.

<sup>20</sup> Dee najc laa yälxhiga'tz xten regajdz balxhaguibaa ni bahuilu lo naä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

## 2

### *Rediidx nani chää loj rexpejn guidoo Éfeso*

<sup>1</sup> Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, nájza nani rsiaj galáii guigajdz gandilier oor, rni rediidxre lojtu:

<sup>2</sup> Nará numbeá xhi redzuun rujntu, xhi trabajw rdejdu rujntu dzuunga, nájza xho rsiudzu'tztu. Dizatu guchagsa'tu benlatsiaj; nájza bala'tztu xho rujn rebejn nani rniireni najcreni apost ni rni xtidx Dios, luxh direni gac, luxh la'tu gucbegajctu cagusgueereni bejn.

<sup>3</sup> Rsiudzu'tztu, rujntu huant xcuent xtidxá, gajdtu guidxajg.

<sup>4</sup> Empac yu' te quej ni rbe'cá xcuenttu: dirutu chanälajz nará si'cni huinälajztu nará ganiddoo.

<sup>5</sup> Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxá. Palga ditu gusiechljajztu, sudzucaá xcandilieertu cadro suga'ni.

<sup>6</sup> Laaca rujntu rbälaztu xtzuum rebejn ni laa nicolaítas, sa'csi nájza nará rbixlazá xtzuumreni.

<sup>7</sup> Nani yu' diajgni te cuadiajgni diidx, sucuadiajgni diidx ni rni Sprit Dxan xten Dios loj reguidoo: loj renani gun gaan lo dojl, gudedá gauni ninejxh ni rcaj lo yajg yäl nabajñ, ni yu' xhaguibaa cadro yu' Dios.”

*Rediidx ni rniini loj rexpejn guidoo ni yu' Esmirna*

<sup>8</sup> Dxejcti najni loá:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rni diidxre lojtu:

<sup>9</sup> Nará naná xho cadejdlu trabajw, nanáza guxilii rajplu, niluxh nez loj Dios yu' xhidajl xhixtenlu. Nanáza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobáz bendxab.

<sup>10</sup> Na'c guidxajblu trabajw nani agojl tedlu. Aree bendxab gusäl gaii sa'tu neñ latzguuib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti nará gunidxá te coron xten yäl nabajñ.

<sup>11</sup> Nani rlajz cuadiajg diidx sucuadiajgni diidx ni rni Sprit Dxan xten Dios loj reguidoo: nani gun gaan lo dojl, xhet gundi yälgujt ni rojpa lojni.”

*Rediidx ni rniini lo rexpejn guidoo ni yu' Pérgamo*

<sup>12</sup> Dxejcti najni loá:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rni rediidxre lojtu:

<sup>13</sup> Nará naná caro rbájztu, rbájztu lo guejdx cadro rnibee bendxab. Rsiudzu'tztu xcuent xtidxá. Laítis rsiudzu'tztu rililajztu xtidxá, mase neñ redxer cheni bagu'treni Antipas, ni guni diidx xcuenta, nani gusudzutzpac nez loá, nani bagu'treni neñ guejdx cadro rnibee bendxab.

<sup>14</sup> Niluxh yu' tiop-chon xtojltu. Lojtu nadxaag gaii bejn ni rujn si'c bejn toBalaam agujc xchero. Laani baseedni Balac xho gunni te jiajb rexpejn Israel neñ dojl, baseedniireni gaureni recos ni gurej lo dxan nez loj rebanájb, baseedzani rexpejn Israel guesnäjreni chutis gunaa.

<sup>15</sup> Sigajcza nadxaag lojtu gaii bejn ni riu rediidx ni rusule' reni laa nicolaítas.

<sup>16</sup> Colgusiechxgaa lajztu, te di jialgacá lojtu te gucuanääreni spaad ni yu' ro'á.

<sup>17</sup> Nani rlajz cuadiajg diidx, sucuadiajgni diidx ni rni Sprit Dxan xten Dios loj reguidoo: renani gun gaan lo dojl, lojni gudedá yäxtiil ni laa mana ni yuchee-xhiga'tz. Sudedáza lojni te guibáz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

*Rediidx nani rniini lo rexpejn guidoo ni yu' Tiatira*

<sup>18</sup> Dxejcti najni loá:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rni rediidxre lojtu:

<sup>19</sup> Ananá xtzuumtu, sanälajztu sa'tu, naná xho rililajztu xtidxá, xho racnäjtu resa'tu, nájza xho rsiudzu'tztu, runduxhtu huant. Nanáza cayujntu dzunroru ñaj loj ni bejntu che guslojtu.

<sup>20</sup> Niluxh yu' xhicuent rdxe'chá lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rni xtidx Dios, rusgueetisni bejn. Luxh xcäl'ruseedni cagusgueeni rexpená nani ahuililajz xtidxá, te ñaj rujnreni cosguijdx, si'c yälresnäj ni di gac cháälni, rajwzarení nani gurej lo dxan xten rebanájb.

<sup>21</sup> Agulázá xchej te gusiechlajzni, gusaanni gunni dojl, luxh naaddini gusiechlajzni xcuent redzungujdx ni rujnñi.

<sup>22</sup> Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni.

<sup>23</sup> Sugutzhiä, sunitloä rexi'n gunaaga, te si'c gacbee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yälrlilajz ni yu' neñ lastooreni. Te gacbeezareni narä sunidxä lo tejgatu ni riäj] xca'tu xcuent redzuun ni rujntu.

<sup>24</sup> Dxejc loj guiraa reni yu' lo guedx Tiatira, la'tu ni di guirinaj] xnezyuj Jezabel, la'tu ni di gumbee nani rniireni najc recosduxh xten bendxab, xhetru rniädi lojtu, dirunä gotalä xtzuuntu.

<sup>25</sup> Colyapdzu'tz rextidxä nani arajptu dxejli ni guibisacä lojtu.

<sup>26</sup> Nani gun gaan lo dojl, näjza nani cagusoob xtidxä dxe lultli, lojni sutedä yälrnibee te guinibeeni renacion.

<sup>27</sup> Si'cni baniidx Xtädä yälrnibee loä, sutedä yälrnibee lojni, te guinibeeni guiraa reben guedxliuj, gunnäjni yälguxhtis lojreni te barguiib si'c rujn ni runchee guesbaj]n, rlia'ni guiraa regues nani xhet sajcdi.

<sup>28</sup> Sunidxäza bale' xhaguibaa ni rii rsildoo (ni säloj guibaññaju Dios).

<sup>29</sup> Nani rlanj cuadiajg sucuadiajgni diidx ni rniü Sprit Dxan xten Dios loj reguidoo."

### 3

#### *Rediidx nani rniini lo rexepejn guidoo ni yu' Sardis*

<sup>1</sup> Dxejcti najni loä:

—Bacuaa rediidxre lo xangl Dios xten guidoo ni yu' Sardis: "Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rniü rebejn nabajntu, niluxh narä nanä ascanu agujttu, dirutu gun xtzunä.

<sup>2</sup> Colguibaj]n, colgula'tzru nani rapsijctu xcuent rextidxä nani ameer nitloj neñ lastootu. Narä ruhuiä ditu niunsa'c dzuun xtenä nez loj Dios.

<sup>3</sup> Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibaj]n, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu.

<sup>4</sup> Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäj]reni.

<sup>5</sup> Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadro caj laj renani sibaj]näj Dios par tejpas. Sicäpäza nez loj Xtädä näjza nez loj guiraa rexquixhaj]ni, bejnga najc rexpenä.

<sup>6</sup> Nani rlanj cuadiajg diidx, sucuadiajgni diidx ni rniü Sprit Dxan xten Dios loj reguidoo."

#### *Rediidx nani rniini lo rexepejn guidoo ni yu' Filadelfia*

<sup>7</sup> Dxejcti najni loä:

—Bacuaa rediidxre lo xangl Dios xten guidoo yu' Filadelfia: "Nani najc dxan, nani najc guliipac, nani rajp xliäii toDavid (ni säloj guiragajc yälrnibee), nani che ruxhalmi, rut rusäuudi, nani che rusäuuni, rut ruxhaldi, laani rniini diidxre lojtu:

<sup>8</sup> Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä.

<sup>9</sup> Suhuüitu xho gunä rebejn ni yu' lo guidobäz xten bendxab. Rniisireni najcreni xpejn Israel, luxh direni gac; rusinguereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu.

<sup>10</sup> Sa'csi basooobt xtidxä ni gunibeä sutijptu, na'c jieedtu, ni'cni narä sacnäázatu che guidzuj]n dxej tedtu trabajw. Luxh orga ameer guidzuj]n lo guideb guedxliuj, luxh sidejd guiraa reben guedxliuj trabajw, te guibee rebensa'c lo reben guedxliuj.

<sup>11</sup> Narä di gaclaa jälä; gopdzu'tz ni rajptu, te rut gudzucajdi ni gunidxä xca'tu.

<sup>12</sup> Nani gun gaan lo dojl, narä gunäni si'c te pilajr neñ xquidoo Xtioozä, nalajznu, sajcnj te bejn nani gac guinibee cadro yu' Dios. Sibaj]ni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncuob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najcnj xpenä.

<sup>13</sup> Nani rlanj cuadiajg diidx, sucuadiajgni ni rniü Sprit Dxan xten Dios loj reguidoo."

#### *Rediidx nani rniini lo rexepejn guidoo ni yu' Laodicea*

<sup>14</sup> Dxejcti najni loä:

—Bacuaa rediidxre lo xangl Dios xten guidoo ni yu' Laodicea: "Nani laa Amén (ni säloj sugacni si'c), nani najc testiigw ni rniüipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree:

<sup>15</sup> Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni!

<sup>16</sup> Ni'cni, sa'csi najctu si'c nistiib, ditu gac si'c nisnaji, niclaza gactu si'c nislää, sibäro'ä la'tu.

<sup>17</sup> Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu beñ gubijn, te beñ probduxhlu, di lojlu jien, luxh suga'lu xhabäälü nez lo Dios.

<sup>18</sup> Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujylu suulu xhabäälü; gusiiza unguent loä te chää balojlu, te jien lojlu.

<sup>19</sup> Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblaj; colgusiejch lajztu.

<sup>20</sup> Colhüii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalmi xpuert lastooni, siu'ä lastooni, te gacnääni, te guibañsa'czani nez loä.

<sup>21</sup> Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rnibeeni xhaguibaa.

<sup>22</sup> Nani rlanj cuadiajg diidx, sucuadiajgni diidx ni rniü Sprit Dxiän xten Dios loj reguidoo."

## 4

### *Calä'preni xpala'n Dios xhaguibaa*

<sup>1</sup> Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejrcru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaa ree, te guluiä lojlu recos ni churu gac che luux gac recosre.

<sup>2</sup> Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilo cadro rbej nani rnibee xhaguibaa, luxh ro'c sobga' nani rnibeeni.

<sup>3</sup> Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda.

<sup>4</sup> Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejjareni.

<sup>5</sup> Nez lo yagxhilo cadro rnibeeni riü reyälrdinya' näjza guzii. Nez loj cadro rnibeeni caya'guij gajdz bajl ni najc gajdz Sprit Dxiän xten Dios.

<sup>6</sup> Nez loj cadro rnibeeni yu' astoocanu te nisdoo ni rien si'c te guiuanro, rdimbichasejsni.

Galäii yagxhilogä näjza guideb gabini suga' tajp man, guideb nez lojreni näjza nez dejtreni yu' balojni.

<sup>7</sup> Manganidga najc si'c te lion; man ni rojppga najc si'c te gonbäz; man ni riojnga rujn lojni si'c rujn loj te niguii; man ni rdajppga najcni si'c te bisiro cagutajt xhaguibaa.

<sup>8</sup> Niluxh guidap remanga tejjareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dxiän, dxiän, dxiän najc Dad Dios ni rajp yälrnibeduxh,

nani yu' galooli, nani yu' naj, nani churu jääd.

<sup>9</sup> Guidap remanga rliä'preni xpala'n Dios, rusuxhijbreni rajnrenini, rdeedzaren i xquixtios loj nani rnibee par tejjas.

<sup>10</sup> Dxejc guigalbitap rebengool, suzuxhijbzareni loj nani rbej lo yagxhilo, te ganreni nani nabajn par tejjas. Sucuaareni xcoronreni nez loj xyagxhiloni, siniireni lojni, säjpreni:

<sup>11</sup> Dad Dios baxhuaannu, Guejbpaculu riäj'l xca' guiraa rebala'n, guiraa reyälruzuxhijb, guiraa reyälrnibee,

sa'csi Guejblu guläxtiej guira'ti nani yu' naj,

yu'reni sa'csi rlanj Guejblu chureni,

ni'cni benchee Guejblu guiraareni.

## 5

### *Te guijtznä; te ni najc Xiil xten Dios*

<sup>1</sup> Dxejrcru narä Juan bahuiä lo nani sobga' lo yagxhilogä. Naani ladbee ca'ni te libr, najcni si'c te bilüu guijtznä. Caj diidx nez lojni caj diidx nez dejtznä, nadxe'ni, caj gajdz seii lojni.

<sup>2</sup> Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj'l guxhal guijtznä? ¿Chuni'c riäj'l gutiäjs reseiere?

<sup>3</sup> Niluxh niclä tej bejn di nidxäj'l ni riäj'l gutiäjs reseiega te guxhalmi guijtznä; niclä xhaguibaa, niclä lo guedxliujre, niclä xhajiät nez nen guedxliuj. Niclaza nidxäj'l chu niajc nuhüii lo guijtznä.

<sup>4</sup> Narä ronduxhä sa'csi nicla tej rut riäjldi gutiäjs reseiiga, niclaza ni riäjł gol guijtzga, niclaza ni riäjł fiitis lo guijtzga.

<sup>5</sup> Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo tojudá, xagdoo toDavid, abejnni gaan lo yälgujt ni'c naj riäjł guxhalni guijtzga, gutiäjszani guigajdz reseiiga.

<sup>6</sup> Dxejc bahuiä nez cadre suga' yagxhilroga näj guidap remanga, näj cadre suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj.

<sup>7</sup> Laani gubigni, cua'ni guijtzga, guläänini ñaa ladbee xten nani sobga' lo yagxhilroga canibee.

<sup>8</sup> Che cua'ni guijtzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zarenı taz oor guidxa te ni najc si'c yaal. Yaalga najc guiraa reyälrbexdx, yälriiab xten rexpejn Dios.

<sup>9</sup> Cayolzarenı te dicoob ni najc scree:

Guejblu sacduxh,

riäjłpac xca' Guejblu guijtzga,  
gutiäjs Guejblu reseiiga, sa'csi bagu't rebejnlu,  
näjza xtiejnlu gudijx xcuent bejn lo Dios.

Gudijxlu xcuent bejn ni najc garen-garen raz,  
ni rniı garen-garen didxsaj,

ni siääd garen-garen guejdx lo garen-garen ladxbejn.

<sup>10</sup> Badeedlu gacrenı reii näjza bixhojz lo Dios.

Laarenı sinibeerenı reben guedxliuj.

<sup>11</sup> Che bahuiä, biejn diagä xse' xhidalduxh xangł Dios ni suga' guideb gabi yagxhilro cadre rbejn nani rnıbee, näjza xse' guidap reman, näjza xse' guiraa rebengool. Luxh di gacdi guigab xangł Dios ni tre' ro'c sa'csi xhidalduxhtej najcrenı, xhidalduxh miyoñ najcrenı.

<sup>12</sup> Dipduxh najc xse'reni, caniireni scree:

Sacduxh Xiil nani bagu'trenı,

ni'c riäjł xca'ni yälrnıbeduxh, yälrapduxh, yälñanduxh, yälmilagwr.

Riäjłza guiliä'pnu xpala'nni, guzuxhıjbnu lojni ganñuni, gudeednı xquixtıos lojni.

<sup>13</sup> Dxejcti biejn diagä xse' guiragajcrenı, guiraa renı benchee Dios ni yu' xhaguıbaa, näj guiraa renı yu' loj guedxliujre, näjza guiraa renı yu' xhajiät nez neñ guedxliuj näj lo nısdoo, biejn diagä caniireni scree:

Loj nani sobga' lo yagxhilro cadre rnıbeeni,

näjza loj ni najc Xiil xten Dios, laatisni sacduxhni,

guiliä'pnu xpala'nni, guzuxhıjbnu nez lojni ganñuni,

gäbzanu rinıbeeni par tejpas.

<sup>14</sup> Dxejcti guidap remanga rnıgajcrenı scree:

—Sugacni si'c.

Dxejcti guigalbitap rebengool bazuxhıjbrenı nez loj nani nabajñ par tejpas, gojnrenini.

## 6

### *Guigajdz reseii*

<sup>1</sup> Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

<sup>2</sup> Dxejc bahuiä lo te cabai nol. Nani bıjb dejtznı ca' te arcw nani rucuaa fle'ch. Badeedrenı te coron lojni. Biriini cayujñni gaan te chanuutis gunni gaan.

<sup>3</sup> Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

<sup>4</sup> Dxejc bahuiä lo te cabai xniaa. Loj nani bıjb cabai xniaaga badeedrenı yälrnıbee gudzucajni yälñadoo, yälrbexılajz, lo guedxliujre, te ju't sa' rebejn. Badeedrenı te spadro cua'ni.

<sup>5</sup> Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejc bahuiä lo te cabai yas. Nani bıjbni naazni te balans.

<sup>6</sup> Biejn diagä astoo galäii guidap remanga, birii xse' te ni canii scree:

—Tej kıl xob xca'lu gunlu dzuun tebdxej; choñ kıl salbaad xca'lu gunlu dzuun tebdxej. Niluxh na'c guhuałlu bin niclaza se't.

<sup>7</sup> Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

<sup>8</sup> Dxejç bahuiä lo te cabai gojtz. Nani bijbni laa yälgujt, luxh dejtzn siädналgajc ni rnibee gabijl. Gula'ni rebejn ni re' lo guedxliujre gujçreni tajp gala', dxejç loj redee badeedreni guinibeereni lo te cuaa rebenguedxliuj te ju'treni rebejnга con spaad, näj yälrliaan, näj yälraxhuu, näjza remanduxh ni yu' dajn.

<sup>9</sup> Dxejcti che batiäjsni ni rajc gaaï seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios.

<sup>10</sup> Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quixreni ni bejnreni?

<sup>11</sup> Dxejcti cua'reni te ladnolbäj gojt teygareni. Dxejç räjpreni lojreni cuäzsjçreni, gusilajzreni, la! ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

<sup>12</sup> Bahuiäza cheni batiäjsni ni rajc xho'p seiiga, luxh gujç te xuduxh, bigasboo loj gubijdx si'c te ladyas, sas bäii gujç guidebni si'c rejn.

<sup>13</sup> Rebalj ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga.

<sup>14</sup> Dxejcti gunitloj guibaa si'cni rnitloj te guijtz che re'ni, rajcni te bilii. Guiraa redajn näjza reyuj ni re' galäii lo nisdoo biniibreni, bidxaa xladreni.

<sup>15</sup> Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajçreni baxunreni, huicuatzlojreni nen rebiliää nen redajn.

<sup>16</sup> Dxejç räjpreni loj redajn, loj reguilaj:

—Colguitejb yejçnu, colgucua'tz nuure loj nani rbej lo yagxhilo xhaguibaa näjza loj yälguxhtis xten nani najc Xiil xten Dios.

<sup>17</sup> Sa'csi abidzujñ dxero xten xcälguxhtisni, ¿chuni'c sajc suu nez lojni?

## 7

### *Tegayuu tiubitajp mi! rexpejn Israel*

<sup>1</sup> Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejç reyajg.

<sup>2</sup> Bahuiä lo stee xangl Dios, ni siääd nez cadro rliejn gubijdx, ca'ni seiï xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo.

<sup>3</sup> Räjpni lojreni:

—Guläzsjçtero, la! ni guicuaanu te seen lo cuaj reni najc xpejn Dios, te dxejçru sajc guntu daan lo yuj, näj loj nisdoo, näj loj reyajg.

<sup>4</sup> Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mi! bejn ni bibee loj rexpejn Israel.

<sup>5</sup> Loj rexpejn Judä bibee tzubitio'p mi!; loj rexpejn Rubén bibee tzubitio'p mi!; loj rexpejn Gad bibee tzubitio'p mi!;

<sup>6</sup> loj rexpejn Aser bibee tzubitio'p mi!; loj rexpejn Neftalí bibee tzubitio'p mi!; loj rexpejn Manasés bibee tzubitio'p mi!;

<sup>7</sup> loj rexpejn Simeón bibee tzubitio'p mi!; loj rexpejn Leví bibee tzubitio'p mi!; loj rexpejn Isacar bibee tzubitio'p mi!;

<sup>8</sup> loj rexpejn Zabulon bibee tzubitio'p mi!; loj rexpejn José bibee tzubitio'p mi!; loj rexpejn Benjamín bibee tzubitio'p mi!.

### *Benguixhuj ni najcw ladnolbäj*

<sup>9</sup> Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarenì zijn.

<sup>10</sup> Dipduxh rniireni, räjpreni:

Dios ni rnibee lo yagxhilo, näjza nani najc Xiilre, baslaareni nuure lo xtojlnu.

<sup>11</sup> Suga'za guiraa rexangl Dios guideb gabi yagxhilo cadro rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios,

<sup>12</sup> räjpreni:

Sugacni si'c. Loj Xtiosisnu colye'tz sacduxhni;



colguiliä'p xpala'nni;  
 laatisni rajpni yäl'najn;  
 lojtisni colgudeed xquixhtios, laatisni colgan,  
 col'suxhijb lojni; laatisni rajpni yäl'mibee näjza yäl'milagwr.  
 Sugacni si'c par tejpas.

<sup>13</sup> Dxejc gunii te beṅgool loä, najni:

—Renani najcw reladnolbäjre, ¿chu najcreni? ¿Casiäädreni?

<sup>14</sup> Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yäl'trabajwduxh, renani abia rextojl'reni sa'csi xtiejn Xiil xten Dios agudijx xtoj'reni.

<sup>15</sup> Ni'cni suga'reni nez loj yagxhilo xten Dios dxej-yääl cayujn'reni xtzuunni nen xquidooni. Ni'cni sacnäy nani sobga' lo yagxhilogra guiraa renani suga' nez lojni, sunäj'tisni laareni.

<sup>16</sup> Dirureni guiliaan, niclaza jiojl'reni, diza gubijdx guze'c loj'reni, dizareni gacnanlaa.

<sup>17</sup> Sa'csi nani najc Xiil xten Dios ni sobga' galäii loj yagxhilo xten Dios, laani cayajpnireni si'c xilbäz, sinänireni cadro yu' nisyä ni rudeed yäl'nabajn par tejpas. Suspijdz Dios nisbee baloj'reni, dirureni goon par tejpas.

## 8

### *Ni rajc gajdz seiiga*

<sup>1</sup> Che batiäjsni ni rajc gajdz seiiga, gucdxi xhaguibaa si'cti med or.

<sup>2</sup> Dxejcti bahuiä loj guigajdz xangl Dios ni suga' nez loj Dios. Loj'reni badeedreni gajdz trompe't.

<sup>3</sup> Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejñ yaal te cachaagnini loj guiraa rextidx xpejn Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilogra.

<sup>4</sup> Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios.

<sup>5</sup> Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujzca te xuduxh.

### *Retrompe't*

<sup>6</sup> Dxejcti guigajdz rexangl Dios ni ca' guigajdz retrompe't, guzusin'reni te guisloj goj'reni retrompe'tga.

<sup>7</sup> Che bil' trompetganid, guixob näj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejzca ni riojn la' reyajg näjza guiralii recuaan.

<sup>8</sup> Che bil' ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn.

<sup>9</sup> Dxejcti gujt ni riojn la' rebäj'l näj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

<sup>10</sup> Che bil' ni riojn xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojn la' regueuu, näjza cadro rliejn nis.

<sup>11</sup> Laj bajlga najc Ajenjo, ni säloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisanlaaga.

<sup>12</sup> Che bil' ni rdajp xangl Dios trompe't ni ca'ni, guxhijñ ni riojn la' gubijdx, näjza ni riojn la' bäii, näjza ni riojn la' rebal xhaguibaa, bicäy'reni. Dxejcti dirureni guzanij ni riojn la' dxej, näj ni riojn la' yääl.

<sup>13</sup> Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, canüini rediüdxre:

—¡Aii! ¡Aii! ¡Aii! Riaduxhä reben guedxliuj che guisloj goj' schoñ rexangl Dios retrompe't ni ca'reni. Sidejd reben guedxliuj trabajwduxhru.

## 9

<sup>1</sup> Che bil' ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni liäii ni ruxhal ro' gabijl.

<sup>2</sup> Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej.

<sup>3</sup> Dxejcti lo gujxhga birii betzsu gusu'reni guideb lo guedxliuj. Cua'reni yäl'mibee gacreni nialajz si'c nialajz renaxejb.

<sup>4</sup> Cua' remanga yälrnibee na'c gunreni daan loj reguixa', loj recuaan, loj reyagbajn; rebejntis nani xhet beedi xten Dios caj lo cuajreni, reni'c gusacsireni.

<sup>5</sup> Cua'reni yälrnibee na'c ju'tni bejn, gaii bäii gusacsireni xcäl'nayanreni bejn. Luxh xcäl'nayanreni najc si'c yäl'nayan cadro rauya' te naxejb te bejn.

<sup>6</sup> Neñ redxejga, siguiil rebejn yälgujt, luxh direni guidxälni. Luxh mase rlaizreni guetreni, sibicaj yälgujt lojreni.

<sup>7</sup> Rebetsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujn si'c loj rebejn.

<sup>8</sup> Xquichejcreni si'c najc xquichejc gunaa; reläyjreni najc si'c läjy lion.

<sup>9</sup> Luxh guideb tiejxhreni caj si'c guuib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii näj xcarreni che agojl chääreni guer.

<sup>10</sup> Xhibaanreni najc si'c xhibaan naxejb, xcuchreni yu' yäl'nayan te gusacsireni reben guedxliuj gaii bäii.

<sup>11</sup> Yu'za ni rnibee lojreni, xangl beñdxab ni birii gabijl. Xtidx hebreo laani Abadón, xtidx griegw, laani Apoliön.

<sup>12</sup> Naj agudejd tej casionroga, naj cayäädx stio'pni.

<sup>13</sup> Che bil ni rxho'p xangl Dios trompe't, biejn diagä te xse' bejn ni lascanu siäädni galäii guidajp reca'ch ni caj loj xpüändxan ni nac-chee ganax oor; ni yu' nez loj Dios.

<sup>14</sup> Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

<sup>15</sup> Dxejcti baslaani guidap reanglga te ju'treni ni riojn la' beñ guedxliuj. Luxh gule Dios reanglga parpac dxejga, bäiiga, ijzga.

<sup>16</sup> Biejn diagä bal najc guiraa resoldaad ni rbijb cabaii: najcreni tio'p gayuu miyon.

<sup>17</sup> Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guuib, najcni xniaa näj zul näj gojtz. Dxejcro yejc recabaiiga najc si'c yejc te beedz. Ro'reni carii bajl näj gujxh, näj sufr.

<sup>18</sup> Ni riojn cuaa bejn gujt xcuent guichon replaag nani carii ro' recabaii, xcuent bajl näj gujxh, näjza sufr.

<sup>19</sup> Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

<sup>20</sup> Luxh guiraa rebejn nani di replaagre nugu't, direni nusiejch laizreni xcuent ni cayujñ ñaareni, te rajñreni rebendxab, näjza rebanäjb ni nac-chee oor; näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi sareni.

<sup>21</sup> Diza rebejnga nusiejch laizreni xcuent xcäl'rugu'treni, xcäl'rujnreni yälbidxaa, xcäl'resnäjreni bejn ni di gac chäälni, niclaza xcäl'gubaanreni.

## 10

### *Te angl ni ca' te guijtz*

<sup>1</sup> Bahuiä stee xangl Dios ni rajp yälrnibeduxh, siädjiäjtñi xhaguibaa, li yu'ni neñ bäj, yejçni dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl.

<sup>2</sup> Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj,

<sup>3</sup> dxejc guredxaduxh anglga si'c rbedxa' beedz. Dxejcro gunii guigajdz guzii sigajcsa.

<sup>4</sup> Che gulujx gunii guziiga, narä rlazä nucuaä lo guijtz nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

<sup>5</sup> Angl nani suj ni'ni loj nisdoo näjza loj yuj, guläs naani ladbee nez xhaguibaa.

<sup>6</sup> Guniliini diidx con laj GuebDios ni nabajn par tejpas, ni guläxtiej xhaguibaa näjza guiraa ni tre' xhaguibaa; ni guläxtiej guedxliujre näjza guiraa ni tre' lojni; ni guläxtiej nisdoo näjza guiraa ni tre' neñ nisdoo. Räjñni:

—Diru redxejre gaclaa.

<sup>7</sup> Che guidzujntis dxej ni agojl goj ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

<sup>8</sup> Dxejc gunisac xse' nani gunii xhaguibaali, stehuält biejn diagä caniiini loä, najni:

—Huij, te xca'lu libre' ni naxhal ni yu' ladzñaangl ni suj te laad ni'ni loj nisdoo, stelaad ni'ni lo guedxliuj.

<sup>9</sup> Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajçni nejxh si'c dzujñ.

<sup>10</sup> Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanläani xque'ä.

<sup>11</sup> Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rerei.

## 11

*Tio'p niguii ni rusule' xtidx Dios*

<sup>1</sup> Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb nenga.

<sup>2</sup> Na'c gutiehxlu gabi lole' guidooga, sa'csi ni'c acua' rebenzjtni te tiubitio'p bäii chaläjsreni guedxdxan si'ctis ni rlanjreni.

<sup>3</sup> Narä sudedä yäl'rnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mił tio'pgayuu gayojn dxej.

<sup>4</sup> Guiro'preni najc si'c tio'p yag oliib, si'c tio'p gandilieer ni suga' nez lo Dios.

<sup>5</sup> Palga yu' chu bejn rlanj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlanj gun latsiajreni.

<sup>6</sup> Guiro'p redade'ga rajp yäl'rnibee te gusäureni xhaguibaa te na'c jiajb nisguij guideb nen redxej nani cagusule'reni xtidx Dios, rajpzareni yäl'rnibee te guchaareni nis te gacni rejn, rajpzareni yäl'rnibee te jiädgusacsı xhitis plaag lo guedxliuj, si'ctis huält ni rlanjreni.

<sup>7</sup> Che luux gusule'reni xtidx Dios, dxejcti ni najc si'c te man nialajz sirii gabijl te jiädchagdijłni guiro'preni. Sujnni gaanreni, sugu'tniren.

<sup>8</sup> Dxejcti jia'n guiro'p rebengutga lad caii xten guejdx cadre bacuaareni Dad Jesucrist lo cruzj. Guejdxroga rbälajzareni Sodoma näjza Egipto.

<sup>9</sup> Chon dxej garol guiraa rebejn ni siääd guedxbäz, ni siääd guedxro, ni najc garen-garen raz, ni rnii garen-garen xtidx guiraa rebejn guedxliuj, suhuii loj guiro'p rebengutga, direni gusaan guiga'tzreni nen baa.

<sup>10</sup> Guiraa renani nabajn lo guedxliujre sibalazduxhreni sa'csi gujtreni. Luxh sa'csi rbalajzduxhreni, suxhalzareni xhi xca' sa'reni; sa'csi guiro'p redade' ni basule' xtidx Dios bahal trabajwduxh lojreni.

<sup>11</sup> Che gudej chon dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhreni.

<sup>12</sup> Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Cołchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa.

<sup>13</sup> Lagajc orga gujc te xuduxh, gurebän tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhreni, guslojreni calä'preni xpala'n Dios ni yu' xhaguibaa.

<sup>14</sup> Si'cti gulujx ni rojp casioon, luxh agojł guidzujn ni riojnga.

*Ni rajc gajdz xangl Dios gol trompe't*

<sup>15</sup> Che bił ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcäl'rnibee guedxliuj agudejd ladznaa Dad Dios näjza Jesucrist;

luxh laani sinibeeni par tejpas.

<sup>16</sup> Galbitajp rebengool nani sobga' lo tron xtenreni cadre rnibee Dios, biabrojreni nez loj Dios te calä'preni xpala'n Dios.

<sup>17</sup> Räjpreni:

Xquixtioste Guejblu Dios, nani rajp yäl'rnibeduxh, nani najclu, nani gujclu, nani churu gac,

sa'csi acua'lu xcäl'rnibeduxhlu te agusloj canibeelu.

<sup>18</sup> Bidxe'ch reben guedxliuj lojlu,

luxh abidzujn dxej guidxe'chlu lojreni,

gunlu yäl'guxhtis rebengut, te gudeedlu cossa'c loj rexpejnlu,

lo renani gunii xtidx Dios, lo renani huililajz xtiidxlu, lo renani rusuxhijbni nez lojlu;

rebenproob sigajc rebenro.

Abidzujnza dxej che cuäcajlu renani bejn daan guedxliujre,

te nitlojreni par tejpas.

<sup>19</sup> Dxejc bixal xquidoo Dios ni yu' xhaguibaa, nen guidooga bieñ te guijn cadre yu' guij cadre caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

## 12

*Te gunaa näj te ni najc si'c te gutiatzro*

<sup>1</sup> Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejctni yu' te coron ni nac-chee tzubitio'p balxhaguibaa.

<sup>2</sup> Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh.

<sup>3</sup> Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuwejni, sojb tzuu xca'chni. Tejga yejctni yu' te coron, najcreni gajdz coron.

<sup>4</sup> Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni.

<sup>5</sup> Dxejcti gojl xi'n gunaaga, najcni te niguii, luxh te bar guuib nungäjil guinibenäjni lo guiraa reben guedxliuj. Guläsgajcreni bäzga te sanärenini xhaguibaa cadro rnibee Dios.

<sup>6</sup> Dxejcti baxuñ gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mił tio'p gayuu gayoñ dxej.

<sup>7</sup> Dxejcti guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexangl ni gudilduxhni,

<sup>8</sup> niluxh direni niujn gaan, luxh di niajcdiru nia'n manga näjza resa'ni xhaguibaa.

<sup>9</sup> Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Bēdxab, ni laaza Satanás, ni rusguee guideb guedxliujre.

<sup>10</sup> Dxejcti biejn diagä xse' te ni canii dipduxh xhaguibaali, räjpni:

—Abidzujñ yälruslaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl.

<sup>11</sup> Laareni gujc bejnreni gaan loj bēdxabre, xcuent xtejn ni najc Xiil xten Dios, näjza sa'csi huilazsa'creni xtidx Dios, dizareni nidxejb mase niejtzareni.

<sup>12</sup> Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt bēdxab lo guedxliuj, luxh cadxcheduxhni sa'csi anajnni guxii dxej räjpni.

<sup>13</sup> Che gucbee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsini.

<sup>14</sup> Dxejcti badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Choñ iñz garol guyu'ni ro'c, nacuatzojni lo bälga.

<sup>15</sup> Dxejcti ro' gutiatzrore birii nis si'c te gueuu te nuslo'ni gunaaga.

<sup>16</sup> Dxejcti gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga.

<sup>17</sup> Dxejcti bidxcheduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

## 13

*Tio'p manduxh*

<sup>1</sup> Narä gusuä lo yujxh ni tre' ro' nisdoo, dxejcti bahuiä carii te manro lo nisdoo. Sojb tzuu xca'chni. Dxejcti lo tejga xca'chni yu' te coron. Yu' gajdz bitiuwejni cadro caj diidx ni rnijaj Dios.

<sup>2</sup> Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadro rbejni, näjza xcälrnibeduxhni.

<sup>3</sup> Dxejcti bahuiä te yejctni najc ascanu yu' chu batiuugni con madxed, ameer guetni, luxh biäc cadro gurujg yejctni. Ni'cni rdxeloduxh guiralii rebejn guedxliuj, sanajlni manduxhga.

<sup>4</sup> Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejcti-tiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlni, gucuanäjnni?

<sup>5</sup> Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rnijaj Dios. Yu'za chu badeed ga'pni yälrnibee tiubitio'p bäii, gunni si'ctis ni rlanjni.

<sup>6</sup> Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa.

<sup>7</sup> Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh.

<sup>8</sup> Dxejcti guiraa reben guedxliuj sazuxhijbreni, sagajñreni manroga, guiraa rebejn nani di lajreni nicaj lo libr xten yälñabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

<sup>9</sup> Palga yu' chu rlaiz cuadiajgni, sugucuaadiagsa'cni.

<sup>10</sup> Palga yu' chu nungäjł jiäuu neñ latzguiib, siäuupacni. Chutis ni ju't te bejn con te madxed, con madxeda guetni. Ni'cni renani anumbee Dios, riäjł gunreni huant, chanuutis chalilazsa'creni xtidx Dios.

<sup>11</sup> Dxejcti bahuiä loj stee manro, cariini neñ yuj. Sojb tio'p xca'chni si'c xca'ch te xiil, rniini si'c rniit te gutiatz.

<sup>12</sup> Luxh rñibeezani si'cni rñibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejçni, luxh biajc yejçni.

<sup>13</sup> Manroga ni birii neñ yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn.

<sup>14</sup> Rusgueeni rebejn nani nabajn lo guedxliuj xcuent remilagwrro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejçni, luxh biajca yejçni.

<sup>15</sup> Dxejcti man ni rojgga baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini.

<sup>16</sup> Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbáz.

<sup>17</sup> Gunibeezani digacdi sii, digacdiza guto' bejn palga xhet seendi caj ñaani o lo cuajni. Seenga najc laj manga o numbr xten laj manga.

<sup>18</sup> Dee rquiin yälñajn. Renani rajp yälñajn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayoñbixho'p.

## 14

### *Dij ni rol te gayuu tiubitajp mił*

<sup>1</sup> Che bahuiä stee, bahuiä suga' Xiil xten Dios yejç dajn ni laa Siön. Sugañjni te gayuu tiubitajp mił bejn nani caj lo cuajreni laj Xiil näj laj Xtadni.

<sup>2</sup> Biejn diagä rubej xhaguibaali, rubeduxh, riejnni si'c rubej xhidajł gueuro, näj te guziro; riejnznani si'cni riejn che cayol xhidajł bejn ni rol arp.

<sup>3</sup> Cayolreni te dicoob nez loj tron cadro rbej nani rñibee, näjza nez loj guidap reni najc si'c man ni nabajnpac, näjza nez loj rebengool. Rutliidi gujc bisieeddi dijga, xtebtis tegayuu tiubitajp mił bejn nani gułaa lo reben guedxliuj.

<sup>4</sup> Reniguire najc renani gajd xhñ con gunaa; nicla tejreni di niesnäj te gunaa, najczeni beñ dxan. Laareni rinajłreni Xiil xten Dios cadrotis sääni. Redee gułaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch.

<sup>5</sup> Nicla tej didx-xhii di guirii ro'reni, sa'csi xhetliidi xtojłreni, nayareni suga'reni nez loj tron cadro rñibee Dios.

### *Rediidx nani bazule' jion rexangl Dios*

<sup>6</sup> Dxejcti bahuiä loj stee xangl Dios, rutajtñ nez galäii xhaguibaa, siädñäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbáz, loj reben ni najc garen-garen raz, nani rni garen-garen xtiidreni.

<sup>7</sup> Dipduxh guniini, räjpni:

—Colguidxjeb Dios, colguiliä'p xpala'n Dios sa'csi abidzujñ or gunni yälguxtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

<sup>8</sup> Dxejcti siädñajł stee angl nani canii:

—Abiajb, abiajb guejdxroga nani laa Babilonia, sa'csi baquiiłni guzojz guiraa reguejdx xten guedxliuj xcuent xcäl-latsiajñi, xcuent dojł ni bejnñi guideb lagaa; najçni si'c reni rä'nejp.

<sup>9</sup> Dxejç biädñajł ni riojñ xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo ñaani,

<sup>10</sup> sidxechduxh Dios lojni, di xcälguxtisduxh Dios tedcaj lojni. Sidejdpacni trabajwduxh neñ balro näjza azufr nez loj rexangl Dios näjza nez loj Xiil xten Dios.

<sup>11</sup> Luxh gujxh xten reni cayejc sä'p nez lojreni guixe-guixee par tejpas. Digacdi gusilazreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni.

<sup>12</sup> Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

<sup>13</sup> Biejn diagä xse' te ni caniini loä xhaguibaali:

—Scree bacuaa: “Chichaa rebejn ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

*Yäl'nsa'c ni rudeed guedxliujre*

<sup>14</sup> Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcti, dxejcti naani ca'ni te guiboz ni caduxh ro'ni.

<sup>15</sup> Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni: —Basäl xquibozlu, batiuug, te batie' yäl'nsa'c, sa'csi agojl or guire' yäl'nsa'c, guideb guedxliuj aguyajl'ni.

<sup>16</sup> Dxejcti nani sobga' lo bäjga basniibni xquibozni, batiuugni yäl'nsa'c ni caj lo guedxliujre.

<sup>17</sup> Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni.

<sup>18</sup> Dxejcti birii stee xangl Dios nez loj piändxan xten Dios. Laani rajpni yäl'rnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa resesim uub ni yu' lo guedxliujre, sa'csi aguyajl'reni.

<sup>19</sup> Dxejcti batiuug anglga guiraa resesim uub ni yu' lo guedxliujre nalajznu rebenguijd, basäl'nireni neñ tanc cadro guläjreni yejcti sa'csi rdexchduxh Dios lojreni.

<sup>20</sup> Dxejcti baläjreni yejc reuub nez orii te guejdx. Biriiduxh rejn yejcti, gutiäs rejnga, bidzujñ rejnga ro'li recabaii, gujcti si'c che riu' nisro gueuu, biäjtni si'cti choñ gayuu mil metr guideb gabi cadro baläjreni yejc reuub.

## 15

*Guigajdz xangl Dios näj lult xcäl'guxhtis Dios*

<sup>1</sup> Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejgareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yäl'rdxe'ch xten Dios.

<sup>2</sup> Dxejcti bahuiä loj tej ni najc si'c te nisdoo ni najc si'c biidr nu'chmi bajl. Dxejcti galäii nisdoooga suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios.

<sup>3</sup> Cayol'reni dij xten toMoisés ni gujc xpejn Dios, cayol'zareni dij xten Xiil xten Dios. Scree najc dijga:

Sacduxh, ruscheloy guiraa redzuun ni rujn Guejblu, Dad Dios, ni rajp guiraa yäl'rnibee.

Rujn Guejblu ganax dzunsa'c, rni Guejblu ganax didxlii.

Guejblu rnibee loj guiralii reguejdx ni yu' lo guedxliuj.

<sup>4</sup> Bahuii, Dad, ¿chu laa ni di guidxiejb Guejblu ni di guilä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluiloj guiraa rextzunsa'cpac Guejblu.

<sup>5</sup> Dxejcti bahuiä xhaguibaa, bixal ro' yu' ni najc dxanro neñ guidoo, cadro yuchee guij cadro caj xleii toMoisés.

<sup>6</sup> Ro' yudxanroga birii gajdz xangl Dios ni ca' plaag te gusacsíreni reben guedxliuj. Najcwreni te ladlñ ni najc nolbäj, ni rdimbichaduxh. Dejd si'c te cinturañ lastooreni ni najc ganaxduj oor.

<sup>7</sup> Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejsa reanglga te co'p ni najc ganaxduj oor. Guidxa tejsa rexhijgga xcäl'guxhtisro Dios nani nabajñ par tejsas.

<sup>8</sup> Gudxaj guidoo ni najc yudxanroruga gujxh ni siädä xcuent xcäl'milaagwr, xcäl'rdimbichaduxh xten Dios. Rut gujcti biu' neñ yudxanroruga che gulujxli guiraa replaag ni ca' guigajdz reanglga.

## 16

*Rexhij ni guidxa xcäl'guxhtis Dios*

<sup>1</sup> Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhij ni guidxa xcäl'guxhtis Dios.

<sup>2</sup> Anglalo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

<sup>3</sup> Dxejc ni rojp anglga baslojni ni yu' neñ xhijg ni ca'ni loj nisdoo, te bejnni gubixhloj nisdooa gujçni si'c rejn xten te beñgut. Dxejcti gujt guiralii reman ni yu' lo nisdoo.

<sup>4</sup> Ni riojn anglga baslojni ni yu' neñ xhijg ni ca'ni loj regueuu nājza cadro rliejn nis. Gubixhlojreni gujçreni rejn.

<sup>5</sup> Dxejcti bejn diagā gunii angl ni rajp yälñibee lo nis räjpni:

—Huenduxh najc Guejblu Dad ni najc naj sigajc gujç Guejblu galoo, dxanduxh najc Guejblu sa'csi cayujn Guejblu yälguhxhtis redzunguijdx.

<sup>6</sup> Sa'csi laareni baxhe'reni rejn, bagu'treni rexpejnlu nājza renani gunii xtiidxlu, luxh naj badeed Guejblu rejn cayā'reni. Si'c pac nungäjļ gacreni.

<sup>7</sup> Dxejcti bejn diagā canii steeni lagajc lo piändxan, räjpni:

—Guliipacni Dad Dios ni rajp guiralii yälñibee, xcälguhxhtis Guejblu najc laaca, si'c riäjļ gacni.

<sup>8</sup> Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñibee guze'cnäjni rebejn guiboo.

<sup>9</sup> Guiraliireni gosloj cayejçreni, lacti nanladuxh, dxejc gosloj caniyajreni Dios ni rajp yälñibee loj recosga. Niluxh direni nusiechljazreni, ni claza niliä'preni xpala'n Dios.

<sup>10</sup> Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadro rñibee manroduxh. Bicäjy guideb cadro rñibee manduxhga, luxh rebejn rauya'tisreni lujdxreni sa'csi cayajçreni yälñayanduxh.

<sup>11</sup> Guniyajreni Guejb Dios ni yu' xhaguibaa sa'csi rajçreni yälñayanduxh, xcuentza rexquedxnayanreni. Luxh direni nusiechljazreni xcuent xtojļreni.

<sup>12</sup> Dxejcti ni rajc xho'p anglga cua'ni xhijgni, baslojni ni yu' neñ xhijgga loj gueuro ni laa Eufrates. Gueuga gubidzlii nisni te guc-chee te nezyuj xten reçei ni jääd nez cadro rliejn gubijdx.

<sup>13</sup> Bahuiäza birii ro' gutiatzro, nājza ro' manro, nājza ro' ni najc profet ni rusguee, birii choñ spritgijdx ni najc si'c bedz,

<sup>14</sup> sa'csi najçreni respit xten beñdxab, rujnreni milagw, senro. Rijreni loj guiraa reçei loj guedxliuj te gutie'reni guiraa bejn loj guedxliuj te gac gueñroduxh, te gucuanäjreni Gueb Dios ni rajp guiralii yälñibee che guidzujñni lo guedxliuj.

<sup>15</sup> “Narä siädxhiga'tzä si'c riääd te gubaan. Chicbaaza renani cabäjz, çagutie'çhçreni bacal lojni che guibi'ä si'c rujn nani najcw guiraa xhajbni, te na'c guiga'ni xhabäälni, jianxtujyni che guibi'ä.”

<sup>16</sup> Dxejc gutie'reni guiraa rebejnre te lajt ni laa lo didx hebre “Armagedón”.

<sup>17</sup> Dxejcti ni najc rgajdz anglga cua'ni xhijgni baslojni ni yu' neñ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rñibee Dios, räjpni:

—Agujçni, agulujxhni.

<sup>18</sup> Dxejc guyuduxh yälrdinya' nāj guziro. Gujçza te xuroduxh lo guedxliuj, te xu sa' ni gajdpac gac.

<sup>19</sup> Che gujç xuroga, biräjs guedxroduxhga, gujçni choñ la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguhxhtis guedxga.

<sup>20</sup> Li gubicaj, gunitloj reyuj ni tre' lo nisdoo, gunitlojza redajn.

<sup>21</sup> Xhaguibaali bijb te guixhobro yejç rebejn; te jga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujçni.

## 17

### *Gun Dios yälguhxhtis te gunadxab*

<sup>1</sup> Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis.

<sup>2</sup> Guiraa reçei lo guedxliujre bennäjreni gunaaga dojļ, sigajçza guiraa rebeñ guedxliuj bennäjreni gunaaga dojļ. Gusosnäjreni gunaaga bejnreni si'ctis ni rlajzreni.

<sup>3</sup> Dxejcti huiñani narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiujejçni, sojboza tzuu xca'çhni.

<sup>4</sup> Gunaaga najcw te lad moraad con xniaa, sucheduxh gunaaga oor, nāj reguisa'c, nāj perl ni sa'cduxh. Ca'ni te copro ni najc ganaxduj oor ni guidxa ganax recosgijdx, recosdxab ni bennäjni rebeñ guedxliuj.

<sup>5</sup> Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan reguadxab, xnan recosdxab ni rajc lo guedxliuj.”

<sup>6</sup> Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä.

<sup>7</sup> Dxejcti gunii anglga loä, najni:

—¿Xhicuent rdxelolju, ä? Narä siniä xhi säloj gunadxabga, näjza manroga ni sojb gajdz bitiuvejcnii näj tzuu xca'chni.

<sup>8</sup> Manroga ni bahuiilu gubajnni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtz xten yäl'nabajn xten Dios, guijtz ni guc-chee che birixtiejli guedxliuj, rebejna sidxeloduxhrene che fiireni loj manroga nani gubajn galoo, ni gunitloj, niluxh naj agubansacni.

<sup>9</sup> Ree nanab ga'pni yäl'najn. Gajdz rebitiujejcnii säloj gajdz dajn cadre sobga' gunaaga,

<sup>10</sup> sälojzareni gajdz reii. Agujc gaii reiiga ni cayajb. Tej reieiiga canibee naj. Stee reiiga churu jiääd. Luxh che jiääd lult reiiga, guxii dxej guinibeeni.

<sup>11</sup> Manro ni gubajn galoo, ni agunitloj naj, ni'c rac xhujn reii, najczani tej loj guigajdz reiei, luxh sinitlojni, sejtni par tejpas.

<sup>12</sup> Guidzoo rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yäl'ribee teb or, nalajznu guxii dxej.

<sup>13</sup> Tejtis xhigab gun reieiiga, gudeedreni xcäl'nadipreni, xcäl'ribereeni lo manroga.

<sup>14</sup> Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rribee loj guiraa redad, najcni Reii ni rribee lo guiraa reiei. Luxh renani siädnaJNI najcni agurejdxni, reni aguleni, sisiudzu'tznäJreni.

<sup>15</sup> Dxejcti najza anglga loä:

—Reni ni bahuiilu cadre sobga' gunadxabga säloj guiraa guejdx, guiraa bejn guedxliuj, guiraa bejn ni rnii garen-garenca xtiidxreni, ni siääd garen-garen reguejdx.

<sup>16</sup> Guitzoo reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälni, saJwreni bältiejxhni, suze'creni gunadxabga lo guiboo.

<sup>17</sup> Sa'csi abasniib Diosreni te gunreni tejsi xhigab, te gudeedreni xcäl'ribereeni lo manroga che guidzujnii dxej ni chale' guira'ti ni gunii Dios gac.

<sup>18</sup> Gunadxabga ni bahuiilu säloj guedxro ni rribee loj guiraa reiei loj guedxliuj.

## 18

### *Xho jiajb guedx Babilonia*

<sup>1</sup> Dxejcti bahuiä loj stee xangl Dios ni siädyäjt xhaguibaa. Siädnäni yäl'ribeduxh, xcäl'rdimbicha'ni bazanij loj guedxliujre.

<sup>2</sup> Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadre rbäjz rebejdxab, ro'c rcanzaj guiralii cuaa spritdxab, najczani xpitiäaz guiraa reman xhaguibaa ni najc mandxab, mandxuudx.

<sup>3</sup> Sa'csi guiraa rebejn guedxliuj agusojzreni xcuent dojl ni bennäJreni gunadxabga, guiraa reiei loj guedxliuj bejn dojl guläsnäJreni gunadxabga, luxh guiraa rebejn guedxliuj ni ruto' abejnreni ganduxh, agujcreni ri'cw xcuent recosdxab ni rujn gunabdxabga.

<sup>4</sup> Dxejcti biejn diägä xse' stee nani canii xhaguibaa:

—Colguirii guejdxga rexpänä, te di näj la'tu gunnäJtu gunadxabga dojl, te di tedtu trabawduxh lo replaag xtenni.

<sup>5</sup> Sa'csi yuduxh rextoljni, abidzujnreni xhaguibaali, luxh abanajza lajz Dios rextoljni.

<sup>6</sup> Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnii laani. Nejn co'p cadre badeedni gu' bejn (te trabajw ni bateedni bejn), lagajc nenga coljejn te ni najc tio'p huält maazru fuert yä gunadxabga, nalajznu tedni trabajw tio'p huält.

<sup>7</sup> Lacti gulä'p gunaaga xpala'nii, gubajnni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nii; si'cti mediidza ni bibalaznäJni mood ni gubajnni, sigajcza gac-huin lastooni sa'csi bejnii xhigab nejn lastooni: “Narä sobga'ä ree si'c te rein, te benroduxh, dina gacä biuud, ni claza gac-huin laZä.”

<sup>8</sup> Ni'cni tejsi dxej siajb yejcnii guiraa replaag xten Dios: yäl'gujt, yäl'huin lajz, näj yäl'riaan, luxh sejczeni lo balguiboo, sa'csi rribeduxh Dad Dios ni gun xcäl'guxhtisni.

<sup>9</sup> Guiraa reiei lo guedxliujre ni bennäJ gunaadxabga cosguijdx, reni cuansanäJnini, sonduxhrene, siaduxhrene che fiireni gujxh ni carii cadre cayejcni.

<sup>10</sup> Zijtru sisiujreni sa'csi rdxejbreni replaag xten gunadxabga, dxejcnii sinitlojni:

—Aii, aii, riaduxhnu guedxrore, Babilonia, guedxdipduxh gujclu, luxh chela gucheenu, ala bidzujn yäl'guxhtis yejclu.



<sup>11</sup> Rebejn ni ruto' loj guedxliuj sonduxhrene, siareni guejdxga sa'csi rutru rsiidi xhixtnereni ni ruto'reni.

<sup>12</sup> Laareni ruto'reni oor, pla't, guiraloj reguisa'c, perl, ladlin, ladmuraad, ladseed, najza guiraloj barajd yagdo, naj guiraloj cos saru, ni nacchee lai elefant, naj cos saru ni nacchee bronzo, naj guuib, naj marm,

<sup>13</sup> Najza caneel, guiraloj laj comiid, najza yalnejh, naj perfum, najza yaal, najza bin, najza se't oliib, najza arinsa'c, najza triuu, najza gon, najza rexii, najza cabaii, najza gare't, najza bejn ni ruto'reni tiejxhrene, xaimrene. Guiraa reni'c ruto'reni.

<sup>14</sup> Dxejc guniiza xse' ni canii xhaguibaali, najni:

—Ninexhsa'c ni rladuxhlu, agunitoj. Guiraa recossa'c, recossaruduxh agubicajrene lojtu, luxh di gacdiru guidxal bejn reni'c.

<sup>15</sup> Reni ruto' guiraloj recosga, nani gujcreni ri'cw xcuent guedxroga, zijtru sisiujrene sa'csi rdxejbrene trabajw ni cadeed guejdxga, sonduxhrene, sac-huinduxh lajzrene,

<sup>16</sup> sajbrene:

—Aii, aii, riaduxhnu guedxrore, naiti gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl,

<sup>17</sup> tera'tbäztis baralii recosro ni najc xhixtenni, guxhijjrene.

Guiraa recapitan xte barcw, najza guiraa remarineer, najza rebejn ni rij biaj lo rebarcw najza guiraa reni rujn dzuun lo nisdoo, gusujrene zijt,

<sup>18</sup> najza laareni cahuiireni cayäjs gujxh guejdxga, cabedxa'reni, caniireni:

—Xhi stee guejdx najc si'c najc guedxrore, ä?

<sup>19</sup> Bachajrene uyuj vejcreni sa'csi rac-huin lajzrene, binduxhrene, guredxa'reni:

—iAii! iAii! Riaduxhnu guedxro sa'csi xcuenttis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijj guedxrore.

<sup>20</sup> Guniiiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yalguxhtis xcuent ni bejn lojtu.

<sup>21</sup> Dxejcti te xangl Dios ni rajp yalmibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni.

<sup>22</sup> Diru guibi' jiejn cayel nez xladcaii lu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't.

<sup>23</sup> Diru guibi' jieñ xcälrdimbicha' te bajl ni cagusanij; diruza guibi' jiejn xse' bi'n naj dxa'p loj te sa' sa'csi rexpejñ lu ni ruto' gujcreni bejroduxh lo guedxliuj sa'csi basguezazu reben guedxliuj xcuent rextzundxablu.

<sup>24</sup> Neñ guejdxga bidxälza xtiejn renani gunii xtidx Dios, najza xtiejn rexpejn Dios, najza xtiejn guiraa reben guedxliuj ni bagu'treni.

## 19

<sup>1</sup> Che gulujx recosre, biejn diagä lascanu xse' xhidralo bejn ni canii xhaguibaa, cayäjprene: iColguiliä'p xpala'n Dios!

Xtentis Dios, xtenni najc yälrusläa lo dojl,

naj yälrdimbicha', naj yälmilagwr.

<sup>2</sup> Sa'csi xcälguxhtisni najc ganax laaca,

huentis najcni, sa'csi abejjni yalguxhtis gunadxabga nani caguxhin reben guedxliuj xcuent xcälndaxbani.

Abejn Dios yalguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

<sup>3</sup> Guibi' guniizareni:

—iColguiliä'p xpala'n Dios! Gujxh xten gunadxabga sanuutis cayä'p par tejpas.

<sup>4</sup> Guiraa regalbitajp rebenool najza guidap remanbajnga bazuxhijbrene, biabrojrene gojprene Dios ni rbej lo tron cadro rribeeni, caniireni:

—Sugacni si'c. iColguiliä'p Xpala'n Dios!

<sup>5</sup> Dxejcti nez lo tron cadro rribee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuum Dios,

guira'tu ni rajntu Dios, rebenro sigajc rebenmadolajz.

*Sa' xten Xiil xten Dios*

<sup>6</sup> Dxejcti biejn diagä ascanu xse' xhidalduxh bejn, riejnni si'c che cayajt nisro xhidajl gueu, najza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtennu ni rajp guiralii yälrnibee, ani acanibee.

<sup>7</sup> Guibalajznu, guibalazduxhnu, guiliä'pnu xpala'nni sa'csi abidzujñ dxej guchñaa Xiil xten Dios, aguzucheeza dxa'p.

<sup>8</sup> Abadeedreni ladlñ ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

<sup>9</sup> Najza anglga loä:

— Bacuaa diidxre: “Chicbaa renani bidon jiaäd lo xsa' Xiil xten Dios.”

Guniizani loä, najni:

— Rediidxre najc didx-guliipac xten Dios.

<sup>10</sup> Dxejcti bazuxhibä lojni te ganäni, dxejc laani najni loä:

— Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios ruedeed gusule' bejn xcuent Jesucrist, gusule'zareni xtidx Dios.

### *Nani bijb te cabainol*

<sup>11</sup> Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxguli. Entis laaca rujni yälguxhtis, entis laaca rucuaani che rujni guer.

<sup>12</sup> Rebalojni rbebajl, yejcni yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni.

<sup>13</sup> Najcwni te lajd ni nadiini rejn; lajni najcza Xtidx Dios.

<sup>14</sup> Guiraa resoldaad guibaa xten Dios siädnajni najcwreni ladnol, ladnaya, bijbzareni cabainol.

<sup>15</sup> Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdexchlaj lo Dios, si'c ruläjreni yec uub che rbääreni bin, si'c sujnz Dios ni rajp guiralii yälrnibee.

<sup>16</sup> Lo xhajbni näjza cuä' cujdni caj lajni: “Reii xten rerei, Dad xten redad.”

<sup>17</sup> Bahuiä loj te angl suga'ni galäi gubijdx, cabedxa'ni caniini loj guiraa reman ni rutajt xhaguibaa, räjpni:

— Coltaa, colguire' ree, te gautu xcheroduxh xten Dios;

<sup>18</sup> te gautu xpääl rerei, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbáz sigajc rebenro.

<sup>19</sup> Dxejcti bahuiä loj manro näjza loj rerei guedxliuj, abire'reni te gucuanäjreni nani rbijb cabainol näjza guiraa resoldaad xtenni.

<sup>20</sup> Biga' manroga näjza profetxii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäj xten manroga. Guiro'p redee bacuaareni guideb nabajreni nen te bal guiboduxh ni recnäj sufr.

<sup>21</sup> Dxej guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

## 20

### *Te mil ijz*

<sup>1</sup> Dxejcti bahuiä loj te xangl Dios ni siädjäjt xhaguibaa, siädnäni liäi ni ruxhal guedro ni laa gabijl. Ca'zani te cadenro.

<sup>2</sup> Anglre gunaaz gutiatzroga, ni gujc bäl galooli, ni najcza benđxab, ni laaza Satanás. Bacuaduunini te mil ijz.

<sup>3</sup> Basälñini nen gabijl, te ro'c basäunini, bacuaani liäi te na'cru gusgueeni reben guedxliuj lañ ni guiza' te mil ijz. Che guiza' reijzga, empac sibi' lasacni bale'si dxej.

<sup>4</sup> Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcni sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubansacreni loj rebenğut, gurenäjreni Jesucrist te laani gunibenäjreni te mil ijz.

<sup>5</sup> Dee najc yälrbansac galoo lo rebenğut. Niluxh stecuaa rebenğut, direni guibansac che guisa'li te mil ijz.

<sup>6</sup> Chicbaa rebejn nani guibansac ganiddoo, najcreni benđxan ni agubicaj xtojlni. Ni rojp yälgujt di guidzujñ lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mil ijz.

<sup>7</sup> Che guiza' te mił ijzga, suslasacni Satanás nen gabijl.

<sup>8</sup> Che guiriini ro'c, gusgueeni guiraa reguejdx ni tre' lo guidap laad guedxliujre. Sugsueeni reben Gog nájza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo.

<sup>9</sup> Huá'preni lo te camp cadre gulagduxh. Gudäyreni guideb gabig cadre rnibee rexpejn Dios nen guejdx nani sanälajz Dios. Per baxhal Dios bal guiboo xhaguibaali bitejbní, te guyejc guiragajcreni.

<sup>10</sup> Dxejc bacuaareni bendxab nani biädgusguee rebejn lo bal guiboo ni cayecnäj sufr; lagajc cadre yu' manro, nájza profetxhii nani basguee; lo bal guibooga susacsírenini sidejreni trabawduxh dxej-yääl par tejpas.

*Yälguxhtis ni gujc nez loj tronronol*

<sup>11</sup> Dxejcti bahuiä lo te tronronol nájza lo nani sobga' lojni te rujnni yälguxhtis. Nez lojni gunitlojli guedxliuj nájza guibaa, xhetru lajtdi bidxäjł par laareni.

<sup>12</sup> Bahuiä lo rebengut, benro sigajc benadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcäl'nabannäj Dios par tejpas. Dxejcti bejnni yälgutxhtis rebengut xcuent ni bejnreni, xcuentza rediidx nani caj loj reguijtzga.

<sup>13</sup> Guiranejz biääd rebengut: nisdoo batzuug rebengut ni yu' lojni, gabijl nájza yälgujt batzuugza rebengut ni yu' lojreni. Dxejcti bejn Dios yälguxhtis tejpgareni xcuent ni bejnreni.

<sup>14</sup> Dxejcti bacuaani yälgujt nájza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojpn.

<sup>15</sup> Guiraa bejn ni di lajni nidxäjł lo xlibr yäl'nabajn bacuaazani reni'c lo bajlga.

## 21

*Xhaguibacoob nájza guedxliucoob*

<sup>1</sup> Dxejcti bahuiä te xhaguibacoob nájza te guedxliucoob, sa'csi agunitloj guibabiejw, nájza guedxliubiejw, luxh xhettiruza nisdoo.

<sup>2</sup> Narä Juan, bahuiä lo guedx Jerusaléncoob, guedxdxan, siädjiäjtni xhaguibaali cadre rnibee Dios. Sucheduxhni si'c rsiuchee te dxa'p nani agojł guchnaa.

<sup>3</sup> Dxejcti bejn diagä te xse' te ni canii dipduxh, ascanu lo tron cadre rnibee Diosli carii se'ga, scree caniini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejnni. Sibannäj lagajc Gueb Diosreni.

<sup>4</sup> Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jajn, sa'csi guiraa redee ni guyu' galoo agunitloj.

<sup>5</sup> Dxejcti ni sobga' lo tron cadre rnibeeni guniini, najni loä:

—Bahuii, najrä guscobä gira'ti.

Guniizani loä:

—Bacuaa rediidxre, sa'csi guliipacreni, sajč chalilajz bejn rediidxre.

<sup>6</sup> Dxejcti najzani loä:

—Agujcni. Narä nacä A nájza Z, ni säloj nani rbaxtiej nájza nani ruluux. Lo chutis ni cayojł, sudedxliä'ä nis yäni, nalajznu yäl'nabajn par tejpas.

<sup>7</sup> Chutis nani gun gaan lo dojl, sica'zani guiraa dee si'c yäl'nasa'c, luxh narä sacä Xtiosni, laani sacni xi'nä.

<sup>8</sup> Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rsguee rniireni didxhii, guiragajc reni'c sij lo nisdoo ni najc ganax bal guiboo, cadre rejč guiboo nájza sufr par tejpas. Dee ni najc yälgujt ni rojpn.

*Guejdx Jerusaléncoob*

<sup>9</sup> Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

<sup>10</sup> Dxejcti bejnni gunixcalä, huinäni narä lo te danro ni jiaduxh, ro'c baluini loä te guedxro, te guedxdxan ni laa Jerusalén, luxh xhaguibaali siädjiäjtni nez lo Dios.

<sup>11</sup> Guejdxga rdimbicha' guideb xcäl'rdimbicha' Dios. Luxh yäl'rdimbicha'ga najc si'c najc te guisacduxh ni laa jaspe, rdimbicha'zani si'c biidr.

<sup>12</sup> Guideb gabi guejdxga dejd te paderro cadre caj tzubitio'p xportonroni. Te angl xten Dios suga' ro' tejsa portonga. Loj tejsa portonga, caj laj tej retzubitio'p cuaa xten rexpejn Israel.

<sup>13</sup> Chon portonga caj nez cadre rliejn gubijdx, yu'za chon portonga nez ladbee, yu'za chon portonga nez ladbäjw, yu'za chon portonga cadre räaz gubijdx.

<sup>14</sup> Yu' tzubutio'p guiro lo cimient xten guejdxga. Lo tejga reguijga caj laj tej retzubutio'p apost xten Xiil xten Dios.

<sup>15</sup> Angl ni caninäjä narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga.

<sup>16</sup> Guejdxga najc cuadraad: sigajc ni sioolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil' tio'p gayuu kilómetros tejga laad. Sigajc sioolni, sigajcza gulajgni, sigajcza jiaani.

<sup>17</sup> Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäjza anglga.

<sup>18</sup> Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn.

<sup>19</sup> Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda;

<sup>20</sup> ni rgaiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista.

<sup>21</sup> Guitzubitio'p portonga najc tzubutio'p perl. Tejga portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

<sup>22</sup> Dina nuhuiä nicla tej guidoo nen' guejdxga, sa'csi suga' Gueb Dios ni rajp guiralii yäl'rnibeduxh, näjza Xiil xten Dios. Laani najc xquidoo guejdxga.

<sup>23</sup> Guejdxga dini guiquiin gusanij nicla gubijdx niclaza bäii, sa'csi lagajc xcäl'rdimbicha' Dios näjza Xiil xten Dios ruzanij ro'c.

<sup>24</sup> Rebejn guedxliuj ni rililajz xtidx Dios sajc sareni lo bianijga, luxh rereii ni siäd lo guedxliujre siädnäzarenii xcäl'rnibeereni, näj xpala'nreni ro'c.

<sup>25</sup> Di ro' reportanga jiäuu rdxej, luxh ro'c xhettiza yääl.

<sup>26</sup> Ro'c chanäzarenii yäl'nasa'c näj xpala'n reguejdxro ni yu' lo guedxliuj.

<sup>27</sup> Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

## 22

<sup>1</sup> Dxejc baluii anglga te gueuro loä, cadre yu' nisyä xten yäl'nabajn. Rdimbicha'ni si'c te guihuajn, luxh carini lo tron cadre rnibee Dios näjza Xiil xten Dios,

<sup>2</sup> rdejdnii loj nezyujro ni rdejgd galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubutio'p cuaa ninejxh nen' tebijz, tejga cuaani tejga bäii; luxh rebalajg ni rcaj lo reyajgga najc te gusajcni reben' guedxliuj.

<sup>3</sup> Dxejcti ro'c xhettiru yäl'rdzudbe, sa'csi ro'c yu' tron cadre rnibee Dios näjza Xiil xten Dios, ruzuxhijbza rexejnni, rajnreni laareni.

<sup>4</sup> Suhuireni lojpacni si'cpac ni najcni, sicajza laj Dios lo cuajreni.

<sup>5</sup> Ro'c diru yääl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjreni par tejpas.

*Siäddzungajxh dxej ni guibisac Jesucrist*

<sup>6</sup> Dxejc naj anglga loä:

—Guliipac najc rediidxga, sajcpac chaliälzurenii. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxha'ni xanglni te baluilojni loj rexejnni guira'ti nani agojl'gac.

<sup>7</sup> —Sajngalu gan, sojpb jiälä. ¡Chicbaa nani riu rediidx ni caj lo librré!

<sup>8</sup> Luxh narä, Juan, bejn diägä rediidxre, bahuiäza recosre. Luxh che bahuiä, che biejn diägä bazuxhibä te ganä xangl Dios nani baluii loä guiraa redee.

<sup>9</sup> Luxh laani najni loä:

—Na'c gunlu si'c, sa'csi narä runä xtzuunni sigajc rujn'luni, sigajc rujn rebejn ni gunii xtidx Dios agujc xchero, sigajc rujn rebejn ni rusoo rediidx ni caj lo librré. Bazuxhijb loj Diostis.

<sup>10</sup> Dxejc najni loä:

—Na'c gusäuuu guijtz cadre caj rediidxre xcuent nani churu gac, sa'csi asiäddzungajxh redxej ni chale'reni.

<sup>11</sup> Luxh laj ni guidzujn dxejga, basaan suchanuu gun dojl' renani cayungajc dojl'; basaan suchanuu gun dzungujdx renani cayungajc dzungujdx. Per renani cayujn dzunsa'c, chanuu gunreni dzunsa'c, nani najcza ben'naya, si'cza chanuu gacni ben'naya.

<sup>12</sup> Gunajtiro:

—Sojpb jiälä, luxh siädnääh xhi gunidxä loj tejgatu si'c ni riäl' xca'tu xcuent dzuun ni bejntu.

<sup>13</sup> Narä Jesucrist nacä si'c najcza A näjza Z, ni säloj nani rbäxteij näjza nani ruluux.

<sup>14</sup> Chicbaa renani riu xtidx Dios, najcreni si'c ni rguuib xhajbreni te sajc jiu'reni nez porton xten guejdxga, sajcza gauni ninejxh ni caj lo yajg xten yäl'nabajn par tejpas.

<sup>15</sup> Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchagljaz rni didx-xhii te gusgueeni.

<sup>16</sup> Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä neñ reguidoo loj rexpenä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

<sup>17</sup> Sprit Dxaan xten Dios näjza chääl Xiil canii, najreni:

—Col'taa.

Suguiniiza nani riejn diajgreni diidxre, gäbreni:

—Col'taa.

Sujiäädza chutis ni cayojl, sujiädya'xlia'ni nis yäl'nabajn par tejpas.

<sup>18</sup> Sa'csi narä rniliä'ppac lojtu, guiraatu ni riejn diajgtu rediidx ni caj lo guijtze xcuent recos ni churu gac, palga yu' chu tejtu gutajlru diidx ni caj guijtze, suteedru Dios bejnga replaag yejcnii loj ni caj lo guijtze.

<sup>19</sup> Palga yu' chu gudzucaj loj rediidx ni caj lo guijtze, sudzucajza Dios nani nica'ni lo yajg xten yäl'nabajn par tejpas, näjza lo guedx Dxaan, ni caj xcuentreni lo guijtze.

<sup>20</sup> Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

<sup>21</sup> Sujiääd xcäl'racnäjb Dad Jesucrist lo guiraatu. Sugacni si'c.